



唐 姚思廉 撰

書 局

中

卷第

至卷一六(紀

傳)

册

《梁書》《陳書》出版説明

梁書五十六卷,陳書三十六卷,分別記載了梁陳兩個封建割據 政權 的歷 史,是六

世紀五十年代到七世紀三十年代期間,姚察、姚思廉父子相繼編撰的。

梁陳是繼東晉宋齊,先後在江南建立的兩個封建割據王朝。 梁自蕭衍(梁武帝)建國

建國到陳叔寶(陳後主)時被隋所滅,歷時三十三年(五五七到五八九)。 到蕭方智(梁敬帝)時滅亡,首尾五十六年(公元五〇二到五五七)。陳自陳霸先(陳武帝)

鼎足三分的形勢。陳建立後,北齊和北周已經代替了東、西魏,仍然是三分的局面。 梁代前期,是同割據北方的北魏對立的。北魏分裂成東魏、西魏後,梁和東、西魏成爲

紀七、八十年代,北周和隋相繼統一了北方,六世紀末隋滅陳,結束了南北的分裂。

命編撰,許亨寫成梁史五十八卷。 梁代的歷史,曾由沈約、周興嗣、裴子野和杜之偉、顧野王、許亨等在梁陳兩代先後受 梁代謝吴又有梁書四十九卷,陳代何之元和隋代劉

璠各成梁典三十卷。陳代的歷史,傅縡、顧野王都曾受命 編撰, 「國史紀傳二百卷,未就而卒」。陸瓊還著有陳書四十二卷。以上這些著作, 陳書顧野王傳説他有 姚氏父子修

出 版

史時可能參考過,但都没有流傳下來。

梁陳兩朝史,没有成書就死了。 姚察 在陳初曾參與梁史的編撰。 姚思廉在隋唐兩次受命繼續完成這兩朝史,到六三六年 人隋後, 又在公元五八九年(隋開皇九年)受命編撰

(唐貞觀十年)才寫成了梁書和陳書。

弘文館學士,後來做到散騎常侍。死於六三七年(唐貞觀十一年)。 在隋代做秘書丞。死於公元六〇六年(隋大業二年)。姚思廉字簡之,在唐任著作郎、 姚察字伯審,吴興武康(在今浙江德清縣西)人。在陳代任秘書監、領大著作、吏部尚

紀部分和陳書皇后傳後面都有魏徵的史論。他在一些具體論述上,看法有和姚氏父子 姚思廉編撰梁陳史的時候,魏徵是梁陳齊周隋五史的監修官。所以梁書陳書本

相出人的地方。

史,記載了它們的傳説、風俗、物産,以及我國人民和海南各地人民經濟文化交流的情況。 外關係方面,也都保存了一些資料。梁書諸夷傳比較系統地敍述了海南一些國家的歷 的記載。 般説來, 梁陳 除政治和軍事問題以外,這兩部書在哲學史、文學史、宗教史、民族關係、對 兩代的早期歷史著作都已失傳,因此梁書和陳書就成爲現存的比較原始 梁書的記載要比陳書豐富些,梁書的文筆也比陳書要好些。梁書記公元

較生動的。

我們利用了張元濟、張森楷 目,都是我們重編的 衲本爲底本, 九等)的末尾附有一兩行小字,這是宋人曾鞏等所作校語, 本及明南監本、北監本、汲古閣本,清武英殿本、金陵書局本互校, 册府元龜、 我們現在對這兩部書加以標點校勘。梁書, 取校的本子和參考書與梁書基本上相同。 資治通鑑和資治通鑑考異的有關 兩種校勘記的稿本及錢大昕廿二史考異等書。 用商務印書館據宋大字本影印 部分。 陳書某些卷(如卷一、卷三、卷 在汲取前人校勘成果方面, 是百衲本原有的。 擇善而從, 還參考了南 兩部書的總 陳書以百 的百 衲

錯誤,希望讀者批評指正。 梁書由盧振華同志點校, 趙守儼同志做了編輯整理。 陳書由張維華同志點校。 缺點

中華書局編輯部

梁書目錄

梁書目錄	敬帝 方智 四三	卷六 本紀第六	元帝 釋 一三	卷五 本紀第五	簡文帝 綱 10三	卷四 本紀第四	武帝下	卷三 本紀第三	武帝中	卷二 本紀第二	武帝 蕭衍 上一	卷一 本紀第一
	昭明太子 統 空	卷八 列傳第二	世祖徐妃	高祖阮脩容	高祖丁貴嬪 一六0	ダ騫 一兲	太宗王皇后 一兲	高祖郗皇后 一 三	父 穆之⋯⋯⋯⋯⋯⋯⋯ 一 一	太祖張皇后 一弄	皇后	卷七 列傳第一

梁書目錄	卷十八 列傳第十二	張齊 六一	馬仙琕	王珍國 二七	卷十七 列傳第十一	王 瑩 • • • • • • • • • • • • • • • • • •	張稷・・・・・・・・・・・・・・・・・・・・・・・・・・・・・・・・・・	王 亮 • • • • • • • • • • • • • • • • • •	卷十六 列傳第十	弟子 覧 二六五	謝朏 云	卷十五 列傳第九	任昉	江淹 一四	卷十四 列傳第八 ————————————————————————————————————
111.	王瞻	卷二十一 列傳第十五	褚緭⋯⋯⋯⋯⋯⋯⋯ 三二	陳伯之 三一	劉季連	卷二十 列傳第十四	子法才	樂調	劉坦・・・・・・・・・・・・・・・・・・・・・・・ 1100	宗夬••••• 二九	卷十九 列傳第十三	目義之 二九三	康絢 二九0	馮道根	張 惠 紹···································

罕

留の記

四

四0

業弟 藻 •••••••

兲

梁書目錄	子顯子 愷 五三 _	子範弟子顯 ************** 五一	確 *************	子範子 滂 •••••• 三一	子恪弟 子範	蕭子恪•••••• 50七	卷三十五 列傳第二十九	縮・・・・・・・・・・・・・・・・・・・・・・・・・・・・・・・・・・・・	弟 纘••••••••••••••••••••••••••••••••••••	張緬	卷三十四 列傳第二十八	王筠	子 誌 四八四	劉孝綽 四九	張率 四岩
七	元法僧	卷三十九 列傳第三十三	賀琛 500	朱异	卷三十八 列傳第三十二	•	謝舉	卷三十七 列傳第三十一		江革·····	孔休源	卷三十六 列傳第三十	子雲弟 子暉 ************* 三六	子雲子 特 •••••• 三五	子顯弟子雲 •••••••• 五三

劉 顯····································	孫蓋	到漑	司馬褧	卷四十 列傳第三十四	羊鴉仁	子 鵙	羊侃	楊華	王神念	元願達	子 貞	元樹	景仲************************************	子 景隆	1 1
五〇	五六九	芸	五六七		芸兰	五六		蓋	五 六	臺	蓋	蓋	蓋	蓋	
第 篇	劉孺	褚球	從父兄 洽	蕭介·····	褚翔	王承	- 宋	劉敦	子 展	王規:	卷四十一 列傳第三十五	許懋	弟之亨・・・・・・・・・・・・・・・・・・・・・・・・・・・・・・・・・・・・	劉之遴・・・・・・・・・・・・・・・・・・・・・・・・・・・・・・・・・・・・	
五二	弄一	五0	吾 元	吾七		吾	吾四	吾四	吾	兲		型岩	五四四	型二	

梁書目錄	弟子四	江子一	章粲	卷四十三 列傳第三十七	傅岐	弟厥	臧盾	卷四十二 列傳第三十六	蕭幾	殷芸	孝先	孝威	弟孝勝	劉潛	輝
		公	公		<u> </u>	<u> </u>	五九九		五六六	五九六	五九五	五九五	五九五	五九四	五九三
九	武寧王大威	西陽王大鈞	新興王大莊	瀏陽公大雅	安陸王大春	南郡王大連	南海王大臨	尋陽王大心	太宗十一王	卷四十四 列傳第三十八	兄 仲禮	柳敬禮 六	沈浚六	張嵊•••••• 六(子五
	二二七	二七七	六七	六六	六六	六 五	六 五	六三			二	二	二0	公	公允

弟幼安************************************	兄岸	杜崱	徐文盛	胡僧祐	卷四十六 列傳第四十	子 顗 • • • • • • • • • • • • • • • • • •	王僧辯:************************************	卷四十五 列傳第三十九	貞惠世子方諸	忠壯世子方等	世祖二子	綏建王大擊	義安王大昕	建平王大球************************************	
盗	盗	益	六四〇			尝	空		苔	二 九		六	六八	二七	
	. }										去	卷四	π Δ.		
何炯	劉曇靜 六四	韓懷明・・・・・・・・・・・・・・・・・・・・・・・・・・・・・ 至三	甄恬	吉務	庾黔婁	荀匠 六四九	沈崇傃	宛陵女子	徐普濟 六四八	滕曇恭 六四八	孝行	四十七 列傳第四十一	陰子春	兄子 含龍	

梁書目錄	卷五十三 列傳第四十七	蕭眎素 七六二	陶季直	顧憲之	止足	卷五十二 列傳第四十六	庾承先·······	張孝秀	子 曼倩 运二	庾詵	劉齡 也	劉 新 七四七	范元琰	劉慧斐 七四五	沈顗・・・・・・・・・・・・・・・・・・・・・・・・・・・・・・・・・・・・・
1 111	盤盤 七九二	扶南 七七	林邑	海南諸國	諸夷	卷五十四 列傳第四十八	何遠 七七	伏暅	從子廉 2中四	孫謙 七二	丘仲学 470	范述曾	沈瑀	庾蓽	良吏

四

西北諸戎	扶桑 八0八	大漢 八〇七	文身 八〇七	倭 八〇六	新羅・・・・・・・・・・・・・・・・・・・・・・・・・・・・・・・ 八0五	百濟・・・・・・・・・・・・・・・・・・・・・・・ 〇四	高句驪 八〇一	東夷	師子・・・・・・・・・・・・・・・・・・・・・・・・・・・・ 八00	中天竺	婆利	狼牙脩	干陁利	丹丹 七四
武興 八六	鄧至	岩昌	波斯 八五	末	渴盤陁 八四	于闐 八一	龜茲 八一	白題 八三	胡蜜丹 八三	呵跋檀	周古柯 八二	滑	高昌 八一	河南 八0

河東王譽	臨賀王正德************************************	武陵王紀	豫章王綜•••••••••••• 八三	卷五十五 列傳第四十九	芮芮 八七	
	會鞏梁書目錄序 八元		王偉	侯景	卷五十六 列傳第五十	

梁書卷

本紀第

武帝上

丹陽尹,贈鎭北將軍。 考諱順之,齊高帝族弟也。 苞,苞生博士周,周生蛇丘長矯,矯生州從事逵,逵生孝廉休,休生廣陵郡丞豹,豹生太中大 夫裔,裔生淮陰令整,整生濟陰太守饍,

籍生州治中副子,副子生南臺治書道賜。 育,育生御史中丞紹,紹生光祿勳閎,閎生濟陰太守闡,闡生吳郡太守冰,三冰生育,育生御史中丞紹,紹生光祿勳閎,閎生濟陰太守闡,闡生吳郡太守冰,三冰生 延, 延生侍中彪,彪生公府掾章,章生皓,皓生仰,仰生太子太傅望之,曰望之生光禄 髙 祖 武皇帝諱衍,字叔達,小字練兒,南蘭陵中都里人,漢相國何之後也。 參預佐命,封臨湘縣侯。 歷官侍中,衞尉,太子詹事,領軍將軍, 何生酇定侯 道賜生皇 中山 大夫 相

本紀第一 武帝上

高祖以宋孝武大明八年甲辰歲生于秣陵縣同夏里三橋宅。

生而有奇異,兩骻駢骨,頂

上 隆 起,有文在右手曰「武」。 帝及長,博學多通,好籌略,有文武才幹,時流名輩咸推許焉。

所居室常若雲氣,人或過者,體輒肅然。

預蕭 初, 旭。 約、謝朓、 憲 明帝輔 毎謂 起家 諶等定策 此 蕭郎 所親 王融 巴陵王南 政, 起高祖為寧朔將 曰:「宰制 、蕭琛、范雲、任昉、陸倕等並 勳,封建陽 三十內當作侍中,出此 中郎法曹行參軍,遷衞將軍王儉東閤祭酒。 天下,必在此 縣男,邑三百戶 軍,鎭壽春。 則貴不可言。」竟陵王子良開 人。」累遷隨王鎭西 遊焉,號 服 闋,除太子庶子、 日 1八友。 諮議參軍,尋 融俊 儉一見深相器異,謂廬 給 西邸, 爽, 事 黄門侍郎, 以皇考艱 識 鑒過 招 文 學, 人, 去 入直 尤敬 高 職 祖 一殿省。 隆昌 異 江 與 沈 何

晉安 出 祖。 爲援。[]] 軍 王 攻 爾 建 武 魏 司 夜 馬、淮 距 栅 便 二年,魏遣 高 進,去魏軍數 義陽百餘里, 陵 祖 太 帥 將劉 守。 所領 自外 里,逕上賢首 還爲太子 昶、王肅 衆以魏軍 進戰。 帥衆 中 盛,越趄莫敢前 魏軍 庶子,領羽 Щ 旅司 表裏受敵, 魏軍不 州,以高祖爲冠軍將軍、軍主,隷江州 林 測 監 多少, 乃棄 高祖 頃之,出 重 請 未敢逼。 重 爲先啓, 退走。 鎭 石頭 黎明, 廣 軍 卽 ·罷, 分麾下 城內見援至, 以高 祖 精 刺 爲右 史 兵配 王 廣 軍 因

總督諸軍,高祖 四 年 魏 帝 及雍州刺史曹虎等並受節度。四明年三月,慧景與高祖進行鄧城, 自 率 大衆 寇 雍州 明帝令高 祖 赴援。 十月,至襄陽,詔 又遣左民 尚書崔 魏主帥 一慧景

高 + 祖 萬餘騎奄至。 獨 帥 衆 距 戰,殺數十百 慧景失色,欲引退,高祖固止之,不從,乃狼狽自拔。 人,魏騎稍却 因 得結陣斷後, 至夕得下船。 魏騎乘之,於是大敗。 慧景軍死傷略盡,

惟高祖全師而歸。俄以高祖行雍州府事。

刺史。 崩。 諾,委政朝臣。 足可 當今避禍,惟有此地。勤行仁義,可坐作西伯。 性甚猜狹,徒取亂機。所可當軸,惟有江、劉而已。 爭權,遂內難九興,外寇三作。今六貴爭權,人握王憲,制主畫敕,各欲專威,睚眦 將軍蕭坦之、侍中江祀、衞尉劉暄更直內省,分日帖敕。 相屠滅。 多門,亂其階矣。詩云:『一國三公,吾誰適從?』況今有六,而可得乎!嫌隙若成,方相誅滅, 待。 今得守外藩,幸圖身計,智者見機,不俟終日。及今猜防未生,宜召諸弟以時聚集。 時高祖 七 月,仍授持節、都督雍梁南北秦四州郢州之竟陵司州之隨郡諸軍事、輔國將軍、雍州 其月,明帝崩,東昏卽位,揚州刺史始安王遙光、尚書令徐孝嗣、尚書右僕射江 蕭坦之胸懷猜忌,動言相傷,徐孝嗣才非柱石,聽人穿鼻,若隙開釁起,必中外土 且嗣主在東宮本無令譽,媒近左右,蜂目忍人,一總萬機,恣其所欲,豈肯虛坐主 長兄懿罷益州還,仍行郢州事,乃使弘策詣郢,陳計於懿曰:「昔晉惠庸主,諸王 積相嫌貳,必大誅戮。 始安欲爲趙倫,形迹已見,蹇人上天,信無 但諸弟在都,恐罹世 施怯 而無斷,暄弱而不才,折鼎覆餗,翹 高祖聞之,謂從舅張弘策曰 一息,須與益州圖之耳。」 **沁此理**。 成憾, 1...「政出 施、右 且 理

多伐竹木,沉 下。 也。」懿聞之變色,心弗之許。 相 防 世 疑,拔足 治 則 竭 無路。 於檀溪,密爲舟裝之備。 誠 本朝, 郢州控帶荆、湘、西注漢、沔,雍州士馬, 時 亂則 弘策還,高祖 爲 國翦暴,可得與 時所住齋常有五色回轉, 乃啓迎弟偉及儋,是歲至襄陽。 、時進退,此蓋萬全之策。 呼吸數萬, 狀若蟠龍,其上紫氣騰起, 虎际 如 於是潛造器械 不早圖 其間, 悔 以觀 無及

形

如

繖

蓋,

望者莫不

異焉

瞻等謀之。 餘匹,船三千艘,出檀溪竹木裝艦 舉,公侯將相,良在茲日,各盡勳 昏主惡稔,窮虐極暴,誅戮朝賢,罕有遺育, 永元 二年冬,懿被害信至,高祖密召長史王茂、中兵呂僧珍、別駕柳慶遠、功曹史吉士 旣定,以十一月乙巳召僚佐集於 効, 我不食言。」是日建牙。 液 廳 事 生民塗炭, ,謂曰:「昔武王會孟津,皆 天命殛之。 於是收集 卿等同 得甲士萬餘 心 疾 紂 恶, 可 伐 共 興義

高祖 首、諸君試觀何如。」及山陽至巴陵,高祖復令天虎齎書與穎冑兄弟。 夏,韓、白重出,不能爲計。況以無算之昏主,役御 荆 州 知其 先是,東昏以劉 本畏襄陽 謀,乃遣參軍王天虎、龐慶國詣 人,加脣亡齒寒,自有傷弦之急, Щ 陽爲巴西太守,至 江 配精 陵, 遍 兵三千,使過 寧不 ガ 與 應敕 州 闇 府書。 同邪? 之徒 哉? 荆州就行事蕭 及 我若 Щ 我能使 陽 「總荆、 西 去後, Ē, Щ 雍之兵, 高 穎冑以 陽 高祖謂張弘策 至荆 祖 謂 襲襄陽 諸 掃定東 便 將日 刨

蘭艾同焚;若功業克建,威聾四海,號令天下,誰敢不從! 豈是碌碌受人處分? 待至石城 當 諸侯,而節下前去爲人所使,此豈歲寒之計。」弘策言之,高祖 年二月,遽便進兵,恐非廟算。」高祖答曰:「今坐甲十萬,糧用 十人馳入,穎冑伏甲斬之,送首高祖。 事事相接,猶恐疑怠;若頓兵十旬,必生悔吝。 行 王茂又私於張弘策曰:「我奉事節下,義無進退;然今者以南康置人手中, 義 人皆有書。 曰:「夫用兵之道,攻心爲上,攻城次之,心戰爲上,兵戰次之,今日是也。 生疑 而 州矣。」山陽至江安,聞之,果疑不上。 面 事 不得相聞,不容妄有所道。 ·曉王茂、曹景宗也。」於沔南立新野郡,以集新附。 動,天時人謀,有何不利。處分已定,安可中息。昔武王伐尉,行逆太歲, 竟陵太守曹景宗遣杜思沖勸高祖迎南康王都襄陽,待正尊號,然後 山陽惑於衆口,判相嫌 今段乘驛甚急, 止有兩封與行事兄弟, 云『天虎口具』, 貮 天虎 則行事進退無以 足行事 仍 以南康王尊號之議來告,且曰:「時月未 穎冑 心膂,彼聞 大懼, 童兒立異, 便大事不 乃斬天虎,送首山陽。 自明,必漏吾謀內。[+]是馳兩空函定 必謂行事 自竭,況所 曰「若使前 與天虎共隱其 成。 及問 藉義 今太白 天虎 近遣天虎往州府, 途大事不 進軍,高 彼便挾天子以令 山陽信之,將數 心,一 而 八事、「公」 復須待年月 出 利,當 口 祖 西方,仗 無所 捷,故自 時驍銳, 則人 須來 說,

三年二月,公 南康王爲相國,以高祖爲征東將軍,給鼓吹一部。 戊申,高祖發襄陽。

本 紀

第

武

帝上

留弟偉守襄陽城,總州府事,弟憺守壘城,府司馬莊丘黑守樊城,功曹史吉士詢兼長史,白

馬戍主黃嗣祖兼司馬,都令杜永兼別駕,小府錄事郭儼知轉漕。 移檄京邑日

昌邑悖德,孝宣聿興,海西亂政,簡文升歷,並拓緒開基,紹隆寶命, 夫道不常夷,時無永化,險泰相沿,晦明非一,皆屯困 而後亨,資多難以啓聖。故 理驗前經,事昭

往策。

受遺託,同參顧命,送往事居,俱竭心力。宜其慶溢當年,祚隆後裔;而一朝齏粉,孩稚 氏之尊,盡忠奉國;江僕射外戚之重,竭誠事上;蕭領軍葭莩之宗,志存柱石;徐司空、 沈僕射搢紳冠冕,人望攸歸。 豎,亂惑妖孽。 子不遑哭。劫掠剽虜,以日繼夜。晝伏宵遊,會無休息。淫酗醟肆,酣歌壚邸。 哀色,歡娛遊宴,有過平常,奇服異衣,更極誇麗。至於選采妃嬪,姊妹無別,招侍巾櫛, 爲歡笑。 姑姪莫辨,掖庭有稗販之名,姬姜被干殳之服。至乃形體宣露,褻衣顚倒,斬斮其間,以 日。猜忌凶毒,觸途而著,暴戾昏荒,與事而發。自大行告漸,喜容前見,梓宮在殯,靦無 獨夫擾亂天常,毀棄君德,姦回淫縱,歲月滋甚。 騁肆淫放,驅屏郊邑。老弱波流,士女塗炭。行產盈路,輿尸竟道,母不及抱, 梅蟲兒、茹法珍臧獲厮小,專制威柄,誅翦忠良,屠滅卿宰。 或渭陽餘感,或勳庸允穆,或誠著艱難,或劬勞王室,並 挺虐於鬌翦之年,植險於髫丱之 劉鎭軍舅 寵恣愚

道禍 **遄及**, 影從, 潛圖 暴后,未有若斯之甚者也。 酷,盡寓縣之竹,未足紀其過,窮山澤之兔,不能書其罪。 功出桓、文,勳超伊、呂;而勞謙省己,事昭心迹,功遂身退,不祈榮滿。 、飛泉,孤城獨振。 密 淫,罪不容戮。 崔慧景奇鋒迅駭,兵交象魏,武力喪魂,〔云〕義夫奪膽,投名送款,比屋交馳,負糧 預稟精靈,孰不寃痛!而羣孽放命,蜂蠆懷毒,乃遣劉山陽驅扇逋逃,招逼亡命, 愚智競赴。復誓旅江甸,奮不顧身,獎厲義徒,電掩强敵,剋殲大憝,以固皇基 構,規見掩襲。 人神怨結,行路嗟憤。蕭令君忠公幹伐,誠貫幽顯。 至於悖禮違敎,傷化虐人,射天彈路,比之猶善,刳胎斮脛,方之非 及中流逆命,憑陵京邑,謀猷禁省,指授羣帥,剋翦鯨鯢,清我王 蕭右軍、夏侯征虜忠斷夙舉,義形於色,奇謀宏振,應手 自草昧以來,圖牒所記,昏君 往年寇賊遊魂,南鄭危逼, 敦賞未聞,禍酷 梟懸,天

足無 楚,三靈再 藩,化流 觀 鼠傾覆 地。 旣 ! 人神乏主,宗稷阽危,海內沸騰,氓庶板蕩,百姓懍懍,如崩厥角,蒼生喁喁,投 西夏,謳 至尊體自高 幕府荷眷前朝,義均休戚,上懷委付之重,下惟在原之痛, 说,九縣更新,升平之運,此焉復始,康哉之盛,在乎茲日。 歌 攸奉,萬有 宗,特鍾 慈寵,明並 樂推。右軍 ·蕭穎冑、征虜將軍夏侯詳並 日月,粹昭靈神,祥啓元龜,符驗當 豈可臥薪引 同 然帝德雖彰,區 心 翼戴,即宮舊 **一壁,作鎭陝** 火,坐

建業 擁荆 朱旗 鶩。 中郎 字未 新 益 郞 二十軍主,長槊五萬,驥騄爲羣,鶚視爭先,龍驤並驅,步出橫江,直指朱雀。長史、冠 城 諮 軍 州 、襄陽 南 絳 幕 太守崔 刺 議 定,元惡未黜,天邑猶梗。 諮 黜放 寓, 府 史 議 参軍 之衆,督四方之師,宣讚中 劉 參 總 太守王茂等三十軍主,戈船七萬,乘流電激,推鋒扼險,〔10〕斜趣白城。 《愚狡》: 方舟千里, 駱驛係進。 軍、軍 丁軍 率 僧季,並肅 季 連、 貔 主蕭偉等三十九軍主,巨艦迅檝,衝波噎水,旗鼓八萬,焱集石頭。 貅, 均禮海昏,廓淸神甸,掃定京宇。 梁州刺 主蕭儋等四十二軍主,熊羆之士,甲楯十萬,沿波馳艓, 驍勇百萬, 奉 史柳惔、司州刺 一明韶, 仰稟宸規,率前啓路。 繕甲燕弧,屯兵冀馬,摐金沸地,鳴鞞聒天,霜 襲行天罰。 權 蕭右 奉衞輿輦。 軍 史王僧景、魏興太守裴師仁、上庸 許謨上才, 蜀、漢 **旍麾所指,威稜無外,龍驤** 果銳,沿流 譬猶崩泰山而 兼資文武, 即日遣冠軍、竟陵內史曹景宗等 而 下,淮、汝 英略峻遠,執 壓蟻壤, 勁 決懸河 掩據新亭。 虎 太守韋叡 勇,望波遄 步,並: 鋒 鈞匡世 曜 而 南 日 集 南 中 軍

受制 大衆一臨,刑茲罔赦,所謂火烈高原,芝蘭同泯。 **M** 今資斧所 威。 若能因變 加 一,止梅 立 蟲兒、茹法 马, 轉禍 爲 珍而 福 が並誓河 已。 諸君咸世冑羽儀, 岳 一,永紆 勉求多福, 青紫。 無貽後悔。 書勳 若執 王府, 迷不 ·悟,距 賞罰之科,有 皆俛眉 逆王 姦黨, 前,

熛燼

,豈有不殄滅者哉

如白水。

信使。 議欲 之耳 軍 邀擊,大破 諸 固 下 口 於 守, ,輕兵濟江,逼郢城。 軍 夏首。 。」諸 濟 併 高 為郢 陵、湘中之兵, 江 軍 祖 圍郢, 將皆 · 與 至竟陵,命長史王茂與太守曹景宗爲前軍,中兵參軍張法安守寬陵城。 城 之,皆棄甲奔走。 高祖 荆 人掎角。 曰「善」。乃命 州 築漢口 分兵以襲西陽、武昌。 軍 連旗 相 若悉衆前進,賊 會,以逼 城以守魯山, 其刺史張沖置陣據石橋浦、義師與戰不利、軍主朱僧起死之。 繼至。 王茂、曹景宗帥 荆州 · 賊壘。 糧食旣足, 遣冠軍 命水軍 必絕我軍後, 吾自後 高祖 將 衆 士衆 軍 曰:「漢 主張惠紹、 鄧元 濟岸 圍魯山, 稍多,圍 起、軍 進 口不闊一里,箭道 朝 頓 以通沔、漢。 主王王 九里。 守 朱思遠等遊遏江 爲阻, 兩城,不攻自拔,天下之事,臥 世 興、田 其日, 則 悔無所及。 鄖城、竟陵間 安等數千人,行三會大 張沖 交至,房僧寄以重 中,絕 出 軍 今欲遣王、曹 迎戰, 野、魯二城 粟,方舟 茂等至漢 茂等 諸 兵 取 而

其 衆 復推 三月, 軍主 乃命元起進據南堂西階,四日田 一薛元嗣 及沖 長 史程茂 爲 主 安之頓城北,王世 興頓曲水故城。 是時 張沖死

尙 左僕 乙巳 射, 一,南 康 加 征 王 即帝 東 大 八將軍 位於江陵, 、都督征討諸軍事, 改永元 三年爲 假黃鉞。 中 興元 年, 西臺又遣冠軍將軍 遙 廢 東昏爲涪 陵王。 蕭穎達領兵會 以 高 祖 爲

是日,元嗣軍主沈難當率輕舸數千,亂流來戰,張惠紹等擊破,盡擒之。

[月, 高] 祖出沔,命王茂、蕭穎達等進軍逼郢城。 元嗣戰頗疲, 因不敢出。 諸將欲攻

五月,東昏遣寧朔將軍吳子陽、軍主光子衿等十三軍救郢州,進據巴口。

陷。 然風靡,何遽分兵散衆,自貽其憂!且丈夫舉動,言靜天步,況擁數州之兵以誅羣豎,懸 軍有上者,萬人攻一城,兩城勢不得相救。 若我分軍應援,則首尾俱弱,如其不遣,孤城必 又分兵前進,魯山必阻沔路,所謂益喉。若糧運不通,自然離散,何謂持久。鄧元起近欲以 定西陽、武昌,取江州,此機已失,莫若請救於魏,與北連和,猶爲上策。」高祖謂闡文曰:「漢 其可。 三千兵往定尋陽,彼若歡然悟機,一酈生亦足,脫距王師,故非三千能下。 口路通荆、雍,控引秦、梁,糧運資儲,聽此氣息,所以兵壓漢口,連絡數州。今若併軍圍城, 火,奚有不滅。豈容北面請救,以自示弱!彼未必能信,徒貽我醜聲。此之下計,何謂上 · 卿爲我白鎭軍:前途攻取,但以見付,事在目中,無患不捷,恃鎭軍靖鎭之耳。」 一城旣沒,諸城相次土崩,天下大事於是去矣。若郢州旣拔,席卷沿流,西陽、武昌,自 六月,西臺遣衞尉席闡文勞軍,齎蕭穎冑等議,謂高祖曰:「今頓兵兩岸,不併軍圍郢, 西陽、武昌,取便得耳,得便應鎭守。 守兩城不減萬人, 糧儲稱是, 卒無所出。 脫賊 進退無據,未見 泂

壘 吳子 兩 岸 陽等進軍 而 待之。 式口, 子陽 叉 高 進 祖乃命軍 據 加 湖 主梁天惠、 去郢三十里,傍 蔡道 祐據漁湖城, Щ 帶 水 、築壨 栅 唐脩 以自固 期 劉道 魯 曼 Щ 城 屯 白 主

襲 僧 寄 加 湖 死 衆 衆 將 逼 復 推 于 子 助防 陽 孫樂祖 水 茂 涸 虜 不 其 通 代之。[[三七月, 高祖 餘 艦,其夜暴長,衆軍 而 旋。 於是郢 魯 命 乘 王茂 流 城 齊 和軍 相 進,鼓 視 奪 主 噪攻之,賊俄 曹仲宗 氣 康 絢 武 而大潰, 會超 等 子 陽 潛 師

竄

走,

盡

溺

王

焉。 萬 當 須 實 人,疾疫流 忷 魯山 懼 力 先是, 外所 我謂 城 聽威 東昏 主 腫 九 孫樂 愛耳。 死者十 造冠 江 江 傳檄 祖 軍將 |郢 今加湖 七 미 城主程茂 軍 八,及城開 定 陳伯之 也 之敗 。」因 2鎭江 誰 、薛元嗣 命搜所獲俘囚 一高祖 不 州 弭 並 服 相 爲子陽等聲 加 繼 隱 請 陳 卹 降。 虎 ,其死 得伯之幢主蘇 牙 援。 卽 初,郢城 伯 者命給 之子 高 祖 之閉,將 棺構。 乃謂諸 隆 狼 之, 狽 奔歸, 佐文武 將 厚 一一二 加 賞 彼 男女 夫征討未 賜 間 人 使 П 情 计餘 致 命 理 必

隨 郡 先是, ,並剋之。 汝南 司 人胡文超 州 刺 史王 起義於躡陽,求討義陽 一僧景 %遣子 貞孫 入質。 、安陸等郡 同部 悉 以自 效, 高祖 又遺軍主 唐脩期 攻

之,計 旭 登舟, 陳伯之遣蘇隆之反 無所出, 命諸將以 勢不 次進路, 得暴。」 命 ", 求未 乃命鄧元起率 留上庸太守韋叡守郢城,行州事 便 進 衆 高 卽 祖 H 日「伯之此 沿 流 八 月 意懷 天子遣黃門 鄧元起將至尋陽 首 鼠 了及其 鄎 蘇 **猶豫** 口 勞 陳伯之猶 , 急往 軍 高 逼

本

紀

第

武

帝

上

李居 航 曹景宗據皂莢橋,鄧元起據道土墩,陳伯之據籬門。 走,退保朱爵、三三憑淮以自固。 為遊 冑 定 猜懼,乃收兵退保湖口,留其子虎牙守盆城。 棄姑孰 以西、新亭以北,蕩然矣。 東夏,並 士率 兵。 步軍 是日,新亭城主江道林率兵出戰,衆軍擒之於陣。 走,至是時大軍進據之, 以便宜從事。 迎戰,景宗擊走之。 是月,留少府、長史鄭紹叔守江州 時李居士猶據新亭壘,請東昏燒南岸邑屋以開戰場。 仍遣曹景宗、蕭穎達領馬步進頓江寧。 於是王茂、鄧元起、呂僧珍進據赤鼻邏, 及高祖至,乃東甲請罪。 道林餘衆退屯航南,義軍迫之,因復散 城。 大軍次新林,命王茂進據越城 前 軍次蕪湖 九月,天子詔高 東昏 曹景宗、 南 1遺征 豫州 一房將軍 陳伯之 刺 史申 祖平 自大

開航 祖 史桓和給東昏出戰,因以其衆來降。 義軍追至宣陽門,李居士以新亭壘、徐元瑜以東府城降,石頭、白下諸軍並宵潰。 珍國之衆,一時土崩,投淮死者,積尸與航等,後至者乘之以濟,於是朱虧諸軍望之皆潰 虎牙等列陣於航南大路,悉配精手利器,尙十餘萬人。閹人王倀子持白虎幡督率諸軍,又 鎭 背水,以絕歸路。 石頭,命衆軍圍六門,東昏悉焚燒門內,驅逼營署、官府並入城,有衆二十萬。 十月, 東昏石頭軍主朱僧勇率水軍二千人歸降。 王茂、曹景宗等掎角奔之,將士皆殊死戰,無不一當百,鼓噪震天地 高祖命諸軍築長圍。 東昏又遣征虜將軍王珍國 率軍主胡 壬午,高 青州刺

鎭 孰 京 奔 歸, 口 初 輔 叉 義 使 國 師 將 屯 之逼, 破 軍 恢 墩 東昏遣軍 屯 以 破 爲 墩 東北 ,從弟寧朔將軍景鎭 聲 主左僧慶鎭京口 援。 至是, 高 祖 ,常僧景鎭廣陵,李叔獻 廣陵。日恩吳郡太守 遣使 曉 喻 並 率衆 蔡夤 降。 屯瓜步 乃遣 棄 郡 弟 赴 及 義 輔 申 師 或 胄 將 自 軍 姑 秀

兵封 驃 如 王 故 騎 爲 東昏 大 府 十二 依晉 將 庫 月丙 軍 侯 及 武 揚 圖 依 陵 寅 籍 漢 州 王 收收 旦, 遵 刺 海 史,封 襲妾 昏 承 兼 侯 制 衞 潘妃 故 故 尉 建安郡公, 事 事 張 及凶 稷 授高 北 黨 徐 食邑萬戶 祖 王 州 中 咺 刺 書 之以下四 史王 監 , 都 給班 珍 督揚 國 + 劍四十 斬 南徐 東昏, 人屬 人, 吏,誅之。 州 送首 黄鉞 諸 軍 義 、侍中、征 事 師 宣德 大司 高 皇后 祖 馬、 討 命 呂僧 諸 令廢 錄 軍 尚書 涪陵 事 珍 並 勒

危, 弭 率 共。 多 主之情,厲 蠢 難 卯 凡 如 ٠, 厰 虐 綴 高 政 負釁,咸 其忘 祖 横 吾 入 流 身 生 屯 爲 之 籍 與 閲 志。 催 日 皇宗,曲荷 武 新 旣 堂。 雖實 久, 可 下令曰:「皇家 同 大赦! 曆 惡 先 重升,明 相 顧,受任 天下 濟 諒 ";唯 命 邊 非 不 有紹, 王咺之等 疆, 造 造 族。 推 遘 此 昏 凶 而 一載萬 仰 獨 四十一 :禀朝 夫 里, 醜 命,任 禍 眷 言 縱, 人 不 挻 方 [瞻烏, 在 在 動 煽京邑。 植 赦 專 广虐被 征 例 痛 心 思播 投袂 在 人 目 鬼 皇澤,被之 援戈, 故 社 率 廟 克 其 之

廟。 窮 叉 区 令 極 日 悖, 夫樹 書 契 以司 未 有。 牧, 征 非 賦 役 不一,苛酷 物 以 養 生 ; 巡遊章。 視 民 如 緹繡 傷, 土木,菽粟犬馬, 豊 肆 上 以 縦 虐。 徴發閭 廢 主 棄 左, 自 以充繕 絕

Ξ

本

紀

第

宮掖、官府臺寺、尺椽無遺、 此塗炭!今明昏遞運,大道公行,思治之氓,來蘇茲日。 流離 寒暑,繼 以 疫癘,轉死溝渠,曾莫救恤,朽肉枯骸,烏鳶是厭。 悲甚黍離,痛兼麥秀。 遂使億兆離 猥以寡薄,屬當大寵,雖 心,疆 徼侵弱,斯 加 以天 災 運 人火,屢焚 人 何 距 ,辜,離 中

主守散失,諸所損耗,精立科條,咸從原例。」

艱

同草昧,思闡皇休,與之更始。

凡昏制、謬賦、淫刑、濫役,外可詳檢前源,悉皆除蕩。

其

哉 使閹尹有翁媼之稱,高安有法堯之旨。 義,擁抑彌年,懷寃抱理,莫知誰訴。 主者淹停不時施行者,精加訊辨,依事議奏。」 - 今理 又曰:「永元之季,乾維落紐。政實多門,有殊衞文之代,權移於下,事等曹恭之時。 運惟新,政刑得所,矯革流弊,實在茲日。 姦吏因之,筆削自己。 **鬻獄販官,錮山護澤,開塞之機,奏成** 可通檢尚書衆曹,東昏時諸諍訟失理及 **豈直賈生流涕,許伯哭時而已** 小醜。 直道 正

徒送 死者,特許家 又下令,以義師臨陣致命及疾病死亡者,並加葬斂,收恤遺孤。 人殯葬;若無親屬,或有貧苦,一縣長尉即爲埋掩。 又令曰:「朱爵之捷,逆 建康城內,不達天命,

左 光祿大夫,考侍中丞相。 年正月,天 子遣無侍中席闡文、兼黃門侍郎樂法才慰勞京邑。 追贈高祖祖散騎常侍

取

淪滅,亦同

此

科。」

馳。 玠 請 罷 自 荷 運,厲精惟始,雖曰 家,貂狐 戎之賜;珍羞百品,同伐冰之家。 窮凶 自孤 省。 非可 大龍 在朝,士大夫不敢靡衣偷食。 國 極悖,焉可勝言。 高 始。 以奉 祖 披庭備御妾之數,大予絕鄭衞之音。[18]其中有可以率先卿士,准的甿庶,菲食薄衣, ,務在澄清, 命朝權,盡移近習。 在 下令曰:「夫在上化下,草偃風從,世之澆淳,恒由 御,工商 -粢盛,脩紱冕,習禮樂之容,繕甲兵之備,此外衆費,一皆禁絕。 加羣才並軌,九官咸事,若能人務退食,競存約己,移風易俗,庶朞月 纘戎,殆同 之子,緹繡是襲。 思所以仰述皇朝大帛之旨,俯厲微躬鹿裘之義,解而 旣 而 **琁室** 販官鬻爵,賄貨公行。 創革。 外構,傾宮內積, 魏武 愚民因之,浸以成俗。 且淫費之後,繼以 歎曰:『孤之法不如毛尙書。』孤雖德謝往賢,任重先 日入之次, 夜分未反, 奇技異服, 殫所未見。 並甲第康衢,漸臺廣室。 興師,巨橋、鹿臺,凋罄 驕豔競爽, 夸麗相 此作。 昧爽之朝, 自永元失德, 期之清 上慢下暴,淫侈競 更張,斵雕 高。 御府 長袖低昂, 至乃市 不 日。 有成。昔毛 中署,量宜 書契未紀, __. 聖 爲樸 井之 孤 等 明 和 忝 肇

事 中 中 外諸軍事,劍履上殿,入朝不趨,贊拜不名。 郎、掾、屬各四人,並依舊辟士,餘並如故。詔曰 戊戌,宣德皇后臨朝,入居內殿。拜帝大司 加前 馬,解承制,百僚致敬 後部羽葆鼓吹。 如前。 置左右長史、司馬、從 韶進高祖 都督

達,實望多士得其此心。

外可詳爲條格。」

靖衰

亂於

般、周

海 振 而不 夫日月麗天, 高明所以表德; 山岳題地, 柔博所以成功。 洩。 二象貞觀,代之者人。 是以七輔、四叔,致無爲於軒、昊,韋、彭、齊、晉, 故能庶物出 而資始,河

泮。 政。 難, 海,方斯蔑如也。 援彼已溺,解此倒懸,塗歡里抃, **袂勤王,沿流電舉,** 虐,毒被含靈,溥天惴惴, 同、豫懸切,樊、漢危殆,覆强寇於沔濱,僵胡馬於鄧汭。 功參帷模,錫賦開壤,式表厥庸。 **積弊窮昏**, 取新壘其如拾芥,撲朱爵其猶掃塵。 大司馬攸縱自天,體茲齊聖,文洽九功,武苞七德。 朝載廓, 聲敎遐漸, 無思不被。 魯城雲撤,夏汭霧披,江北加湖羣盜,一鼓殄拔,姑孰連絡,條焉冰 命懸晷刻。 角近 及遠。 否終有期,神謨載挺,首建大策,惟新鼎祚。 建武 霆電外駭,省闥內傾, 升歷,邊隙屢啓。 畿甸 `夷穆,方外肅寧,解茲虐網,被以寬 雖伊尹之執茲壹德,姬旦之光于四 欽惟厥始,徽猷早樹,誠著艱 永元肇號,難結羣 公釋書輟講, 餘 醜纖蠹, 醜,專威擅 經營四方。 蚳蝝必盡 投

門,輟而莫授,眷言前訓,無忘終食。便宜敬升大典,式允羣望。 超邁自古。 昔呂望翼佐聖君,猶享四履之命,文侯立功平后,尚荷二弓之錫,況於盛德元勳, 黔首慄慄,待以爲命,救其已然,拯其方斮,式閭表墓,未或能比;而大輅渠 其進位相國,總百揆,

揚 州 刺史、江公封十郡爲梁公,備九錫之禮, 加璽紱遠遊冠,位在諸王上,加相國綠綟

綬。 其 驃 騎大將軍 ·如故。 依 舊置 一梁百司。

策日:

於有道, 允茲元輔,應期挺秀,裁成天地之功,幽協 典策,其敬聽 儀寂寞, 大勳 振 股 於 由寒暑而代行,三才並用,資立人以爲寶,故能流形品物,仰代天工。 命: 無 外, 雖伊陟之保义王家, 姬公之有此丕訓, 神明之德。 撥亂 反正,濟世寧民,[[元]盛烈光 方之蔑如也。 今將授

賢,誅 藉昏 永, 毒賦,載離比屋,溥天熬熬,置身無所。 紐 我絕綱,大造 雖夙夜劬勞, 明之期,因 上天不 殘 台輔,含寃抱痛,噍類靡餘。寔繁非 造 皇家 兆民之願,援帥羣后,翊成中興,宗社之危已固,天人之望允塞,此實公 難鍾 而隆平不 者也。 **煌皇室**, 世祖以休明早崩,世宗以仁德不嗣,如高宗襲統, 洽。 嗣君 香暴, 寃頸 書契弗覩。 一、並專國 引決,道 樹 命。 相望,無近 朝權 嚬笑致災, 睚 國柄, 無遠,號天靡告。 委之羣孽。 眦 及禍 勦 戮 宸居弗 嚴科

忠

公

輕 兵赴襲,縻 永 明 季年,邊隙 以長算,制之環中。 大啓,荆河 連率,招引戎荒,江、淮 排危冒險、强柔遞用, 擾逼, 坦然一方, 勢同履虎。 還成藩服。 公受言本朝, 此又公

本

紀

第

武

帝

上

甲靡 之功 執俘 陸盤據,規援夏首,桴旝一臨,應時褫潰。 踐華之固 頓 此 蠢 踰邑編, 之功也。 案路徐歸 危逼,淪陷 至,元帥 星 兵 言鞠旅 又公之功也。 動 也。 象 一王,謀猷深著。 , 湮爲洪流, 句吳、於越, 巢幕匪喻。 遺。 坐甲,寒往暑移,我行永久,士忘歸願,經以遠圖,御以長策,費無遺矢,戰未窮 魏 :潛及,如可不相告報,棄甲捐師,餌之虎口。 公南收散卒,北禦雕騎,全衆方軌, 動高代入,易亂以化,俾昏作明。 在昔隆昌,洪基已謝,高宗慮深社稷,將行權道。 **,拯我邊危,重獲安堵。此又公之功也。** ·禀命徂征,而軍機戎統,事非己出,善策嘉謀,抑而莫允。 ,相望俱拔。 永元紀號,瞻烏已及,雖廢昏有 公作藩爰始,因資靡託,整兵訓卒,蒐狩有序,俾我危城,飜爲强鎮。 ,獻馘海渚,焚廬毁帳,號哭言歸。此又公之功也。|樊、漢阽切,羽書續至。公 指期。公治兵外討,卷甲長騖,接距交綏,電激風掃,摧堅覆銳,咽水塗原, 魯城 此又公之功也。建武闡業,厥猷雖遠,戎狄內侵,憑陵關塞,同部 、夏汭,梗據中流,乘山置壘,縈川自固。 此又公之功也。 惟此羣凶, 典,而伊、霍稱難。 公投袂萬里,事惟拯溺,義聲所覃,無思 此又公之功也。 此又公之功也。 漢南迥弱, 咫尺勍寇, 兵糧蓋闕, 器 同惡相 濟,緣江 公定策帷帳,激揚大節, 姦嬖震皇,復懷舉斧,蓄兵 文王之風,雖被江、漢,京邑 公首建大策,爱立明聖,義 公御此鳥集,陵茲 負險,蟻聚 鄧城之役,胡馬卒 加湖。 此又公 不韙。 地 兵 險, 廢

九派, 戮。 埓。 姑孰 獨夫昏很,憑城靡懼,鼓鍾鞺鞜,傲若有餘。 擬,睢水不流,曷其能及。 公爱命英勇,因機騁銳, 駭,焚舟委壁,卷甲宵遁。 憑險作守,兵食兼資,風激電駭,莫不震疊,城復于隍,於是乎在。 公奇謨密運,盛略潛通,忠勇之徒,得申厥効,白旗宣室,未之或比。 衝 用擬勤王。 一要,密邇京畿,凶徒熾聚,斷塞津路。 公稜威直指, 氣冠版泉,勢踰洹水,追奔逐北,奄有通津,熊耳比峻,未足云 此又公之功也。 此又公之功也。 勢踰風電, 琅邪、石首,襟帶岨固,新壘、東墉,金湯是 羣豎猖狂,志在借一,豕突淮涘,武騎如雲。 旌旆小臨,至三全州稽服。此又公之功也。 公偏師啓塗,排方繼及,兵威所震,望旗自 狎是邪孽,忌斯冠冕,凶狡因之,將逞孥 此又公之功也。 此又公之功

河海。 夫禹 紳,重荷戴天之慶;哀哀黔首,復蒙履地之恩。 艱難,宗社 公有拯億兆之勳,重之以明德,爰初厲志,服道儒門,濯纓來仕,清猷映代。 永平故事,聞之者歎息;司隸舊章,見之者隕涕。 危殆,崐崗已燎,玉石同焚。 驅率貔貅,抑揚霆 德踰嵩、岱,功隣造物,超哉邈矣,越無 解茲 、亂網, 請我民命,還之斗極。 電,義等南巢, 理此棼絲, 復禮衽 功齊牧野。 席, 憫憫搢 反樂 時運

也。

得而言焉。

本

紀

第

武帝上

是用錫公納陛以登。公正色御下,以身軌物,式遏不虞,折衝惟遠,是用錫公虎賁之士 髻髽首,夷歌請吏,是用錫公朱戶以居。公揚清抑濁,官方有序,多士聿興,棫樸流詠, 以雅,易俗陶民,載和邦國,是用錫公軒懸之樂,六佾之舞。公文德廣覃,義聲遠洽,椎 穡,念在民天,丕崇本務,惟穀是寶,是用錫公衮冕之服,赤鳥副焉。公鎔鈞所被,變風 兼修,刑德備舉,哀矜折獄,罔不用情,是用錫公大輅、戎輅各一,玄牡二駟。 公勞心稼 都督大司馬印綬,建安公印策,驃騎大將軍如故。又加公九錫,其敬聽後命:以公禮律 宜與事革。 命使持節兼太尉王亮授相國揚州牧印綬,梁公璽統,使持節兼司空王志授梁公茅土, 邦,用建冢社。 之淮南宣城吳吳興會稽新安東陽十郡,曰司封公爲梁公。錫茲白土,苴以白茅,爰定爾 朕甚懼焉。今進授相國,改揚州刺史爲牧,以豫州之梁郡歷陽、南徐州之義興、揚州 金虎符第一至第五左,竹使符第一至第十左。 地,寧濟區夏,道冠乎伊、稷,賞薄於桓、文,豈所以憲章齊、魯,長轡宇宙。 斯征,王道淳洽,刑措罔用。覆政弗興,歷茲永久,如燬旣及,晉、鄭靡依。 朕又聞之:疇庸命德,建侯作屏,咸用剋固四維,永隆萬葉。 是以二南流化,九伯 其以相國總百揆,去錄尚書之號,上所假節、侍中貂蟬、中書監印、中外 在昔旦、處,入居保佑,逮于畢、毛,亦作卿士,任兼內外,禮實宜之。今 相國位冠羣后,任總百司,恒典彝數, 惟公經綸天 敬惟前烈,

嵩 永 相 言惟孝 以 下, 一陵厲 人。公威同夏日, ,至感 遵舊式。 區字,譬諸日月,容光必至,是用錫公彤弓一,彤 通 神,恭嚴祀典,祭有餘敬,是用錫公秬鬯一卣, **欽哉!** 志清姦宄,放命圮族,刑茲罔赦,是用錫公鈇、鉞各一。 其敬循往策, 祗服大禮, 對揚天眷, 用膺多福, 以弘我太祖 关百; 圭瓚副焉。 盧弓十, 盧矢千。 梁國 公跨躡 置 公 丞

休

1

之致。 奉 塗泥 狹 斮之痛, 高 於 天 加 曲 人,允膺 固 濟 ...辭。 阜, 何 斯民 黔首懼 者? 慶賞 府僚勸進曰:「伏承嘉命、顯至佇策。 大 於院岸,使夫匹婦童兒,羞言伊、呂,鄉校 嗣 禮。 、之道,尚其未洽。 比屋之誅。 君 棄常,自絕宗社,國命民主,翦爲 無使 《後予之歌,同彼胥怨, 明公亮格天之功,拯水火之切,再躔日月,重綴參辰,反 夫大寶公器,非 兼 濟之人,飜爲獨善。」公不 要非 明公逡巡盛禮,斯實謙尊之旨, 仇讐,折棟崩 、距,至公至平,當仁 里塾, 恥談 五. 榱,壓焉自及, 霸。 而 一誰讓? 許。 位 卑乎 卿 未窮 明 阿 公宜 龜玉 士 衡, 懷 遠 祗 地 脯 大 於

是 玉 所 依 璜 未 達。 而 班 太公 師 蓋 振 聞 不 旅 受金 以 爲 大 造 讓 於府,通 王 室。 況世 人弘 哲繼 雖復累繭救宋,重胝存煙,居今觀古, 致,高蹈 軌,先德在 海隅, 民,經 匹夫 綸 小 草 昧,歎 節, 是 深微管。 以 履 曾何足云 乘石 加 而 周公 以 朱方 不 而 之役 以 惑甚盜鍾, 爲 判判河 疑,贈

月辛

酉

一,府僚

重請

日「近

以

朝

命蘊

策,

冒奏丹誠,奉被還令,未蒙虛受,搢

紳

顒

顒,深

本

紀

第

武

帝

上

爲君子,將使伊、周何地。」於是始受相國梁公之命。 論,坐鎭雅俗,不習孫、吳,遘茲神武。驅盡誅之氓,濟必封之俗,龜玉不毀,誰之功與?獨 東馬影從,伐罪弔民,一匡靜亂,匪叨天功,實勤濡足。 公據鞍輟哭,厲三軍之志,獨居掩涕,激義士之心,故能使海若登祇,罄圖 功疑不賞,皇天后土,不勝其酷。是以玉馬駿奔,表微子之去,金板出地,告龍逢之寃。明 且明公本自諸生,取樂名教,道風素 **効祉**,山戎、孤竹,

是日,焚東昏淫奢異服六十二種於都街。湘東王實晊謀反,賜死。 詔追贈梁公故夫人

爲梁妃。 乙丑,南兖州隊主陳文興於桓城內鑿井,得玉鏤騏驎、金鏤玉璧、水精環各二枚。

康令羊瞻解稱鳳皇見縣之桐下里。宣德皇后稱美符瑞,歸于相國府。

叉建

流遂往,馳騖成俗,媒孽夸衒,利盡錐刀,遂使官人之門,肩摩轂擊。 豈直暴蓋露冠,不 丙寅,詔:「梁國初建,宜須綜理,可依舊選諸要職,悉依天朝之制。」高祖上表曰: 臣聞以言取士,士飾其言,以行取人,人竭其行。所謂才生於世,窮達惟時,而風

詐偽多緒,人物雅俗,莫肯留心。 是以冒襲良家,即成冠族;妄修邊幅,便爲雅士;負俗 避寒暑,遂乃戢屨杖策,風雨必至。良由鄕舉里選,不師古始,稱肉度骨,遺之管庫。 加 以 山河梁畢,闕輿徵之恩;金、張、許、史,忘舊業之替。吁,可傷哉!且夫譜牒訛誤,

夷,九流乖 冑籍升降,行能臧否,或素定懷抱,或得之餘論,故得簡通賓客, 深累,遽遭寵擢;墓木已拱,方被徽榮。 獎成澆競。 藏聲,自埋 失。 **衡華,又以名不素著,絕其階緒。** 愚謂自今選曹宜精隱括,依舊立簿,使冠屨無爽,名實不違,庶人識崖涘, 其有勇退忘進,懷質抱眞者,選部或以未經朝謁,難於進用。 故前代選官,皆立選簿,應在貫魚,自有銓次。 必須畫刺投狀,然後彈冠,則是驅迫廉撝, 無事掃門。三回頃代陵 或有晦善

設官分職,惟才是務。 宜刊革。 祿之家,無意爲善;布衣之士,肆心爲惡。 歲登朝,必增年就宦,故貌實昏童,籍已踰立,滓穢名教,於斯爲甚。 且 聞 不然,將使周人有路傍之泣,晉臣興漁獵之歎。 中間立格,甲族以二十登仕,後門以過立試吏,求之愚懷,抑有未達。 。若八元立年,居阜隸而見抑;四凶弱冠,處鼎族而 **豈所以弘獎風流,希向** 且俗長浮競,人寡退情,若限 .後進。此實巨蠹,尤 宜 甄。 何者? 是則 世

造請自息。

臣總司內外,憂責是任,朝政得失,義不容隱。 伏願陛下垂聖淑之姿,降聽覽之

末,則彝倫自穆,憲章惟允。

丙戌, 詔曰:

本紀第一 武帝上

尊,勤勞王室,姬公增附庸之地。 嵩高 ·惟岳,配天所以流稱,大啓南陽,霸德所以光闡。 前王令典,布諸方策,長祚字甿,罔不由此。 忠誠簡帝,番君膺上爵之

遠有 哉! 俗,治兵敎戰,則霆雷赫於萬里。 以豫州之南譙廬江、江州之尋陽、郢州之武昌西陽 陣,拯危京邑,清我帝畿,撲旣燎於原火,免將誅於比屋。 城勁卒,憑川爲固。 形於造 合,咸受其賜。匡俗正本,民不失職。 旅,指景長騖。 覆,草木塗地。 之臨海 斬德。 至於兆庶殲亡,衣冠殄滅,餘類殘喘,指命崇朝,含生業業,投足無所,遂乃山 相國梁公,體茲上哲,齊聖廣淵。 永嘉 次,嘉數未申,晦朔增佇。 十郡,益梁國,並前爲二十郡。 而爵後藩牧,地終秦、楚,非所以式酬光烈, 而本朝危切,樊、鄧遐遠,凶徒盤據,水陸相望,爰自姑孰,屆于夏首 與夫仁被行葦之時,信及豚魚之日,何其遼夐相去之遠歟!公命師鞠 公沿漢浮江,電激風掃,舟徒水覆, 道喪時昏,讒邪孔熾。 便宜崇斯禮秩, 文教內洽,武功外暢。 仁信並行,禮樂同暢。 其相國、揚州牧、驃騎大將軍如故 、南徐州之南琅邪 允副遐邇之望。 允答元勳。 豈徒宗社 地險雲傾,藉茲義勇,前無强 悠悠兆庶,命不在天,茫茫六 推轂作藩,則威懷被於殊 伊、周未足 如綴、神器莫主而 寔由 南東海晉陵、揚州 可進梁公爵爲王。 公履謙爲本, 方軌,桓、文 JII 反

公固辭。

有詔斷表。

相國左長史王瑩等率百僚敦請。

平旦, 酉 三月辛 邏 Щ 將 E 雲 潘 ·卯,延陵 霧 道 蓋 四 合,須 於 縣華陽 Щ 石穴中得 與有玄黃之色,狀 邏主 戴 毛 |車牒稱云:「十二月乙酉, 龜 二月辛 如 龍 形 西,邏 ,長十餘 將 丈, 徐 靈符 甘露降茅山 乍隱 又於 乍顯, 久 Щ 東 沙 彌漫 見 從西 白 致里。 鏖 北 升 天。」 正 丙 寅 月

1 卯 兖州 刺 史馬 元 和 籤:「所領 東 平 郡 壽 張 縣 見騶虞

息, 節 邈 頭 五. 雲罕,樂 然 思 終 尙 癸巳, 日 丙 弘 隔 遠。 昧 午, 政 體 爽 命王 塗 諒 受梁王之命。 舞 以 聖 八 ,莫知津 朝 前、三三一 羣 佾, 設鍾虞宮 冕十有二 永言舊式,隆 后 百司 濟。 皆原 施, , 令曰:「孤 邦 重茲敦 赦。 縣。 建 甸 此 天 初 眷 子 鰥 啓,藩宇惟 王 獎, 命。 以 寡 旌 妃 虚 勉茲 王 旗 孤 味,任 侯伯盛典,方軌前 子王 獨 出 厚顏,當此 不 新, 警入蹕, 執 能 女爵命之號,一 自存 國 思覃嘉慶,被 [鈞,雖 者, 乘 休祚 金 夙 賜 烈 根 夜 穀 嘉錫 車,駕 依舊儀 之下 勤止,念在 五. 望昆、彭 斛。 六馬 或 隆被,禮 府 以 州 國 長 興治,而 備 所 內 想,欽 數 五. 統,亦 殊 昭 一時副 死 祟。 以下 桓 育德振民, 司 車 文 徒守 蠲 今月 蕩 而 旄 歎 愿

丙辰,齊帝禪位于梁王。 詔曰:

神。 革 晦 以 夫 光 明 五. 德 再 由 沉, 更始,三正 來 尙 七 廟 矣。 如 迭 綴。 齊德淪 興, 鼎業幾移, 馭 微, 物 資賢, 危亡荐襲。 含識知泯。 登庸 啓聖, 隆 昌 我高、 X 故帝 虐,寔 跡 明之祚, 所 違 以 天 代昌, 地 眇焉將 ; 永元 王 昏暴 度 墜。 所 以 永惟 取 改耀 紊 屯

紀第一 武帝上

本

梁書卷一

難,冰谷載懷。

河嶽表革命之符,圖讖紀代終之運。樂推之心,幽顯共積;歌頌之誠,華裔同著。昔水 羽禎奇,雲星瑞色而已哉!勳茂於百王,道昭乎萬代,固以明配上天,光華日月者也。 文館盈紳,戎亭息警。浹海宇以馳風,罄輪裳而禀朔。八表呈祥,五靈効祉。 塗炭。扶傾頹構之下,拯溺逝川之中。九區重緝,四維更紐。絕禮還紀,崩樂復張。 國梁王,天誕睿哲,神縱靈武,德格玄祇,功均造物。 止宗社之横流,反生民之 豈止鱗

便敬禪于梁,卽安姑孰,依唐虞、晉宋故事。 朕雖庸蔽, 闇于大道, 永鑒崇替, 爲日已久, 敢忘列代之高義, 人祇之至願乎! 今 政旣微,木德升緒,天之曆數,寔有所歸,握鏡琁樞,允集明哲。

璽紱,未亡人便歸于別宮。」壬戌,策曰: 四月辛酉,宣德皇后令曰:「西詔至,帝憲章前代,敬禪神器于梁。明可臨軒遣使,恭授

鳥跡以前,慌忽杳冥之世,固無得而詳焉。洎乎農、軒、炎、皡之代,放勛、重華之主,莫 之志;暫適箕嶺,卽動讓王之心。故知戴黃屋,服玉璽,非所以示貴稱尊,乘大輅,建旂 不以大道君萬姓,公器御八紘。居之如執朽索,去之若捐重負。一駕汾陽,便有窅然 咨爾梁王:惟昔邃古之載,肇有生民,皇雄、大庭之辟,赫胥、尊盧之后,斯並龍圖

茫九域,翦爲仇讎,溥天相 則 受曆,應符啓運,二葉重光,三聖係軌。 告終,有漢所 旌 ,蓋欲令歸趣有 撫茲歸運,惟能是 以高揖,黃德旣謝,魏氏所以樂推。 地。 與。 是故忘己而字兆民,殉物而君四海。 況兼乎笙管革文,威圖 顧,命縣晷刻。 嗣君喪德,昏棄紀度,毁紊天綱,凋 斮涉刳孕,於事已輕;求雞徵杖,曾何足譬。 啓瑞,攝提夜朗,熒光 爱及晉、宋, 及於精華內竭,畚橇 亦弘 斯 典。 晝發者哉 我太祖握河 絕 地紐,茫 • 外勞, 四百

是以谷滿川枯,山飛鬼哭,七廟已危,人神

無主。

川泉。 中,式遵前典,以副昊天之望。 祗 難 長民御衆,爲之司牧,本同已於萬物,乃因心於百姓。寶命無常主,帝王非一族。 徼之民,膜拜稽首,願爲臣妾。 姓之符允集。 卿雲叢天而已哉!至如晝覩爭明,夜飛枉矢,土淪彗刺,日旣星亡,除舊之徵必顯,更 **「乾象,俯藉人願,敬禪神器,授帝位于爾躬。 大祚告窮,天祿永終。** 孔棘,則推鋒而拯塗炭。 惟 文教與鵬翼齊舉,武功與日車並運。 王體茲上哲,明聖在躬,禀靈五緯,明並日月。 是以義師初踐,芳露凝甘,仁風旣被,素文自擾,北闕藁街之使,風車火 功踰造物,德濟蒼生,澤無不漸,仁無不被,上達蒼昊,下及 鍾石畢變,事表於遷虞,蛟魚並出,義彰於事夏。 **輕上帝而臨億兆,格文祖而膺大業,以傳無疆之祚,豈** 固以幽顯宅心,謳訟斯屬,豈徒桴鼓播 彝倫攸序, 則端 於戲!王允執其 冕而協邕熙;時 今仰 地,

本

紀

第

i

1

又璽書曰: 不盛歟

先殄衣冠 牧。 周,實受命於蒼昊。爰自漢、魏,罔不率由,降及晉、宋,亦遵斯典。 愚之情不一;託性五常,强柔之分或舛。 羣后靡一,爭犯交興,是故建君立長,用相司 而 人,刀俎爲 撫歸運,畏上天而恭寶曆者也。 非謂[在昔勛 夫 生者天地之大德,人者含生之通稱,並首同本,未知所以異也。 . 尊驕在上,以天下爲私者也。 ,次移龜鼎。 命,已然之逼,若綫之危,跼天蹐地,逃形無所。 一華,深達茲義,眷求明哲,授以蒸民。 衡、保、周、召,並列宵人。巢幕累卵,方此非切。 至于季世,禍亂荐臻,王度紛糾,姦回熾積。 兼以三正迭改, 五運相遷, 綠文赤字, 徵河表 遷虞事夏,本因心於百姓,化殷爲 羣凶挾煽,志逞殘戮,將欲 我高皇所以格文祖 自非英聖遠圖, 而禀靈造化,賢 億兆 夷

難,緝 方扇, 周文。風化肅穆,禮樂交暢。 惟 鞠義 熙王道。 王崇高 旅 以勤王。 則天,博厚儀地,鎔鑄六合, 懷柔萬姓,經營四方。 揚旍斾於遠路, 加以赦過宥罪、神武不殺、盛德昭於景緯、至義感於鬼神。 舉直措枉,較如 戮姦宄於魏闕。 陶甄萬有。 畫 鋒馹交馳,振靈武以遐略,雲雷 **德冠往初**, 0 待旦 同乎殷后,日昃過於 功無與二。 弘濟艱

仁爲己任

,則鴟梟厲吻,翦焉已及。

若夫納彼大麓,膺此歸運,烈風不迷,樂推攸在。 在上,於昭于天。」所以二儀乃眷,幽明允叶,豈惟宅是萬邦,緝茲謳訟而已哉! 天表秀特,軒狀堯姿,君臨之符,諒非一揆。 至於星孛紫宮,水効孟月,飛鴻滿野,長蔧橫天,取新之應旣昭, 玄甲遊於芳荃,素文馴於郊苑。 教所及,車書所至,革面回首,謳吟德澤。 躍九川於淸漢,鳴六象於高崗。 九山滅祲,四瀆安流。 書云:「天鑒厥德,用集大命。」詩云:「文王 治五韙於已亂,重九鼎於旣輕。 革故之徵 靈瑞 祥風易起, 淫雨靜息。 雜沓,玄符昭著。 必顯。 加以 自聲

奉皇帝璽紱。受終之禮,一依唐虞故事。 侍中、中書監、兼尚書令汝南縣開國侯亮,兼太尉、散騎常侍、中書令新吳縣開 以木德而傳于梁。遠尋前典,降惟近代,百辟遐邇,莫違殷心。今遣使持節、兼太保、 天之休命! 朕是用擁琁沉首,屬懷聖哲。 昔水行告厭,我太祖旣受命代終,在日天祿云謝,亦 王其陟茲元后,君臨萬方,式傳洪烈,以答上 國侯志,

並明著,羣臣重表固請,乃從之。 高祖抗表陳讓,表不獲通。於是,齊百官豫章王元琳等八百一十九人,及梁臺侍中臣雲等 一百一十七人,並上表勸進,高祖謙讓不受。是日,太史令蔣道秀陳天文符讖六十四條,事

校勘記

- C-J 仰生太子太傅望之 「太子太傅」,各本作「太傅」,據册府元龜一八二增補。 錢大昕廿二史考
- 巽云:「當云太子太傅,脫太子二字。」
- 【ニ」闡生吳郡太守冰 「冰」、南齊書高帝紀作「永」。
- 隸江州刺史王廣爲援 「王廣」即「王廣之」,南齊書有傳。 本書王珍國傳云:「父廣之。」六朝人

雙名後所帶「之」字,往往可省去。

- 避唐諱,凡「虎」字皆改爲「武」或「獸」。 殿本依照北監本又皆改回,但此處漏改,今改正 高祖及雍州刺史曹虎等並受節度 「曹虎」,各本作「曹武」,南齊書本傳作「曹虎」。 按: 姚思廉
- ヹ 東昏以劉山陽爲巴西太守「巴西」,各本作「巴陵」,據南史改。錢大昕廿二史考異:「蕭穎達、

劉山陽」。 柳忱傳並作巴西。」按:南齊書和帝紀及通鑑齊東昏侯永元二年紀並云「巴西、梓潼二郡太守 巴西、梓潼同爲益州領郡,巴陵則爲荆州領郡,離梓潼甚遠,足證「巴陵」爲「巴西」

之譌。

- **へ** 六 し 彼聞必謂行事與天虎共隱其事 「聞」,通鑑作「間」。 疑作「間」是。
- しよし 必漏吾謀內 此句疑有脫誤。 通典一六一、太平御覽二八七,「必」下有「恐」字。 册府元龜

八五引此句無「內」字。

- く〕 三年二月 「二月」當作「正月」。下云「戊申,高祖發襄陽」。 是年正月丙申朔,戊申爲正月十
- *∓*6 武力喪魂 三日。 北史薛安都傳,「在南以武力見叙」,隋書高祖紀下,「武力之子,俱可學文」,「武力」
- 用 法 均 與此異。 册府元龜一八五「武力」作「武士」。
- 推鋒扼 險 「推」殿本等作「摧」,今從百衲本、南監本。 按:「推鋒」一詞,史籍中屢見,如「推鋒
- 越河 見晉書祖逖傳;「推鋒逕進」,見北齊書高昂傳。 時尚未交鋒,不得 云「摧鋒」。
- 乃命元起進據南堂西陼 軍主王 世 興田安等數千人 「陼」,册府元龜一八五作 田安卽田安之,下文有「田安之頓城北」。 ..「渚」。 按:「陼」「渚」古通用。 此省去「之」字。 通鑑齊和帝
- 中興元年紀作「渚」。 胡注:「南堂在郢城南,西近江渚
- 作魯山 衆復 推 城主 助防孫樂祖代之 孫樂祖。」按:南齊書張冲傳、 「孫」,各本作「張」。 通鑑齊和帝中興元年紀並作「孫樂祖」。 洪頤煊諸史考異: 「楊公則傳、南齊書和帝紀俱 胡三省注云
- 「參考前後,張當作孫。」今改正。
- 退保朱爵 「朱爵」,上文作「朱雀」(直指朱雀)。 按「爵」、「雀」古今字,後不悉出。
- 二吾 寧朔將軍景鎮 廣陵 蕭景原名蕭昞,姚思廉避唐諱改
- ,絕鄭衞 之音 「大予」各本作「大享」,惟百衲本作「大予」。張元濟梁書校勘記:「按大予卽

本

紀

第

校勘

記

- 太樂,見後漢書。」今從之。
- 夏汭霧披 「霧」各本作「露」。 按:册府元龜一八五作「霧」,是,今據改。
- 其進位相國總百揆揚州刺史 州 刺史,今進位揚州牧,所以下策文中謂「今進授相國,改揚州刺史爲牧」。 按三揚州刺史」當依通鑑作「揚州牧」。 蕭衍於上年十二月爲揚
- 濟世寧民 「世」「民」各本作「俗」「人」。 係姚思廉避唐太宗「世民」諱改。 據册府元龜一八五
- 世祖以休明早崩世宗以仁德不嗣 册文,豈能提及蕭衍後裔諡號,顯然錯誤。 改回 世 祖」各本作「元帝」,「世宗」作 據南史梁本紀改正。 又「德」原作「弱」,據南史改。 「簡文」。 此爲齊「禪」梁
- [三] 元帥潛及 「及」,疑爲「反」字之譌。
- 旌斾 | 行,及蕭 小臨 衍 臨江州,伯之束甲請降事。 「小臨」各本作「未臨」。 據南史及册府元龜一八五改。 當云「小臨」,不得云「未臨」。 按此指陳伯之據江州拒蕭
- 以豫州之梁郡歷陽南徐州之義 俱 脱一「吳」字,不足十郡之數。 與揚州之淮南宣城吳吳興會稽新安東陽十郡 今據南史補。 「吳興」上,各本
- 故得簡通賓客無事掃門 「事」通典選舉典作「俟」,義似較勝。
- 今月十五日昧爽以前 三月五日。「今月十五日」應作「今月五日」,衍一「十」字。 蕭衍於三月癸巳受梁王之命,卽日下赦令。 文館詞林六九五無「十」字。 是年三月己丑朔, 癸巳爲

梁書卷一

本紀第二

武 帝 中

情,用 惟能是授,天命不于常,帝王非一族。唐謝虞受,漢替魏升,爰及晉、宋,憲章在昔。 康世 之君,蹶 長,肆厥姦回暴亂,以播虐于我有邦,俾溥天惴惴,將墜于深壑。九服八荒之內,連率岳 德 用 馭 玄牡,昭告于皇天后帝:齊氏以曆運斯旣,否終則亨,欽若天應,以命于衍。 一,實 四 天監元年夏四月丙寅,高祖卽皇帝位於南郊。 拯 海,元功子萬姓,故能大庇氓黎,光宅區宇。 角 兆民之切。 有厥勞。 頓顙,匡救無術,臥薪待然,援天靡訴。 而 **晷緯呈祥,川岳効祉,朝夕坰牧,日月郊畿。** 銜膽誓衆,覆銳屠堅,建立人主,克翦昏亂。 齊代云季,世主昏凶,狡焉羣慝,是崇是 設壇柴燎,告類于天曰:「皇帝臣衙, 行投袂星言,推鋒萬里,[1] 厲其掛冠之 遂因時來,宰司邦國,濟民 代終之符旣顯,革運之期 夫任 是司牧, 咸以君 牧

本

紀

第

武

帝中

用

永保于我有

梁。

惟明靈是饗

監 老 周 不 言前 股 獲 以 所 知 元 蹤,義 寡闇 收。 年。 命,寅 以 攸 禮 改 濟。 畢 命 物。 備 其 賜 畏 均 犯 民 洪 慙德。 亦 F 法駕即建康宮,臨太極前 基初 鄕 爵 雖禪代相舛,遭會異時,而微明迭 靈, 先後,寧濟之功,屬當 論 二級;文武 兆 清議,贓汙 用膺景業。 齊氏以代終有徵,歷數 一萬品 權 加加 ?淫盜,一 輿, 位 執 二等; 思俾慶澤, 期運 皆蕩滌,洗 殿。 鰥寡 乘 韶曰:「五精遞襲,皇王所以受命;四 云改,欽若前 孤 覃被率土。 此 獨不 與能 時來,因心萬物,遂振 用 除 能 ,其流遠矣。 之祚, 前 自 注 存 載, 與之 可 繼 渚, 大 迹 集大 更始 赦 人 白 莫不振民育德, 穀 天下 八命于 王, Ŧi. 君 o 斛。 厥 股 臨 改齊 弛 躬。 維、大 四 逋 海, 中 布 顧 海樂推,殷、 、口錢、宿債 興二年 惟 若 造 光被黎元。 非 沙大 品 德, 夏 爲天 إال 永 辭

制度、皆用齊典。 封 齊帝 爲 巴 陵王, 齊宣德皇后爲齊文帝妃,齊后王氏爲巴陵王妃。 全食 郡。 載 天子 旌 旗, 乘五 時副車。 行齊正朔。 郊祀天地,禮

詔 曰:「興運升降,前代舊章。 齊世王侯封爵,悉皆降省。 其有効著艱難者,別有後命。

惟宋汝陰王不在除例。」

叉 詔 日 大運肇升,嘉慶惟始,劫賊餘口沒在臺府者,悉可蠲放。 諸流徙之家, 並聽

還本。」

爲 長沙郡王、諡 追尊皇考爲文皇帝,廟曰太祖;皇妣爲獻皇后。 日宣武; 齊後軍諮議 敷爲 永陽郡王,諡 追諡妃都氏為德皇后。 日|昭; 弟齊太常暢爲衡陽郡王,諡 追封兄太傅懿

宣,齊給事黃門侍郎融爲桂陽郡王,諡曰簡。

宏 為揚州 是日, 刺 詔封 史,封爲 文武功臣 臨 JII郡 新除車騎將軍夏侯詳等十五人爲公侯,食邑各有差。 王 南徐州 刺史秀安成郡王;雍州刺史偉建安郡王;左衞將軍恢 以弟中護軍

鄱陽郡王,荆州刺史憺始興郡王。

爲 中 ·書監 丁 卯, 加 撫軍將軍,吏部尚書沈約爲尚書僕射,長兼侍中范雲爲散騎常侍、 領 軍將軍王茂鎭軍將軍。以中書監王亮爲尙書令、中軍將軍,相 吏部 國左長史王瑩 尚書。

拘 逼不一。 ,西解暴室,諸 詔 宗宋氏 撫絃 以來,並恣淫侈,傾宮之富,遂盈 命管,良家不被蠲;織室繡房,幽 如 此例,一 皆放遣。 若衰老不能自存,官給廩食。」 製千。 厄猶 見役。 推算五都,愁窮 弊國 傷和 ,莫斯爲甚。 四 海, 並嬰罹 凡後宮 冤横,

三六

將 西將軍 軍 戊 河南 安西將 辰 車 王 騎 吐谷渾休留代進號征西將軍。 軍宕昌王 將 軍 高句驪王高雲進號車 梁彌領進號鎮 西將軍 ·騎大將軍。 巴陵王薨于姑孰, 鎭 東大將軍倭王武 鎭東 大將軍百濟王 追諡爲齊和帝, 進號征 餘 東大將軍 大 進號征東大 終禮一依 \exists 鎭

己 已, 以光祿大夫張褒爲右光祿大夫。 庚午,鎮南將軍、江州刺史陳伯之 進號 征南

將軍。

故

者 基, 輶 張,置之仁壽;而明慚照遠,智不周物,兼以歲之不易, 治方,藉代終之運,當符命之重,取監前古,懍若馭朽。 分遣內侍,周 一悉隨 軒 四 所 詔 載斯履。 屆, 曰:「觀風省俗,哲后弘規,狩岳巡方,明王盛軌。 事 如 以 聞。 省四方,觀政聽謠,訪賢 股 故能物色幽微,耳目屠釣,致王業於緝熙,被淳風 親 題馬 若懷 寶迷邦,蘊奇待價,蓄響藏眞,不求聞達,並依名 (舉滯。 其 有田 野 不闢,獄訟 未遑卜征,興言夕惕,無忘鑒寐 思所 所以重華在上,五品聿脩,文命肇 以振 無章,忘公殉私, 民育德,去殺 於遐邇。朕 騰奏、罔 以寡薄,昧于 勝殘,解 或 遺隱。 侵漁是務 網 使 可 更

偷 薄成風,嬰諐入罪,厥塗匪一。 叉 詔 曰:「金作贖刑,有聞 自昔,入縑 斷弊之書,日纒於聽覽;鉗釱之刑,歲積於牢犴。 以免,施於中世,民悅法行,莫尙 乎此。 永 言 死者不 叔

擇其 可 復 令典, 生,刑 漢文四百,邈焉已遠。 者 有可以憲章邦 無因自返,〔三由此而望滋 國,罔不由之。 雖省事淸心,無忘日用,而委銜廢策,事未獲從。 實,庸可致乎。朕夕惕思治,念崇政 釋愧 心 於四海、昭情素於萬 物。 俗偽 術, 可依周、漢舊 日 斟酌前王, 久,禁網 彌

改南 南 蘭 陵武 東海為蘭陵郡。 辛未,以中領軍蔡道恭爲司州刺史。 進縣,依前代之科。 土斷南徐州諸僑郡縣 徵謝朏爲左光祿大夫、開府儀同三司,何胤爲右光祿大夫。 以新除謝沐縣公蕭寶義爲巴陵王,以奉 齊 祀。 復

典,有罪入贖,外詳爲條格,以時奏聞

然,受困包匭,夫大政侵小,豪門陵賤,四民已窮,九重莫達。 可策、犀兕徒弊、龍蛇方縣;次身才高妙,擯壓莫通,懷傳、呂之術,抱屈、賈之歎,其理有 公車府謗木肺石傍各置一函。若肉食莫言,山阿欲有横議,投謗木函。若從我江、漢,功在 癸酉,詔曰:「商俗甫移,遺風尙熾,下不上達, 由來遠矣。升中馭索, 增其懍然。 若欲自申,並可投肺石函。」 可於 皦

甲戌,詔斷遠近上慶禮。

具瞻 斯在。 振衣朝伍,長揖卿相,趨步廣闥,並驅丞郎。 又詔曰:「禮聞文閣,宜率舊章,貴賤旣位,各有差等,俯仰拜伏,以明王度,濟濟洋洋, 頃因多難, 治綱弛落,官非積及,榮由幸至。六軍尸四品之職,青紫治白簿之 遂冠履倒錯,珪甑莫辨。 靜言疚懷,思返

本紀

第

流弊。 且翫法惰官,動成逋弛,罰以常科,終未懲革。 夫**檟楚申威,蓋代斷趾,**笞捶有令,如

或可從。外詳共平議,務盡厥理。」

癸未,詔「相國府職吏,可依資勞度臺,若職限已盈,所度之餘,及驃騎府,並可賜滿。」

閏月丁酉,以行<u>宕昌王梁彌邕爲安西將軍、河凉二州刺史,正封宕昌王</u>。 壬寅,以車騎

將軍夏侯詳爲右光祿大夫。

詔曰:「成務弘風,肅厲內外,寔由設官分職,互相懲糾。 而頃壹拘常式,見失方奏,多

容違惰,莫肯執咎,憲網日弛,漸以爲俗。今端右可以風聞奏事,依元熈舊制。」

之舉兵反,以領軍將軍王茂爲征南將軍、江州刺史,率衆討之。 五月乙亥夜,盜入南、北掖,燒神虎門、總章觀,害衞尉卿張弘策。 戊子,江州刺史陳伯

六月庚戌, 以行北秦州刺史楊紹先爲北秦州刺史、武都王。 是月,陳伯之奔魏, 江州

平。前益州刺史劉季連據成都反。

压。 丁未, 詔中書監王瑩等八人參定律令。是月, 詔尚書曹郎依昔奏事。 八月戊戌,置建康三官。乙巳,平北將軍、西涼州刺史象舒彭進號安西將軍,封鄧至 林邑、干陁利國

各遺使獻方物。

冬十一月己未,立小廟。甲子,立皇子統爲皇太子。

十二月丙申,以國子祭酒張稷爲護軍將軍。 辛亥,護軍將軍張稷免。

是歲大旱,米斗五千,人多餓死。

除 恢 九牧遐荒, 網,斯政又闕,牢犴沉壅, 刑,深戒疑枉,成功致治, 確實。」 爲南 左光祿大夫王亮免。 一年春正月甲寅朔,詔曰:「三訊五聽,著自聖典, 徐州 乙卯,以尚書僕射 無因臨覽。 刺史;尚書令王亮爲左光祿大夫;右衞將軍 深懼懷寃就鞫,匪惟一方。 申訴靡從。 沈約爲尚書左僕射; 罔不 由茲。 朕屬當期運,君臨兆億,雖復齋居宣室, 朕自藩部, 吏部尚書范雲爲尚書右僕射, 常躬訊錄, 可申敕諸州, 哀矜折獄,義重前誥,蓋所以明愼用 柳慶遠爲中領軍。 求理 月一臨訊, 得情,洪細 丙辰,尚書令、新 博詢擇善, 必盡。 前將軍 留 心 聽斷 鄱 末運弛 務在 陽 而 王

夏 四月癸卯,尚書删定郞蔡法度上梁律二十卷、冷三十卷、科四十卷。

五. 月丁已, 尚書右僕射范雲卒。 乙丑,益州 刺史鄧元起克成都,曲 赦益 州 申,斷諸

郡 縣獻奉二宮。 惟諸州及會稽,職惟嶽 牧,許薦 任土,若非地產,亦不

多癘疫。 六月丁亥,詔以康陽、信安、豐安三縣水潦,漂損居民資業,遣使周履,量 以新 除左光祿大夫謝朏爲司徒、尚書令。 甲午,以中書監王瑩爲尚書右僕射 蠲 課 調。 是夏

四〇

秋七月, 扶南、龜茲、中天竺國各遣使獻方物。

冬十月,魏寇司州

十一月乙卯,雷電大雨,晦。 是夜又雷。 乙亥,尚書左僕射沈約以母憂去

營爲尚書左僕射,太子詹事柳惔爲尚書右僕射,前尚書左僕射沈約爲鎭軍將軍。 三年春正月戊申,後將軍、揚州刺史臨川王宏進號中軍將軍。 癸丑,以尚書右僕射王

二月,魏陷梁州。

三月,隕霜殺草。

五月丁巳,以扶南國王憍陳如闍耶跋摩爲安南將軍。

害,抑鬱無歸,聽詣使者,依源自列。 致災邦國,西土孤魂,登樓請訴。 撫。 風 凋,久曠茲典,雖欲肆遠忘勞,究臨幽仄,而居今行古,事未易從,所以日晏踟蹰,情同再 總總九州,遠近民庶,或川路幽遐,或貧羸老疾,懷冤抱理,莫由自申,所以東海匹婦, 六月丙子,詔曰:「昔哲王之宰世也,每歲卜征,躬事巡省,民俗政刑,罔不必逮。 念此于懷, 中夜太息。 庶以矜隱之念, 昭被四方, 遏聽遠聞, 事均親覽。」癸 可分將命巡行州部, 其有深寃鉅 末代

未,大赦天下。

秋七月丁未,以 光 禄大夫夏侯詳爲車騎將軍、 湘州刺 史, 湘州 刺史楊公則為 中護

甲子,立皇子綜爲豫章郡王。

八月,魏陷司州,詔以南義陽置司州。

九月壬子,以河 南王世子 伏連籌 爲鎭 西將軍 西秦河二州刺 史、 河南王。 北天 丛 或

使獻方物。

息。 贖,以全元元之命。 **外矣,嬰網陷辟,日夜相** 可除贖罪之科。」 冬十一 月甲子,詔曰:「設敎因時,淳薄異政, 今遐邇 · 葬。 知禁, 若悉. 加正法,則赭 圄犴稍虚, 衣 塞路 率斯 刑以 以往, ·; 並 世革, 申 弘 庶幾 輕重殊風。 宥, 刑 則 措。 難 用 金作權 爲 昔商俗未移、民散 國 ,故使 典 宜 有 在 罪 蠲

是歲多疾疫。

徐州 顏,勿限 刺 四 大禋 史鄱 年 春 陽 年 Ē 郊饗帝 王恢 次。」置五經博士各一人。 月癸卯朔, ,至敬攸在,致誠盡慤,猶懼有違,而往代多令宮人縱觀茲禮,惟 爲郢 州刺 韶曰:「今九流常選,年未三十,不通一經, 史, 中 領軍 柳慶遠為雍 以鎭: 北將軍、雍州刺 州 刺 史。 史建安王偉 丙午, 省鳳皇銜書伎。 不得解褐。 為南 徐 州 若有才 刺 宮廣設、 戊申, 史,南 同

本

紀

第

武

帝

中

輜軿耀路,非所以仰虔蒼昊,昭咸上靈。 屬車之間,見譏前世,便可自今停止。」辛亥,輿駕

親祠南郊,赦天下。

討平之。曲赦交州。 二月壬午,遣衞尉卿楊公則率宿衞兵塞洛口。 戊戌,以前郢州刺史曹景宗為中護軍。是月,立建興苑於秣陵建興里。 壬辰, 交州刺史李凱據州反, 長史李畟

夏四月丁巳,以行宕昌王梁彌博爲安西將軍、河凉二州刺史、宕昌王。 是月,自甲寅至

壬戌,甘露連降華林園。

五月辛卯,建康縣朔陰里生嘉禾,一莖十二穗。

六月庚戌,立孔子廟。 壬戌,歲星晝見。

秋七月辛卯,右光祿大夫張壤卒。

八月庚子,老人星見。

冬十月丙午,北伐,以中軍將軍、揚州刺史臨川王宏都督北討諸軍事,尚書右僕射柳惔

爲副。 是歲,以興師費用,王公以下各上國租及田穀,以助軍資。

十一月辛未,以都官尚書張稷爲領軍將軍。甲午,天晴朗,西南有電光,聞如雷聲三。

十二月,司徒、尚書令謝朏以所生母憂,去職

是歲大穰,米斛三十。

凡諸 朕 用 王瑩爲護軍將軍,僕 司徒、衞將軍,鎭 隔 以菲德,君此兆民,而兼明廣照,屈於堂戶,飛耳長目, 郡 聽覽, 五. |年春正月丁卯朔,詔曰:「在昔周、漢, 國 舊族邦內無在朝位 士操 流淪胥, 軍將軍 射 因茲靡勸。 如 沈約 故。 者, 爲右光祿大夫,豫章王綜爲南徐州刺 甲申,立皇子綱 選官搜括, 豈 其 岳瀆 使郡有一人。」乙亥,以前司徒謝朏 **《縱靈,偏有厚薄,寔由** 取士方國。 爲晉安郡王。 不及四方, 頃代凋訛,幽仄罕被, 丁亥,太白晝 史。 知與不知、用 永言愧懷, 1 見。 丑: 一,以尚 無忘 人孤 與不 爲中書監、 書左僕射 地絕, 旦夕。 甪 耳。

二月庚戌,以太常張充爲吏部尚書。

青州 刺史元繋 三月丙寅 朔, 於 膠水。 日有 ·蝕之。 丁亥,陳伯 癸未,魏宣武帝從弟翼率其諸弟來降。 之自壽陽 率衆歸降 輔 國將軍劉思效破

情。 居,惟刑是恤,三辟五聽, 而 夏四 明愼 月 丙 未洽,囹圄尚 申,廬陵高昌之仁山 壅,永言納隍,在予興愧。 寢 興載懷。 獲 銅劍二, 故陳 肺 石於 始豐縣獲 、都街, 凡犴獄之所, 八目龜 增官司 於詔 • 可遣法官近侍,遞錄 甲寅, 獄, 殷懃親 詔曰:「朕昧 覽, 小 囚徒, 大以 且 齌

如有枉滯,以時奏聞。」

五 月辛未 ,太子左衞率張惠紹克魏宿預城。至乙亥, 臨川王宏前軍 克梁城。 辛巳, 豫

梁 卷 四四四

丁亥,廬江太守裴邃克羊石城,庚寅,又克霍丘城。

辛

卯,

太白

晝見。

州

刺史韋叡克合肥城。

六月庚子,青、冀二州刺史桓和前軍克朐山城。

秋七月乙丑,鄧至國遣使獻方物。

八月戊戌,老人星見。辛酉,作太子宮。

冬十一月甲子,京師地震。 乙丑,以師出淹時,大赦天下。 魏寇鍾離,遺右衛將軍曹景

宗率衆赴援。

十二月癸卯,司徒謝朏薨。

延首,無因奏達。 思 民,淪礙幽遠,不能自通者,可各詮條布懷於刺史二千石。 曰:「夫有天下者,義非爲己。 闡政術,雖百辟卿士,有懷必聞,而蓄響邊遐,未臻魏闕。 六年春正月辛酉朔,詔曰:「徑寸之寶,或隱沙泥,以人廢言,君子斯戒。 **豈所以沉浮靡漏,遠邇兼得者乎?** 凶荒疾癘,兵革水火,有一於此,責歸元首。 四方士民,若有欲陳言刑政, 有可申採,大小以聞。」己卯,詔 或屈以貧陋,或問 今祝 以 **股聽朝晏罷** 史請 Щ 川,頓足 益國 利

諸不善,以朕身當之,永使災害不及萬姓,俾茲下民稍蒙寧息。

不得爲朕祈福,以增其過。

特班遠邇,咸令遵奉。」

二月甲辰,老人星見。

三月庚申朔,隕霜殺草。是月,有三象入京師

書右僕 斬 獲 萬計。 夏 射, 四四 月壬辰, 中書令安成王秀爲平南將軍、江州 癸卯, 以右 置左右驍騎、左右游擊將軍官。 衞將軍曹景宗爲領軍將軍、徐州刺史。 刺史。 癸巳,曹景宗、韋叡等破魏軍於邵陽洲 分湘 廣二 州置衡州。 己 酉, 以江州刺史王茂 丁巳, 以 中 爲尚 軍 將

大夫沈約 爲尚書左僕射,尚書左僕 射 王瑩爲中軍 將 軍。

軍、揚州

刺

史臨川王宏爲驃騎將軍、開府儀

同三司,

撫

派軍將軍

建安王偉爲揚州刺

史,右

光

禄

己巳,置中 五 月己未, 衞、中權 以 新 除 將軍,改驍騎 左驍騎將軍長沙王深業爲 爲雲騎,游擊爲游騎。 中 護 軍。〔六〕癸亥, 辛未,右 將軍、揚州 以侍中袁昂為吏部尚 刺 史建安

偉進號中權將軍。

安南 將軍 六月 、湘州 庚 戌, 以 刺 車騎將 史。 新吳縣 軍、湘州 獲 四 刺 目 史夏侯詳 龜 0 爲右光祿大夫,「引新除金紫光祿大夫柳惔

爲

秋 七 月甲子, 太白晝見。 丙寅, 分廣州置桂州。 丁亥,以新除尚書右僕射王茂爲中衞

將軍。

本紀第二 武帝中

四六

八月戊子,赦天下。 戊戌,大風折木。 京師大水,因濤入,加御道七尺。

戌,以左衞將軍呂僧珍爲平北將軍、南兗州刺史,豫章內史蕭昌爲廣州刺史。 九月,嘉禾一莖九穗,生江陵縣。 乙亥,改閱武堂爲德陽堂,〔八〕聽訟堂爲儀賢堂。 丙

冬十月壬寅,以五兵尚書徐勉爲吏部尚書。

號安西將軍。 爲尚書令、行太子少傅,吏部尚書袁昂爲右僕射。〔云〕戊寅,平西將軍、荆州刺史始興王憺進 閏月乙丑,以驃騎將軍、開府儀同三司臨川王宏爲司徒、行太子太傅,尚書左僕射沈約 甲申,以右光祿大夫夏侯詳爲尚書左僕射。[10]

十二月丙辰,尚書左僕射夏侯詳卒。 乙丑,魏淮陽鎮都軍主常邕和以城內屬。分豫州

置霍州。

德,使陶鈞遠被,微言載表。」 中衞將軍、領太子詹事|王茂進號車騎將軍。 戊戌,作神龍、仁 光宅區字,雖耕耘雅業,傍闡藝文,而成器未廣,志本猶闕,非所以鎔範貴遊,納諸軌度。 欲式敦讓齒,自家刑國。今聲訓所漸,戎夏同風,宜大啓庠勢,博延胄子,務彼十倫,弘此三 七 年春正月乙酉朔,詔曰:「建國君民,立教爲首。不學將落,嘉植靡由。 朕肇基明命, 思

虎闕於端門、大司馬門外。壬子,以領軍將軍曹景宗爲中衞將軍,衞尉蕭景兼領軍將軍。

以 高 中 雲 護 爲 庚午,詔於 二月乙卯,廬江灊縣獲銅鍾二。 撫 軍 長 東大將軍、〇〇〇開府儀同三司,平北將軍、南兗州刺史呂僧珍爲領軍將軍。 沙王深業爲南兗州刺史,兼領軍將軍蕭景爲雍州刺史,雍州刺史柳慶遠爲護軍 州郡縣置州望、郡宗、鄕豪各一人,專掌搜薦。 新作國門于越城南。 乙丑,增置鎭衞將軍以下各有 乙亥,以車騎大將軍高麗王 丙子,

0 夏四月乙卯,皇太子納妃,赦大辟以下,頒賜朝臣及近侍各有差。 辛未,秣陵縣獲靈龜

丘月71亥,詔复置宗臣、太菐、大茊、一。戊寅,餘姚縣獲古銅劍二。

將

平 南 將軍、江州 五 月己亥, 刺史安成王秀爲平西將軍 詔 復置宗正、太僕、大匠、鴻臚,又增太府、太舟,仍先爲十二卿。 一、荆州 刺 史,安西將軍 、荆州刺史始興王憺爲護軍 癸卯,以

將軍,中衞將軍曹景宗爲安南將軍、江州刺史。

秋七月丁 六月辛酉 亥, ,復建、修二 月犯氐 陵 周 回五 里內居民,改陵監爲令。

軍 荆 八 州 月癸丑 刺史安成王 ,安南將軍、江州 秀進號安西將軍, 刺史曹景宗卒。 雲摩將軍、郢州刺史都陽 丁巳,赦大辟以下未結正 王恢進號平 者。 西將軍 甲戌,平西將 老

星見。

本紀第二 武帝中

斧斤之用,比屋所資。 見封熂者, 九月丁亥,詔曰:「芻牧必往,姬文垂則,雉兔有刑,姜宣致貶。〔二〕藪澤山林,毓材是出, 可悉開常禁。」壬辰,置童子奉車郎。 而頃世相承,並加封固,豈所謂與民同利,惠茲黔首? 癸巳, 立皇子績爲 南康郡 凡公家諸屯戍 己亥, 月

舉 北伐。 瓠鎭軍主白阜生、自己豫州刺史胡遜以城內屬,以阜生爲鎭北將軍 冬十月丙寅,以吳興太守張稷爲尙書左僕射。 以護軍將軍始興王憺爲平北將軍,率衆入淸, 丙子,魏陽關主許敬珍以城 車騎將軍王茂率衆向宿預。 、司州刺史, 內附。 遜爲平 1 韶大 犯東井。

十一月辛巳,鄞縣言甘露降。

北

將軍、豫州刺史。

魏

懸

八年春正月辛巳,輿駕親祠南郊,赦天下,內外文武各賜勞一年。 壬辰,魏鎮東參軍成

景儁 斬宿 預 城主嚴仲實,口以城內屬。

月壬戌,老人星見。

太傅臨川王宏爲司空、揚州刺史,車騎將軍、領太子詹事王茂卽本號開府儀同三司。丁卯, 夏四月,以北巴西郡置南梁州。 戊申,以護軍將軍始興王憺爲中衞將軍,司徒、行太子

魏楚王 城主李國興以城 內附。 丙子,以中軍將軍、丹陽 尹王瑩爲右光祿 大夫。

軾 始 閭 末無倦者,策實之後,選可量加敍錄。 闢 五. 館,造次以之。 月壬午,詔 日 :「學以從政,殷勤往哲,祿在其 故負袟成風, 甲科間出,方當置諸周行, 雖復牛監羊肆,寒品後門,並隨才試 、中,抑 亦前 事。 飾 以青紫。 肸 思闡 治綱,每 其有能通 吏, 勿有 敦儒 經、 術,

秋七月癸巳,巴陵王蕭寶義薨。

遺隔。」

八月戊午,老人星見。

冬十月乙巳,以中軍將軍始興王憺爲鎭北將軍、南兗州刺史,曰司南兗州刺史長沙王深

業爲護軍將軍。

新 將軍、益州刺史,太常卿王亮爲中書監。 王瑩爲尚書令,行中撫將軍建安王偉領護軍將軍,鎭北將軍、南兗州刺史始興王憺爲鎭西 作緣淮塘,北岸起石頭迄東冶,南岸起後渚籬門迄三橋。 九 年春正月乙亥,以尚書令、行太子少傅沈約爲左光祿大夫,行少傅如故,右光祿大夫 丙子,以輕 車將軍晉安王綱爲南兗州刺史。 庚寅,

月己丑,車駕幸國子學,親臨講肆,賜國子祭酒以下帛各有差。 乙未,詔曰:「王子從

斯以降,並宜肄業。 學,著自禮經,貴遊咸在,實惟前誥,所以式廣義方,克隆 皇太子及王侯之子,年在從師者,可令入學。」于闐 一教道。 今成均大啓, 元良齒讓, 國遣使獻 方 物。 自

夏四月丁巳,革選尚書五都令史用寒流。 林邑國遣使獻白猴 0

宜,若非總會衆言,無以備茲親覽。 五月己亥,詔曰:「朕達聽思治,無忘日昃,而百司羣務,其途不一,隨時適用, 自今臺閣省府州郡鎮戍應有職僚之所,時共集議,各陳 各有攸

六月癸丑,盜殺宣城太守朱僧勇。 癸酉,以中撫將軍、領護軍建安王偉爲鎭南將軍、江 損益,具以奏聞。」中書監王亮卒。

州刺史。

閏月己丑,宣城盜轉寇吳興縣,太守蔡撙討平之。

秋七月己巳,老人星見。

冬十二月癸未,輿駕幸國子學,策試胄子,賜訓授之司各有差。

張稷 章王綜爲郢州刺史,輕車將軍南康王績爲南徐州刺史。 爲安北將軍、靑冀二州刺史,郢州刺史鄱陽王恢爲護軍將軍。甲辰,以南徐州刺史豫 十年春正月辛丑,輿駕親祠南郊,大赦天下,居局治事賜勞二年。 戊申,騶虞一,見荆州華容縣。 癸卯,以尙書左僕射

左民尚書王陳爲吏部尙書。辛酉,輿駕親祠明堂。

三月辛丑,盗殺東莞、琅邪二郡太守鄧晰,口心以朐山引魏軍,遣振遠將軍馬仙碑討之。

是月,魏徐州刺史盧昶帥衆赴朐山。

夏五月癸酉,安豐縣獲一角玄龜。[1+3丁丑,領軍呂僧珍卒。 己卯,以國子祭酒張充爲

尚書左僕射,太子詹事柳慶遠爲領軍將軍。

六月乙酉,嘉蓮一莖三花生樂遊苑。日日

羣務。 秋 晉氏陵替,虛誕爲風,自此相因,其失彌遠,遂使武帳空勞,無汲公之奏,丹墀徒關, 七月丙辰,詔曰:「昔公卿面陳,載在前史,令僕陛奏,列代明文,所以釐彼庶績,成茲

闕鄭生之履。 三槐八座,應有務之百官,宜有所論,可入陳啓,庶藉周爰,少匡寡薄。」

九月丙申,天西北隆隆有聲,赤氣下至地。

是歲,初作宮城門三重樓及開二道。 冬十二月癸酉,山車見于臨城縣。 庚辰,馬仙琕大破魏軍,斬馘十餘萬,剋復朐山城。 宕昌國遺使獻方物。

哀矜,故罰有弗及。 十· 年春正月壬辰,詔曰:「夫刑法悼耄,罪不收孥,禮著明文, 近代相因,厥網彌峻,髫年華髮,同坐入譽。 雖懲惡勸善,宜窮其制,而 史彰前 事,蓋所以申其

本

紀第

海

帝中

老幼流離,良亦可愍。 自今逋讁之家及罪應質作,若年有老小,可停將送。」加左光祿大夫、

行太子少傅沈約特進。 鎮南將軍、江州刺史建安王偉儀同三司。 司空、揚州刺史臨川王宏

驃騎將軍王茂爲司空。日己尚書令、雲麾將軍王瑩進號安左將軍。

安北將軍

青冀二州刺史張稷進號鎭北將軍。[10]

進位爲太尉。

二月戊辰,新昌、濟陽二郡野蠶成繭。

三月丁巳,曲赦揚、徐二州。 築西靜壇於鍾山。 庚申,高麗國遣使獻方物。

埋紫,仁者用 四月戊子,詔曰:「去歲朐山大殲 ۱Ļ 其下青州悉使收藏。」百濟、扶南、林邑國並遣使獻方物。 。醜類,宜爲京觀,用旌武功,但伐罪弔民,皇王盛軌,掩

六月辛巳,以司空王茂領中權將軍。

骼

九月辛亥,宕昌國遣使獻方物。

冬十一月乙未,以吳郡太守袁昂兼尚書右僕射。 己酉, 降太尉、 揚州刺史臨川王宏爲

驃 騎將軍、開府同三司之儀。 癸丑,齊宣德太妃王氏薨

將軍、荆州刺史。

十二月己未, 以安西將軍 、荆州刺史安成王秀爲中衞將軍, 護軍將軍鄱陽王恢爲平西

Ŧi

十二年春正月辛卯,輿駕親祠南郊,赦大辟以下。

十三間。 衣莫改,卽就收斂,量給棺具。 洽,髐然路隅,往往而有,言愍沉枯,彌勞傷惻。 **槥櫝有加,事美漢策。** 二月辛酉,以兼尚書右僕射袁昂爲尚書右僕射。〔三〕丙寅,詔曰:「掩骼埋胔,義重周經, 朕向隅載懷,每勤造次,收藏之命,亟下哀矜;而寓縣遐深,遵奉未 庶夜哭之魂斯慰,霑霜之骨有歸。」辛巳,新作太極殿,改爲 可明下遠近,各巡境界,若委骸不葬,或蒢

三月癸卯,以湘州刺史王珍國爲護軍將軍。

閏月乙丑,特進、中軍將軍沈約卒。

夏四月,京邑大水。

六月癸巳, 新作太廟, 增基九尺。庚子, 太極殿成。

驃騎將軍、開府同三司之儀、揚州刺史臨川王宏爲司空;領中權將軍王茂爲驃騎將軍、開府 秋九月戊午, 以鎮南將軍、開府儀同三司、江州刺史建安王偉為撫軍將軍,儀同如故,

同三司之儀、江州刺史。

冬十月丁亥,詔曰:「明堂地勢卑濕,未稱乃心。外可量就埤起,以盡誠敬。」

本

陽王恢爲鎭 一年春 西將軍、益州 正月壬戌,以丹陽尹晉安王綱爲荆州刺史。 刺史。 丙寅,以翊右將軍安成王秀爲安西將軍、郢州 癸亥,以平西將軍、 刺史。 荆州 刺史鄱

二月丁亥,輿駕親耕籍田,赦天下,孝悌力田賜爵一 級。 老人星見。

三月辛亥,以新除 中撫將軍、開府儀同三司建安王偉爲左光祿大夫。

夏四月辛卯,林邑國遣使獻方物。 壬辰,以郢州刺史豫章王綜爲安右將軍。

五月辛亥,以通直散騎常侍韋叡爲中護軍。

秋七月乙亥,立皇子編爲邵陵郡王,釋爲湘 六月己亥,以南兗州 刺史蕭景 爲領軍將軍,領軍將軍柳慶遠爲安北將軍、雍州刺史。 東郡王、紀爲武陵郡王。

八月癸卯,扶南、于闐國各遣使獻方物。

是歲作浮山堰。

將軍。 蒼璧,柴望旣升,誠敬克展,思所以對越乾元,弘宣德教;而缺于治道,政法多昧,實佇羣才, 停遠近 十 ·四年春正月乙巳朔,皇太子冠,赦天下,賜爲父後者爵一級,王公以下班賚各有差, E 辛亥,輿駕親祠 一慶禮 丙午,安左 南郊。 一將軍、尚書令王瑩進號 詔 曰:「朕恭祗 明祀,昭 中權 事 將 上 軍 靈,臨竹宮而登泰壇, 以鎭 西將軍始興王憺 服裘冕 爲 中撫 而 奉

待 用 庶 百 時 康 未 庶績。 司 成事 加 收採;或賢良、方正,孝悌、力田,並 ,兆民 可班 下遠近,博採英異。 無隱。 叉世 輕世重,隨時約法,前以 若有確然鄉黨,獨行 卽騰奏, 具以名上。 **劓墨,用代重辟,** 州閭, 肥遁丘園,不求 當擢 彼周行, **猶念改悔**, 聞達, 試 以邦邑, 其路已 藏器

月庚寅,芮芮國遣使獻方物。 戊戌,老人星見。 辛丑,以中護軍韋叡爲平北將軍、雍

州刺史,新除中撫將軍始興王憺爲荆州刺史。

並

可省除

。」丙寅,汝陰王劉胤

夏 四 月丁 丑,驃 騎 將 軍、開 府同 三司之儀 江州 刺 史王茂薨。

五月丁巳,以荆州刺史晉安王綱爲江州刺史

秋八月乙未,老人星見。

九 月癸亥 了, 以 長 沙 主 深業 爲護軍 一將軍。 狼牙脩 國遣使獻 方 物。

侵漁 載 此 懷 作。 爲 十 朝 蠹 五. 頃 玉 因 年 帛 分 革之令,隨事 春正月己已,詔 别 而 奏 興 上, 歎 將 口 行 申 必 黜 下, 下 日三觀時設教,王政所先,兼 陟 匹 而 方, 張 長 政 弛 吏勸課,躬履堤防,勿有 有 之要,未臻厥宜 不 便於民者,所 民 在 而 漢猶 具條 利之,寔惟 不脩,致妨農 「繁,廉」 以 聞 平 務本,移 守宰 尙 寒,所 事 若 清潔 風 關 以竚 致 市 之賦 沿,咸 可 旒 稱 纊 或 由 或 而

本

紀

第

武

帝

中

五六

有未允,外時參量,優減舊格。

三月戊辰朔, 日有蝕之。

夏四月丁未,以安右將軍豫章王綜兼護軍。 高麗國遣使獻方物。

五月癸未,以司空、揚州刺史臨川王宏爲中書監,驃騎大將軍 、刺史如故。

射 袁昂爲尚書左僕射,吏部尚書王陳爲尚書右僕射。 六月丙申,改作小廟畢。 庚子,以尙書令王瑩爲左光祿大夫、開府儀同三司,尙書右僕

秋 八月,老人星見。 芮芮、河南遣使獻方物。

九月辛巳,左光祿大夫、開府儀同三司王瑩薨。 壬辰,赦天下。

冬十月戊午,以丹陽 尹長沙王深業爲湘州刺史。

京師。 十一月丁卯,以兼護軍 曲 赦交州。 壬午,以雍州 豫章王綜爲安前將軍。 刺史章叡為護軍將 軍。 交州刺史李 數 交州 反者 阮宗孝,傳首

紀。 年三調。 十六年春正月辛未,輿駕親祠南郊,詔曰:「朕當扆思治,政道未明,昧旦劬勞,亟移星 今太皡御 其無田業者,所在量宜賦給。 氣 句芒首節,升中就陽,輕敬克展,務承天休,布茲 若民有產子, 即依格優蠲。 和 孤老鰥寡不能自存,咸 澤。 尤貧之家 ,勿收今

加 賑 卹。 班下四方。 諸州郡縣,時理 獄訟,勿使寃滯,並若親覽

二月庚 戌, 老人 `星見。 甲寅,以安前 :將軍豫章王綜爲南徐州刺史。

三月丙子,河南王遣使獻方物。

夏四月甲子,初去宗廟牲。三三潮溝獲白雀一。

六月戊申,以廬陵王續爲江州刺史。

七 月 T 丑: 以以 郢 州 刺 史安 成成 王秀為鎮北將軍 、雍州刺史。

冬十月,去宗廟薦脩,始用蔬果。八月辛丑,老人星見。扶南、婆利國各遣使獻

方

物。

十七七 舊所。 此 不樂還者, 本 志? 庶氓,無忘待旦,亟弘 车 + 資業殆闕,自返莫由,巢南之心,亦何 七年春正月丁巳朔,詔曰:「夫樂所自生,含識之常性;厚下安宅,馭世之通規。 正 將 月一 使 即使著 那 無曠 日 以 土籍 前 土,邑靡游民,鷄 可開恩伴 爲民, 生聚之略,每 准舊課輸。 歲,悉聽還本,獨 犬 布 相聞 寬 即之思 若流移之後,本鄉無復居宅者, 能弱。 桑柘 一; 課三年。 交畛。 今開 編戶未 元發歲,品物 凡天下之民, 其流寓過遠者 弦, 遷徙尙 惟新 有流 有, 了, 量 村司 思思 移 輕去故鄉, 加 他 俾 程 三老及餘 境, 黔黎, 日 在 进 各安 若 天 股 矜 監 其 親 有

本

紀

第

武

帝

中

屬, 盗衰減 即爲詣縣,占請村內官地官宅,曰司令相容受,使戀本者還有所託。 應被封籍者,回到其田宅車牛,是民生之具,不得悉以沒入,皆優量分留,使得自止。 凡坐為市埭諸職割

其商賈富室,亦不得頓相兼併。 遁叛之身,罪無輕重,並許首出,還復民伍。 若有拘限,自

還本役。並爲條格,咸使知聞。」

二月癸巳,鎭北將軍、雍州刺史安成王秀薨。 甲辰,大赦天下。 乙卯,以領石頭戍事南

康王績爲南兗州刺史。

三月甲申,老人星見。 丙申,改封建安王偉爲南平王。[1]

夏五月戊寅,驃騎大將軍、揚州刺史臨川王宏免。 己卯、干陁利國造使獻方物。 以領

軍將軍蕭景爲安右將軍,監揚州。 辛巳,以臨川王宏爲中軍將軍、中書監。

六月乙酉,以益州刺史鄱陽王恢爲領軍將軍。 中軍將軍、中書監臨川王宏以本號行司

徒。癸卯,以國子祭酒蔡撙爲吏部尚書。

秋八月壬寅,老人星見。 韶以兵騶奴婢,男年登六十,女年登五十,CIKJ 觅爲平民。

冬十月乙亥,以中軍將軍、行司徒臨川王宏爲 中書監、司徒。

十一月辛亥,以南平王偉爲左光祿大夫、開府儀同三司。

刺 史始 十八 興王 年春正月甲申,以領軍將軍鄱陽王恢爲 憺 爲 中 撫將 軍 、開 府 儀 同 三司、 領 軍。 征 以 西將軍、開府儀同三司、荆州 尚 書左 僕射 袁昂 爲尙 書令, 刺 尙 史, 書 荆 右 僕 州

一級。

射

王

暕

爲尙

書左僕射,太子詹事徐勉爲尚書右僕

射。

辛卯,

輿駕

親祠

南郊,

孝悌

力田

賜

二月戊午,老人星見。

四月丁巳,大赦天下。

秋 七月甲申,老人星見。 于闐、扶南國各遣使獻方物。

校勘記

推鋒萬里 推 殿本作「摧」,今從百衲本。 說見卷一校勘記第十條。

鎭 東大 將軍 倭王武進號征東大將軍 「征東大將軍」各本及倭國傳並作「征東將軍」。今據南史

倭國傳補。

≡ 刑 者無因自返 「刑」,各本作「生」,據齊史改。 按:此語本緹縈上書故事。 漢書刑 法志「死者

不可復生,刑者不可復屬。」

29 今遐 邇 知禁 「今」殿本作「令」,從百衲本。按:「今遐邇知禁」對上「昔唐俗未移」言,作「令」譌。

本

紀

第

校

勘

記

- \neg 五 太子 左衞率張惠紹克魏宿預城 「太子左衞率」張惠紹傳及通鑑皆作「太子右衞率」。
- 以新除左驍騎將軍長沙王深業爲 中護軍 長沙王本名淵業,因避唐諱, 或去「淵」字,或改「淵

爲「深」。後如此者,不再出校記。

- \sim . . --以車騎將軍湘州刺史夏侯詳爲右光祿大夫 「右」各本作「左」,據夏侯詳傳改。
- 乙亥改閱武堂爲德陽堂 「乙亥」各本作「丁亥」,據南史改。按:下有丙戌,則丁亥不得在前,作

「乙亥」是。

- **へ**た **い** 吏部尚書袁昂爲右僕射 「右」各本作「左」,據南史、通鑑並參照袁昂傳改。按:袁昂傳、昂於天
- 監六年徵爲吏部尚書,累表陳讓,徙爲左民尚書、兼右僕射。
- 以右光祿大夫夏侯詳爲尚書左僕射 傳,詳終於右光祿,今補正。 「光祿」上,各本脫「右」字。南史作「左」字, 亦誤。 按本
- 以車騎大將軍高麗王高雲爲撫東大將軍 九六三及本書東夷傳改正。 「撫東大將軍」各本作「撫軍大將軍」。 據南史、 册府
- 雉兔有刑姜宣致貶 牛運震空山堂集讀史糾繆八:「案孟子,殺其麋鹿者如殺人之罪。 非謂雉

冤也。宣王乃田齊,非姜齊。」

魏懸瓠鎭軍主白阜生 「白阜生」魏書宣武帝紀作「白早生」,通鑑從魏書。

- 魏鎭東參軍成景儁斬宿預城主嚴仲寶 「嚴仲寶」魏書宣武帝紀作「嚴仲賢」。
- 以中軍將軍始興王憺爲鎭北將軍南兗州刺史 蕭儋於本年四月爲 中衛 將 軍 o 此「中軍 將 軍」當

爲「中衞將軍」之譌。

- 三月辛丑盗殺東莞琅邪二郡太守鄧晰 夜,按是月丁酉朔,二十四爲辛酉,非辛丑。 通鑑考異據魏書盧昶傳 又「鄧晰」當依馬仙碑傳及魏書宣武帝紀、 以爲殺太守事 在三月二十四 盧昶傳
- 夏五月癸酉安豐縣獲一角玄龜 之丁丑、己卯。 四月丙寅朔,有癸酉、丁丑、己卯。 「五月」當作「四月」。 是年五月丙申朔,無癸酉,亦無下文所出

作「劉晣」。

- 六月乙酉嘉蓮一莖三花生樂遊苑 「六月」各本脫,建康實錄一七「乙酉」上有「六月」二字。 是年五月丙申朔,無乙酉。六月乙丑朔,乙酉爲六月二十一日,正蓮花開放之時。
- 年進 驃騎將軍王茂爲司空 位司空,改領中權將軍,至十二年始出爲使持節散騎常侍、驃騎將軍、都督江州諸軍事。此 將軍」當作「車騎將軍」。 按王茂傳,茂以天監七年拜車騎將軍,八年以本號開府儀同三司,十一
- 號,據 安北將軍靑冀二州 }張 稷 傳改。 刺史張稷進號鎭北將軍 「鎭北將軍」各本作「領北將軍」。時無領北將軍之

本

紀

森楷梁書校勘記云:「據下十五年以右僕射袁昂爲左僕射之文,則此不得是左僕射。」

夏四月甲子初去宗廟牲 通鑑不書日。 考異云:「按長曆是月辛卯朔,無甲子。」

占請村內官地官宅 「占」北監本、汲古閣本、殿本並譌「告」、今從百衲本、金陵局本。 按:

詞林六七〇、册府元龜一九一並作「占」。 占請,謂隱度其地而請之。

凡坐為 改。 市埭諸職割盗衰減應被封籍者 割盜衰減,是割盜諸稅及稅收衰減之意。 「減」各本作「滅」。 據文館詞林六七〇、 册府元龜一九

至 三月甲申老人星見丙申改封建安王偉爲南平王 是年三月丙辰朔,無丙申。「丙申」,建康實錄

作「丙寅」。但甲申又不應在丙寅前。

三台 男年登六十女年登五十 南史作「男年六十六,女年六十」。

梁書卷二

本紀第三

近帝下

史,安右將軍、監揚州蕭景爲安西將軍、郢州刺史。 勿收常調,鰥寡孤獨,並加贍卹。丙子,日有蝕之。己卯,以司徒臨川王宏爲太尉、揚州刺 普通元年春正月乙亥朔,改元,大赦天下,賜文武勞位,孝悌力田爵一級,尤貧之家, 尚書左僕射王陳以母憂去職,金紫光祿

大夫王份爲尚書左僕射。 庚子,扶南、高麗國各遣使獻方物。

癸丑,以高麗王世子安爲寧東將軍、高麗王。

三月丙戌,滑國遣使獻方物。

二月壬子,老人星見。

夏四月甲午,河南王遣使獻方物。

六月丁未,以護軍將軍韋叡爲車騎將軍。

六四

秋七月己卯,江、淮、海並溢。 辛卯,以信 威將軍邵陵王綸爲江州刺史。

八月庚戌,老人星見。甲子,新除車騎將軍韋叡卒。

九月乙亥,有星晨見東方,光爛如火。

冬十月辛亥,以宣惠將軍長沙王深業爲護軍將軍。 辛酉,以丹陽尹晉安王綱爲平西將

軍、益州刺史。

終其身。又於京師置孤獨園,孤幼有歸,華髮不匱。 乾覆,布茲亭育。凡民有單老孤稚不能自存,主者郡縣咸加收養,贍給衣食,每令周足,以 徐州刺史。辛巳,輿駕親祠南郊。 二年春正月甲戌, 以南徐州刺史豫章王綜爲鎭右將軍。 韶曰:「春司御氣,虔恭報祀,陶匏克誠,蒼璧禮備,思隨 若終年命,厚加料理。尤窮之家,勿收 新除益州刺史晉安王綱改爲

二月辛丑,輿駕親祠明堂。

租賦。」戊子,大赦天下。

三月庚寅,大雪,平地三尺。

上協星鳥,俯訓民時,平秩東作,義不在南。 夏四月乙卯,改作南北郊。 丙辰,詔曰:「夫欽若昊天,曆象無違,躬執耒耜,盡力致敬, 前代因襲,有乖禮制,可於震方,簡求沃野,具

茲千畝,庶允舊章。」

尤。 祥, 則 百辟體國之誠,朕懷良有多愧。 可 自今可停賀瑞。」 五月癸卯,琬琰殿火,门延燒後宮屋三千間。 無慚德;而政道多缺,淳化未凝,何以仰叶辰和,遠臻冥貺? 若其澤漏川泉,仁被動植,氣調玉燭,治致太平,爰降嘉 丁巳,詔曰:「王公卿士,今拜表賀瑞,雖 此乃更彰寡薄,重增其

六月丁卯,信威將軍、義州刺史文僧明以州叛 入于魏。行

秋 七月丁酉,假大匠卿裴邃節,督衆軍北討。 甲寅, 老人星見。 魏荆州刺史桓叔興帥

衆降。

冬十一月,百濟、新羅國各遣使獻方物。 八月丁亥,始平郡中石鼓村地自開成井,方六尺六寸,深三十二丈。

十二月戊辰,以鎭東大將軍百濟王餘隆爲寧東大將軍。

王份爲右光祿大夫。 三年春正月庚子,以尙書令袁昂爲中書監,吳郡太守王陳爲尙書左僕射,尙書左僕射 庚戌,京師地震。 己未,以宣毅將軍廬陵王續爲雍州刺史。

三月乙卯,巴陵王蕭屛薨。〔三〕

六六

夏四月丁卯,汝陰王劉端薨。

五. 月 壬辰 朔, 日有蝕之,旣。 癸巳,赦天下,並班下四方,民所疾苦, 咸卽以聞, 公卿 百

僚各上封事,連率郡國舉賢良、方正、直言之士。

秋 八 月辛酉,作二郊及籍田並畢,班賜工匠各有差。 甲子,老人星見。 婆利、白題國各

遣使獻方物。

冬十月丙子,加中書監袁昂中衞將軍。

月甲午,撫軍將軍、開府儀同三司、領軍將軍始興王憺薨。 辛丑,以太子詹事蕭淵

藻爲領軍將軍。

四 . 年春正月辛卯,輿駕親祠南郊,大赦天下,應諸窮疾,咸加賑卹, 並班下四方,時理 獄

訟。丙午,輿駕親祠明堂。[四]

禮 馨香靡替。 節 因之以著,古者哲王咸用此作。眷言八政,致茲千畝,公卿百辟,恪恭其儀,九推畢禮, 二月庚午,老人星見。乙亥,躬耕籍田。 兼以風雲叶律,氣象光華,屬覽休辰,思加獎勸。 詔曰:「夫耕籍之義大矣哉! 粢盛由之而興, 可班下遠近,廣闢良疇,公私

畎畝,務盡地利。

若欲附農而糧種有乏,亦加貸卹,每使優逼。

孝悌力田賜爵一級。

預耕

之司,剋日勞酒。」

三月壬寅,以鎭右將軍豫章王綜爲平北將軍、南兗州刺史。

六月乙丑,分益州置信州 ,分交州置愛州,分廣州置成州、南定州、 合州、 建州, 分霍州

置義州。

秋八月丁卯,老人星見。

冬十月庚午,以中書監、中衞將軍袁昂爲尙書令,卽本號開府儀同三司。 己卯,護軍將

軍昌義之卒。

十一月癸未朔,日有蝕之。 太白晝見。 甲辰,尚書左僕射王陳卒。

十二月戊午,始鑄鐵錢。狼牙脩國遣使獻方物。

儀 同 三司 五. 年春正月,以左光祿大夫、開府儀同三司南平王偉爲鎭衞大將軍,改領右光祿大夫, 如故。 征西將軍 、開府儀同三司、荆州刺史鄱陽王恢進號驃騎大將軍。 太府卿厦

侯亶 章王綜進號鎭 爲 中護軍。 北將軍。 右光祿大夫王份爲左光祿大夫,加特進。 平西將軍 、雍州刺史晉安王綱進號安北將軍。 辛卯,平北將軍、南兗州刺史豫

月庚午,特進、左光祿大夫王份卒。丁丑,老人星見。

六

三月甲戌,分揚州、江州置東揚州。

夏四月乙未,以雲麾將軍南康王績爲江州刺史。

以會稽太守武陵王紀爲東揚州刺史。 六月乙酉,龍鬭于曲阿王陂,因西行至建陵城。 庚子,以員外散騎常侍元樹爲平北將軍、北青虎二州 所經處樹木倒折,開地數十丈。 戊子,

刺史,率衆北伐。

秋七月辛未,賜北討義客位一階。

八月庚寅,徐州刺史成景雋克魏童城。日

九月戊申,又剋睢陵城。 戊午,北兗州刺史趙景悅圍荆山。 壬戌,宣毅將軍裴邃襲壽

陽,入羅城,弗剋。

冬十月戊寅,裴邃、元樹攻魏建陵城,破之。 辛巳,又破曲木。[六] 掃虜將軍彭寶孫剋琅

邪。 東海太守韋敬欣以司吾城降。 甲申,又剋檀丘城。辛卯,裴邃破冰城。[+]丙申,又剋甓城,遂進屯黎漿。[5]壬寅,魏 定遠將軍闕二字太守曹世宗破魏曲陽城。甲辰,又剋秦墟。

|魏郿、潘溪守悉皆棄城走。

十一月丙辰,彭寶孫剋東莞城。 壬戌,裴邃攻壽陽之安城, 剋之。[九] 丙寅,魏馬頭、安

城並來降。

月戊寅,魏荆山 城降。 乙巳,武勇將軍李國興攻平靜關,剋之。 辛丑,信威長史楊

法乾攻武陽關;壬寅,攻峴關:並剋之。

鄭城 領軍 城。 馳次邁,其餘衆 刺史元 將 庚戌,又破馬圈、彫陽二城。 六年春正月丙午,安北將軍晉安王綱遣長史柳津破魏南鄉郡,[10]司馬董當門破魏晉 軍西昌侯淵藻,可便親戎,以前啓行;鎭北將軍 法 甲戌,以魏鎭東將軍、徐州刺史元法僧 僧以彭城內附。 軍,計日差遣,初中後師,善得嚴辦。 己巳,雍州前軍剋魏新蔡郡。 辛亥,輿駕親 爲司空。 祠南郊,大赦天下。 朕當六軍雲動,龍舟濟江。」癸酉, 剋魏 、南兗州刺史豫章王綜董馭 詔曰:「廟謨已定,王略方 庚申,魏鎭 東將軍 舉。 雄 大、徐州 侍中 禁,風

二月丁丑,老人星見。庚辰,南徐州刺史廬陵王續還朝,禀承戎略。 乙未,趙景悅下魏

龍亢城。

行六軍頓所。乙丑,鎮北將軍、南兗州刺史豫章王綜權頓彭城, 己巳,以魏假平東將軍元景隆爲衡州刺史,魏征虜將軍元景仲爲廣州刺史。 三月丙午,歲星見南斗。 賜新附民長復除,應諸罪失一無所問。 總督衆軍,並攝徐州府事。 己酉,行幸白下城,履

夏五月己酉,築宿預堰, 又修曹公堰於濟陰。 太白晝見。 壬子, 遣中護軍夏侯亶督壽

本

紀

第

陽諸軍事、北伐。

六月庚辰,豫章王綜奔于魏,魏復據彭城。

秋七月壬戌,大赦天下。

八月丙子,以散騎常侍曹仲宗兼領軍。 壬午,老人星見。

十二月戊子,邵陵王編有罪,冤官,削爵土。 壬辰,京師地震。

七年春正月辛丑朔,赦殊死以下。 丁卯,滑國遣使獻方物。

二月甲戌,北伐衆軍解嚴。 河南王遣使獻方物。 丁亥,老人星見。

三月乙卯,高麗國遣使獻方物。

凡是清吏,咸使薦聞,州年舉二人,大郡一人。 夏四月乙酉,太尉臨川王宏薨。 南州津改置校尉,增加俸秩。 詔在位羣臣,各舉所知,

六月己卯,林邑國遣使獻方物。

秋九月己酉,驃騎大將軍、開府儀同三司、荆州刺史鄱陽王恢薨。

冬十月辛未,以丹陽尹湘東王釋爲荆州刺史。

十一月庚辰,大赦天下。是日,丁貴嬪薨。辛巳,夏侯亶、胡龍牙、元樹、曹世宗等衆軍

侯亶爲豫、南豫二州刺史。 剋壽陽城。 丁亥,放魏揚州刺 平西將軍 史李憲還北。 、郢州 刺史元樹進號安西將 以壽陽置豫州,合肥改爲南豫州。 軍 魏新 野太守以 以中護 郡 軍夏

原宥。 蒼璧,思承天德,惠此下民。 循,未遑改革。 兆民,惟日不足,氣象環回,每弘優簡。 大通元年春正月乙丑,以尚書左僕射徐勉爲尚書僕射、[1]]中衞將軍。 惟事涉軍儲,取公私見物,不在此例。」辛未,輿駕親祠 孝悌力田賜爵一級。」是月,司州刺史夏侯夔進軍三關,所至皆剋。 自今已後,可長給見錢,依時卽出,勿令逋緩。 凡因事去土,流移他境者,並聽復宅業,蠲役五年。 百官俸祿,本有定數,前代以來,皆多評准,頃者因 南 凡散失官物,不問 郊。 韶曰:「奉時昭 詔曰: 多 「股 事 少,並從 ,虔薦 思利

軍。 林邑、師子國各遣使獻方物 三月辛未,輿駕幸同泰寺捨身。 甲戌,還宮,赦天下,改元。 以左衛將軍蕭淵藻爲中護

夏五月丙寅,成景雋剋魏臨潼、竹邑。

秋八月壬辰,老人星見。

冬十月庚戌,魏東豫州刺史元慶和以渦陽 內屬。 甲寅,曲赦東豫州。

十一月丁 卯,以中護軍 ·蕭淵藻爲北討都督、征北大將軍,鎭渦陽。戊辰,加尚書令、中

衛將軍、開府儀 同三司袁昂中書監。 以渦陽置西徐州。 高麗國遣使獻方物。

同三 司袁昂進號 年春正月庚申,司空元法僧以本官領中軍將軍。 中撫大將軍。 衛尉 卿蕭 昂 爲 中 領 軍。 乙酉 中書監、尚書令、中衞將軍 ,芮芮國遣使獻方 物 、開府儀

二月甲午,老人星見。是月,築寒山堰。

三月壬戌,以江州刺史南康王績爲安右將軍

夏四月辛丑,魏郢州 刺史元願達以義陽 內附,置北司州。 時魏大亂,其 北海王 元顥

淮王元彧、汝南王元悦並 來奔,其北 青州 刺史元世 馬、南荆州刺史李志亦以地降

六月丁亥,魏臨淮王元彧求還本國,許之。

冬十月丁亥,以魏北海王元顥爲魏主,遣東宮直閤將軍陳慶之衞送還北。 魏豫州 刺史

鄧獻以地內屬。

中 大通 元年正月辛酉,輿駕親 祠南郊,大赦天下,孝悌力田賜爵一 級。 甲子,魏汝南王

元悅求還本國,許之。辛巳,輿駕親祠明堂。

一月甲申,以丹陽尹武陵王紀爲江州刺史。 辛丑,芮芮國遣使獻方物。

一月丙辰, 以河南王阿羅眞爲寧西將軍、 西秦河沙三州刺史。江三庚辰,以中護軍蕭淵

藻爲中權將軍。

夏 四 月癸未,以安右將軍南康王績爲護軍將軍。 癸巳,陳慶之攻魏梁城,曰司拔之,進

屠考城,擒魏濟陰王元暉業。

五 月戊辰, 剋大梁。 癸酉, 剋虎牢城。 魏主元子攸棄洛陽,自己走河北。 乙亥,元顥入

洛陽。

六月壬午,大赦天下。 辛亥,魏淮陰太守晉鴻以湖陽城內屬。

閨 月己未,安右將軍、護軍南 康 王績薨。 己卯,魏介朱榮攻殺 元顥,復據洛陽。

诗,設四部無遮大會,因捨身,公卿以下, 秋九月辛巳,朱雀航華表災。 以安北將軍羊侃 以錢 億萬 爲青、冀 奉贖。 州刺史。 癸巳, 輿駕幸 同

泰

冬十月己酉,輿駕還宮,大赦,改元。

十 一 月丙戌, 加中撫大將軍、 開府儀 同 三司 袁 昂 中 書 監。 加 鎭衞 大將軍 開 府 儀 同

騎 司 將 南 平 軍 主 中 偉 權 太 將 子 少 軍 傅。 蕭 淵 藻爲中護軍將軍。[1吾] 加 金紫光祿 大夫蕭琛 、陸杲 中領軍蕭昂為領軍將軍 並 特 進。 司 空、中 軍 將 戊子, 軍元 魏巴州 法 僧 進 刺 號 史 車

嚴始欣以城降。

十二月丁巳,盤盤國遣使獻方物。

二年春正月戊寅, 以雍州刺史晉安王綱爲驃騎大將軍、 揚州刺史,南徐州刺史廬陵王

續爲平北將軍、雍州刺史。 癸未,老人星見。

夏四月庚申,大雨雹。 壬申,以河南王佛輔爲寧西將軍、西秦河二州刺史。

六月丁巳,遺魏太保汝南王元悅還北爲魏主。庚申,以魏尚書左僕射范遵爲安北將軍

司州牧,隨元悅北討。 林邑國遣使獻方物。 壬申,扶南國遣使獻方物。

秋八月庚戌,輿駕幸德陽堂,設絲竹會,祖送魏主元悅。 山賊聚結,寇會稽郡所部縣。

九月壬午,假超武將軍湛海珍節以討之。

三年春正月辛巳,輿駕親祠南郊,大赦天下,孝悌力田賜爵一級。 丙申,以魏尙書僕射

鄭先護爲征北大將軍。

二月辛丑,輿駕親祠明堂。 甲寅,老人星見。 乙卯,特進蕭琛卒。 乙丑,以廣州刺史元

景隆爲安右 將軍。

夏四月乙巳,皇太子統薨。

國遣 使獻方物。 六月丁未,以前太子詹事蕭淵猷爲中護軍。 癸丑,立昭 明 太子子南徐 州 刺史華容公歡爲 尚書僕射徐勉加特進、右光祿大夫。 豫章郡王,枝江公譽爲河 丹丹

王,曲阿公營爲岳陽郡王。

班 賜 暱親,自依舊章。」 壬辰,以吏部尚書何 以侯 爵 秋七月乙亥,立晉安王綱爲皇太子。 級。 爵, 亦曰惟允。 乙酉,以侍中、五兵尚書謝舉爲 凡是宗戚有服屬者, 敬容爲尙書右僕射。 大赦天下,賜爲父後者及出處忠孝文武淸勤, 吏部尚書。 並 可 賜沐食鄉亭侯,各隨遠近以爲差次。 庚寅, 癸巳,老人星見。 詔 曰:「推恩六親,義彰 九族, 並

冬十月己酉,行幸同泰寺, 九月庚午,以太子詹事蕭淵藻爲 高祖 升法 征 北 將軍 座, 爲四部衆說大般若涅盤經義,行引 南兗州 刺 史。 戊寅,狼牙脩 國 奉 迄于乙卯。 表獻方物。

前 樂 川 縣侯 蕭 正 則 有罪流徙,至是招誘亡命,欲寇廣州,在所討平之。

十 月乙未,行幸同泰寺,高祖升法座,爲四部衆說摩訶般若波羅蜜經義,訖于十二月

辛丑。

是歲,吳興郡生野穀,堪食。

四 年 春 正 月丙 寅 朔, 以鎭衞大將軍、開府儀同三司南平王偉進位 一大司馬,司空元法僧

本

進位太尉,尚書令、 中權大將軍、開府儀同三司袁昂進位司空。日乙立臨川靖惠王宏子正德

爲臨賀郡王。 戊辰,以丹陽尹邵陵王綸爲揚州刺史。 庚午,立嫡皇孫大器爲宣城郡王。 太子右衞率薛法護爲平北將軍、司州 癸未,魏南兗州刺史劉世 明以 、城降,

改魏南兗州爲譙州,以世明爲刺史。

牧,衞送元悅入洛。

二月壬寅,老人星見。新除太尉元法僧還北,爲東魏主。 以安右將軍元景隆爲征北將

新除揚州刺史邵陵王綸有罪,殆爲庶人。壬子,以江州刺史武陵王紀爲揚州刺史, 軍 、徐州刺史,雲麾將軍羊侃爲安北將軍、兗州刺史,口己散騎常侍元樹爲鎭北將軍 領軍將 庚 戌,

軍 昂為江州 刺史。 丙辰,邵陵縣獲白鹿一。

月庚午,侍中、領國子博士蕭子顯上表置制旨、委經助敎一人,生十人,專通高祖所釋

孝經義。

夏四 月壬申、盤盤國造使獻方物。

秋七月甲辰,星隕 如 雨

八月丙子,特進陸杲卒。

九 (月乙巳,以太子詹事 南平王世子恪爲領軍將軍,平北將軍、雍州刺史廬陵王續爲安

北將軍,西中郎將、荆州刺史湘東王釋爲平西將軍,司空袁昂領尚書令。

十一月己酉,高麗國遣使獻方物。

十二月庚辰,以太尉 元法 僧 爲驃騎 大將軍、開府同三司之儀 、野州 刺

見。 壇 南郊令解滌之等到 Ē, 辛亥,輿駕親 五年春正月辛卯,輿駕親祠南郊,大赦天下,孝悌力田賜爵一級。 朱紫黄白雜色, 祠 '郊所履行,忽聞空中有異香三隨風 明堂。 食頃方滅。 癸丑,以宣城王大器爲中軍將軍。 兼太宰武陵王紀等以 至,及 聞。 將行 戊申,京師 河 南 事,奏樂迎神 國 遣使獻方 先是一 地震。 畢,有神 日 物 己 丙夜, 西。 光滿 長星 (10)

二月癸未, 行幸 同 泰寺, 設四部大會, 高祖 升法 座 , 發金字摩訶波若經題, 訖于己丑

老人星見。

三月丙辰,大司馬南平王偉薨。

夏四月癸酉,以御史中丞臧盾兼領軍。

五月戊子,京邑大水,御道通船。

六月己卯,魏 建義 城 主蘭寶殺魏 東徐州 刺史,「三」以下邳城降

秋七月辛卯,改下邳爲武州。

月庚 中, 以前 徐州 刺 史元景隆爲安右將軍。 老人星見。 甲子, 波斯國 遣使獻方物。

甲申,中護軍蕭淵猷卒。

九月己亥,以輕車將軍、臨賀王正德爲中護軍。 甲寅,以尚書令、司空袁昂爲特進、 左

光祿大夫,自己 司空如故。 盤盤國遣使獻方物。

冬十月庚申,以尚書右僕射何敬容爲尚書左僕射,吏部尚書謝舉爲尚書右僕射,侍中、

或 子祭酒蕭子顯爲吏部尚書。

六年春二月癸亥,輿駕親耕籍田,大赦天下,孝悌力田賜爵一級。

三月己亥,以行河南王可沓振 爲西秦河二州刺史、河南王。 甲辰,百濟國遣使獻方物。

夏四月丁卯,熒惑在南斗。

秋七月甲辰,林邑國遣使獻方物。

八月己未,以南梁州刺史武 興王楊紹先為秦 、南秦二州刺

冬十月丁卯,以信武 將軍元 慶和 爲鎭北將軍, 率衆北伐。

閏十二月丙午,西南有雷聲二。

大同元年春正月戊申朔,改元,大赦天下。

月己卯,老人星見。 辛巳,輿駕親祠明堂。 輿駕躬耕籍田。 辛丑, 高麗國、丹

丹國各遣使獻方物。

三月辛未,滑國王安樂薩丹王遣使獻方物。

夏四 月庚子,波斯國 獻方物。 甲辰,以魏鎭東將軍劉濟爲徐州刺史。 壬戌, 以安北將

軍廬陵王續爲安南將軍、江州刺史。

秋七月乙卯,老人星見。辛卯,扶南國遣使獻方物。

冬十月辛卯,以前南兗州刺史蕭淵藻爲護軍將軍。

十一月丁未, 中衞 將軍、特進、右光祿大夫徐勉卒。 壬戌,北梁州刺史蘭欽攻漢中,剋

之,魏梁州刺史元羅降。 癸亥, 賜梁 州歸附者復除有差。 甲子,雄勇將軍、北益 州刺史陰平

王楊法深進號平北將軍。月行左角星。

辛丑,平西將 刺 史武興王楊紹先進號車騎將軍,回回平北將軍 十二月乙酉,以魏北徐州刺史羊徽逸爲平北將軍。 軍 、荆州刺史湘東王 釋進號安西將軍。 、北益州刺 戊戌、四三以平西將軍、秦南秦二州 史陰平王楊 法深進號驃騎將軍。

二年春正月甲辰,以兼領軍臧盾爲中領軍。

紀第三 武帝下

本

二月乙亥, 輿駕躬耕籍田。 丙戌, 老人星見。

防。 親覽,以紓其過。 民 不云乎:"股肱惟 刺 亂 者,可悉陳之。 反正,倐焉三紀。不能使重門不閉,守在海外,疆埸多阻,車書未一。民疲轉輸,士勞邊 舉,郡忘共治。 徹田爲粮,未得頓止。治道不明,政用多僻,百辟無沃心之言,四聰闕飛耳之聽,州輟 三月庚申,詔曰:「政在養民,德存被物,上令如風,民應如草。 人,良臣惟聖。』 寔賴賢佐, 匡其不及。 凡厥在朝, 各獻讜言, 政治不便於 若在四遠,刺史二千石長吏,並以奏聞。細民有言事者,咸爲申達。 致使失理負謗,無由聞達,侮文弄法,因事生姦,肺石空陳,懸鐘徒設。 文武在位,舉爾所知,公侯將相,隨才擢用,拾遺補闕,勿有所隱。」 朕以寡德,運屬時來,撥 股將

夏四月乙未,以驃騎大將軍、開府同三司之儀元法僧爲太尉,領軍師將軍。

者,便 上, 知之在下。 先是,尚書右丞江子四上封事,極言政治得失。五月癸卯,詔曰:「古人有言,屋漏在 即勒停,宜速詳啓,勿致淹緩。」乙巳,以魏前梁州刺史元羅爲征北大將軍、靑冀二州 朕所鍾過,不能自覺。 江子四等封事如上, 尚書可時加檢括, 於民 有蠹患

冬十月乙亥,詔大舉北伐。 六月丁亥,詔 曰:「南郊、明堂、陵廟等令,與朝請同班,於事爲輕,可改視散騎侍郎。」 刺

史。

十一月己亥,詔北伐衆班師。辛亥,京師地震。

十二月壬申,魏請通 和,詔許之。丁酉,以吳興太守、駙馬都尉、利亭侯張纘爲吏部尚

書。三三

三年春正月辛丑,輿駕親祠南郊,大赦天下,孝悌力田賜爵一級。 是夜,朱雀門災。

寅、天無雲、雨灰、黃色。癸卯,以中書令邵陵王編爲江州刺史。

南將軍廬陵王續爲中衞將軍、護軍將軍。 護軍將軍蕭淵藻爲安右將軍、尚書左僕射。 二月乙酉,老人星見。丁亥,與駕親耕籍田。 以尚書右僕射謝舉爲右光祿大夫。 己丑,以尚書左僕射何敬容爲中權將軍, 庚寅,以安

三月戊戌,立昭明太子子警爲武昌郡王,譼爲義陽郡王

夏四月丁卯,以南琅邪彭城二郡太守河東王譽爲南徐州刺史。

五月丙申,以前揚州刺史武陵王紀復爲揚州刺史。

六月,青州朐山境隕霜。

秋七月癸卯、魏遣使來聘。 己酉,義陽王譼薨。 是月,青州雪,害苗稼。

八月甲申,老 人星見。 辛卯,輿駕幸阿育王寺,赦天下。

九月,南兗州大饑。 是月,北徐州境內旅生稻稗二千許頃。

閏月甲子,安西將軍、荆州刺史湘東王繹進號鎭西將軍,揚州刺史武陵王紀爲安西將

軍、益州刺史。

冬十月丙辰,京師地震。

是歲,饑。

四年春正月庚辰,以中軍將軍宣城王大器爲中軍大將軍、揚州刺史。

二月己亥,輿駕親耕籍田。

三月戊寅,河南國遣使獻方物。 癸未,芮芮國遣使獻方物。

五月甲戌,魏遣使來聘。

秋七月己未,以南琅邪彭城二郡太守岳陽王營爲東揚州刺史。 癸亥,詔以東冶徒李胤

之降如來眞形舍利,大赦天下。

八月甲辰,詔「南兗、北徐、西徐、東徐、靑、冀、南北靑、武、仁、潼、睢等十二州,旣經饑

饉,曲赦逋租宿責,勿收今年三調。」 冬十二月丁亥, 兼國子助教皇侃表上所撰禮記義疏五十卷。

駕親祠南郊,詔孝悌力田及州閭鄕黨稱爲善人者,各賜爵一級,並勒屬所以時騰 南 尙 僕 書 北二郊及籍田往還並宜御輦,不復 射 張纘 蕭 五 年 淵藻爲 爲尚書僕射,都官尚書劉孺 春正月乙卯,以護軍將軍廬陵王續爲驃騎將軍 中衛將軍 、開府儀 同三司。 施行。 乘輅。 爲 吏部尚書。 中 改素輦名大同輦。 權 二郊請用素輦,籍田往還乘常輦,皆以侍中陪 將 軍、 丁巳, 丹陽 、開府儀同三司,安右 御史中丞、參禮儀事賀琛奏:「今 尹何敬容以本號爲尚書 昭祀宗廟乘玉 將 上。 軍 · 、 尙 令, 辛未,輿 書 吏 部 左

者,州郡縣卽時皆言,勿得欺隱。 月己未,詔曰:「朕四聰旣闕,五識多蔽,畫可外牒,或致紕繆。 如使怨訟,當境任失。 而今而後,以爲永准。」 凡是政事不便於民

秋 七月己卯,以驃騎將軍、開府儀同三司廬陵王續爲荆州刺史,湘東王繹爲護軍將軍、

安右將軍。

八月乙酉,扶南國遣使獻生犀及方物。

九月庚申,以都官尚書到溉爲吏部尚書。

冬十一月乙亥,魏遣使來聘。

十二月癸未,以吳 郡 太守謝舉為 中書監,新除中書令鄱陽王範爲 中 領

八四

六年春正月庚戌朔,曲赦司、豫、徐、兗四州。

二月己亥,輿駕親耕籍田。 丙午,以江州刺史邵陵王綸爲平西將軍、郢州刺史,雲麾將

軍豫章王歡爲江州刺史。秦郡獻白鹿一。

時事浸遠,宿草榛蕪,望古興懷,言念愴然。晉、宋、齊三代諸陵,有職司者動加守護,曰於一勿 夏四月癸未,詔曰:「命世興王,嗣賢傳業,聲稱不朽,人代徂遷, 二賓以位, 三恪義在,

令細民妄相**侵毁。作兵有少,**補使充足。 五月戊寅,以前青、冀二州刺史元羅爲右光祿大夫。己卯,河南王遣使獻馬及方物。曰以 。前無守視,並可量給。」

六月丁未,平陽縣獻白鹿一。

秋七月丁亥,魏遣使來聘。

自今尚書中有疑事,前於朝堂參議,然後啓聞,不得習常。其軍機要切,前須諮審,自依舊 舜,何得發言便是。 上朝,以議時事,前共籌懷,然後奏聞。頃者不爾,每有疑事,倚立求決。古人有云,主非堯 八月戊午,赦天下。 辛未,詔曰:「經國有體,必詢諸朝,所以尚書置令、僕、丞、郞,旦旦 是故放勛之聖,猶咨四岳,重華之叡,亦待多士。豈朕寡德,所能獨斷。

典。」盤盤國遣使獻方物。

九月,移安州置定遠郡,受北徐州都督,定遠郡改屬安州。 始平太守崔碩表獻嘉禾一

莖十二穗。戊戌,特進、左光祿大夫、司空袁昂薨。

冬十一月己卯,曲赦京邑。

十二月壬子,江州刺史豫章王歡薨。 以護軍將軍湘東王繹爲鎭南將軍、江州刺史。

桂州於湘州始安郡,受湘州督,省南桂林等二十四郡,悉改屬桂州。

七年春正月辛巳,輿駕親祠南郊,赦天下,其有流移及失桑梓者,各還田宅,蠲課五年。

辛丑,輿駕親祠明堂。

二月乙巳,以行宕昌王梁彌泰爲平西將軍、曰己河涼二州刺史、宕昌王。 辛亥,輿駕躬

耕籍田。乙卯,京師地震。丁巳,以中領軍、鄱陽王職爲鎭北將軍、雍州刺史。 三月乙亥,宕昌王遣使獻馬及方物。 高麗、百濟、滑國各遣使獻方物。

夏四月戊申,魏遣使來聘。

五月癸巳,以侍中南康王會理兼領軍。

秋九月戊寅,芮芮國遣使獻方物。

冬十月丙午,以侍中劉孺爲吏部尙書。

利,蓋先聖之格訓也。凡是田桑廢宅沒入者,公創之外,悉以分給貧民,皆使量其所能以受 公田悉不得假與豪家,已假者特聽不追。 田分。如聞頃者,豪家富室,多占取公田,貴價僦稅,以與貧民,傷時害政,爲蠹已甚。自今 昧爽以前,在民間無問多少,言上尚書督所未入者,皆赦除之。」又詔曰:「用天之道,分地之 **姦盜,朕亦知此之爲病矣。如不優赦,非仁人之心。凡厥諐耗逋負,起今七年十一月九日** 丑,以金紫光祿大夫臧盾爲領軍將軍。 十一月丙子,詔停在所役使女丁。丁丑,詔曰:「民之多幸,國之不幸,恩澤屢加,彌長 其若富室給貧民種糧共營作者,不在禁例。」己

宰虎而傅翼,楊阜是故憂憤,賈誼所以流涕。至於民間誅求萬端,或供厨帳,或供廐庫,或 或求供設,或責脚步。又行劫縱,更相枉逼,良人命盡,富室財殫。此爲怨酷,非止一事。 遣使命,或待賓客,皆無自費,取給於民。又復多遣遊軍,稱爲遏防,姦盜不止,暴掠繁多, 矣,每當食投箸,方眠徹枕,獨坐懷憂,憤慨申旦,非爲一人,萬姓故耳。 州牧多非良才,守 自今有越界禁斷者,禁斷之身,皆以軍法從事。若是公家創內,止不得輒自立屯,與公競作 地界,止應依限守視;乃至廣加封固,越界分斷水陸採捕及以樵蘇,遂致細民措手無所。凡 亦頻禁斷,猶自未已。外司明加聽採,隨事舉奏。又復公私傳、屯、邸、冶,爰至僧尼,當其 十二月壬寅,詔曰:「古人云,一物失所,如納諸隍,未是切言也。 朕寒心消志,爲日久

以 收私利。 至百姓樵採以供煙爨者,悉不得禁,及以採捕,亦勿訶問。 若不遵承,皆以死罪

結正。」魏遣使來聘。 丙辰,於宮城西立士林館,延集學者。

是歲,交州土民李賁攻刺史蕭諮,諮輸賂,得還越州

八年春正月,安成郡民劉敬躬挾左道以反,公民司 內史蕭說委郡東奔,[三]敬躬據郡,進

攻廬陵,取豫章,妖黨遂至數萬,前逼新淦、柴桑。

三月戊辰,大破之,擒敬躬送京師,斬于建康市。 二月戊戌,江州刺史湘東王繹遣中兵曹子郢 討之。 是月,於江州新蔡、高塘立頌平

屯,[三]墾作蠻田。遣越州刺史陳侯、羅州刺史寧巨、安州刺史李智、 愛州刺史阮漢 同征李

貴於交州。

九年春閏月丙申,地震,生毛。

三月,以太子詹事謝舉爲尙書僕射。二月甲戌,使江州民三十家出奴婢一戶,配送司州

夏四月,林邑王破德州,攻李賁,賁將范脩又破林邑王於九德,林邑王敗走。

冬十一月辛 丑,安西將軍、益州刺史武陵王紀進號征西將軍、開府儀同三司

十二月壬戌,領軍將軍臧盾卒,以輕車將軍河東王譽爲領軍將軍。

十年春正月,李賁於交阯竊位號,署置 百官。

三月甲午,輿駕幸蘭陵,謁建陵。曰三辛丑,至脩陵。

宜有以慰其此心。 訟稍簡,國務小閑,始獲展敬園陵,但增感慟。 壬寅,詔曰:「朕自違桑梓,五十餘載,乃眷東顧,靡日不思。 今四方款關,海外有截,獄 **幷普賚內外從官軍主左右錢米各有差。」因作還舊鄉詩。** 並可錫位一階,幷加頒賚。 故鄉老少,接踵遠至,情貌孜孜,若歸于父, 所經縣邑,無出今年租賦。 監所責民,蠲復

川王正義進號安東將軍。己酉,幸京口城北固樓,改名北顧。庚戌,幸回賓亭,宴帝鄉故老 癸卯,詔園陵職司,恭事勤勞,並錫位一階,幷加沾賚。 丁未,仁威將軍、南徐州刺史臨

及所經近縣奉迎候者少長數千人,各賚錢二千。 夏四月乙卯,輿駕至自蘭陵。

詔鰥寡孤獨尤貧者贍卹各有差。

五月丁酉,尚書令何敬容免。

秋九月己丑, 韶曰:「今茲遠近, 雨澤調適, 其穫已及, 冀必萬箱, 宜使百姓因斯安樂。

原除。 以文最逋殿,罪悉從原。 凡天下罪無輕重,已發覺未發覺,討捕未擒者,皆赦宥之。 田者荒廢、水旱不作、無當時文列,應追稅者,幷作田不登公格者,並停。 其有因饑逐食,離鄉去土,悉聽復業,蠲課五年。」 侵割耗散官物,無問多少,亦悉 各備臺州

冬十二月,大雪,平地三尺。

寧,下民安义。 言除省,以舒民患。」 治,市埭、桁渡,津税、田園,新舊守宰,遊軍戍邏,有不便於民者,尚書州郡各速條上,當隨 浮,不遑飱飯。 淪,澆波斯逝,動競日滋,情僞彌作。 朕負扆君臨,百年將半。 宵漏未分,躬勞政事;白日西 十一年春三月庚辰, 詔曰:「皇王在昔, 澤風未遠, 故端居玄扈, 拱默巖廊。 雖復三思行事,而百慮多失。凡遠近分置、內外條流、四方所立屯、傳、邸、 退居猶被布素,如此含咀匪過藜藿。寧以萬乘爲貴,四海爲富,唯欲億兆康 自大道旣

夏四月,魏遣使來聘。

猾,所以一日復勑禁斷。川流難壅,人心惟危,旣乖內典慈悲之義,又傷外敎好生之德。 云:『與殺 冬十月己未,詔曰:「堯、舜以來,便開贖刑,中年依古,許罪身入貲, 吏下因此, 不無姦 不辜,寧失不經。』可復開罪身,皆聽入贖。」

本紀

第三

武帝

中大同元年春正月丁未,曲阿縣建陵隧口石騏驎動,有大蛇鬭隧中,其一 一被傷 奔走。

癸丑,交州刺史楊瞟剋交趾嘉寧城,李賁竄入屈獠洞,〔圖〕交州平。

戌,法駕出同泰寺大會,停寺省,講金字三慧經。 鄉失土,可聽復業,蠲課五年,停其徭役,其被拘之身,各還本郡,舊業若在,皆悉還之。 庚 十一年正月以前,皆悉從恩,十一年正月已後,悉原加責,其或爲事逃叛流移,因饑以後亡 三月乙巳,大赦天下:凡主守割盗、放散官物,及以軍糧器甲,至三凡是赦所不原者,起

夏四月丙戌,於同泰寺解講,設法會。 大赦,改元。 孝悌力田爲父後者賜爵一級,賚宿

衞文武各有差。是夜,同泰寺災。

六月辛巳,竟天有聲,如風雨相擊薄。

者,父母祖父母勿坐。唯大逆不預今恩。」丙寅,詔曰:「朝四而暮三,衆狙皆喜,名實未虧, 過於禽獸,至於父母並皆不知。多觸王憲,致及老人。耆年禁執,大可傷愍。自今有犯罪 而喜怒爲用。 秋七月辛酉,以武昌王警爲東揚州刺史。甲子,詔曰:「禽獸知母而不知父,無賴子弟 頃聞外間多用九陌錢,陌減則物貴,陌足則物賤,非物有貴賤,是心有顚倒。

至於遠方,日更滋甚。

豈直國有異政,乃至家有殊俗,徒亂王制,無益民財。 自今可通用足

陌錢。 令書行後,百日爲期,**若**猶 ;有犯,男子謫運,女子質作,並同三年

州 刺史, 八月丁丑 丹陽 尹邵陵 一,東 揚州 王綸 刺史武昌王警薨。 爲鎭東將軍 、南 徐州刺史。 以安東將軍、南徐 甲午,渴槃陁國遣使獻方物 州 刺史臨川王 正義卽本號東揚

冬十月癸酉,汝陰王劉哲薨。

乙亥,以前東揚州刺史岳陽王營爲雍州刺史。

邑,或獨行特立,不求聞達,咸使言上,以時招聘。」甲子,輿駕親祠明堂。 功博 討逋叛,巧籍隱年,闇丁匿口,開恩百日,各令自首,不問往罪;流移他鄉,聽復宅業,蠲課五 慶兼懷,思與億兆,同其福惠。 江 年,孝悌力田 州 ;;乾道變化,資始之德成。 刺史湘東王繹爲鎭西將軍、荆州刺史。 太清 元年正月壬寅、驃騎大將軍、開府儀同三司、荆州刺史廬陵王續薨,以鎮南將軍 .賜爵一級,居局治事賞勞二年。 可班下遠近,博採英異,或德茂州閭,道行鄕 可大赦天下,尤窮者無出卽年租調,清議禁錮,並皆宥釋,所 朕沐浴齋宮,虔恭上帝,祗事槱燎,高熛太一,大禮克遂,咸 辛酉,輿駕親祠南郊,詔曰:「天行彌綸,覆燾之

豫 、南兗、西兗、齊等十三州內屬。〔景〕壬午,以景爲大將軍,封河南王,大行臺,制承如鄧 月己卯,白虹貫日。 庚辰、魏司徒侯景求以豫、廣、潁、洛、陽、西揚、東荆、北荆、襄、

本紀第三 武帝下

禹故

1

亥,輿

駕躬耕籍

田

Ξ

三月庚子,高祖幸同泰寺,設無遮大會,捨身,公卿等以錢一 億萬奉贖。 甲辰, 遣司州

刺 史羊鴉仁、兗州刺史桓和 、仁州刺史湛海珍等應接北豫州。

夏四月丁亥,輿駕還宮,大赦天下,改元,孝悌力田爲父後者賜爵一 級,在朝羣臣宿衞

文武並加頒賚。

五月丁酉,輿駕幸德陽堂,宴羣臣,設絲竹樂。

六月戊辰,以前雍州刺史鄱陽王範爲征北將軍,總督漢北征討諸軍

前代故事,以懸瓠爲豫州,壽春爲南豫,改合肥爲合州,北廣陵爲淮州,項城爲殷州,合州 秋七月庚申,羊鴉仁入懸瓠城。 甲子,詔曰:「二豫分置,其來久矣。今汝、願剋定,可

爲南合州。」

依

亡,逃叛入北,一皆曠蕩,不問往諐,並不得挾以私讎而相報復。若有犯者,嚴加裁問。」戊 **清,瞻言遺黎,有勞鑒寐,宜覃寬惠,與之更始。應是緣邊初附諸州部內百姓,先有負罪流** 八月乙丑,王師北伐,以南豫州刺史蕭淵明爲大都督。 韶曰:「今汝南新復,嵩、 潁載

九月癸卯,王遊苑成。庚戌,輿駕幸苑。

子,以大將軍侯景錄行臺尚書事。

冬十一月,魏遣大將軍慕容紹宗等至寒山。 丙午,大戰,淵明敗績,及北兗州刺史胡貴

孫等並陷魏。紹宗進圍潼州。

十二月戊辰,遣太子舍人元貞還北爲魏主。 辛巳,以前征北將軍鄱陽王範爲安北將

軍、南豫州刺史。

進據之。乙卯,以大將軍侯景爲南豫州牧,安北將軍、南豫州刺史鄱陽王範爲合州刺 令,守吏部尙書王克爲尙書僕射。 年春正月戊戌, 詔在位各舉所知。 甲辰、豫州刺史羊鴉仁、殷州刺史羊思達,並棄城走,魏 己亥,魏陷渦陽。 辛丑,以尚書僕射謝舉爲尚書 史。

司蕭淵藻爲征東將軍、南徐州刺史。是日,屈獠洞斬李賁,傳首京師 東將軍、南徐州刺史邵陵王綸爲平南將軍、湘州刺史、同三司之儀,中衞將軍、開府儀同三 三月甲辰,撫東將軍高麗王高延卒,以其息爲寧東將軍、高麗王、樂浪公。 己未,以鎭

夏四月丙子,詔在朝及州郡各舉淸人任治民者,皆以禮送京師。 戊寅,以護軍將軍河

東王譽爲湘州刺史。

軍 將 事,尤闕治道,孤立在上,如臨深谷。 五 月辛丑,以新除中書令邵陵王綸爲安前將軍、開府儀同三司,前湘州刺史張纘爲領 辛亥,曲赦凌、愛、德三州。 癸丑, 詔曰:「爲國在於多士, 寧下寄于得 凡爾在朝,咸思匡救,獻替可否,用相啓沃。 朕暗於 班 下方

紀

第

Ξ

武帝

ፑ

岳,傍求俊乂,窮其屠釣,盡其巖穴,以時奏聞。」是月,兩月夜見。

戍。 甲辰,以安前將軍、開府儀同三司邵陵王編都督衆軍討景。 秋八月乙未,以右衞將軍朱异爲中領軍。 戊戌,侯景舉兵反,擅攻馬頭、木栅、 曲赦南豫州。 荆山等

九月丙寅,加左光祿大夫元羅鎭右將軍。

辛亥,景師至京,臨賀王正德率衆附賊。 光祿大夫臨賀王正德爲平北將軍,都督京師諸軍,屯丹陽郡。 冬十月,侯景襲譙州 ,執刺史蕭泰。 丁未,景進攻歷陽, 太守莊鐵降之。 己酉,景自横江濟于采石 戊申, 以新除

史蕭 丙戌,安北將軍鄱陽王範遣世子嗣、雄信將軍裴之高等帥衆入援,次于張公洲 弄璋、前譙州刺史趙伯超等入援京師,頓鍾山愛敬寺。 十一月辛酉,賊攻陷東府城,害南浦侯蕭推、中軍司馬楊暾。 乙酉,編進軍湖頭,與賊戰, 庚辰, 邵陵王編帥武州刺 敗

刺史章粲、高州刺史李遷仕、前司州刺史羊鴉仁等並帥軍入援,推仲禮爲大都督 十二月戊申,天西北中裂,有光如火。尚書令謝舉卒。丙辰,司州刺史柳仲禮、前衡州

死。 庚申,邵陵王綸、東揚州刺史臨成公大連等帥兵集南岸。 三年春正月丁巳朔,柳仲禮帥衆分據南岸。 是日,賊濟軍於青塘,襲破韋粲營,粲拒戰 乙丑,中領軍朱异卒。 丙寅,

以司 農卿傅岐為 中領軍。 戊辰,高州刺史李遷仕、天門太守樊文皎進軍青溪東,為賊所破,

文皎死之。壬午,熒惑守心。乙酉,太白晝見。

亭苑。 |月丁未, 南兗州刺史南康王會理、前青冀二州刺史湘潭侯蕭退帥江州之衆, 頓于蘭 庚戌,安北將軍、合州刺史鄱陽王範以本號開府儀同三司。

岐 中外諸軍事、大丞相、錄尚書。 丁卯,賊攻陷宮城,縱兵大掠。己巳,賊矯詔遣石城公大款解外援 三月戊午,前司州刺史羊鴉仁等進軍東府北,與賊戰, 辛未,援軍各退散。 丙子, 簽惑守心。 大敗。 軍。 已未,皇太子妃王氏薨 庚午,侯景自為 壬午,新除中領軍傅 都督

冀二州刺史明少遐、東徐州刺史湛海珍、北青州刺史王奉伯各舉州附于魏 夏四月己丑,京師地震。 丙申,地又震。己酉,高祖以所求不供,憂憤寢疾。 是月,青

五月丙辰,高祖崩于凈居殿,時年八十六。辛巳,遷大行皇帝梓宮于太極前殿。

冬十一月,追尊爲武皇帝,廟曰高祖。乙卯,葬于脩陵。

寢食,倍道就路,憤風驚浪,不暫停止。。高祖形容本壯,及還至京都,銷毀骨立,親表士友, 黨,咸加敬異。 高祖 生知淳孝。年六歲,獻皇太后崩,水漿不入口三日,哭泣哀苦,有過成人,內外親 及丁文皇帝憂,時爲齊隨王諮議,隨府在荆鎭,髣髴奉聞,便投劾星馳,不復

紀第

武帝下

趨學向 初,則 稱制 夜。 拜掃 不 以 古。 舍 臺 王侯朝臣皆奉表質疑,高祖皆爲解釋。 文 炗 丙立 百 躬製贊序,凡六百卷。 陰陽緯候,卜筮占决,並悉稱善。 孔 斷 思 造制旨孝經義,周易講疏,及六十四卦、二繫、文言、序卦等義,樂社義,毛詩答問,春秋 Щ 何佟之、賀瑒、嚴植之、明山賓等覆述制旨, 尚書大義,中庸講疏,孔子正言,老子講疏, 陵 風, 疑。 欽 至敬等殿。 子 質誄 了, 涕淚所灑,松草變色。 袪等遞相 明,能事畢究,少而篤學,洞達儒玄。 聽覽餘閑,卽於 雲集於京 於是穆穆恂恂, 望宅奉諱,氣絕久之,每哭輒歐血數升。 ,箴頌牋奏,爱初在 。又立七廟堂,月中再過,設淨饌。每至展拜,恒涕泗滂沲,哀動左右。 講述。 師矣。 重雲殿及同泰寺講說, 皇太子、 天情睿敏, 兼篤信正法,尤長釋 家 知 べ禮節。 田, 及居帝位,卽於鍾山造大愛敬寺,青溪邊造智度寺,又於 宣城 下筆 泊登寶曆 又撰金策三十卷。 王亦於東宮宣猷堂及揚州廨開講, 大同 脩飾國學, 增廣 成章 中,於臺西立士林館, 雖萬機多務,猶卷不輟手,燃燭側光,常至戊 八凡諸 ,千賦百詩, 典,製涅盤、大品、 名僧 凡二百餘卷,並正先儒之迷,開古聖之旨 並撰吉凶軍賓嘉五禮, 文集, 服內不復嘗米,惟資大麥,日止二溢 碩學、 生員,立五館,置五經博士。 草隸尺牘,騎射弓馬,莫不奇妙。 直疏 叉百二十卷。 四部聽衆, 便就,皆文質彬彬, 淨名、三慧諸經 領軍 常萬餘 朱异、太府卿賀 凡 六藝備 於是 千餘卷,高 人。 一四方 閑 義記,復 又造通 超邁 基登逸 郡 天監 國, 加

不飲 理 類。 儻移中, 便嗽口以過。 洞 勤 衣冠 也。 盡物情,常哀矜涕泣,然後可奏。日止一食,膳無鮮腴,惟豆羹糲食而已。 於政務,孜孜無怠。每至冬月,四更竟,卽敕把燭看事,執筆觸寒,手爲皴裂。 酒,不聽音聲,非宗廟祭祀、大會饗宴及諸法事,未嘗作樂。 五十外便斷房室。 ,小坐押腰,盛夏暑月,未嘗褰袒。不正容止,不與人相見,雖覿內豎小臣,亦如遇大 歷觀古昔帝王人君,恭儉莊敬,藝能博學,罕或有焉。 身衣布衣, 木縣阜帳, 後宮職司貴妃以下,六宮韓榆三翟之外,皆衣不曳地,傍無錦綺。 一冠三載,一被二年。常克儉於身,凡皆此 性方正,雖居小殿暗室,恒 。庶事繁擁, 糾姦擿伏, 日

作威 是御 文軌 建 ·號,濡足救焚,總蒼兕之師,翼龍豹之陣,雲驤雷駭,翦暴夷凶,萬邦樂推,三靈改卜。 於 四 作福 傍通之地, 鳳曆,握 史臣曰:齊季告終,君臨昏虐,天棄神怒,衆叛親離。高祖英武睿哲,義起樊、鄧,仗旗 聰旣 四十年,斯 挾朋 達,萬機斯理,治定功成,遠安邇肅。加以天祥地瑞,無絕歲時。征賦所及之鄕, 龍圖,關四門弘招賢之路,納十亂引諒直之規。興文學,脩郊祀,治五禮,定六 樹 南超萬 爲盛矣。 黨,政以賄成,服冕乘軒,由其掌握,是以朝經混亂,賞罰無章。「小人道 里, 自魏 西拓五千。 、晉以降,未或有焉。 其中瓌 以財重 |寶,千夫百族,莫不充牣 及乎耄年, 委事羣倖。 王府, 蹶角闕 然朱异之徒,

本

紀

第

=

武帝

長」,抑此之謂也。 賈誼有云「可爲慟哭者矣」。遂使滔天羯寇,承間掩襲,鷲羽流王屋,金

乘輿,塗炭黎元,黍離宮室。 嗚呼!天道何其酷焉。 雖曆數斯窮,蓋亦人事然也。

校勘記

五月癸卯琬琰殿火 是年五月戊辰朔,無癸卯。 通鑑繫於六月,六月丁卯朔,亦無癸卯。 建康

實錄作「五月己卯」,是。

義州刺史文僧明以州叛入于魏 「文僧明」隋書五行志、 天文志並作「文僧朗」, 此宋刻避宋始

祖玄朗諱而改「朗」爲「明」。

- 三月乙卯巴陵王蕭 屛薨 「乙卯」各本作「己卯」,按:是年三月癸巳朔,無己卯。 今據南史改。
- 四 丙 午輿 駕 親 祠 明 堂 「丙午」南史作「辛亥」。按齊、梁祭典,祠南郊、明堂,例用辛日,南史作「辛
- 徐州刺史成景雋剋魏童城 「童城」各本作「童棧」,據通鑑改。 按通鑑胡注:「童城、即下邳僮縣
- 城也。」
- 又破曲 立大堰遏水西流,兩濱之會,置城防之,曰曲沭戍。」 木 通鑑胡注:「『曲 木』當作『曲 沭 水經注: 流水過建陵縣故城東,又南逕陵山西, 魏

- [4] 裴邃破狄城 「狄城」,裴邃傳作「狄丘」。
- 逐進屯黎漿 「黎漿」各本作「黎將」。 據本書裴邃傳、 韋放傳及通鑑改。 水經肥水注: 黎漿水

東逕黎漿亭南。」作「黎漿」是。

壬戌裴邃攻壽陽之安城剋之 壬戌旣書剋安城, 則下文丙寅不應又書安城來降。 通鑑無 剋

之」二字,疑二字是衍文。

(18) 安北將軍晉安王綱遣長史柳津破魏南鄉郡 「柳津」,通鑑作「柳渾」。

以尚書左僕射徐勉爲尚書僕射 「左」原作「右」。 本書徐勉傳, 勉以尙書右僕射爲尙書僕射。

按:自普通四年尚書左僕射王陳死後,左僕射久缺,徐勉不曾爲左僕射。

以河南王阿羅眞爲寧西將軍西秦河沙三州 刺史 阿羅眞」,本書諸夷傳作「呵羅眞」。「西秦河

沙三州刺史」諸夷傳作「西秦河二州刺史」。

陳慶之攻魏梁城 「梁城」,本書陳慶之傳作「滎城」,通鑑同。

魏主元子攸棄洛陽 「子攸」各本皆作「子猷」,誤。子攸,北魏孝莊帝名,時正在位。 本書陳慶

之傳亦作「子攸」,今據改。

二吾 中權將軍 蕭淵藻爲中護軍將軍 張森楷梁書校勘記云:「中護軍不稱將軍, 護軍將軍不加中

字,必有一誤。」

本

紀

- 假超武將軍湛海珍節以討之 按:中大通元年更定二百四十號將軍班次,超武與鐵騎、樓船等同班,無昭武。 「超武將軍」各本作「昭武將軍」。據南史及册府元龜二一六改。
- [14] 爲四部衆說大般若湼盤經義 各本脫「若」字,今補。
- 尚書令中權大將軍開府儀同三司袁昂進位司空 袁昂於大通二年進號中撫大將軍。「中權」當

作「中撫」。

- 州刺史,事具本傳。 雲麾將軍羊侃爲安北將軍兗州刺史 「羊侃」各本作「楊侃」,據通鑑改。 按:羊侃自雲麾爲兗
- 先是一 二亦均 作「丙夜」。 日丙夜 「丙夜」二字各本譌作「東」,據預史改。 通志一三、御覽九八一、册府元龜二〇
- 王早、簡實等殺刺史崔庠」。 魏建義城主蘭寶殺魏東徐州刺史 「蘭寶」南史作「蘭保」。 魏書出帝平陽王紀作「東徐州城民
- 以尙書令司空袁昂爲特進左光祿大夫 「左」各本譌作「右」,據本書袁昂傳改。
- 戊戌 删 又是年十二月癸酉朔,「乙酉」、「戊戌」及下之「辛丑」,皆在十二月。 「戊戌」上各本有「十二月」三字。上已書「十二月乙酉」、則此「十二月」三字當爲衍文,今
- 以平西將軍秦南秦二州刺史武興王楊紹先進號車騎將軍 本書諸夷傳 楊紹先以天監十年

死,子智慧,以大同 初自魏歸梁,則此年當是紹先子智慧,非紹先。

至 丁酉以吳與太守至 張纘爲 吏部尚書 大同二年十二月無丁酉, 有乙酉、癸酉、丁丑、丁亥,不知

此「丁酉」爲何干支之誤。

[1]於]有職司者勤加守護 「勤」各本譌「勒」,據南史改。

己卯河南王遣使獻馬及方物 按:「己卯」當依建康實錄一七作「乙卯」。 是年五月戊申朔, 無

己卯。

会 以行宕昌王梁彌泰爲平西將軍 「梁彌泰」通鑑作「梁彌定」,考異云從典略。

三之 安成郡民劉敬躬挾左道以反 「安成」各本作「安城」,據南史及通鑑改。「劉敬躬」,本書及南史

張綰傳作「劉敬宮」。

[10] 內史蕭說委郡東奔「蕭說」,本書張綰傳作「蕭倪」。

於江州新蔡高塘立頌平屯 「高塘」各本並譌「高埭」,據南史改。

謁建陵 「建陵」各本作「建寧陵」,據南史改。 天監七年,復建、 脩二陵五里內周圍居民, 卽此

建陵。 通鑑胡注:「建寧陵、梁紀曰建陵、皇妣張皇后陵也。」是胡氏所見本亦作「建陵」。

退居猶被布素 「被」各本譌「於」,據册府元龜一九一改。

屈 獠洞 屈 [獠洞]各本作「獠洞」。 按本卷|太淸|二年三月己未下作「屈獠洞」。 陳書高祖紀及建

本

紀第

Ξ

校勘

記

康實錄亦作「屈獠洞」,今據補。

呈 及以軍糧器甲 「器甲」各本作「器下」,據册府元龜二〇八改。

魏司徒侯景求以豫廣潁洛陽西揚東荆北荆襄東豫南兗西兗齊等十三州內屬

行一「章」字、據<u>册</u>府元龜二一七**删**。

齊等十三州內屬 「豫」下各本並

梁書卷四

本紀第四

簡文帝

使持節 佐吏。 四年,徙爲使持節、都督雍梁南北秦四州郢州之竟陵司州之隨郡諸軍事、平西將軍 十七年,徵爲西中郎將、領石頭戍軍事,尋復爲宣惠將軍、丹陽 尉、荆州刺史,將軍如故。 入爲宣惠將軍、丹陽尹。十三年,出爲使持節、都督荆瘫梁南北秦益 丁未,生于顯陽殿。五年,封晉安王,食邑八千戶。八年,爲雲麾將軍,領石頭戍軍 太宗簡文皇帝諱綱,字世纘,小字六通,高祖第三子,昭明太子母弟也。 、都督益寧雍梁南北秦沙七州諸軍事、益州刺史、未拜、改授雲麾將軍、南徐州 九年,遷使持節、都督南北兗青徐冀五州諸軍事、宣毅將軍、南兗州刺史。十二年, 十四年,徙爲都督江州諸軍事、雲麾將軍、江州 尹,加侍中。 寧七州諸軍事、南蠻校 刺史,持節如故。 普通元年,出爲 天監二年十月 事,量置 刺史。

本

紀第四

簡文帝

內敏,羣后歸美,率土宅心。 允武允文,豈能荷神器之重,嗣龍圖之尊。 武王,格于上下,光于四表。 「非至公無以主天下, 今岱宗牢落,天步艱難,淳風猶鬱,黎民未义,自非克明克哲, 可立爲皇太子。」七月乙亥,臨軒策拜,以脩繕東宮,權居東府。 晉安王綱,文義生知,孝敬自然,威惠外宣,德行

非博愛無以臨四海。

所以堯舜克讓,惟德是與,文王舍伯邑考而立

四年九月,移還東宮。

者,並及妻兒,悉可原放。」癸未,追諡妃王氏爲簡皇后。 罪!朕以寡昧,創承鴻業,旣臨率土,化行宇宙,豈欲使彼獨爲匪民。 惠,道著興王,本非隸役。 社稷用安。 帝奄棄萬國,攀慕號躃,厝身靡所。猥以寡德,越居民上,榮榮在疾,罔知所 太清三年五月丙辰,高祖崩。 謹遵先旨,顧命遺澤,宜加億兆。可大赦天下。」壬午,詔曰:「育物惟寬,馭民惟 或開奉國,便致擒虜,或在邊疆,濫被抄劫。 辛巳,卽皇帝位。 詔曰:「朕以不造, 諸州見在北人爲奴婢 夙丁閔凶。 二邦是競, 託,方賴藩 大行皇 黎元何

六月丙戌,以南康嗣王會理爲司空。丁亥,立宣城王大器爲皇太子。 壬辰,封當陽公

大心 爲尋陽郡王,石城公大款爲江夏郡王,寧國公大臨爲南海郡王,臨城公大連爲南郡王,

西豐公大春 爲安陸郡王,新淦公大成 爲 山陽郡王,日臨湘公大封爲宜都郡王

定州 王會 理 刺 秋 史蕭 兼 七月甲寅,廣州 尚書令,南海王大臨爲揚州刺史,新興王大莊爲南徐州刺史。〔三〕是月,九江大饑, 勃 爲 刺史。 刺史元景仲謀應侯景,西江督護陳霸先起兵攻之,景仲自殺,霸先迎 戊辰,以吳郡置吳州,以安陸王大春爲刺史。 庚午,以司空南康嗣

八月癸卯,征 東大將軍、開府儀同三司、南徐州刺史蕭淵藻薨。 相

食十四

Ŧi.

冬十月丁未,地震。

十二月,百濟國遣使獻方物。

禍,元首懷無厭之欲,乃當樂推之運,因億兆之心,承彼掎角,雪茲讎恥。 量,啓西伯之基。 獲已而臨蒞之。 民,故功成弗居,卑宮菲食,大慈之業普薰,汾陽之詔屢下。 大寶元年春正月辛亥朔,以國哀不朝會。 故帝王之功,聖人之餘事,軒冕之華,儻來之一 高祖武皇帝道洽二儀,智周萬物。 韶曰:「蓋天下者,至公之神器,在昔三五,不 屬齊季薦瘥,彜倫 于茲四紀, 物。 太祖文皇帝含光大之 副剝喪,1 無得 事 非 而 同氣離 爲己, 稱。 義寔從 肸 入 成龙之 以寡

本紀

第

四

簡文

帝

天,辛酉乃止。 端建號,抑惟舊章。可大赦天下,改太淸四年爲大寶元年。」丁巳,天雨黃沙。 遲, 諒闇 昧,哀榮孔棘,生靈已盡, 彌切。 西魏寇安陸,執司州刺史柳仲禮,盡沒漢東之地。 丙寅, 月晝見。癸酉, 前 方當玄默在躬,栖心事外。 志不圖全,僶俛視陰, 卽王道未直,天步猶艱,式憑宰輔,以弘 企承鴻緒。 懸旌履薄, 未足云喻。 己未,太白經 庶政。履 痛甚愈

江都令祖皓起義,襲廣陵,斬賊南兗州刺史董紹先。

侯景自帥水步軍擊皓。

先 爲 郡。 月,邵陵王編自尋陽至于夏口,郢州刺史南平王恪以州讓編。 師畿內,無事戎衣。 夏五月庚午,征北將軍、開府儀同三司鄱陽嗣王範薨。 二月癸未,景攻陷廣陵,皓等並見害。 韶曰:「近東垂擾亂,江陽縱逸。上宰運謀,猛士雄奮,吳、|會肅淸,濟、虎澄證,京 朝廷達官,齋內左右,並可解嚴。」乙巳,以尚書僕射王克爲左僕射。是 丙戌,以安陸王大春為東揚州刺史。 自春迄夏、大饑、人相食、京師 丙午,侯景逼太宗幸西州 省吳州,如

尤甚。

秋七月戊辰,賊行臺任約寇江州,刺史尋陽王大心以州降約。 是月,以南郡王大連爲

六月辛巳,以南郡王大連行揚州事。庚子,前司州刺史羊鴉仁自尚書省出奔西州

江州刺史。

八月甲午,湘東王繹遣領軍將軍王僧辯率衆逼郢州。 乙亥,侯景自進位相國,封二十

郡爲漢王。邵陵王編棄郢州走。

大鈞為西陽郡王,大威為武寧郡王,大球為建安郡王,大昕為義安郡王,大擊為綏建郡王, 冬十月乙未,侯景又逼太宗幸西州曲宴,自加宇宙大將軍、都督六合諸軍事。 立皇子

大圜爲樂梁郡王。壬寅、景害南康嗣王會理。

史徐文盛督衆軍拒約。 十一月,任約進據西陽,分兵寇齊昌,執衡陽王獻送京師,害之。 南郡王前中兵張彪起義於會稽若邪山,攻破浙東諸縣。 湘東王釋遣前寧州刺

二年春二月,邵陵王綸走至安陸董城,爲西魏所攻,軍敗,死。

三月,侯景自帥衆西寇。 丁未,發京師,自石頭至新林,舳艫相接。

四月,至西陽。〔三乙亥,景分遣爲將宋子仙、任約襲郢州。 丙子,執刺史蕭方諸。

閨 五月癸未, 月甲子,回景進寇巴陵,湘東王釋所遣領軍將軍王僧辯連戰不能剋。 湘東王釋遣游擊將軍胡僧祐、 信州刺史陸法和援巴陵, 景遺任約帥衆拒

援軍。

攻魯山城,剋之,獲魏司徒張化仁、云、儀同門洪慶。云、辛酉,進圍郢州, 六月甲辰,僧祜等擊破任約,至 擒之。 乙巳、景解圍宵遁、王僧辯督衆軍追景。 下之, 獲賊帥宋子 庚申,

本紀

|仙等。 鄱陽王故將侯瑱起兵,襲偽儀同于慶于豫章,慶敗走。

秋 ,七月丁亥,侯景還至京師。辛丑,王僧辯軍次湓城,賊行江州事范希榮棄城走。

器、尋陽王大心、西陽王大鈞、武寧王大威、建平王大球、云義安王大昕及尋陽王諸子二十 人。 矯爲太宗詔,禪于豫章嗣王棟,大赦改年。 午,侯景遣衞尉卿彭儁、廂公王僧貴率兵入殿,廢太宗爲晉安王,幽于永福省。害皇太子大 八月丙午,晉熙人王僧振、鄭寵起兵襲郡城,爲晉州刺史夏侯威生、儀同任延遁走。戊 遣使害南海王大臨於吳郡,南郡王大連於

姑孰,安陸王大春於會稽,新興王大莊於京口。 冬十月壬寅,帝謂舍人殷不害曰:「吾昨夜夢吞土,卿試爲我思之。」不害曰:「昔重耳饋

塊,卒還晉國。陛下所夢,得符是乎。」及王偉等進觴於帝曰:「丞相以陛下憂憤旣久,使臣

酣,曰:「不圖爲樂一至於斯」、旣醉寢,王偉、彭儁進土囊,王脩纂坐其上,於是太宗崩於永 梓宮升朝堂,世祖追崇爲簡文皇帝,廟曰太宗。四月乙丑,葬莊陵。 福省,時年四十九。賊僞諡曰明皇帝,廟稱高宗。明年,三月己丑,云王僧辯率前百官奉 上壽。」帝笑曰:「壽酒,不得盡此乎。」於是並賫酒餚、曲項琵琶,與帝飲。 帝知不 克, 乃盡

雞鳴不已。弗欺暗室,豈況三光,數至於此,命也如何」又爲連珠二首,文甚悽愴。 初,太宗見幽縶,題壁自序云:「有梁正士朦陵蕭世纘,立身行道,終始如一,風雨如晦,

降,拓 號泣 (標三十卷)禮大義二十卷,老子義二十卷,莊子義二十卷,長春義記一百卷,法寶連壁三百 恒討 |杜 云:「余七歲有詩癖,長而 書,善言玄理。 畫,眄睞則 一懷寶 論篇籍,繼以文章。 不絕聲,所坐之席,沾濕 太宗幼而敏睿,識悟過人,六歲便屬文,高祖驚其早就,弗之信也,乃於御前面試,辭采 地千餘里。 高 振 祖歎 目光燭 遠 將軍曹義宗等衆軍進討, 曰:「此子,吾家之東阿。」旣長,器宇寬弘,未嘗見慍喜。 自年十一,便能親庶務,歷試蕃政,所在有稱。 人。 及居監撫,多所弘宥,文案簿領,纖毫不可欺。 讀書十行俱下。 高祖 不倦。」然傷於輕豔,當時號曰「宮體」。所著昭明太子傳 法盡爛。 所製五經講疏,嘗於玄圃奉述,聽者傾朝野。 在襄陽拜表北伐、遣長史柳津、司馬董當門、壯武 九流百氏,經目必記,篇章辭賦,操筆立成。 剋平南陽、新野等郡,魏南 在穆貴嬪憂,哀毀骨立,晝夜 引納文學之士,賞接無倦, 荆州刺史李志據安昌城 方頰豐下,鬚鬢 雅好題詩,其序 五. 卷,諸王 博綜 將 軍 如

不取 制 賊 焉。 臣, 史臣 弗展所蘊 日:太宗幼年聰睿,令問 及養德東朝,聲被夷夏,洎乎繼統,寔有人君之懿矣。 一,終罹懷、愍之酷,哀哉 夙標,天才 ·縦逸,冠於今古。 文則時以 方符文、景,運鍾屯、剝,受 輕 華爲累, 君子所

卷,並行於世焉。

校勘記

新淦公大成爲山陽郡王 「淦」各本譌「塗」。 今改正。 按:本書武帝紀大同八年正月下, 出「新

淦」。 通鑑太清二年十一月紀「新塗公大成」胡注:「新塗或作新淦。 沈約志:新淦縣, |漢屬豫

章郡。」

ヘニン 新興王大莊爲南徐州刺史 「大莊」各本作「大壯」,據本書太宗十一王傳及南史改,下同。

四月至西陽 按:下出「乙亥」、「丙子」。 是年閏三月甲戌朔,乙亥爲閏三月二日,丙子爲閏三

月三日,是「四月」當作「閏月」。

閏月甲子 「閏月」當作「四月」。是年閏三月,不閏四月。閏三月甲戌朔,無「甲子」,四月甲辰

朔,有「甲子」。

アガン 六月甲辰僧祐等擊破任約 「甲辰」下各本衍一「朔」字,據通鑑删。 是年六月癸卯朔,甲辰爲

六月二日。

ハベン 仁。 獲魏司徒張化仁 按魏司徒安得爲景守城,今從典略。」 「魏司徒張化仁」,通鑑作「別將張化仁」。考異云:「梁帝紀作魏司徒張化

「八」武寧王大威建平王大球 「武寧王」下各本脱「大威建平王」五字,今據本書太宗十一王傳補。

按:太宗十一王傳,武寧王大威、建平王大球並於大寶二年秋遇害。

(元) 明年三月己丑 「己丑」各本譌「癸丑」,據南史改。本書元帝紀亦作「己丑」,是。大寶三年三

月己巳朔,無癸丑。

梁書卷五

本紀第五

元帝

中外諸軍事、司徒承制、餘如故。 月,侯景寇沒京師。 軍將軍,領石頭戍軍事。六年,出爲使持節、都督江州諸軍事、鎮南將軍、江州 進號平西將軍。 年,封湘東郡王,邑二千戶。 元年,徙爲使持節、都督|荆癃湘|司郢|寧|梁|南北秦九州諸軍事、鎭西將軍、荆州刺史。 七年,出爲使持節、都督|荆湘郢|益|寧南梁六州諸軍事、西中郎將、荆州刺史。 世祖孝元皇帝諱釋,字世誠,小字七符,高祖第七子也。 大同元年,進號安西將軍。 四月,太子舍人蕭韶至江陵宣密韶,曰以世祖爲侍中、假黃鉞、大都督 初爲寧遠將軍、會稽太守,入爲侍中、宣威將軍、丹陽尹。 是月, 世祖徵兵於湘州,湘州刺史河東王譽拒不造。六月 三年,進號鎭西將軍。 天監七年八月丁巳生。 五年,入爲安右將軍、護 中大通 刺史。 三年三 四年, 太清 普通

本紀第五

元

帝

丙午, 卯,雍州刺史岳陽王營舉兵反,來寇江陵,世祖嬰城拒守。 各率其衆來降。 遺世子方等帥衆討譽,(三) 丙寅,營遁走。 鮑泉攻湘州不克,又遣左衞將軍王僧辯代將。 戰所敗死。 七月,又遺鎭兵將軍鮑泉代討譽。〔三〕九月乙 乙丑,營將杜崱 與其兄弟及楊混

大寶元年,世祖猶稱太清四年。 二月甲戌,衡陽內史周弘直表言鳳皇見郡界。 正月辛亥朔,左衞將軍王僧辯獲橘三十子共帶,以獻。

夏五月辛未,王僧辯克湘州,斬河東王譽,湘州平。

六月,江夏王大款、山陽王大成、宜都王大封自信安間道來奔

子方諸 平王恪 子右衛率蕭慧正、雋州 王,大封爲汝南郡王。 九月辛酉,以 爲荆 爲郢州刺 州 刺 史,鎭 史, 前郢州刺史南平王恪爲中衛將軍 左衛將軍王僧辯爲領軍將軍 武 刺史席文獻等下武昌拒約。 是月,任約進寇西陽、武昌,遣左衞將軍徐文盛、右衞將軍陰子春、太 陵。 ·、 尙 以中衞將軍、 改封大款為臨 .書令、開府儀同三司,中撫軍將軍 尚書令、]]] 郡王, 開府儀同三司南 大成 爲 桂陽 世 郡

衞 將軍張縮、司徒左長史曇等府州國一千人奉牋曰: 十 一月甲子,南 平王恪、侍中臨川王大款、桂 陽王大成、散騎常侍江安侯圓正、侍中左

公大王殿下,命世應期,挺生將聖,忠爲令德,孝實天經,地切應、韓,寄深旦、奭,五 方,愼名與器。 竊 以嵩岳旣峻,山川出雲,大國有蕃,申甫惟翰。豈非皇建斯極,以位爲寶,聖教辨 是知太尉佐帝,重華表黃玉之符,司空相土,伯禹降玄珪之錫。 伏惟 品 明

斯訓,七政以齊,志存社稷,功濟屯險。

夷狄內侵,枕戈泣血,鯨鯢未掃,投袂勤王,能

湘波 使遊 折,遂修職貢。 底定灊、霍。泝流窮討,路絕窺窬,胡兵侵界,鐵馬霧合,神規獨運, 魂請盟以屈膝,醜徒銜璧而 自息,非築杜弢之壘;峴山離貳,不伐劉表 梁、漢合契,肆犀利之兵,巴、漢俱下,竭驍勇之陣。 可謂上流千里,持戟百萬,天下之至貴,四海之所推 響氣。 親蕃 外叛,釁均吳、楚,義 之城。 九江致梗,二別殊派,纔命戈船, 討申 皆即· 南通 威, 五 梟 嶺, 懸, 兵不 北 翻 ·血刃。 出力 也。 同 翅

東夷不怨,西戎卽序。

野蠶 相趨 不彰於彝典,明試不陳乎車服者哉 自績,何謝歐絲,閑田生稻,寧殊 ;夢水之傍,尚致**車輿結轍**。 今海水飛雲,崑山起燎,魏文悲樂推之歲,韓宣歎成禮之日,陽臺 麰麥兩穗,出於南平之邦,甘露泥枝,降乎當陽 、雨栗。 莫非品物咸亨,是稱文明光大,豈可徽號 之下, 獨有冠蓋 之境。

尋甲令,博詢惇史,謹再拜上,進位相國,總百揆,竹使符一,別准恒儀。 昔晉、鄭入周,尙作卿士;蕭、曹佐漢,且居相國。 宜崇茲盛禮,顯答羣望。 杖金斧以翦逆 恪等稽

書 卷 Ŧi. 一一六

暴,乘玉輅而定社稷。 傍羅麗於日月,貞明合于天地。 扶危翼治,豈不休哉

恪等不通大體,自昧伏奏以聞

哽恋。」 文,終建一匡,肅其五拜。 于海,西至于河,南次朱鳶,北漸玄塞。 世祖令答曰:「數鍾陽九, 時惟百六,鯨鯢未翦,寤寐痛心。 雖義屬隨時, 事無虛紀, 率茲小宰, 弘斯大德。 傳稱皆讓,象著鳴謙, 周粤天官, 將何用繼蹤曲阜, 秦稱相國, 瞻言前典,再懷 擬跡恒、 東至

珣 、定州刺史杜幼安帥衆下武昌,(三) 助徐文盛 十二月壬辰,以定州刺史蕭勃爲鎭南將軍、廣州刺史。 遣護軍將軍尹悅、 巴州刺史王

大寶二年,世祖猶稱太淸五年。 二月己亥,魏遣使來聘。

三月,侯景悉兵西上,會任約軍。

奔歸、王珣、尹悅、杜幼安並降賊。 庚戌,領軍將軍王僧辯帥衆屯巴陵。 甲子,景進寇巴陵。 四月丙午,「於」景遣其將宋子仙、任約襲郢州,執刺史蕭方諸。 戊申,徐文盛、陰子春等

以王僧辯爲征東將軍、開府儀同三司、尚書令,胡僧祐爲領軍將軍,陸法和爲護軍將 五月癸未,世祖遣游擊將軍胡僧祐、信州刺史陸法和帥衆下援巴陵。 任約敗,景遂遁

軍。仍令僧辯率衆軍追景,所至皆捷。

南將軍南平王恪進號征南大將軍、湘州刺史、餘如故。 八月甲辰,僧辯下次湓城。 辛亥,以鎭南將軍、湘州刺史蕭方矩爲中衞將軍。 司空、征

九月己亥,以征東將軍、開府儀同三司、尚書令王僧辯爲江州刺史,餘如故。 盤盤國獻

馴象。

冬十月辛丑朔,有紫雲如車蓋,臨江陵城。是月,太宗崩。侍中、征東將軍、開府儀同

三司、江州刺史、尚書令、長寧縣侯王僧辯等奉表曰:

商啓祚。 不同寃。 遂憑天邑。 寇庭者,並罹禍酷。六軍慟哭,三辰改曜。哀我皇極,四海崩心。我大梁纂堯構緒,基 而 :和四時,履至尊而制六合。 麗正居貞,大橫固祉。 衆軍薄伐,塗次九水,即日獲臨城縣使人報稱:侯景弑逆皇帝,賊害太子,宗室在 悠悠彼蒼,何其罔極 太祖文皇帝徇齊作聖,肇有六州。高祖武皇帝聰明神武,奄龕天下。依日月
 IIII
 III
 III</ 四葉相係,三聖同基。蠢爾凶渠, 金楨玉幹,莫

配 ,平王則 臣聞 喪君 居正東遷,宗周所以卜世。 有君,春秋之茂典,以德以長,先王之通訓。 漢光以能捕不道,故景歷重昌,中宗以不違羣 少康則牧衆撫職,祀夏所以

本 紀

實居長。 道。 議,故江東可立。儔今考古,更無二謀。伏惟陛下至孝通幽, 而應千載之期,啓殷憂之明,而居百王之會。 家國之事,一至於斯。天祚大溪,必將有主。 乘屈完而陳諸侯,拜子武而服大輅。 功齊九有,道濟生民。非奉聖明,誰嗣 取威定霸,嶮阻艱難,建社治兵,载循古 軒轅得姓,存者二人,高祖五王,代 英武靈斷,當七九之厄,

大夫 開 殘寇潛居,器藏社處,乾象旣傾,坤儀已覆,斬|莽輗車,燒|卓照市,廓清|函夏,正爲塋陵, 宗正奉詔,博士擇時,南面卽可居尊,西向無所讓德。四方旣知有奉,八百始可同期。 君,宗祏豈可一日無主。 伏願陛下掃地升中,柴天改物。 事迫凶危,運鍾擾攘,蓋不勞 兆 制,可以權宜,五 坐廟堂以朝四夷, .雪宮闈,庶存鍾鼎,彼黍離離,伊何可言。 陛下繼明闡祚,卽宮舊楚。 而尊,鸞輅龍章,蓋以郊禋而貴。 ,更謀都鄙。 臣聞日月貞明,太陽不可以闕照,天地貞觀,乾道不可以久惕。黃屋左纛,本爲億 一禮六樂之容,歲時取備。 登靈臺而望雲物,禪梁甫而封泰山,臨東濱而禮日觀。 左遷右澗,夾艦可以爲居,抗殿疏龍,惟王可以在臨,何必勤勤建業 寶器存乎至重,介石愼於易差。 金芝九莖,瓊茅三脊。 要衞率職,尉候相望。 黔首豈可少選無 然後 左廟右社之 與三事

也哉。

臣等不勝控款之至,謹拜表以聞。

將 附 蕭 蛇卽 世 樹之酷,萬始不追;霜露之哀,百憂總萃。 棟, 祖 軍 鳳之徒,旣聞來議。 ·胡僧祐 戮,方欲追延陵之逸軌,繼子臧之高讓,豈資秋亭之壇,安事繁陽之石。 奉諱,大臨三日,百官編素。 殷辛也。 率羣僚二百餘人,江州別駕張佚率吏民三百餘人,並奉牋勸進。 赤泉未賞、劉邦尚曰漢王;白旗弗懸,周發猶稱太子。 羣公卿士,其諭孤之志,無忽」司空南平王恪率宗室五十餘人,領軍 乃答曰:「孤以不德,天降之災,枕戈飮膽,扣心泣血。 甫聞伯升之禍,彌切仲謀之悲。 飛龍之位,孰謂可躋; 若封豕旣殲,長 侯景,項籍 世祖固讓。 風

十一月乙亥,王僧辯又奉表曰:

赴 純 之勸。 唐郊,猶懼陛下俛首潸然,讓德不嗣。 紫宸 岳牧 **曠位,赤縣無主,百靈聳動,萬國回皇。** 翹首,天民累息。 傳車在道,方愼宋昌之謀,法駕已陳,尚杜耿 雖醉醒相扶,同歸景亳,式歌且誦,總

成,洞 寶 I文思 日 位。 臣 陰陽 英雄 聞 星回 黄屋 之不 特 日薄,擊雷鞭電者之謂天,岳立川流, 達。 測 廟堂之下,本非 而 比以周旦,則文王之子,方之放勛,則帝摯之季。 以裁 成 萬物者,其在 獲已 而 居 一; 明 聖 一人乎! 鏡四衢 故云 之樽 吐霧蒸雲者之謂地。 蓋 「天地之大德曰 由 應 物 取 訓。 千年 生, 伏 苞天 ·旦暮,可不 惟 聖 陛 人 地之混 之大 下

本

紀

第

五

元

帝

在斯。 置高廟。 庭闕 陛下方復從容高讓,用執謙光。 湮亡,鍾鼎淪覆,嗣膺景曆,非陛下而誰。豈可使赤眉更立盆子, 展其矯行偽書,誣罔正朔,見機而作,斷可識 隗囂託

矣。匪疑何卜,無待蓍龜。

謀,百道俱進,國恥家怨,計期就雪,社稷不墜,緊在聖明。今也何時,而申帝啓之避, 府無虛月。自洞庭安波,彭蠡底定,文昭武穆,芳若椒蘭,敵國降城,和如親戚,九服同 伯之伐,四方雖虞,一戰以霸。斬其鯨鯢,旣章大戮,何校滅耳,莫匪姦回,史不絕書, 鼎之謀,莫不定算扆帷,決勝千里。擊靈鼉之鼓,而建翠華之旗,驅六州之兵,而總九 首,將欲安歸!陛下英略緯天,沉明內斷,橫劍泣血,枕戈嘗膽,農山圯下之策,金匱玉 凶危若此,方陳泰伯之辭。 側足皆爾。 日 者,公卿失馭,禍纒霄極,侯景憑陵,姦臣互起,率戎伐頴,無處不然,勸明誅晉, 刁斗夜鳴,烽火相照。中朝人士,相顧銜悲,涼州義徒,東望殞涕, 慄慄黔 國有具臣,誰敢奉詔。

水浮 莫不覆盾銜威,提斧擊衆,風飛電耀、志滅凶醜。 一夜聚, 川,鐵馬銀鞍,陵山跨谷。 天下者高祖之天下,陛下者萬國之歡心,萬國豈可無君,高祖豈可廢祀。 八風通吹,雲煙紛郁,日月光華,百官象物而動,軍政不戒而 英傑接踵,忠勇相顧,湛宗族以酬恩,焚妻子 所待陛下昭告后土,虔奉上帝,廣發 備。 飛艫 以報主。 巨艦,竟 即日五

斬 明詔,師出以名,五行夕返,六軍曉進, 姚秦 而 取鍾,脩掃塋陵,奉迎宗廟。 便當盡司寇之威,窮蚩尤之伐,執石趙而求璽, 陛下豈得不仰存 國計 ,俯從民請。 漢宣嗣位之

後,即遣蒲類之軍;光武登極旣竟,始有長安之捷。 臣等或世受朝恩,或身荷重遇,同休等戚,自國刑家,苟有腹心,敢以死奪。 由此言之,不無前 准 不任

慺慺之至,謹重奉表以聞。

施行。」是日,賊司空、東南道大行臺劉神茂率儀同劉歸義、留異赴義,奉表請降。 遠,于居于處,寤寐疚懷,何心何顏,撫茲歸運。 自今表奏,所由並斷,若有啓疏,可寫此令 乘乾,明夷垂翼,璿度亟移,玉律屢徙,四岳頻遣勸進,九棘比者表聞。 夏配天,方申來議也。」是時巨寇尙存,未欲卽位,而四方表勸,前後相屬,乃下令曰:「大壯 姓則有扈不賓,臥而思之,坐以待旦,何以應寶曆,何以嗣龍圖。 提、合雒以前,栗陸、驪連之外,書契不傳,無得稱也。 世 人民焉,有社稷焉,或歌謠所歸,或惟天所相。 祖答曰:「省示, 復具一二。 孤聞天生蒸民而樹之以君,所以對揚天休,司牧黔首。 孤遭家多難,大恥未雪,國賊則蚩尤弗翦,同 自阪泉彰其武功,丹陵表其文德,有 庶一戎旣定,罪人斯得,祀 譙、沛未復, 些陵永

大寶三年,世祖猶稱太淸六年。 正月甲戌,世祖下令曰:「軍國多虞,戎旃未靜,青領雖

業, 桃敷水;四人有令,[t] 猶及落杏飛花。化俗移風,常在所急;勸耕且戰,彌須自許。 熾,黔首宜安。 時惟星鳥,表年祥於東秩,春紀宿龍, 歌歲取於南畯。 垂寒谷,積黍自溫,寧可墮此玄苗,坐飡紅粒,不植灩頷,空候蟬鳴。 無棄民力, 並分地利。 班勒州郡, 咸使遵承。」以智武將軍、 南平內史王褒爲吏部尚 可悉深耕穊種,安堵復 況三農務業, 尚看天 豈直燕

二月,王僧辯衆軍發自尋陽。世祖馳檄告四方曰:

書。

龕 代;溫、陶之績,彌盛於金行。 九舜,曷足云也。 後,延頸 之夫,叱咤則風雲興起,鼓動則嵩、華倒拔。 鼉之鼓,則百神警肅。 風、愀、方、邵之賢,衞、霍、厗、趙之將,羽林黃頭之士,虎賁緹騎 征不服。 艱難,成之者忠義。 夫剝極生災,乃及龍戰,師貞終吉,方制獖豕。 (舉踵, 交臂屈膝。 左伊右瀍,咸皆仰化;濁涇淸渭,靡不向風。 故羿、燒滅於前,莽、卓誅於後。是故使桓、文之勳,復興於周 |胡人不敢牧馬,秦士不敢彎弓。叶和萬邦,平章百姓,十**堯** 粤若|梁興五十餘載,平壹宇內,德惠悠長,仁育蒼生,義 自桐柏以北,孤竹以南,碣石之前,流沙之 豈不以侵陽蕩薄,源之者亂階;定 。建翠鳳之旗,則六龍驤首,擊靈

賊臣侯景,匈奴叛臣,鳴鏑餘噍。懸瓠空城,本非國寶,壽春幾要,賞不踰月。開海

本紀第五 元帝

王畿。 北臨,或有穹廬氈帳。南山之竹,未足言其愆;西山之兔,不足書其罪。 **慄黔首,路有銜索之哀;蠢蠢黎民,家隕桓山之泣。**[ξ] 偃師南望,無復儲胥、露寒,河陽 斂,肆意哀剝,生者逃竄,死者暴尸,道路以目,庶僚鉗口。 刑戮失衷,爵賞由心,老弱 是以班師凱歸,休牛息馬。賊猶不悛。遂復矢流王屋,兵躩象魏。 斂無度,景卿之誚已及。爲虎傅翼,遠相招致。 波流,士女塗炭。臧獲之人,五宗及賞,搢紳之士,三族見誅。穀粟騰踴,自相吞噬。 訟之堂;甘泉之宮,永乖避暑之地。坐召憲司,臥制朝宰,矯託天命,僞作符書。重增賦 率皐貔,躬擐甲胄,霜戈照日,則晨離奪暉,龍騎蔽野,則平原掩色,信與江 | 陵之倉,脈常平之米,燉九府之費,錫三官之錢,冒于貨賄,不知紀極。 敢興逆亂,梗我 與寒風俱憤。 賊臣正德,阻兵安忍。 凶醜畏威,委命下吏,乞活滩、肥,苟存徐、克。 渙汗旣行,絲綸爰被。 。日者結怨江岸,遠適單于。 虔劉我生民,離散我兄弟。 簡牘屢彰,彭生之魂未弭,聚 總章之觀,非復 水同流,氣 我是以董 我 聽

首於安南,化仁面縛於漢口,子仙乞活於鄢郢,希榮敗績於柴桑。侯景奔竄,十鼠爭穴, 丘。我是以義勇爭先,忠貞盡力。斬馘凶渠,不可稱算,沙同赤岸,水若絳河。任約泥 地容身。景阻饑旣甚,民且狼顧,遂侵軼我彭蠡,憑凌我郢邑,竊據我江夏,掩襲我巴 外監陳瑩之至,伏承先帝登遐,宮車晏駕。奉諱驚號,五內摧裂,州冤本毒,白無

郭 默清夷,晉熙附義,計窮力屈,反殺後主。 畢、原、酆、郇,並離禍患,凡、蔣、邢、茅,皆

伏鈇鑕。是可忍也,孰不可容!

踰荆山 影從。 宫,三門旣啓,五將咸發,舉整整之旗,掃亭亭之氣,故以臨機密運,非賊所解, 縞。 襲行天罰,提戈蒙險,隕越以之。 誅,何罪不 風,弓則吟猿落雁。 駕長驅,百道俱入,夷山殄谷,充原蔽野。 須總一,共推幕府,實用主盟。 遠,則三千弗違。 末屬,猶能 以此衆戰,誰能禦之!脫復蜂蠆有毒,獸窮則鬭。 幕府據有上流,實惟分陝,投袂荷戈、志在畢命。 ,淺原度彭蠡,[10]舳艫汎水,以掎其南,輜輧委輸,以衝其北。 雷震風駭,直指建業。 如此,況聯華日月,天下不賤,爲臣爲子,兼國兼家者哉!咸以義旗旣建,宜 如彼怒蛙,譬諸鼷鼠,豈費萬鈞, 捧崑崙 而 按劍而 壓卵,傾渤海而 粤以不佞,謬董連率,遠惟國艱,不遑寧處。 天馬千羣,長戟百萬,驅賁獲之士,資智勇之力,大楚 叱,江水爲之倒流,抽戈而揮,皎日爲之退舍。 挾輈曳牛之侶,拔距磔石之夫,騎則 灌熒。 無勞百溢。 如駟馬之載鴻毛,若奔牛之觸魯 昔周依晉、鄭,漢有虚、牟。 謂 山蓋高,則四郊多壘;謂 加以日臨黃道,兵起絳 華夷 百濮,贏糧 中權後 逐日 奉義而 彼惟 地蓋 勁, 方 追

今遣使持節、大都督、征東將軍、開府儀同三司、江州刺史、尚書令、長寧縣開國侯

所問。 降漢,且珥金貂。必有其才,何卹無位。若執迷不反,拒逆王師,大軍一臨,刑茲罔赦。 邑,不爲賊用,上賞方伯,下賞剖符,並裂山河,以紆靑紫。昔由余入秦,禮同卿佐,日磾 夕。 孟諸焚燎,芝艾俱盡;宣房河決,玉石同沉。信賞之科,有如皎日;黜陟之制,事均白 有能縛侯景及送首者,封萬戶開國公,絹布五萬匹。 慚泉壤,上愧皇天! 失忠與義,難以自立。 動,若滄海之奔流。 王僧辯率衆十萬,直掃金陵。 春長狄之喉,繫郅支之頸。今司寇明罰,質鈇所誅,止侯景而已。黎元何辜,一無 。諸君或世樹忠貞,身荷寵爵,羽儀鼎族,書勳王府,俛眉猾豎,無由自效,豈不下 計其同惡, 不盈一旅。君子在野, 小人比周。 鳴鼓聒天,摐金振地。 。想誠南風,迺眷西顧,因變立功,轉禍爲福 朱旗夕建,如赤城之霞起;戈船夜 有能率動義衆,以應官軍,保全城 何校滅耳, 匪朝伊

三月,王僧辯等平侯景,傳其首於江陵。戊子,以賊平告明堂、太社。己丑,王僧辯等

檄布遠近,咸使知聞。

叉奉表曰:

等分勒武旅,百道同趣,突騎短兵,犀函鐵楯,結隊千羣,持戟百萬,止紂七步,圍頂三 重,轟然大潰,羣凶四滅。京師少長,俱稱萬歲。長安酒食,於此價高。 衆軍以今月戊子總集建康。賊景鳥伏獸窮,頻擊頻挫,姦竭詐盡,深溝自固。 九縣雲開,六 臣

元

紀

於孟門,百川復啓,補穹儀以五石,萬物再生。 雄圖武算,指麾則丹浦不戰,顧眄則阪泉自蕩。地維絕而重紐,天柱傾而更植。鑿河津 博覽則大哉無所與名,深言則曄乎昭章之觀。 忠爲令德,孝實動天。加以英威茂略, 物外,未奉慈衷。陛下日角龍顏之姿,表於徇齊之日,彤雲素氣之瑞,基於應物之初。 **樽俎有歸。伊此儻來,豈聖人所欲,帝王所應,不獲已而然。伏讀璽書,尋諷制旨,顧懷** 臣,光武止蕭王,自己豈謂紹宗廟。黃帝遊於襄城,尚訪治民之道,放勛入於姑射,猶使 首。所以越人固執,熏丹穴以求君;周民樂推,踰岐山而事主。 漢王不卽位,無以貴功 謙沖,窅然凝邈。 日者,百司岳牧,祈仰宸鑒。 飛龍可躋,而乾爻在四;帝閣云叫,而閶闔未開。 。以錫珪之功,旣歸有道,當璧之禮,允屬聖明;而優詔 縱陛下拂袗衣而遊廣成,登啽山而去東 謳歌再馳, 是用翹

仙 |郟、洛永以爲居。 豈得不揚淸駕而 平。自己高奴、櫟陽,宮館雖毀,濁河淸渭, 土,羣 六馬於譙郡。 **殘憷之地,抗拒九戎;一旅之師,翦滅三叛。** 興,匪 人承露。 ·臣安得仰訴,兆庶何所歸仁。 朝伊 斯蓋九州之赤縣,六合之樞機。 夕,瞻言法駕 緬求前古,其可得歟。對揚天命,何所讓德! 赴名都,具玉鑾而遊正寢!昔東周旣遷,鎬京遂其不 夏后以萬國朝諸侯,文王以六州匡天下。 ,載渴 且飢,豈 況郊祀配天,罍篚禮曠,齋宮淸廟,匏竹不 可久稽衆議, 佳氣猶存。 博 坦然大定,御輦東歸。 士捧圖書而 皐門有伉, 有曠 稍還,太常定禮儀 桑則 有理存焉,敢重所奏 跡基 • 甘泉四敞,土圭測景, 百里, 舊郊旣復, 解五牛於冀州 復;長安一亂, 劍杖三尺。以 函 陳,仰望 而 已列。 維己

襄陽短狐,未全革面。太平玉燭,爾乃議之。」辛卯,宣猛將軍朱買臣密害豫章嗣王棟,及其 于予一人。 文叔金吾之官,事均往願,孟德征西之位,且符前說。今淮海長鯨,雖云授首, 相 國答曰:「省表,復具一二。羣公卿士,億兆夷人,咸以皇天眷命,歸運所屬,用集寶位

一弟橋、樛,世祖志也。

司空蕭泰、祠部尚書樂子雲拜謁塋陵,自己脩復社廟。丁巳,世祖令曰:「軍容不入國,國容不 四月乙巳,益州刺史、新除假黃鉞、太尉武陵王紀竊位於蜀,改號天正元年。世祖遣兼 雖 子產獻捷,戎服從事,亞夫弗拜,義止將兵。今凶醜殲夷,逆徒殄潰,九有旣截,四

本紀

第

五

元帝

太守張彪爲安東將軍

海 乂安。 漢官威儀,方陳盛禮,衞多君子,寄是式瞻。 便可解嚴,以時宣勒。」是月, 以東陽

雪恥。 南徐州刺史。是月,魏遣使賀平侯景。 樂、辛術等寇秦郡、日四王僧辯遣杜崱帥衆拒之。 今特闡以王澤,削以刑書,自太淸六年五月二十日昧爽以前,咸使惟新。」是月,魏遣太師潘 比屯邅寇擾,爲歲已積,衣冠舊貴,被逼偸生,猛士勳豪,和光苟免,凡諸惡侶,諒非一族。 周經;聖人解網,聞之陽令。 射王偉、尚書呂季略、少卿周石珍、舍人嚴亶於江陵市。 以尚書令、征東將軍、開府儀同三司、江州刺史王僧辯爲司徒、鎭衞將軍。 庚辰,以征南將軍、湘州刺史、司空南平嗣王恪爲鎭東將軍、揚州刺史,餘如故。 五. 元惡稽誅,本屬侯景,王偉是其心膂,周石珍負背恩義,今並烹諸鼎鑊,肆之市朝。但 月庚午,司空南平王恪及宗室王侯、大都督王僧辯等,復拜表上尊號,世祖猶固讓不 自險狁孔熾,長蛇荐食,赤縣阽危,黔黎塗炭,終宵不寐,志在 以陳霸先爲征北大將軍、開府儀同三司 是日,世祖令曰:「君子赦過, 乙酉, 斬賊左僕 甲申, 著在

八月,蕭紀率巴、蜀大衆連舟東下,遣護軍陸法和屯巴峽以拒之。 **兼通直散騎常侍、聘**

臣聞封唐有聖,還承帝嚳之家,居代惟賢,終纂高皇之祚。

無爲稱於革舄,至治表

魏使徐陵於鄴奉表曰:

作訓 於勛 得掩 惟太室之祥 於垂衣,而撥亂反正,非間前古。 ベー 顯 生民,貽風多士。 姓於 一,明讓同於旦、奭。 軒轅,非 圖 .書斯歸,[]至何止堯門之瑞。 才子於顓頊? 莫不時因多難, 俱繼神宗者也。 日二 握 日, 研覽萬機; 允文允武, 包羅羣藝。 圖 執鉞,將在 至如金行重作,源出東莞,炎運猶昌,枝分南頓。 一御天,玉縢珠衡,先彰元后。 若夫大孝聖人之心, 中庸君子之德, 伏惟陛下, 出震等 擬茲三大,賓是四 神祇 所命,非 固以

門,歷試諸難,咸熙庶績,斯無得而

稱也

千剸 |葬、||邑。未有援三靈之已墜,救四海之羣飛,赫赫明明,冀行天罰,如當今之盛者也。於 是卿雲似蓋,晨映姚鄉,甘露如珠,朝華景寢。 火帝,非無戰陣之風;堯誓湯征,咸用干戈之道。星躚東井,時破崤、潼;雷震南陽,初平 廟愔 虎,前驅效命,元惡斯殲。 雄氣方嚴,張繡交兵, 號,瞻丹陵 悟,方承 非云 無妄興暴,皇祚寖微, 明罰。 而 多福 殞慟。 青羌赤狄,同界豺狼,胡服夷言,咸爲京觀。 家寃將報,天賜黃鳥之旗, 自氤氲渾沌之世,驪連、栗陸之君,卦起龍圖,口心文因鳥跡。 風神彌勇。 旣挂膽於西州,方燃臍於東市。 封狶脩蛇, 行災中國, 靈心所宅, 下武其興, 望紫極而長 忠誠冠於日月, 芝房感德,咸出鲖池,蓂莢伺辰,無勞銀 國害宜誅, 孝義感 於冰霜 神奉玄狐之籙。 蚩尤三冢, 邦畿濟濟,還見隆平;宗 如霆 寧謂! 如雷 嚴誅 滕公擁樹 如貔 王莽 雲師 如

本

箭。 無陳,乃棫樸之愆期,非苞茅之不貢。 行司隸。 愚謂大庭、少昊,非有定居;漢祖、殷宗,皆無恒宅。 登封岱岳,猶置明堂;巡狩章陵,時 暉等至鄴,伏承聖旨謙沖,爲而弗宰,或云涇陽未復,函谷無泥,旋駕金陵,方膺天眷。 正應揚鑾旂以饗帝,仰鳳扆以承天,曆數在躬,疇與爲讓!去月二十日,兼散騎常侍柳 詢天官,斟酌繁昌,經營高邑。宗王啓霸,非勞陽武之侯,曰司清蹕無虞,何事長安之邸。 賓,遐邇同 重 以東漸玄蒐,西踰白狼,高柳生風,扶桑盛日,莫不編名屬國,歸質鴻臚,荒服來 何必西瞻虎據,乃建王宮,南望牛頭,方稱天闕。 福。 其文昭武穆, 跗蕚也如彼; 天平地成, 功業也如此。 雲和之瑟,久廢甘泉;孤竹之管,無聞方澤。 抑又聞之:玄圭旣錫,蒼玉 **人應旁求掌故,諮**

但輕生不造,命與時乖。忝一介之行人,同三危之遠擯。 特達,通聘河陽,貂珥雍容,尋盟漳水,加牢貶館,隨勢汙隆,曰己瞻望鄉關,誠均休戚。 引箕山之客!未知上德之不德,惟見聖人之不仁。率土翹翹,蒼生何望!昔蘇季、張 奏邊城,私等劉琨之哭。不勝區區之至,謹拜表以聞。 伏願陛下因百姓之心, 拯萬邦之命。 豈可逡巡固讓, 方求石戶之農, 高謝君臨, 徒 承閒內殿,事絕耿弇之恩;封

不懼歟。

九月甲戌,司空、鎮東將軍、揚州刺史南平王恪薨。

陸 執 納 湘 州 及 冬十月乙未,前 其將 刺 史王 潘 琳 烏累等舉兵反,自立襲陷湘州。 於殿內,琳副將殷晏下 梁州 刺史蕭 循自魏 獄 至于江陵,以循爲平北將軍、開府儀同三司。 死。 是月,四方征鎭王公卿士復勸世祖即尊號,猶 辛酉,以子方略爲湘州刺史。 庚戌,琳長史 戊申,

謙譲

未

表三上,乃從之。

地侔啓 世 僚,咸以 之心 天之威, 田,具瞻 祖 股 ,豈貴黃屋,誠弗獲已而 不升正 承聖元年冬十一月丙子,世祖即皇帝位於江陵。 並 雖云 許弘 斯屬。 誦,方符文、景。 皇靈眷命, 算隆 殿,公卿陪列而已。 撥 貸 寶曆, 亂 皇考高 ;孝子義孫,〔三〕可悉賜 ,且非創 歸運斯 用集神器于予一 祖 羯寇 武 業,如因思得上繫宗祧,下惠億 及,天命 皇帝明並 臨莅之。 憑陵,時 丁丑,以平北將軍、開府儀同三司蕭循 不 人。 可 日月, 朕皇祖太祖文皇帝積德岐、梁, 化行江、漢, 道映在 爵 難 以久淹,宸 孔 ,長徒鏁士,特 昔虞、夏、商、周、年無嘉 功格 棘。 區 朕 「宇,應天從民,惟睿作聖。 極 大 不 拯横流 韶曰:「夫樹之以君,司牧黔首。 兆。 加 可 以 原 可改 宥 ,克復宗社。 **久曠**,粤若前 ' ; 禁錮 太清· 號 六年 奪勞,一 漢、魏、晉、宋,因循 爲驃騎將軍 爲 載, **羣公卿士、百辟** 承聖 皆曠蕩。」 太宗簡文皇 憲章令範, 元 一、湘州 年 帝 是 逋 畏 庶 刺 日 以

本

紀 第

五

元

梁 書 卷 五

史,餘如故。 安郡王。 追尊所生妣阮脩容爲文宣太后。是月, 己卯,立王太子方矩爲皇太子,改名元良。立皇子方智爲晉安郡王,方略爲始 陸納遣將潘烏累等攻破衡州刺 史丁道貴

於淥口,道貴走零陵。

率衆出空靈灘、[三]將下討納,納遣將吳藏等襲破洪雅,洪雅退守空靈城。 十二月壬子,陸納分兵襲巴陵,湘州刺史蕭循擊破之。 是月,營州刺史李洪雅自零陵

年春正月乙丑, 韶王僧辯率衆軍士討陸納。三三戊寅, 以東部尚書王褒爲尚書右僕

射、口回劉瑴爲吏部尚書。西魏遣大將尉遲迥襲益州。

未,李洪雅以空靈城降賊,賊執之而歸。初,丁道貴走零陵投洪雅,洪雅使收餘衆,與之俱 廢業,鳥鹵無遺。國富刑淸,家給民足。其力田之身,在所蠲免。外卽宣勒,稱朕意焉。」辛 有陋於官方。今元惡殄殲,海內方一,其大庇黔首,庶拯橫流。一廛曠務,勞心日仄,一夫 屯田之利。 帝籍。是以稼穡爲寶,周頌嘉其樂章,禾麥不成,魯史書其方册。 秦人有農力之科,漢氏開 洪雅旣降賊,賊乃害道貴。丙子,賊將吳藏等帥兵據車輪。庚寅,有兩龍見湘州西江。 三月庚午,回到韶曰:「食乃民天,農爲治本,垂之千載,貽諸百王,莫不敬授民時,躬耕 頃歲屯否,多難荐臻,干戈不戢,我則未暇。 廣田之令,無聞於郡國;載師之職,

夏四月丙申,僧辯軍次車輪。

五月甲子,衆軍攻賊,大破之。乙丑,僧辯軍至長沙。 甲戌、尉遲迥進逼巴西,潼州刺

史楊乾運以城降,自己納迥。己丑,蕭紀軍至西陵。

六月乙卯,(lie)湘州平。是月,尉遲迥圍益州

秋七月辛未, 巴人苻昇、 徐子初斬賊城主公孫晃,行以舉城來降。 紀衆大潰,遇兵死。

乙未,王僧辯班師江陵,詔諸軍各還所鎭。

水之鄉。 作亂,庸、濁阻兵,命將授律,指期克定。今八表义清,四郊無壘,宜從靑蓋之典,曰記言歸白 舊邦之頌。頃戎旃旣息,關柝無警。去魯興歎,有咸宵分,過沛殞涕,實勞夕寐。 九旂揚斾,拜謁塋陵,脩復宗社。 八月戊戌,尉遲迥陷益州。 江、湘委輸,方船連舳,巴峽舟艦,精甲百萬,先次建鄴,行實京師,然後六軍遄征, 主者詳依舊典,以時宣勒。」 庚子, 詔曰:「夫爱始居亳,不廢先王之都,受命于周,無改 仍以瀟、湘

方智爲江州刺史。 九月庚午,司徒王僧辯旋鎭。 是月,魏遣郭元建治舟師於合肥,如②又遣大將邢泉遠、步大汗薩、東方 丙子,以護軍將軍陸法和為郢州刺史。 乙酉,以晉安王

老率衆會之。「三」

冬十一月辛酉,僧辯次于姑孰,即留鎭焉。 遣豫州刺史侯瑱據東關壘,徵吳興太守裴

之横 帥衆繼之。 戊戌,以尚書右僕射王褒爲尚書左僕射,湘東太守張綰爲尚書右僕射。

十二月,宿預土民東方光據城歸化,魏江西州郡皆起兵應之。

年春正月甲午, 加南豫州刺史侯瑱征北將軍、開府儀同三司。[三] 陳霸先帥衆攻廣

陵城。 秦州刺史嚴超達自秦郡圍涇州,侯瑱、張彪出石梁,爲其聲援。辛丑,陳霸先遣晉陵

太守杜僧明率衆助東方光。

三月甲辰,以司徒王僧辯爲太尉、車騎大將軍。〔三〕丁未,魏遣將王球率衆七百攻宿預,

杜僧明逆擊,大破之。戊申,以護軍將軍、郢州刺史陸法和爲司徒。 夏四月癸酉,以征北大將軍、開府儀同三司陳霸先爲司空。

六月壬午,魏復遣將步大汗薩率衆救涇州。 癸未,有黑氣如龍,見于殿內。

秋七月甲辰,以都官尚書宗懷爲吏部尚書。

九 月辛卯,世祖於龍光殿述老子義,尚書左僕射王褒為執經。 乙巳,魏遣其柱國萬紐

于謹率大衆來寇。

冬十月丙寅,

魏軍至于襄陽,

蕭營率衆會之。 丁卯, 停講, 內外戒嚴, 輿駕出行都栅。

是日,大風拔木。丙子,徵王僧辯等軍。

臣敗 戰。 **營營,又遷還城內** 子,信州 城 城 王琳 樓,使居 南 績 入援。 胡 諸軍事 僧 一月,以領軍胡僧祐都督城東城北諸軍事,右僕射張綰爲副;左僕射王褒都督城西 刺 己酉 祐 史徐 民助運水石,〔圖〕諸要害所,並增 丁酉,大風,城內火。以胡 道 中流矢薨。 降 一殿省 世 一譜、晉安王司馬任約軍次馬頭岸。 左僕 元景亮爲副。 射王褒 六軍 敗績。 為護 軍將軍。 王公卿士各有守備。 反者斬西門關 僧祐為開府儀 兵備。 辛亥, 魏軍 以納 丁亥,魏 同三司,傷州 戊申, 魏師,城陷于 大攻、「長」世 丙 戌, 軍至栅 胡僧 世祖 祐、 刺 下。[量]丙申,徵 史裴畿爲領 逼行 祖 朱買臣等率兵出戰, 西 出 魏 枇 都 杷 栅 世 門, 祖 皇 軍 見 親 廣 將 太 執 臨 子 軍 州 "; 如 巡 陣 刺 督 行 買 庚 史

年四 元良、始安王 月,追尊爲孝元皇帝 月丙辰,徐世 方略皆 見害。 譜、任約退戍巴陵。 ",廟日 乃選 世 百姓男女數萬 祖 辛未,西魏害世祖,遂崩焉, П , 分爲奴婢,驅入長安;小 時年四十七。 弱 者皆殺之。 太子

明

旣長 江東,于時年 汝 試言之。」即 好 世 學,博 祖 聰 悟俊 幾。」答曰:「十七。」高祖曰:「正是汝年。」賀革爲府諮議,敕革講三禮 總羣書 誦 朗 上篇, ,天才英發。 ,下筆成章,出言 左右莫不驚歎。 年五 爲 歲,高祖問:「汝讀 論 初 生 才辯 患眼,高 敏 速, 祖 冠絕 何書。」對曰:「能誦 自 下 意治之,遂盲 時。 高 祖 嘗 問 曲禮 目, 曰:「孫策 高高 彌 加 世 愍 祖 祖 、昔在

本

可言。」初,賀革西上,意甚不悅,過別御史中丞江革,以情告之。 行於世。 在尋陽,夢人曰:「天下將亂,王必維之。」又背生黑子,巫媼見曰:「此大貴兆,當不 革曰:「吾嘗夢主上遍見諸

子,至湘東王,手脫帽授之。此人後必當璧,卿其行乎!革從之。 及太清之難,乃能克復,

故遐邇樂推,遂膺寶命矣。所著孝德傳三十卷,忠臣傳三十卷,丹陽尹傳十卷。 注漢書

百一十五卷,周易講疏十卷,內典博要一百卷,連山三十卷,洞林三卷,玉韜十卷,補闕子十

卷,老子講疏四卷,全德志、懷舊志、荆南志、江州記、貢職圖、古今同姓名錄一卷,筮經十二

卷,式贊三卷,文集五十卷。

史臣曰:梁季之禍,巨寇憑壘,世祖時位長連率,有全楚之資,應身率羣后,枕戈先路。

興,亦世祖雄才英略,紹茲寶運者也。而禀性猜忌,不隔疏近,御下無術,履冰弗懼,故鳳闕 虚張外援,事異勤王,在於行師,曾非百舍。後方殲夷大憝,用寧宗社,握圖南面,光啓中

伺晨之功,火無內照之美。以世祖之神睿特達,留情政道,不怵邪說,徙蹕金陵,左隣强寇,

將何以作。是以天未悔禍,蕩覆斯生,悲夫!

- 太子舍人蕭韶至江陵宣密詔 「韶」各本訛「歆」,據南史及通鑑改正。
- 六月丙午遣世子方等帥衆討譽 南史但云「七月」,不書日。 是年七月甲寅朔,無丙午,亦不合。 「六月」各本作「十月」。按下文出「九月」,十月不應在九月前。 通鑑作「六月丙午」, 其月乙酉

朔,丙午爲二十二日,今據改。

- **^** ≡ ∪ 鑑以遺方等繫於六月,遺鮑泉繫於七月。 七月又遺鎭兵將軍鮑泉代討譽 「七月」原作「是月」。 今旣據通鑑改上文「十月」爲「六月」,則此「是月」亦 按南史以遣方等鮑泉並繫於七月; 通
- 當據通鑑、南史改爲七月,方與史實相合。
- 29 陽,漢水以北皆是魏土,漢九原在今後套東北,不容遠指九原以對五嶺爲言。 南通五嶺北出力原 地名不見有名「力原」者,疑有誤。 或謂是「九原」之譌,但是時北魏都洛
- Ħ. 書杜崱傳, 定州刺史杜幼安帥衆下武昌 謂幼安爲 西荆州 刺史,與 「幼」各本譌「多」,據本書徐文盛傳及通鑑改正。按: 此 不 同 杜幼安附本
- へない 通鑑作「四 四月丙午 月丙午」是,今據通鑑刪「閏」字。 各本作「閏四 月丙午」。 按 大寶 二年閏三月,不閏四月。 閏三月甲戌朔, 無丙午。
- 4 四人有 本 紀 第 令 Ŧ. 按一一人」當作「民」,此姚思廉避唐諱改。 校 勘 記 後漢崔寔有四民月令。

人 **山** 家隕! <u>"</u>苑本作「完山」,「完」「桓」字異音同,則作「桓山」者不誤,而作「恒山」者誤也。 <u>閩刻本顏氏家訓,「桓山」亦譌作「恒山」,見沈揆考證後跋。</u> 上 亦 討侯景檄文正用此典,言侯景肆虐,江南人民家家有死別生離之苦。 養老,送兄賦桓山之悲。」亦用此典。 譌「恒山」,故册府元龜之纂修者,避宋眞宗名恒,改作「常山」。 。……桓山之鳥,生四子焉,羽翼旣成,將分于四海,其母悲鳴而送之, 桓 常山之泣」。 Щ 之泣 百衲本、南監本 按孔子家語: 顔回 「桓」字墨丁。 宋刻太平御覽三八八引家語,「桓山」譌作聞......哭聲, 殿本作「家有隕山之泣」。 非但爲 疑北宋初所見梁書抄本,此「桓山」 死 查家語此條出自說苑, 者 又顏氏家訓文章篇 而 哀聲有似於此。」蕭繹 **르**, 册府元龜一 今仍改作「桓山」。 叉 有 「恒山」。 生 離 八五作 而}說 别 宋 者

- [4] 州冤本毒 册府元龜一八五作「煩冤荼毒。」
- 原。 淺原度彭蠡 高平日原,即今廬山東南之麓瀕於彭蠡者。 「原」各本作「源」。按:「淺原」即禹貢之「敷淺原」。 尚書禹貢:「過九江至於敷淺
- 光武止蕭王 「止蕭王」各本作「不止戈」。據南史及藝文類聚一 四改。

「舊郊」疑當從南史作「舊邦」。

舊郊旣復函雒已平

世祖遣兼司空蕭泰 泰,周書、北史各有傳,云「梁元帝平侯景,以泰爲兼太常卿」,與此云「兼司空」不同。 祠部尚書樂子雲拜 謁 **坐陵** 「蕭泰」各本作「蕭太」,據南史及通鑑改。 蕭

- 魏遣太師潘樂辛術等寇秦郡 「潘樂」各本作「潘洛」,據南史改。 潘樂、辛術、北齊書、北史
- 並 有 傳。 二人又並先仕魏,後入齊,故此作「魏」,而南史作「齊」。
- 圖 書斯歸 圖 書」各本作「圖畫」。 據藝文類聚一四改。 按:圖書乃河圖洛書之省稱。
- 二合 卦起龍 晶 「卦」各本誤作「封」,據襲道耕蛛隱廬日箋(稿本)改。
- により 宗王 啓霸非勞陽武之侯 「宗」各本譌「宋」,據藝文類聚一四改。 按:此用漢文帝劉恒以代王
- 入卽帝 位 事。 宗王,指代王劉恒;陽武侯,指陳平。
- 隨勢汙隆 文苑英華六○○「勢」作「世」。 按:此姚思廉避唐諱改。
- 琳長 史陸納及其將潘烏累等舉兵反 「琳」下各本衍一「州」字。 張元濟梁書校勘記:「按『州』
- 字衍 ,當作『琳長史陸納』,見杜崱傳及南史。」今删。
- 肸 雖 云 撥 亂 且 非 創 業 「且」册府元龜一八八、二〇八並作「自」,疑作「自」是。
- 孝子 義孫 「義」册府元龜二〇八作「從」。 原注:「梁武帝父名順之,故 日『從孫』。」
- 營州 零陵 率 刺 史李 衆 出 洪雅. 空靈難」。 自零 陵率衆出空靈灘 又通鑑梁元帝承聖 「空靈 元年,「洪雅等退保空雲城」, 灘 原作「空雲灘」。 本書王僧孺傳「李洪雅又自 胡注「姚 思 廉梁書作『空
- 靈 |攤』」,是胡氏所見本「雲」作「靈」。 下「空雲城」亦當作「空靈城」。 今並改正
- 至言 本 詔王 紀 僧辯率衆軍 第 Ŧi. 校 勘 士討陸納 記 張森楷梁書校勘記:「士,疑當作上。 士字無義、蓋刻誤。」

- 僕射」。 以吏部 尚書王褒爲尚書右僕射 下十一月戊戌,「以尚書右僕射王褒爲尚書左僕射,湘東太守張綰爲尚書右僕 「右僕射」各本作「左僕射」。 按:本傳及北史王褒傳均作「右 射」, 可
- 三月庚午 「三月」各本作「二月」,譌。 按是年二月甲午朔,無庚午,亦無下文之「辛未」、「丙

見其時王褒尙是右僕射,至十一月始爲左僕射,今據改。

- 潼州刺史楊乾運以城降 子」、「庚寅」;三月癸亥朔,有庚午、辛未、丙子、庚寅,今改正。 「楊乾運」各本作「楊虔運」,據南史及通鑑改。
- 六月乙卯 「乙卯」百衲本、南監本、北監本、殿本譌「乙酉」;汲古閣本、金陵局本譌「乙丑」;南 乙卯爲二十四日。今據南史改「乙卯」。
- 巴人苻昇徐子初斬賊城主公孫晃 「巴」通鑑作「巴東」,是。 本書武陵王紀傳作「巴興」。
- 宜從靑蓋之典 「典」各本訛「興」,據删府元龜一九六改。按王子爲王,賜乘靑蓋車,見續漢書

輿服志

- 魏遣郭元建治舟師於合肥「魏」南史及通鑑並作「齊」。張森楷梁書校勘記:「據此是齊事而云 魏,非也。」按:下「魏江西州郡並起兵應之」,「魏」亦當作「齊」。
- 又遣大將邢杲遠步大汗薩東方老率衆會之 「步大汗薩」各本訛作「步六汗薩」,據南史、通鑑

加南豫州刺史侯瑱征北將軍開府儀同三司 「征北將軍」下,各本衍「安東」二字,今删。

以司徒王僧辯爲太尉車騎大將軍 各本脱「大」字、據本傳及南史、通鑑補。

[MB] 使居民助運水石 「水」疑爲「木」字之譌。

至至 丁亥魏軍至棚下「丁亥」各本作「丁卯」,據南史及通鑑改。 是月癸未朔,無丁卯,有丁亥。

(三六) 辛亥魏軍大攻 「辛亥」各本作「辛卯」,據南史改。 按上文已出丙申、丁酉、庚子、戊申、己酉,

辛卯不應在其後,其誤顯然。

梁書卷六

本紀第六

敬帝

儀同三司、廣州刺史蕭勃爲司徒、鎭東將軍張彪爲郢州刺史。 至自尋陽,入居朝堂。 史王僧辯、司空南徐州刺史陳霸先定議,以帝爲太宰、承制,奉迎還京師。 司空陳霸先班劍三十人。 封晉安王,邑二千戶。二年,出爲平南將軍、江州刺史。 敬皇帝諱方智,字慧相,小字法真,世祖第九子也。太清三年,封興梁侯。 以太尉王僧辯爲中書監、錄尙書、驃騎將軍、都督中外諸軍事。〔1〕加 以豫州刺史侯瑱爲江州刺史,儀同三司、湘州刺史蕭循爲太尉, 三年十一月,江陵陷, 四年二月癸丑, 太尉揚州刺 承聖元年,

敗績,之橫死。 三月,齊遣其上黨王高渙送貞陽侯蕭淵明來主梁嗣,至東關,遣吳興太守裴之橫與戰, 太尉王僧辯率衆出屯姑孰。 四月,司徒陸法和以郢州附于齊, 遣江州刺史

本紀第六

敬帝

侯瑱討之。 九月甲辰,司空陳霸先舉義,襲殺王僧辯,黜蕭淵明。 七月辛丑,王僧辯納貞陽侯蕭淵明,自采石濟江。 丙午,帝卽皇帝位。 甲辰,入于京師 ,以帝爲皇太

徽舉兵反, 資 鯁憤 軍 刺 將 太 如 千 年 越 卢。 史張 軍 故。 爲 (將相,克淸元惡,謝冤陵寢。今墜命載新,宗祊更祀,慶流億兆,豈予一人。 尉 非所,王基傾弛,率土罔戴。朕以荒幼,仍屬艱難,泣血枕戈,志復讐逆。 南 蕭 紹 紹 開府儀同三司。 豫州 震州 壬子, 彪進號征 循 泰 泰元年冬十月己巳,詔曰:「王室不造,嬰罹禍釁,西都失守,朝廷淪覆,先帝梓宮,播 羣公卿尹,勉以大義,越登寡闇,嗣奉洪業。顧惟夙心,念不至此。 元年,大赦天下,內外文武賜位一等。」以貞陽侯淵明爲司徒,封建安郡公,食邑三 爲 乘京師無備,竊據石頭。 刺 太保,新除司徒建安公淵明 刺史杜龕舉兵, 以司空陳霸先爲尚書令、都督中外諸軍事、車騎將軍、楊南徐二州刺史,司空 史任約進號 東大 八將軍。 戊午, 征 攻信武將軍陳蒨於長城,義興太守韋載據郡以應之。癸丑,進 三鎭 一南大將軍。 **尊所生夏貴妃爲皇太后。** 北 將 軍、 爲太傅,司徒蕭勃爲太尉。 丁丑, 辛未, 韋載降,義興平。 詔 司空陳霸先東討韋載。 史徐 立妃王氏爲皇后。 嗣徽 遣晉陵太守周文育率軍援 進號征 以鎭南將軍王琳爲車騎 北 丙子, 鎭 大將 大恥未雪,夙宵 庶仰憑先靈,**傍** 東將軍、揚州 任約、 軍。 可改承聖四 征 南 將

長城。

十一月庚辰,齊安州刺史翟子崇、楚州刺史劉仕榮、淮州刺史柳達摩率衆赴任約,

石頭。 庚寅,司空陳霸先旋于京師。

寧邀之,賊衆大潰,嗣徽、約等奔于江西。 十二月庚戌,徐嗣徽、任約又相率至采石,迎齊援。 庚申,翟子崇等請降,並放還北。 丙辰, 遺猛烈將軍侯安都水軍於江

帝諸子。 賜死,曲赦吳興郡。 太平元年春正月戊寅,大赦天下,其與任約、徐嗣徽協契同謀,一無所問。 以故 永安侯確子後襲封邵陵王,奉攜王後。 己亥,以太保、宜豐侯蕭循襲封鄱陽王。 癸未,鎮東將軍、震州刺史杜龕降,詔 東揚州刺史張彪圍臨海太守 追贈簡文皇

王懷振於剡巖。

將軍。 賊 舉城降,彪敗走。 徐 嗣 徽 月庚戌,遣 丙辰, 岩耶村 任 約襲采石戍, 以 周文育、陳蒨襲會稽,討彪。 中衛將軍臨川王大款卽本號 人斬張彪,傳首京師,曲 執成主明州刺史張懷鈞,入于齊。 赦東揚州。 癸丑,彪長史謝岐、司馬沈泰、軍主吳寶眞等 開府儀 己未,罷震州 同三司, 甲子,以東土經杜龕 中護軍桂陽王 還復 吳 興 大成 郡。 、張彪抄 爲護 癸亥,

暴,遣大使巡省。

卷 六

献 出栅口,向梁山,司空陳霸先軍主黃歲逆擊,大破之。,軌退保蕪湖。 三月丙子,罷東揚州,還復會稽郡。 壬午,班下遠近並雜用古今錢。 遣周文育、侯安都衆 戊戌,齊遣大將蕭

軍,據梁山拒之。

夏四月丁巳, 司空陳霸先表詣梁山撫巡將帥。 壬申,侯安都輕兵襲齊行臺司馬恭於歷

(三)大破之,俘獲萬計。

文育還頓方丘,回徐度頓馬牧,杜稜頓大桁。 五月癸未, 太傅建安公淵明薨。 庚寅,齊軍水步入丹陽縣。 癸卯,齊軍進據兒塘,輿駕出頓趙建故籬門, 丙申, 至秣陵故治。

內外纂嚴。

殞戰場,悉遣斂祭,其無家屬,即爲瘞埋。 彦、蕭軌、東方老、王敬寶、李希光、裴英起、劉歸義等,[+]皆誅之。 戊午,大赦天下,軍士身 衆軍節度,與齊軍交戰,大破之,斬齊北京州刺史杜方慶及徐嗣徽、弟嗣宗,於上擒徐嗣 六月甲辰,齊潛軍至蔣山龍尾,斜趨莫府山北,至玄武湖西北。至乙卯,司空陳霸先授 辛酉,解嚴。

秋七月丙子,車騎將軍、司空陳霸先進位司徒,加中書監,餘如故。 丁亥,以開府儀同

司侯瑱爲司空。

八月己酉,太保鄱陽王循薨。

號 新 開 除 府儀 司徒陳霸先爲丞相、錄尚書事、鎭衞大將軍、揚州牧,封義興郡公。 九 月 、壬寅,改元大赦,孝悌力田賜爵一級,殊才異行所在奏聞,饑難流移勒歸 同三司。 吏部尚書王通爲尚書右僕射。 丁巳,以郢州刺史徐度為領軍將軍 中權 將 軍 本 王沖即 進

冬十一月乙卯,起雲龍、神虎門。

王, 前 南 將 軍、衡州刺 十二月壬申,進太尉、鎭南將軍蕭勃爲太保、 鎭 西法曹、行參軍蕭紞爲巴陵王,奉宋、齊二代後。 史。 壬午, 平南 :將軍劉法瑜進號安南將軍。 驃騎將軍。 甲午, 以新除左衞將軍歐陽頗爲安 以前壽昌令劉叡爲汝陰

水餘 後量 誨之者不倦。 言聲烈 皆遵 一授。 會計 瀾 年 う千世 舊 實 罷 詳 春正月壬寅,詔曰:「夫子降靈體喆,經仁緯義,允光素王,載闡玄功,仰之者彌高 載 兼 州 是日,又詔「諸州各置中正,依 依 欽 猶 品 立忠 尙 愴。 在。 制 爲 立孝,德被蒸民,制禮作樂,道冠羣后。 自皇 外 大郡,人士殷曠,可別置邑居。 務使精實。 可搜舉魯國 圖 屯阻,祀薦不脩,奉聖之門,胤嗣 其開 之族,以爲 雍、青、 舊 訪舉。 奉 兗 聖後,至並繕廟堂,供備祀 雖 暫 至如分割郡縣,新號 不得輒承單狀序官, 為隔 雖泰山頹峻,一老不遺,〔六〕而泗 閡, 殲 滅滅、敬 衣冠多寓 神之寢,簠簋寂寥。 州牧,並係本邑,不 淮海, 皆須 典,四時薦秩 中正 猶 宜不廢司 押上,然

本

紀

第

六

敬

帝

勞兼置。 驃騎大將 宗室在朝開 其選中正,每求耆德該悉,以他官領之。」以車騎將軍、開府儀同三司 國承家者,今猶稱世子, 分尋陽、太原、齊昌、 高唐、新蔡五郡,置西江州,卽於尋陽仍充州鎭。 可悉聽襲本爵。」以尚書右僕射王通爲尚書左僕射。 王琳爲司空、 叉詔

等率衆軍南討。 泰、勃從子政爲前軍,南江州刺史余孝頃以兵會之。 一月庚午,領軍將軍徐度入東關。[10]太保、廣州刺史蕭勃舉兵反,遣偽帥歐陽頠、 戊子,徐度至合肥,燒齊船三千艘。 癸巳,周文育軍於巴山生獲歐陽頠 詔平西將軍周文育、平南將軍侯安都 傅

丁巳,鎭西將軍、益州刺史長沙王韶進號征南將軍

夏四月癸酉,曲赦江、廣、衡三州,並督內爲賊所拘逼者,並皆不問。 三月庚子,文育前軍丁法洪於蹠口生俘傅泰。 甲寅、德州刺史陳法武、前衡州刺史譚世遠於始興攻殺蕭勃 蕭孜、 余孝頃軍退走。 甲辰, 以新除司

己卯,鑄四柱錢,

戊戌、侯安都進軍、余孝頃棄軍走、蕭孜請降、豫章平。 准二十。齊遣使請和。 壬辰,改四柱錢一准十。 勃故記室李寶藏奉懷安侯蕭任據廣州作亂。 丙申,復閉細錢。 蕭勃故主帥前直閣蘭

三司。丙午,以鎭軍將軍徐度爲南豫州刺史。 五月乙巳,平西將軍周文育進號鎮南將軍,侯安都進號鎮北將軍,並以本號開府儀同 戊辰,余孝頃遣使詣丞相府乞降。

秋 八月甲午,加丞相陳霸先黃鉞,領太傅,劍履上殿,入朝不趨,贊拜不名,給羽葆、鼓

吹。

九月辛丑,崇丞相爲相國,總百揆,封十郡爲陳公,備九錫之禮,加璽紱遠遊冠,位在王

公上。加相國綠綟綬。置陳國百司。

旂,出警入蹕,乘金根車,駕六馬,備 冬十月戊 辰,進陳公爵爲王,增封十郡,並前爲二十郡。 五 一時副車,置 |旄頭雲罕,樂儛八佾,設鍾虡宮縣。 命陳王冕十有二旒,建天子旌 王后

王子女爵命之典,一依舊儀。辛未,詔曰:

闡揚 云始, 生已泯, 洪烈。 五 用 運 鼎命 困 更始,三正迭代,司牧黎庶,是屬聖賢,用能經緯乾坤, 長蛇 革晦 斯墜,我皇之祚,眇若綴旒,靜惟屯、剝,夕惕 ,承聖之年,又罹封豕 以明,積代同軌,百 王 デ爱至 一踵武,咸由 一天成, 此則。[三]梁德湮微,禍 重竊 神器。 載 懷 三光 彌綸區宇, 大庇黔首, 亟 改,七廟乏祀, 難 荐 發:太淸

雉 虚 塗炭。東誅 汚非 候 相 止隆 雖 或 大 陳王, 功在 叛逆,北 周 之日。故効珍川陸,表瑞煙雲,玉露醴泉,旦夕凝涌,嘉禾瑞草,孳植郊甸, 舜,盛績 有縱 殲 自天,降神惟 獯醜,威 維 禹 ,巍巍蕩蕩,無得 加四海,仁漸萬 嶽,天地合德, .國。復張 而 稱。 晷曜 來獻 齊明。 崩 樂,重紀絕禮,儒 白環,豈直皇虞 拯 社 稷之横 之世, 流, 館 聿 提億 脩 入貢素 ",戎亭 兆之

敢忘列代之遺典,人祇之至願乎!日己今便遜位別宮,敬禪于陳,一依唐虞、宋齊故事。 道昭於悠代,勳格於皇穹。 陳王踐阼,奉帝爲江陰王,薨于外邸,時年十六,追諡敬皇帝。 有違,自己謳歌爰適,天之曆數,實有攸在。 朕雖庸藐,闇於古昔,永稽崇替,爲日 明明上天,光華日月,革故著於玄象,代德彰於讖圖, 已久, 獄訟

史臣曰:梁季橫潰,喪亂屢臻,當此之時,天曆去矣,敬皇高讓,將同釋負焉。

伐,不期而會,龍躍樊、漢,電擊湘、郢,翦離德如振槁,取獨夫如拾遺。 其雄才大略,固無得 俗,大脩文教,盛飾禮容,鼓扇玄風,闡揚儒業,介胄仁義,折衝罇俎,聲振寰宇,澤流遐裔, 多藝多才。爰自諸生,有不羈之度,屬昏凶肆虐,天倫及禍,收合義旅,將雪家冤。曰|紂可 而 稱矣。 載戢,凡數十年。濟濟焉,洋洋焉,魏、晉已來,未有若斯之盛。然不能息末敦本,斵彫 史臣侍中、鄭國公魏徵曰:「高祖固天攸縱,聰明稽古,道亞生知,學爲博物,允文允武, 旣懸白旗之首,方應皇天之眷,布德施惠,悅近來遠,開蕩蕩之王道,革靡靡之商

爲樸,慕名好事,崇尙浮華,抑揚孔、墨,流連釋、老。或經夜不寢,或終日不食,非弘道以利

所易 『天之所助者信,人之所助者順。』「四高祖之遇斯 蕭 失天入之所助,其能殆於此乎 周 后 在 物,惟飾智以驚 牆 百辟 乎飲食男女, 一, 可 禍 永言麥秀, ,莫得 謂 成 戏羯,身殞非 神有 盡言。 所不 至於 愚。 悲甚殷 險躁之心,暮年愈甚。 達,智有所 軒冕殿堂,非 且心未遺榮, 命,災被億兆,衣冠 墟。 自古以安爲危, 不 通矣。 有 虚 切身之急。 厠蒼頭之伍,高談脫屣, 逮夫 斃 見 旣成 鋒鏑 利 精 高祖 華 而 屯剝, 稍 之下,老幼粉 而 動,愎諫 敗, 竭,鳳德已衰,惑於聽受,權在 屏除嗜慾,眷戀 不得其死、蓋 顚覆之速, 違 下,開 終戀黃屋之尊。夫人之大欲 戎馬之足。 門揖 書契所未聞 軒冕,得其所 動 而 盗,棄 之險, 瞻彼 好 不由信順 黍離 也。 卽 難 · 師、 景 姦佞,儲 m §易 曰: ,痛深 滞於 起

桀逆搆扇,巨猾滔天,始自牖里之拘,終類望**夷** 義罕疏通,哀思之音,遂移風俗,以此 「太宗聰睿過人,神彩秀發,多 聞 博達,富贈 而 貞 萬 國, 之禍。 詞藻。 異乎 周誦 悠悠蒼天,其可 然文豔用 漢莊 矣。 寡, 華 我 問 生不 前 哉 不 ·實, 辰, 體窮 載 離 淫 多

辯以飾非,肆忿戾以害物。 望,坐觀 之難,居連率之長,不能 昔國 時 步初 變,以爲 屯,兵纒魏 身幸。 撫劍嘗膽,枕戈泣 《闕,羣后釋位,投袂勤王。 不急莽、卓之誅,先行昆弟之戮。 爪牙重將,心膂謀臣,或顧眄以就拘囚,或一言而及葅醢,朝之 血,躬先士卒,致命前驅,遂乃擁衆逡巡, 元帝以盤石之宗,受分 叉沉 猜 忌酷, 多行 陜 之任,屬 無禮 內 懷 君 騁 智 觖 親

本

紀

君子,相顧懔然。 而棄忠信;戎昭果毅,先骨肉而後寇讎。 而西隣責言,禍敗旋及。 自謂安若泰山、舉無遺策、忧於邪說、即安荆楚。 上天降鑒,此焉假手,天道人事,其可誣乎!其篤志藝文,採浮淫 雖口誦六經,心通百氏,有仲尼之學,有公旦之才, 雖元惡克翦,社稷未寧,

適足以益其驕矜,增其禍患,何補金陵之覆沒,何救江陵之滅亡哉! 「敬帝遭家不造,紹茲屯運,征伐有所自出,政刑不由於己,時無伊、霍之輔,焉得不爲

校勘記

高讓歟?

二」以太尉王僧辯爲中書監錄尚書驃騎將軍都督中外諸軍事 按「驃騎將軍」本傳及南史、

俱作「驃騎大將軍」,此脫「大」字。

州,必有一誤。」按下文又云「東揚州刺史張彪」,「曲赦東揚州」,疑此「揚州」上脫一「東」字。 鎮東將軍揚州刺史張彪進號征東大將軍 張森楷梁書校勘記:「上文書彪爲郢州, 而此云 揚

<u>_</u> 壬申侯安都輕兵襲齊行臺司馬恭於歷陽 「壬申」各本作「壬午」,據南史改。按是月乙巳朔,無

敕周文育還頓方丘 「方丘」陳書高祖紀、南史陳武帝紀及通鑑俱作「方山」。

壬午。

- . H 至玄武湖 西北 「湖」各本譌作「廟」,據陳書及南史改正。
- 斬 齊 北 兗州 刺史杜方慶及徐嗣徽弟嗣宗 張森楷梁書校勘記:「嗣徽下當更有嗣徽二字,陳書
- }高 }祖 紀可證。」按陳書高祖紀作「生執徐嗣徽及其弟嗣宗,斬之以徇。」
- 及南史改正。

L U

生擒

徐嗣

彦蕭

軌東方老王敬寶李希光裴英起劉歸義等

「徐嗣彦」各本訛爲「徐嗣產」,

據陳書

一老不遺 「老」各本作「簣」,據册府元龜一九四改正。 按「不憖遺一 老」,魯哀公誄孔子語, 見

左傳哀公十六年。

- 八九山 以爲奉聖後 「後」南史及册府元龜一九四作「侯」。
- 南史及册府元龜二一七「領」上有「遣」字。

領軍

將軍

徐度

入東關

- 咸由 此則 各本作「咸此由則」,據陳書高祖紀乙正。
- 獄訟有違 陳書高祖紀「違」作「歸」。 按:此用詩大雅縣「虞芮質厥 成」故事,作「歸」義較長。
- 敢忘列代之遺典人祇之至願乎 「列」各本訛「烈」。 「敢忘列代之」下,各本脫「遺典人祇之」五

字。 據陳書高祖紀改補。

CIED 天之所助者信人之所助者 「天之所助者順也,人之所助者信也」,見易繫辭上。 順 張森楷梁書校勘記: 「南史『信』『順』二字互易, 與易文合。」按

本 紀 第 六 校 勘 記

梁書卷七

列傳第一

太祖張皇后 高祖都皇后 太宗王皇后 高祖丁貴嬪

高祖阮脩容 世祖徐妃

晉,母后之號,皆因漢法,自夫人以下,世有增損焉。 哉 又不建椒閫。 **|義云:「天子之與后,猶日之與月,陰之與陽,相須而成者也。」|漢初因|秦稱號,帝母稱皇太** 務先節儉。 后,后稱皇后,而加以美人、良人、八子、七子之屬。至孝武制婕妤之徒凡十四等。 1 周禮,王者立后六宮,三夫人、九嬪、二十七世婦、八十一御妻,以聽天下之內治。 湯曰:「有天地然後有萬物, 配德早終,長秋曠位,嬪嬙之數,無所改作。 今之撰錄,止備闕云。 有萬物然後有男女, 高祖撥亂反正,深鑒奢逸,惡衣菲食, 有男女然後有夫婦。」夫婦之義尙矣 太宗、世祖出自儲藩,而妃並先殂, 降及魏、 故肾

列

傅

第

太祖獻皇后張氏諱尚柔,范陽方城人也。 祖次惠,宋濮陽太守。 后母蕭氏, 卽文帝從

姑。 后,宋元嘉中嬪於文帝,生長沙宣武王懿、永陽昭王敷,次生高祖

見庭內若有衣冠陪列焉。 同夏里舍,葬武進縣東城里山。 見不?」對曰:「不見。」后曰:「嘗聞見者當富貴。」因遽取呑之。 初,后嘗於室內,忽見庭前昌蒲生花,光彩照灼,非世中所有。 次生衡陽宣王暢、義興昭長公主令嫕。 天監元年五月甲辰,追上尊號爲皇后,自論曰獻 是月產高祖。 宋泰始七年,殂于秣陵縣 后驚視,謂侍者曰:「汝 將產之夜,后

出。 字真藝,齊初爲鎭西參軍,卒於官。 齊鎭西參軍,素風雅猷,夙肩名輩,降年不永,早世潛輝。 土大亂,穆之威懷循拊,境內以寧。 子左率袁淑善,淑薦之於始興王濬,濬深引納焉。 相掾,太子舍人。穆之少方雅,有識鑒。 湛將用爲東縣,固乞遠郡,久之,得爲寧遠將軍、交阯太守。 父穆之,字思靜,晉司空華六世孫。 高祖踐阼,追贈穆之光祿大夫,加金章。 朱文帝聞之嘉焉,將以爲交州刺史,會病卒。 宋元嘉中,爲員外散騎侍郎。 曾祖輿坐華誅,徙興古,未至召還。 穆之鑒其禍萌,思違其難,言於湛求外 朕少離苦辛,情地彌切,雖宅相克 治有異績。 與吏部尚書江湛、太 又詔曰:「亡舅 及過江,爲丞 會刺史死,交 子弘籍,

成, 輅車靡贈, 興言永往,觸目慟心。 可追贈廷尉卿。」 弘籍無子,從父弟弘策以第三子纘

爲嗣 別 有傳。

高祖德皇后郗氏諱徽,高平金鄉人也。 祖紹, 國子祭酒,領東海王師。 父燁, 太子舍

人,早卒。

初,后母尋陽公主方娠,夢當生貴子。 及生后,有赤光照于室內, 器物盡明, 家 人皆怪

之。 巫言此女光采異常,將有所妨,乃於水濱祓除之。

后幼而

明慧,善隸書,讀史傳。

女工之事,

無不閑習。

宋後廢帝將納爲后,齊初,安陸

王緬 叉欲婚: 郗氏並辭以女疾,乃止。 建元末,高祖始娉焉。 生永興公主玉姚, 永世

玉婉,永康公主玉嬛。

建武五年,高祖 爲雍 州 刺 史,自先之鎭,後乃迎后。 至州未幾, 永元元年八月殂于襄

陽官舍,時年三十二。 相國,封十郡,梁公,詔贈后爲梁公妃。 其年歸葬南徐州南東海武進縣東城里山。 高祖 踐阼,追崇爲皇后。有司議證,吏部尚 中興二年,齊朝 書 進高 兼右僕 祖 位

列 傅 第 太 祖 張 皇 后 高 袓 鄱 皇 后 射臣

約議

日

表號

垂名,義昭不朽。

先皇后應祥月德,比載坤靈,柔範

陰化、儀形自遠。

俔

天作合,義先造舟,而神猷夙掩,所隔升運,宜式遵景行,用昭大典。 謹按諡法, 忠和純備日

德,貴而好禮 日德。 宜崇曰德皇后。」詔從之。 陵日脩陵。

后父燁,詔贈金紫光祿大夫。 燁尚宋文帝女尋陽公主,齊初降封松滋縣君。 燁子泛,

中軍臨川王記室參軍。

太宗簡皇后王氏諱靈賓,琅邪臨沂人也。 祖儉,太尉、南昌文憲公。

饑民弊,方欲以身率下,永示敦朴。今所營莊陵,務存約儉。」又詔金紫光祿大夫蕭子範爲 永福省,時年四十五。其年,太宗卽位,追崇爲皇后,謚曰簡。大寶元年九月,葬莊陵。先 是詔曰:「簡皇后窀穸有期。昔西京霸陵,因山爲藏,東漢壽陵,流水而已。朕屬值時艱,歲 大器,南郡王大連,長山公主妙䂮。中大通三年十月,拜皇太子妃。〔三〕太清三年三月,薨于 后幼而柔明淑德,叔父陳見之曰:「吾家女師也。」天監十一年,拜晉安王妃。 生哀太子

襲封南昌縣公,出爲義興太守。還爲驃騎諮議,累遷黃門郎,司徒右長史。性凝簡,不狎 父騰,字思寂,本名玄成,與齊高帝偏諱同,故改焉。以公子起家員外郎,遷太子洗馬, 哀策文。

中,不 當 世。 弃。 嘗從容謂諸子曰:「吾家門戶,所謂素族,自可隨流平進,不須苟求也。」永元末,遷侍 高祖霸府建,引爲大司馬諮議參軍,俄遷侍中,領越騎校尉。

樹。 也。 徙吳郡。 含章 時高 可降 履道,草昧興齊,謨明翊贊,同符在昔。 朕膺曆受圖,惟新寶命,莘莘玉帛,升降有典。 高祖 封南 祖 受禪,詔曰:「庭堅世祀,靡輟於宗周, 八年,入爲太府卿,領後軍將軍,遷太常卿。 於 昌縣公爲侯,食邑千戶。」騫襲爵,遷度支尚書。 鍾山造大愛敬寺,騫舊墅在寺側, 雖 子房之蔚爲帝師,文若之隆比王佐, 樂毅錫壤,乃昭於洪漢。 有良田八 永言前代,敬惟徽烈,匪直 + 年,遷中 十餘頃, 天監 書令,加 四年,出爲 即晉 丞相 齊故太尉南昌公, 員 東陽 、外散騎常侍。 |懋勳,義 王導賜 太守, 無以尙 田 兼 也 懷

叉脫 事。 高祖 略。 遣主書宣旨就騰求市,欲以施寺。 徵還,復爲度支尚書, 高祖怒,遂付市評田價, 加 給給 事 中,領射聲校尉。 以直逼還之。 騫答旨云:「此田不 由是忤旨,出爲吳興太守。 以母 一憂去 賣; 若是敕取, 職 所不 在郡臥疾不 ·敢言。」酬 視 對

普通 三年十月卒,時年四十九。 韶贈侍 中、 金紫光祿大夫,諡曰安。 子規襲爵, 别

有

傳。

高 祖 丁貴嬪諱令光,譙國人也,世居襄陽。 貴嬪生于樊城,有神光之異,紫煙滿室,故

光」爲名。 初,貴嬪 生而有赤痣在左臂,治之不滅,至是無何忽失所在。 相者云:「此女當大貴。」高祖臨州, 丁氏因人以聞。 事德皇后小心祗敬,嘗於 貴嬪時年十四,高祖 納

供養經案之側,髣髴若見神人,心獨異之。

五月,有司 高祖 義 `奏爲貴人,未拜,其年八月,又爲貴嬪,位在三夫人上,居于顯陽殿。 師起,昭明太子始誕育,貴嬪與太子留在州城。 京邑平,乃還京都。 及太子定 天監元年

位

',有 ? 興、武 泰豫 無致敬之道也。 陳太妃, 極,率土 致謁;年節稱慶,亦同如此。 通信問 司 奏日 朝議百官以 禮, 陵 者,及六宫三夫人雖 咸 國臣並以吏敬敬所生潘淑妃、路淑 則宋 母 執吏 以子 明 禮,旣盡禮皇儲,則所生不容無敬。 帝在時,百官未有敬。 貴。 吏敬敬帝所生, 今皇太子聖睿在躬, 皇儲所生,不容無敬。 中與貴 婦人無閫外之事,賀及問訊牋什,所由官報聞而已。 事義 嬪 同 儲禮 正同。 列, 臣竊謂「母以子貴」,義著春秋。 並應以敬皇太子之禮敬貴嬪。 夙 媛。 宋泰豫元年六月,議百官以吏敬敬帝所生 **、備,子貴之道,抑有舊章。** 謂宮閣 貴嬪於宮臣雖 但帝王妃嬪,義與外隔,以理 施敬區宜同 非 吏禮 小君,其義 ,詣神虎門奉牋 皇太子副貮宸 王侯妃主常得 宋元嘉中,始 不異,與宋 以例, 夫婦

之義不殊,前代依准,布在舊 前代始置貴嬪,位次皇后, 已高朝列;況母儀春宮,義絕常算。 行 人之道,義. 而 所從不足者也。 無自專,若不仰繫於夫,則當俯繫於子。 故春秋凡王命爲 爵無所視"其次職者,位 事。 貴嬪載誕元良, 且儲妃作配, 夫人,則禮秩 率由盛則; 克固大業,禮同 視相 與子等。 榮親之道,應極其所榮,未有子所 國,爵比諸侯王。 以婦踰姑, 列 國 儲君 雖異於儲貳,而 ,實惟舊典。 彌乖從序。 此貴嬪之禮, 從 尊 謂

貴嬪典章,一與太子不異。[三]

於是貴嬪備典章禮數,同于太子,言則稱令。

私謁。 貴嬪性仁恕,及居宮內,接馭自下,皆得其歡心。 及高祖弘佛教、貴嬪奉而行之、屏絕滋 一腴,長進蔬 不好華飾,器服無珍麗, 膳。 受戒日,甘露降于殿前, 未嘗爲 方一 親戚

丈五尺。 高祖所立經義,皆得其指歸。 尤精淨名經。所受供賜,悉以充法事

普通七年十一月庚辰薨,[云]殯於東宮臨雲殿,年四十二。詔吏部郎張纘爲哀 策文曰;

罷 郷歌 **菆塗旣啓, 桂罇虛凝, 龍帷已薦, 象服將升。** 乎燕樂,廢徹齊於祀典。 風有采繁, 化行南國, 爱命史臣, 俾流嬪德。 其辭曰:

皇帝傷壁臺之永閟,悼曾城之不踐,

軒 緯 之精,江漢之英,歸于君袂,生此離明。 誕自厥初,時維載育,樞電繞郊,神光

照屋。 爱及待年,含章早穆,聲被治陽,譽宣中谷。 龍德在田,聿恭茲祀,陰化代終,王

風攸始。 動容諮式,出言顧史;宜其家人,刑于國紀。 膺斯眷命,從此宅心;狄綴采珩,

能,芳猷有烈。 珮動雅音。 日中思戒,月滿懷箴;如何不跼,天高照臨。 素魄貞明,紫宮炤晰,逮下靡傷,思賢罔蔽。 玄紞莫脩,禕章早缺,成物誰 躬儉則節,昭事惟虔,金玉

無玩,筐筥不捐。 祥流德化,慶表親賢,甄昌軼啓,孕魯陶燕。 方論婦教,明章閩席,玄

池早局,湘沅已穸。 展衣委華,朱憤寢迹,慕結儲闈,哀深蕃辟。 嗚呼哀哉

掖以依遲,飾新宮而延佇。 令龜兆良,葆引遷祖;具僚次列,承華接武。 鳴呼哀哉 日杳杳以霾春,風淒淒而結緒; 去曾

啓丹旗之星旆,振容車之黼裳;擬靈金而鬱楚,泛悽管而疑傷。 遺備物乎營寢,掩

重關於窒皇,椒風暖兮猶昔,蘭殿幽而不陽。 嗚呼哀哉

側闈高義,彤管有懌;道變虞風,功參唐跡。 婉如之人,休光赤舃;施諸天地,而無

太后父仲遷,天監初,官至兗州刺史。有司奏謚曰穆。 太宗卽位,追崇曰穆太后。

朝夕。

嗚呼哀哉!

高祖阮脩容諱令嬴,本姓石,會稽餘姚 人也。 齊始安王遙光納焉。 遙光敗,入東昏宮。

建康 以平,高祖納爲綵女。 天監七年八月,生世祖。[+] 尋拜爲脩容,常隨世祖出 蕃

大同六年六月,薨于江州內寢,時年六十七。其年十一月,歸葬江寧縣通望山。

謚曰

宣。 世祖即位,有司奏追崇爲文宣太后

承聖二年,追贈太后父齊故奉朝請靈寶散騎常侍、 左衞將軍,封武康縣侯,邑五百戶,

母陳氏,武康侯夫人。

世 祖徐妃諱昭佩,東海郯人也。 祖孝嗣、太尉、枝江文忠公。父緄,侍中、信武將軍。

天監十六年十二月,拜湘東王妃。生世子方等、益昌公主含貞。 太清三年五月,被譴

死,葬江陵瓦官寺。

史臣曰:后妃道贊皇風,化行天下,蓋取葛覃、關雎之義焉。 列 第 髙 袓 阮 脩 容 世 袓 徐 妃 校 勘 記 至於穆貴嬪, 徽華早著,

誕育元良,德懋六宮,美矣。 世祖徐妃之無行,自致殲滅,宜哉。

校勘記

- C一」天監元年五月甲辰追上尊號爲皇后 追上尊號之日期,武帝紀作四月丙寅,南史梁本紀作閏
- 四月。 按是年五月戊午朔,無甲辰,閏四月戊子朔,有甲辰,是「五月」當作「閏四月」。
- 建武五年高祖爲雍州刺史 雍州刺史在永泰元年七月、已在改元之後、「建武五年」應作「永泰元年」。 按:齊明帝建武五年四月,改元永泰。據南齊書明帝紀,以蕭衍爲
- 中大通三年十月拜皇太子妃「中大通」各本皆作「大通」,脫「中」字。大通三年十月改元中大 通,其時昭明太子尙在,何得別立太子妃。明「大通」乃「中大通」之譌脫,今補
- 【8】謂宮閣施敬 「閹」,南史作「僚」。
- びばり 謂貴嬪典章一與太子不異 各本脱「一與」二字,據南史補。
- 普通七年十一月庚辰薨 各本脱「一」字,據本書武帝紀、昭明太子傳及通鑑補。
- フャン 承聖三年,時年四十七。 承聖三年上距天監七年,首尾正四十七年。作「六年」譌,今改正。 天監七年八月生世祖 「七年」各本及南史作「六年」。按元帝紀、元帝生於天監七年八月、死於

梁書卷八

列傳第二

昭明太子 哀太子 愍懷太子

也。 興元年九月生于襄陽。 羣臣固請,天監元年十一月,立爲皇太子。時太子年幼,依舊居於內,拜東宮官屬,文 昭 明太子統字德施,高祖長子也。 高祖旣受禪,有司奏立儲副,高祖以天下始定,百度多闕,未之許 母曰丁貴嬪。 初,高祖未有男,義師起,太子以齊中

武皆入直永福省。

日三日乃還宮。八年九月,於壽安殿講孝經,盡通大義。 東宮。[1]太子性仁孝,自出宮,恒思戀不樂。高祖知之,每五日一朝,多便留永福省,或五 太子生而聰叡,三歲受孝經、論語,五歲遍讀五經,悉能諷誦。 講畢,親臨釋奠于國學。 五年六月庚戌, 始出居

十四年正月朔旦,高祖臨軒,冠太子於太極殿。舊制,太子著遠遊冠,金蟬翠緌纓,至

加金博

作劇韻賦之,皆屬思便成,無所點易。 乃於宮內別立慧義殿, 太子 美姿貌,善舉止。 讀書數行並下,過目皆憶。 專爲法集之所。 招引名僧, 。高祖大弘佛教,親自講說;太子亦崇信三寶,遍覽衆 每遊宴祖道,賦詩至十數韻。 談論不絕。 太子自立二諦、法身 或命

徐勉、左率周拾、家令陸襄並同孝綽議。太子令曰:「張鏡儀記云『依辻禮,終服月稱慕悼』。 悲情,宜稱兼慕,卒哭之後,依常舉樂,稱悲竟,此理例相符。謂猶應稱兼慕,至卒哭。」僕射 奏,服限亦然』。尋傍絕之義,義在去服,服雖可奪,情豈無悲,鐃歌輟奏,良亦爲此。旣 僕劉孝綽議其事。四孝綽議曰:「案張鏡撰東宮儀記,稱『三朝發哀者,踰月不舉樂;鼓吹寢 義,回並有新意。普通元年四月,甘露降于慧義殿,咸以爲至德所感焉。 悼之言。 卒哭之後,依常舉樂,稱悲竟,此理例相符』。尋情悲之說,非止卒哭之後,緣情爲論,此自難 又云『凡三朝發哀者,踰月不舉樂』。劉僕議,云『傍絕之義,義在去服,服雖可奪,情豈無悲, 歷年所』, 三年十一月,始興王憺薨。 用張鏡之舉樂,棄張鏡之稱悲,一鏡之言,取捨有異,此自難二也。陸家令止云『多 張豈不知舉樂爲大,稱悲事小,所以用小而忽大,良亦有以。至如元正六佾,事爲 恐非事證;雖復累稔所用,意常未安。近亦常經以此問外,由來立意,謂猶應有慕 舊事,以東宮禮絕傍親,書翰並依常儀。 太子意以爲疑,命 有

山賓、步兵校尉朱异議,稱「慕悼之解,宜終服月」。於是令付典書遵用,以爲永準。 樂自外,書疏自內,樂自他,書自己。劉僕之議,卽情未安。可令諸賢更共詳衷。」司農卿明 國章,雖情或未安,而禮不可廢。 鐃吹軍樂,比之亦然,書疏方之,事則成小,差可緣心。聲

之味。體素壯,腰帶十圍,至是減削過半。每入朝,士庶見者莫不下泣 胸中亦圮塞成疾。故應强加饘粥,不使我恒爾懸心。」雖屢奉勅勸逼,日止一溢,不嘗菜果 葬,日進麥粥一升。高祖又勅曰:「聞汝所進過少,轉就羸瘵。 殯,水漿不入口,每哭輒慟絕。 高祖遣中書舍人顧協宣旨曰:「毁不滅性,聖人之制。 勝喪比於不孝。 有我在, 七年十一月,貴嬪有疾,太子還永福省,朝夕侍疾,衣不解帶。 那得自毁如此!可卽强進飲食。」太子奉勅, 我比更無餘病,正爲汝如此, 及薨,步從喪還宮,至 乃進數合。 自是至

曉,每所奏有謬誤及巧妄,皆卽就辯析,示其可否,徐令改正,未嘗彈糾一人。平斷法獄,多 所全宥,天下皆稱仁。 太子自加元服,高祖便使省萬機,內外百司奏事者填塞於前。太子明於庶事,纖毫必

権古今;閒則繼以文章著述,率以爲常。于時東宮有書幾三萬卷,名才並集,文學之盛,晉、 性寬和容衆,喜慍不形於色。引納才學之士,賞愛無倦。恒自討論篇籍,或與學士商

宋以來未之有也。

「此中宜奏女樂」。太子不答,詠左思招隱詩曰:「何必絲與竹, 一愛山水,於玄圃穿築,更立亭館,與朝士名素者遊其中。 山水有淸音。」侯慚而 嘗泛舟後池,番禺侯軌盛稱 出

宮二十餘年,不畜聲樂。少時,敕賜太樂女妓一部,略非所

好。

貧凍。 心 左右,周行閭巷,視貧困家,有流離道路,密加振賜。 普通中,大軍北討,京師穀貴,太子因命菲衣減膳,改常饌爲 若死亡無可以斂者, 爲備棺槥。每聞遠近百姓賦役勤苦, 又出主衣綿帛,多作襦袴,冬月以施 小食。 輒斂容色。常以戶口未 毎霖雨積雪,

實,重於勞擾。

義興 丁,開 得 戍 弁假節,

(三)發吳郡、吳興、義興三郡民丁就役。太子上疏曰:「伏聞當發王弁等上東三郡民 多伺候民間虛實,若善人從役,則抄盜彌增,吳興未受其益,內地已罹其弊。不審可得權停 必 :齊集,已妨蠶農。 未 獲後利。 歸,强丁疏 去秋有 .漕溝渠,導泄震澤,使吳興一境,無復水災,誠矜恤之至仁,經略之遠旨。 暫勞永逸, 興郡屢以水災失收,有上言當漕大瀆以瀉浙江。中大通二年春,詔遣前交州刺史王 ?稔,復非常役之民。卽日東境穀稼猶貴,劫盜屢起,在所有司,不皆聞奏。 今征 未萌難覩,竊有愚懷。所聞吳興累年失收,民頗流移。吳郡十城,亦不全熟。唯 少,此雖小舉,竊恐難合,吏一呼門,動爲民蠹。又出丁之處,遠近不一,比 去年稱爲豐歲,公私未能足食;如復今茲失業,慮恐爲弊更深。 且草竊

此 功,待優實以不?聖心垂矜黎庶,神量久已有在。 臣意見庸淺,不識事宜,苟有愚心, 願

得上啓。」高祖優韶以喩焉。

太子孝謹天至,每入朝,未五鼓便守城門開。 東宮雖燕居內殿,一坐一起,恒向西南面

臺。宿被召當入,危坐達旦。

曰「云何令至尊知我如此惡」,因便嗚咽。 詔斂以袞冕。 三年三月,寢疾。 蜃輅俄軒,龍驂跼步;羽翿前驅,雲旂北御。 謚曰昭明。 恐貽高祖憂,敕參問,輒自力手書啓。 五月庚寅,葬安寧陵。 四月乙巳薨,時年三十一。 韶司徒左長史王筠爲哀册,文曰 皇帝哀繼明之寢耀,痛嗣 及稍篤,左右欲啓聞,猶不許, 高祖幸東宮,臨哭盡 德之殂芳;

御 武 帳 而 **悽慟,臨甲觀而增傷。** 式稽令典、載揚鴻烈、詔撰德於旌旒、永傳徽於舞綴。

其辭曰:

傳芳。 功弗宰。 式 睿哲 載 寬綽居 明 膺期,旦暮 兩,實惟少陽;旣稱上嗣,且曰元良。 心,溫恭成性,循時孝友,率由嚴敬。 斯在 一,外弘莊 肅,內含和愷。 儀天比峻,儷景騰光,奉祀延福,守器 識洞機深,量苞瀛海,立德不器,至 咸有 種德,惠和齊聖,三善遞宣,

軒 緯 掩 精,陰羲弛極;纏哀在疚,殷憂銜恤。 孺泣無時,蔬館不溢;禪遵踰月,哀號 萬

或

司

慶。

綢繆恩紀。

祭安民。 畢 實惟監撫,亦嗣郊禋;問安肅肅,視膳恂恂。 光奉成務,萬機是理;矜慎庶獄,勤恤關市。 金華玉璪,玄駟班輪,隆家幹國,主 誠存隱惻,容無慍喜,殷勤博施,

斯務。 咀肴核。 流,清章雲委。 望魯揚芬。吟詠性靈,豈惟薄伎;屬詞婉約,緣情綺靡。 爱初敬業,離經斷句,奠爵崇師,卑躬待傅。 辯究空微,思探幾賾;馳神圖緯,研精爻畫。沈吟典禮,優遊方册;魘飫膏腴,含 括囊流略,包舉藝文,遍該緗素,殫極丘墳。 幐帙充積,儒墨區分,瞻河 寧資導習,匪勞審諭;博約是司,時敏 字無點竄,筆不停紙; 壯思泉 闡訓,

慚秀。 天下歸仁。 逾賜壁。 總覽時才,網羅英茂,學窮優洽,辭歸繁富。 望苑招賢,華池愛客,託乘同舟,連輿接席。 徽風遐被、盛業日新、仁器非重、德輶易遵。澤流兆庶、福降百神、四方慕義、 或擅談叢,或稱文囿;四友推德,七子 摛文掞藻,飛鶴汎醳,恩隆置體,賞

雲物告徵, 禮沴褰象; 星霾恒耀, 山頹朽壤。 靈儀上賓,德音長往,具僚無蔭,諮承

安仰。嗚呼哀哉!

皇情悼愍,切心纒痛;胤嗣長號,跗萼增慟。

慕結親遊,悲動氓衆;憂若殄邦,懼同

首夏司開,麥秋紀節;容衞徒警,菁華委絕。 書幌空張,談筵罷設;虛饋饛饛,孤燈

翳翳。嗚呼哀哉!

簡辰請日,筮合龜貞。幽埏夙啓,玄宮獻成。 武校齊列,文物增明。 昔遊漳隆,賓

從無聲,今歸郊郭,徒御相驚。嗚呼哀哉!

背絳闕以遠徂,輔青門而徐轉;指馳道而詎前,望國都而不踐。 陵脩阪之威夷,遡

平原之悠緬;驥蹀足以酸嘶,挽悽鏘而流泫。 嗚呼哀哉!

混哀音於簫籟,變愁容於天日;雖夏木之森陰,返寒林之蕭瑟。 旣將反而復疑,如

有 求而遂失,謂天地其無心,遽永潛於容質。 嗚呼哀哉!

即玄宮之冥漠,安神寢之淸閟;傳聲華於懋典,觀德業於徽謚。 懸忠貞於日月,播

鴻名於天地;惟小臣之紀言,實含毫而 無愧。 嗚呼哀哉

之民,聞喪皆慟哭。 太子仁德素著,及薨,朝野惋愕。 所著文集二十卷,又撰古今典誥文言,爲正序十卷,五言詩之善者,爲 京師男女,奔走宮門,號泣滿路。 四方氓庶, 及疆徼

文章英華二十卷,文選三十卷。

列

傳

第

昭

明太子

一七二

王, [k] 食邑二千戶。尋爲侍中、中衞將軍, [t] 給鼓吹一部。 哀太子大器字仁宗,太宗嫡長子也。 普通四年五月丁酉生。 大同四年,授使持節、 中大通四年, 封宣城郡 都督揚

徐二州諸軍事、中軍大將軍、揚州刺史,侍中如故。

子,將欲下牀,而刑人掩至。太子顏色不變,徐曰:「久知此事,嗟其晚耳。」刑者欲以衣帶絞 立爲皇太子。〔<〕大寶二年八月,賊景廢太宗,將害太子,時賊黨稱景命召太子,太子方講老 太子曰:「此不能見殺。」乃指繫帳竿下繩,命取絞之而絕,時年二十八。〔5〕 太清二年十月,侯景寇京邑,敕太子爲臺內大都督。 三年五月,太宗卽位。六月丁亥,

敗,志不圖生;主上蒙塵,寧忍遠離。吾今逃匿,乃是叛父,非謂避賊。」便涕泗嗚咽,令卽前 歸,部伍不復整肅,太子所乘船居後,不及賊衆,左右心腹並勸因此入北。 太子曰:「家國喪 賊以太子有器度,每常憚之,恐爲後患,故先及禍。承聖元年四月,追謚良太子。 太子性寬和,兼神用端嶷,在於賊手,每不屈意。初,侯景西上,攜太子同行,及其敗

愍懷太子方矩字德規,世祖第四子也。 初封南安縣侯,隨世祖在荆鎭。 太淸初,爲使

吹一部。 持節、督湘郢桂寧成合羅七州諸軍事、鎭南將軍、湘州刺史。 世祖承制,拜王太子,改名元良。 承聖元年十一月丙子,立爲皇太子。[10]及西魏 尋徵爲侍中、中衞將軍,給鼓

師陷開城,太子與世祖同爲魏人所害。

太子聰穎,頗有世祖風,而凶暴猜忌。 敬帝承制,追謚愍懷太子。

烝以孝,大舜之德,其何遠之有哉! 士,在於畎畝之中,終日爲之,其利亦已博矣。 陳東部尚書姚察曰:孟軻有言,「鷄鳴而起,孳孳爲善者,舜之徒也。」若乃布衣韋帶之 況乎處重明之位,居正體之尊,克念無怠,烝

校勘記

[一] 五年六月庚戌始出居東宮 「六月」各本作「五月」,據通鑑改。 天監五年五月乙丑朔,無庚戌,

六月甲午朔,有庚戌。

至是詔加金博山 各本脱「韶」字、據南史補。按:太平御覽一四八、六八五,册府元龜二六一,

俱有「韶」字。

列傳第二 哀太子 愍懷太子 校勘

記

- 太子自立二諦法身義 答。二諦謂真諦、俗諦。三諦是其所破,非其所立。删府元龜二五八正作「二諦」,今據改。 「二諦」各本作「三諦」。按:廣弘明集二四有昭明太子解二諦令旨並問
- 命僕劉孝綽議其事 此「僕」字及下文「劉僕議」、「劉僕之議」,各本皆誤作「僕射」。本書劉孝
- 綽傳,孝綽曾爲太子僕,未嘗爲尚書僕射,今删。
- 「五」韶遣前交州刺史王弁假節 「王弁」、南史作「王弈」。
- C六〕中大通四年封宣城郡王 「四年」,各本作「三年」,據本書武帝紀及通鑑改。按太宗十一王傳, 諸王之始封,無一在中大通三年。
- Cヤン 尋爲侍中中衞將軍 當從紀作「中軍」。 按本書武帝紀,中大通五年正月癸丑,以宣城王大器爲中軍將軍。「中衞」
- 「八」六月丁亥立爲皇太子 「丁亥」,各本及南史作「癸酉」。按:是年六月乙酉朔,有丁亥,無癸酉。
- 時年二十八 大器生於普通四年,死於大寶二年,時年二十九。此作「二十八」, 譌。

本書簡文紀作「丁亥」。今改正。

承聖元年十一月丙子立爲皇太子 「丙子」,當依本書元帝紀作「己卯」。 丙子是蕭繹即帝位日, 史稱「是日帝不升正殿,公卿陪列而已」;至己卯始立皇太子。

梁書卷九

列傳第三

王茂 曹景宗 柳慶遠

王茂字休遠,日太原祁人也。 祖深、北中郎司馬。 父天生, 宋末爲列將, 於石頭克司

徒袁粲,以勳至巴西、梓潼二郡太守,上黃縣男。

好讀兵書,駮略究其大旨。性沈隱,不妄交遊,身長八尺,潔白美容觀。 |茂年數歲,爲大父||深所異,常謂親識曰:「此吾家之千里駒,成門戶者必此兒也。」及長, 齊武帝布衣時,見

之歎曰:「王茂年少,堂堂如此,必爲公輔之器。」

漢中,茂受詔西討。 寧朔將軍長史鎭援北境,入爲前軍將軍江夏王司馬。 宋昇明末,起家奉朝請,歷後軍行參軍,自司空騎兵,太尉中兵參軍。 魏軍退,還爲鎭南司馬,帶臨湘令。 又遷寧朔將軍、江夏內史。 入爲越騎校尉。 魏寇兗州,茂時以 魏將李烏奴寇 建武初,

列

第三

王

茂

魏 圍 司 州 茂 以野 州之師救焉。 高祖率衆先登賢首山,魏將王肅、 劉昶來戰, 七六 茂從高祖拒

之,大破 魏 軍退,茂還郢,仍遷輔國長史、襄陽太守。

部, 盜 神 不 二十萬,度 虎 可 毎遺茂 自 勝算。 郢 闁 高 表 祖義師 魯 也, 解 航請戰。 旣 爲前 職,優詔 茂率所領 長 平,從高祖東下,復爲軍鋒。 驅至宣陽門。 起,茂私 驅。 不 茂與曹景宗等會擊,大破之。縱 師次郢城,茂進平加湖, 到東掖門應赴,爲盜 許。 於張弘策, 加鎭 建康 軍 將 城平,以茂爲護軍將軍,俄遷侍中、領軍 勸高 軍,封望蔡縣公,邑二千三百戶 祖迎 師次秣陵,東昏遣大將王珍國,盛兵朱雀門,衆號 所 破光 射, 和帝,高 茂躍馬而 子衿、吳子陽等, 兵追奔,積屍 祖 以爲不然, 進,羣盜 與航欄等,其赴淮死者, 反走。 斬馘 語在高祖紀。 (萬計, 還獻捷于 一將軍。 茂 以不能式遏姦 高祖發 羣 盜 一之燒 漢 雍

徔 醉後,每見言色,高祖常宥而 本 固 江 州 號 辭 開 不 刺 是 姓安之。 府 史, 拜,改授 儀 江 給 同 州 鼓 三司、 侍中、中衛 四 刺 吹 年 史陳伯 丹陽 部, 魏 侵漢 南討 尹 之舉兵叛,茂出 將 へ, 侍 中 不之責也。 軍 伯之。 中 ·, 領 ,茂受詔 如 太子 故。 伯之奔于魏。 詹事 西討,魏乃 十一年,進位司空,侍中、尹如故。 時 爲使持節、散騎常侍、都督 天 下 七年,拜車 無事 班 時 高祖 師。 九江 六年, 騎 一新罹 方信仗 將 軍, 軍寇, 遷尙 文雅 太子 江 書右 |州諸軍事、征南將軍、 民思反業, ``**,** 茂 詹 事 僕 心 如故。 茂辭京尹、改領 射, 頗 怏 常侍 茂務農省 怏, 八 年 如 侍宴 故

中權將軍。

持節、散騎常侍、驃騎將軍、開府儀同三司、江州刺史茂,識度淹廣,器宇凝正。 悼惜之,賻錢三十萬,布三百匹。 軍、開府同三司之儀、都督江州諸軍事、江州刺史。 容。 數,式昭盛烈。 盡誠宣力,綢繆休戚,契闊屯夷。方賴謀猷,永隆朝寄,奄至薨殞,朕用慟于厥心。 姿表 褒麗,須眉 茂性寬厚,居官雖無譽,亦爲吏民所安。居處方正,在一室衣冠儼然,雖僕妾莫見其惰 可贈侍中、太尉,加班劍二十人,鼓吹一部。諡曰忠烈。」 如畫,出入朝會,每爲衆所瞻望。 詔曰:「旌德紀勳,哲王令軌; 念終追遠, 前典 視事三年, 薨于州, 時年六十。 明年,出爲使持節、散騎常侍、驃騎將 (明誥。 爱初草味, 高 宜增禮 故使 祖 甚

臣也。 命奏樂。 初,茂以元勳,高祖賜以鍾磬之樂。 茂在江州,夢鍾磬在格,無故自墮,心惡之。 樂旣極矣,能無憂乎!」俄而病,少日卒。 既成列,鍾磬在格,果無故編皆絕,墮地。 |茂謂長史江詮曰:「此樂,天子所以惠勞 及覺,

杜景,欲襲州城,刺史蕭昂討之。四景,魏降人,與貞秀同戮。 子貞秀嗣,以居喪無禮,爲有司奏,〔三徙越州,後有詔留廣州,乃潛結仁威府中兵參軍

曹景宗字子震,新野人也。父欣之,爲宋將,位至征虜將軍、徐州刺史。

將數 因是 於衆 闋 就。 刺史蕭赤斧板爲冠軍中兵參軍,領天水太守。 宋元徽 以膽勇知名。 人,於中路卒逢蠻賊數百圍之。 中射之, 景宗幼善騎射,好畋 中,隨父出京師,爲奉朝請、員外,遷尚書左民郎。 人皆懼中馬足,鹿應弦輒斃,以此爲樂。 頗愛史書,每讀穰苴、樂毅傳,輒放卷歎息 、獵,常與少年數十人澤中逐麞鹿,每衆騎趁鹿, (三) 鹿馬相亂,景宗 景宗帶百餘箭,乃馳騎四 未弱冠,欣之於新野 曰:「丈夫當如是!」辟西曹不 射, 尋以父憂去職,還鄉里。 每箭殺一蠻, 遣出 州 蠻遂散走, 以匹馬 服

參軍 到 軍敬兒少子也,爲武陵太守。 (武陵,收其屍骸,迎還殯葬,鄉里以此義之。 ,帶馮翊太守,督峴南諸軍事,除屯騎校尉。 時建元初,蠻寇羣動,景宗東西討擊,多所擒破。 敬兒誅,道門於郡伏法,親屬故吏莫敢收,景宗自襄陽遣人船 少與 州里 齊鄱陽王鏘爲雍州,復以爲征虜中兵 張道門厚善。云 道門,齊車騎 將

四年 剋馬圈, 顯達論功,以景宗爲後, 景宗退無怨言。 ,太尉陳顯達督衆軍北 建武二年,魏主托跋宏寇赭陽,景宗爲偏將,每衝 圍馬圈,景宗從之,以甲士二千設伏,破魏援托跋英四萬 魏主率衆大至,顯達宵奔,景宗導入山道, 堅陷陣,輒 有斬獲,以勳除游擊將軍。 及

故顯達父子獲全。

意焉。 五年,高祖爲雍州刺史,〔+〕景宗深自結附,數請高祖臨其宅。 永元 初,表爲冠軍 將軍 、竟陵太守。 及義師 起,景宗聚衆, 遣親 時天下方亂, 人杜思沖 :勸先 高祖亦厚 迎南

康,道 莫非富室,抄掠財 居士 未立,且 冠 加 與衆軍 王 康 珍 軍 王 都督郢司二州諸軍事、左將軍、郢州刺史。 棄甲奔走,景宗皆獲之,因鼓而前,徑至阜炭橋築壘。 將軍王茂 於 或 次江寧,東昏將李居士 襄 長圍六門。 於 師行 大航。 陽即 日 濟江,圍郢城, 帝位,然後出 人,器甲穿弊,居士望而輕之,因鼓噪前薄<u>景</u>宗。 茂衝其中堅,應時而陷,景宗縱兵乘之。 物,略奪子女,景宗不能禁。 城平,拜散騎常侍、右衞將軍,封湘、 師,爲萬全計。 以重兵屯新亭, 自二月至于七月,城乃降。 高祖 是日選精騎一千至江寧行頓, 及高祖入頓新城, 天監元年,進號平西將軍,改封竟陵 不 從,語在高 西縣侯, 復帥衆前驅至南州 景宗軍 景宗又與王茂、 祖紀 食邑一千六百戶。 景宗被甲馳戰,短兵裁接, 士皆桀黠無賴,御道左 嚴申號令, 高祖至竟陵,以景宗 呂僧 景宗始至,安營 ,領馬步軍 然後稍息。 珍掎角,破 以縣侯 仍遷持 取 與 建 復

殘橫,民頗厭之。 二年十月,魏寇司州,圍刺史蔡道恭。 望門不出,但耀 景宗在州,鬻貨聚斂。 軍遊獵而已。 於城南起宅,長堤以東,夏口以北,開 及司州城陷,爲御史中丞任昉所奏,高祖以功臣寢而不治,徵 時魏攻日苦,城中負板 街列 門,東西數 而 里,而 汲, 景宗 部曲

列 傳 第 曹 景 宗 護軍

旣至,復拜散騎常侍、右衞將軍。

魏洲 日 棄城 宗等逆裝高艦,使與魏橋等,爲火攻計。 草守之,因謂爲趙草城,是後恣芻牧焉。 年三月,春水生,淮水暴長六七尺。叡遣所督將馮道根、李文釗、裴邃、韋寂等乘艦登岸,擊 眼對橋北岸立城,以通糧運,每牧人過岸伐芻藁,皆爲大眼所略。 傷者十二三,自是魏軍不敢逼。 至濊水上,四十餘里,伏屍相枕。義之出逐英至洛口,〔六〕英以匹馬入梁城。 徑渡大眼城南數里築壘,親自舉築。 軍 高 亦 同 預 祖 走。 進,始大捷矣。」及韋叡至,與景宗進頓邵陽洲,立壘去魏城百餘步。 不聽。 上軍盡殪。 此所以破賊也。 焉,而受景宗節度。 五. 年,魏托跋英寇鍾離,圍徐州刺史昌義之,高祖詔景宗督衆軍援義之,豫州刺史韋叡 諸壘相次土崩,悉棄其器甲,爭投水死,淮水爲之不流。 景宗欲專其功,乃違詔而進,值暴風卒起,頗有渰溺,復還守先頓。 景宗因使衆軍皆鼓噪亂登諸城,呼聲震天地,大眼於西岸燒營,英自東岸 景宗不進,蓋天意乎!若孤軍獨往,城不時立,必見狼狽。 詔景宗頓道人洲,待衆軍齊集俱進。 景宗等器甲精新,軍儀甚盛,魏人望之奪氣。 大眼率衆來攻,景宗與戰破之,因得壘成。 令景宗與叡各攻一橋,叡攻其南,景宗攻其北。 大眼時遣抄掠,輒反爲趙草所獲。 景宗固啓,求先據邵陽洲尾, 景宗令軍主馬廣躡大眼 景宗乃募勇敢士千餘人, 魏連戰不能却,殺 緣淮百餘里,屍 先是,高祖詔景 魏大將楊大 高祖聞之, 使別將趙 今得待衆

骸枕藉,生擒五萬餘人,收其軍糧器械,積如山岳,牛馬驢騾,不可勝計。

景宗乃搜軍所得

生 口萬餘人,馬千匹,遣獻捷,高祖詔還本軍,景宗振旅凱入,增封四百,並前爲二千戶,進

爵爲公。詔拜侍中、領軍將軍,給鼓吹一部。

章叡 使 之 祖 生,鼻頭 瞻,不宜 靂聲,箭 至數百,窮極 作 「輒言 以 頗 爲 知 野虖逐除,[10]遍往 年長,且州里勝流,特相敬重,同讌御筵,亦曲躬謙遜,高祖以此嘉之。 景宗爲人自恃尙勝,每作書,字有不解,不以問人,皆以意造焉。 笑樂。 之, 不 如餓鴟叫。 然。 出火,此樂使人忘死,不知老之將至。 可。 景宗乃: |錦繡。 景宗謂所親曰:「我昔在郷里,「亞騎快馬如龍, 閉置 ئلا 車 平澤中逐麞,數肋射之,渴飲其血,飢食其肉, 性躁動,不能沉默,出行常欲褰車帷幔,左右 中,如三日新婦。 高祖數讌見功臣,共道故舊,景宗醉後謬忘, 人家乞酒食。 本以爲戲,而部下多剽輕,因弄 遭此邑邑,使人無氣。」爲人嗜酒好樂,臘 今來揚州作貴人,動轉不得,路行 與年少輩數十騎, **輒諫以位望隆重,人所** 甜 或誤稱 人婦 如 雖公卿無所推揖; 甘露漿。 女,奪 下官, 景宗好內,妓妾 拓弓弦作霹 開車幔,小 月於宅中, 人財貨。高 高祖故縦 覺耳後 惟 具 風

百匹,追贈 七 年,遷侍中、中衞將軍、江州 征北將軍 · 、 雍州刺史、開府儀同三司 刺史。 赴任卒於道, 時年五十二。 諡 日此。 子皎嗣 **詔賻錢二十萬,布三**

柳慶遠字文和,河東解人也。伯父元景,宋太尉。

暴水,流漂居民,吏請徙民祀城。[11]慶遠曰:「天降雨水,豈城之所知。吾聞江河長不過三 日,斯亦何慮。」命築土而已。俄而水過,百姓服之。入爲長水校尉,出爲平北錄事參軍、裏 慶遠起家郢州主簿,齊初爲尚書都官郎、大司馬中兵參軍、建武將軍、魏興太守。 郡遭

陽令。

其吾君乎。」因盡誠協贊。及義兵起,慶遠常居帷幄爲謀主。 者耳。」因辟別駕從事史。齊方多難,慶遠謂所親曰:「方今天下將亂,英雄必起,庇民定霸, 高祖之臨雍州,問京兆人杜惲求州綱,惲舉慶遠。 高祖曰:「文和吾已知之,所問未知

淮陵、齊昌二郡太守。 城內嘗夜失火,禁中驚懼,高祖時居宮中,悉斂諸鑰,問「柳侍中何 壘,見慶遠頓舍嚴整,每歎曰:「人人若是,吾又何憂。」建康城平,入爲侍中,領前軍將軍,帶 中興元年,西臺選爲黃門郎,遷冠軍將軍、征東長史。從軍東下,身先士卒。 慶遠至,悉付之。其見任如此。 高祖行營

侯,食邑千戶。母憂去職,以本官起之,固辭不拜。天監二年,遷中領軍,改封雲杜侯。四 霸府建,以爲太尉從事中郎。 高祖受禪,遷散騎常侍、右衞將軍,加征虜將軍,封重安

年,出爲使持節、都督雍梁南北秦四州諸軍事、征虜將軍、寧蠻校尉、雍州刺史。 高祖餞於

新亭,謂曰:「卿衣錦還鄉,朕無西顧之憂矣。」

將軍 器 州郢州之竟陵司州之隨郡諸軍事、安北將軍、寧蠻校尉、雍州刺史、雲杜縣開 年五十七。 遷安北將軍、寧蠻校尉、雍州刺史。曰三慶遠重爲本州,頗厲淸節,士庶懷之。 散騎常侍、太子詹事、雍州大中正。 至殞喪,傷慟于懷。 宜追榮命,以彰茂勳。 諡曰忠惠。賻錢二十萬,布二百匹。」及喪還京師,高祖出臨哭。子津嗣 七年,徵爲護軍將軍,領太子庶子。 至京都,值魏宿預城請降,受詔爲援,於是假節守淮陰。 詔曰:「念往篤終,前王令則,式隆寵數,列代恒規。 使持節、都督雍梁南北秦四 爱初草昧,預屬經綸,遠自升平,契闊禁旅。 。十年,遷侍中、領軍將軍,給扶,幷鼓吹一部。 未赴職,仍遷通直散騎常侍、右衞將軍,領右驍騎 可贈侍中、中軍將軍、開府儀同三司,鼓吹、侯如 魏軍退。 重牧西藩,方弘治道,奄 八年,還京師,遷 。明年春,卒,時 國侯 柳慶遠,

夢以吾褥席與汝,汝必光我公族。」至是,慶遠亦繼世隆焉。 初,慶遠從父兄衞將軍世隆嘗謂慶遠曰:「吾昔夢太尉以褥席見賜,吾遂亞台司,適又

耿 光,以成所志,配迹方、邵,勒勳鍾鼎,偉哉! 、賈咸不盡其器力。 陳吏部尚書姚察曰:王茂、曹景宗、柳慶遠雖世爲將家,然未顯奇節。 茂等选據方岳,位終上將,君臣之際,邁於前代矣。 昔漢光武全愛功臣,不過朝請、特進,寇、鄧、 梁興,因日月末

校勘記

- 王茂字休遠 史王茂先爲江州刺史。」北朝諸史凡引述王茂處皆作王茂先。 南史作「王茂字休連,一字茂先」。 南齊書和帝紀:「永元三年二月己丑,以冠軍長
- 歷後軍 一行參軍 「後軍行參軍」各本作「後行軍參軍」。今乙正。
- □□ 爲有司奏 南史及册府元龜九四○「奏」上有「所」字。
- 四 刺史蕭昂討之 「刺史」各本作「長史」。 按本傳昂為廣州刺史,今改正
- 每衆騎 金 陵局 本作「每衆騎趁鹿」。今從金陵局本。 趁鹿 百衲本、南監本、汲古閣本俱作「無還騎趁鹿」。 北監本、殿本作「每衆騎赴鹿」。
- 少與州 門」作「道文」。 里張道門厚善 「少」字下,各本衍「守督峴南」四字,據南史删。 按南齊書張敬兒傳, 道
- 五年高祖爲雍州刺史 齊明帝建武五年四月,改元永泰。蕭衍為雍州刺史在永泰元年七月。

「五年」應作「永泰元年」。

義之出逐英至洛口 「洛」各本訛「浴」。本書品義之傳及南史作「洛」,今據改。

八九山 我昔在鄉里 各本脱「在」字,據南史及册府元龜八五五,太平御覽三〇〇、六九九、八三一補。

臘月於宅中使作野虖逐除 「野虖」南史作「邪呼」。按「野虖」、「邪呼」並狀衆讙叫聲,詞異而

義同。

吏請徙民祀城 「祀」各本訛「杞」、據册府元龜六九一改正。

十二年遷安北將軍寧蠻校尉雍州刺史 按:本書武帝紀,柳慶遠爲安北將軍、 雍州刺史在天監

十三年。

梁書卷十

列傳第四

蕭穎達 夏侯詳 蔡道恭 楊公則 鄧元起

|青親 郎城 州 素畏裹陽人,人衆又不敵,取之必不可制,制之,歲寒復不爲朝廷所容。 昏遣輔國將軍劉山陽爲巴西太守,道過荆州,密敕穎胄襲雍州。 齊建武末行荆州事,穎達亦爲西中郎外兵參軍,俱在西府。四齊季多難,頗不自安。 舉 至而 事,立天子以令諸侯,則霸業成矣。 局參軍席闡文、諮議參軍柳忱閉齋定議。 人王天虎以書疑之。 蕭 穎達,蘭陵蘭陵人,齊光祿大夫赤斧第五子也。 圖之,罔不濟矣。」忱亦勸焉。 山陽至,果不敢入城。穎胄計無所出,夜遣錢塘人朱景思呼西中 穎達曰:「善。」及天明,穎胄謂天虎曰:「卿與劉 山陽持疑不進,是不信我。 闡文曰:「蕭雍州蓄養士馬,非復一 少好勇使氣, 時高祖已爲備矣。仍遣 今斬送天虎,則彼疑可 起家冠軍。八兄穎胄, 今若殺山陽,與雍 日,江陵 穎

列

傳

相 識 Щ 今 陽 不 車 得 踰 不 借 限 卿頭。」乃斬 而 門闔 因 執 天虎以示山陽。 斬之,傳首 高 祖 山陽 且 以奉 大喜 南康王之議來告,高 ,輕將步騎數 百 到 州 祖 闡文勒 許 焉 兵待

步 於 州 漢 進 刺 趨 史,留 口 和 江寧 帝 , 與 卽 王茂 衞 位 ٠, 破 西 朝 、曹景宗等攻郢 以 東 穎 昏將李居士, 胄 以 類達 爲假 節、侍 爲 冠軍 城, 叉 下 .中、尙 陷之。 將 東城 軍。 書 一个、領 隨 及楊公則等率 高 祖 吏部尚書、 平 江州。 師 隨高 都督 高 祖 進江 祖 行留諸 高祖圍郢 州 軍 使與曹景宗先 事、鎭軍將 城, 穎達 軍 率馬 會 ·、 |荆 軍

胄 軍 命。 任漾之於 自 以 及 初 璝 職 義 等 居 師 硤 聞 上 之 將 建 口 起 不不 康 , 破 也 將 大將 能 ,巴東太守蕭 平, 拒 衆 制 軍 劉孝 懼 璝 等, 而 慶 潰, 憂愧 惠訓子璝、 於上明, 乃始 不樂,發疾 發 喪, 穎冑遣 巴西太守魯休烈弗從,舉兵侵荆州 和 帝 數 軍 贈 日 拒 穎冑 而 之; 卒。 丞 而 州 相 高 中 祖 祕 已平江、郢, 之,使似其 昌 書者假 敗輔 建 康。 為教 或 穎 將

湖 在 郡 靈 道絕糧,後因食過飽而卒。 祐 拒 軍 之。 事 爲 義 起 師 回穎 冠 兵, 初 軍 得數 將 頛 学 達 軍 不 弟 百 能 廬 人,屯 穎孚 自 陵 立, 內 自 西昌 史。 京 以 以其兵由 師 藥 穎孚 出 Щ **一一**。 **盧** 湖 率 建安復 靈祐 陵 穎 達 等 人脩景 奔長沙 聞 進 之, 據 智 一希祖 西 假 潛 昌, 穎孚 引與 追之, 東昏 節 南 督 遣 歸 穎孚緣山踰 安 廬 , Ξ 西 陵 太守 豫 至 廬陵, 章 劉 臨 嶂 希 JII 景智 南 祖 僅 自 康 而 及 南江 安 獲発 宗 成 入 人 五.

可封 懷 構 巴 義始,肇基王迹,契闊屯夷,載形 建 彌 東 康 與 城平, 郡 事 開 篤。 或 高祖以穎達爲前將軍、丹陽尹。 公,食邑三千戶,本官如故。」贈穎字 齊故侍中、丞相 ·、尚書· 心 事。 · 令穎胄,風格峻遠,器寓深邵,清猷盛業,問望 朕膺天改物,光宅區宇,望岱觀河, 上受禪,詔曰:「念功惟德,列代所同,追遠 爲侍中,改封作唐侯,縣邑如故。 右衞 將軍。 加穎達散騎常侍,以公事 永言號 一斯歸。 働 o

遷 征 虜 將軍、太子左 衞 率。 御史中丞任昉奏曰: 発。

及

大

論

功賞

う封

穎達吳昌縣侯,邑千五

一百戶。

尋

今年 夫,況乎伐冰之家,爭雞豚 論 魚 軍 年收直 五 稅 臣 一月十 聞 輒 貧 攝 觀 五 四 穎達宅督彭難當 所取, H_o 十萬。』如 主人類達,于 窮 視 其 不 列 之利;衣繡 為。 狀,至 到 時謂 臺辨問。 在於 則 非新 之士,受賈人之服。 布衣, 與 風 立,仍啓乞接代 列 聞 窮居介然之行, 尚可以激貪厲俗, 稱『尋生魚典稅,先 符同 類達 卽 僧琰, 風 主。 聞 征 本是鄧 即蒙降許登 虜將 軍臣 僧琰啓乞,限訖 蕭穎 税,與史法 惇此 達 啓乞 薄

繩。 亟 二,追彼十一,風體 陳, 臣等參議,請以見事免類達所居官,以侯還第。 臣 至公寂寞。 . 謹 案 征 虜 將 屠中之志, 岩茲, 軍、太子 準繩 左 異乎鮑 斯在 衞 率、作 肆 陛 之求; 唐縣 下 弘 開 情 動 魚飱之資, 國 侯 良, 臣 穎達,備 每爲曲法 不俟潛 位 大臣,預 臣 有之數。 一當官執憲, 聞 遂復 執 憲,私 敢不直 申 茲 文 謁

中二千石。 有 詔原之。 治任威猛, 郡人畏之。 轉散騎常侍、左衞將軍。 遷使持節、都督江州諸軍事、江州刺史,將軍如故。 俄復爲侍中, 衞尉卿。 出爲信威將軍、豫章內史,加秩

衣 襲,錢二十萬,布二百匹。 九年, 遷信威將軍、右衞將軍。 追贈侍中、中衞將軍,鼓吹一部。 是歲卒,年三十四。 車駕臨哭,給東園秘器,朝服一 諡曰康。 子敏嗣。 具,

旣處優閑,尤恣聲色,飲酒過度,頗以此傷生。

之,徵爲通直散騎常侍、右驍騎將軍。

穎胄子靡,襲巴東公,位至中書郎,早卒。

夏侯詳字叔業,譙郡譙人也。〔六〕年十六,遭父艱,居喪哀毁。 三年廬于墓,嘗有雀三

足, 飛來集其廬戶,衆咸異焉。 服闋,刺史殷琰召補主簿

魏。 魏氏之卒,近在淮次,一軍未測去就,懼有異圖。 詳說琰曰:「今日之舉,本効忠節,若社稷有奉,便歸身朝廷, 宋泰始初,琰舉豫州叛,宋明帝遣輔國將軍劉勔討之,攻守連月,人情危懼,將請救於 今若遣使歸 款, 何可屈身北面 必厚 相慰納, <u></u> 一異域。 止発 且今 罪

困獸,士庶懼誅,咸欲投魏。僕所以踰城歸德,敢布腹心。

若謂不然,請充一介。」踐許之。

詳見動曰:「將軍嚴圍峭壘,矢刃如霜,城內

愚徒,實

願將軍弘曠蕩之恩,垂霈然之

惠,解 圍 退舍,則 皆相率而至矣。」勵許之。 詳 曰:「審爾,當 如君言,而詳請反命。」 動造 到城

下,詳呼城中人,語以圖辭,卽日琰及衆俱 出,一 州 以 ·全

轉治中從事史,仍遷別駕。 勔 爲 刺史,又補主簿。 歷事八將,州部稱之。 頃之,爲新汲令, 治有異績, 刺史段佛榮班下境內, 爲屬城表。

與語 亭成,常爲寇掠,累攻不能禦,詳率銳卒攻之,賊衆大潰,皆棄城奔走。 出 太守,幷督光城、弋陽、汝陰三郡衆赴之。[刊]詳至建安,魏軍引退。 . 爲征虜長史、義陽太守。 ,詳輒末略不酬。 齊明帝爲刺史,雅相器遇。 帝以問叔業,叔業告詳。 頃之,建安戍爲魏所圍,仍以詳爲建安戍主,帶邊城、新蔡二 及輔政,招令出都, 詳曰:「不爲福始,不爲禍先。」由此微 將大用之。 每引詳及鄉人裴叔業 先是,魏又於淮上置荆 有 日夜 郡

馬、新興太守,便道先到江陽。 軍 劉 山陽先在州,山陽副潘紹欲謀作亂,詳僞呼紹議事,卽於城門斬之,州府乃安。 武末,徵爲游擊將軍,出爲南中郎司馬、南新蔡太守。 時始安王遙光稱兵京邑,南康王長史蕭穎胄並未至,中兵參 齊南康王爲荆州,遷西 遷司 中郎司 州

刺史,辭不之職。

列

俥

第

四

夏

侯

軍 國 高 祖 穎 義兵起,詳與穎胄同創大舉。西臺建,以詳爲中領軍,加散騎常侍、南郡 青多 決 於詳。及高祖圍郢城未下,穎胄遣衞尉席闡文如高 祖軍 。詳獻議曰:「窮 太守。 凡

刺史。 和帝 採。」高祖嘉納焉。頃之,穎胄卒。時高祖弟始興王憺留守襄陽,詳乃遣使迎憺,共參軍國。 此 符,仁之所懷,遠邇歸義,金帛素積,糧運叉充,乃可以列圍寬守,引以歲月,此王翦之所以 魏武之所以定大業也。若三事未可,宜思變通,觀於人情,計我糧穀。若德之所感,萬里同 衆而攻之。 賊樵糧,窺彼人情,權其形勢。 令獻其所見,盡其所懷,擇善而從,選能而用,不以人廢言,不以多罔寡。 剋楚也。若圍之不卒降,攻之未可下,間道不能行,金粟無人積,天下非一家,人情難可豫, 壁易守,攻取勢難;頓甲堅城,兵家所忌。誠宜大弘經略,詢納羣言,軍主以下至于匹夫,皆 則宜更思變計矣。變計之道,實資英斷,此之深要,難以紙宣,輒布言於席衞尉,特願垂 加詳禁兵,出入殿省,固辭不受。遷侍中、尚書右僕射。尋授使持節、撫軍將軍、荆州 詳又固讓于憺。 若使糧力俱足,非攻守所屈,便宜散金寶,縱反間,使彼智者不用,愚者懷猜,此 若使賊人衆而食少,故宜計日而守之;食多而力寡,故宜悉 又須量我衆力,度

百姓所稱。州城南臨水有峻峯,舊老相傳,云「刺史登此山輒被代」。因是歷政莫敢至。 :中,進特進。 三年,遷使持節、散騎常侍、車騎將軍、湘州刺史。 詳善吏事,在州四載,爲 右光祿 天監元年,徵爲侍中、車騎將軍,論功封寧都縣侯,邑二千戶。 大夫,侍中如故。 給親信二十人,改封豐城縣公,邑如故。二年,抗表致仕,詔解 詳累辭讓,至於懇切,乃 詳

於其地起臺榭,延僚屬,以表損挹之志。

侍中如故。 六年,徵爲侍中、右光祿大夫,給親信二十人,未至,授尚書左僕射、
「<〕金紫光祿大夫, 道病卒,時年七十四,上爲素服舉哀,贈右光祿

曰「錫爾金鉤,旣公且侯。」」士瞻,詳兄女壻也。 先是,荆府城局參軍吉士瞻役萬 人沒仗庫防火池,得金革帶鉤,隱起雕鏤甚精巧,篆文 女竊以與詳,詳喜佩之,期歲而貴矣。

蔡道 **|恭字懷儉,南陽||冠軍人也。 父那,宋||益州刺** 史。 **元**

越騎校尉、後軍將軍 道恭少寬厚有大量。 o 建武末,出爲輔國司馬、汝南令。 齊文帝爲雍州, 召補主簿,仍除員外散騎常侍。 齊南康王爲荆州,薦爲西中郎中兵 後累有戰功,遷

參軍,加輔國將軍。

軍門。 司馬。 持節、督西討諸軍事。 義兵起,蕭穎冑以道恭舊將,素著威略,專相委任,遷冠軍將軍、西中郎諮議參軍,仍轉 中興元年,和帝卽位,遷右衞將軍。 以功遷中領軍,固辭不受,出爲使持節、右將軍、司州刺史。 次土臺,與賊合戰,道恭潛以奇兵出其後,一戰大破之,休烈等降于 巴西太守魯休烈等自巴、蜀連兵憲上明,以道 恭

列

賊,今所苦轉篤,勢不支久,汝等當以死固節,無令吾沒有遺恨。」又令取所持節謂僧勰 之,將退。 水 五千人,食裁 內作土山 四 「禀命出 ,道恭載土純塞之。 面 俱 天監初,論功封漢壽縣伯,邑七百戶,進號平北將軍。 前,欲以塡壍, .疆,憑此而已,卽不得奉以還朝, ,厚二十餘丈;多作大槊,長二丈五尺,施長刃**,** 會道恭疾篤,乃呼兄子僧勰、從弟靈恩及諸將帥謂曰:「吾受國厚恩,不 支半歲,魏軍攻之,晝夜不息,道恭隨方抗禦,皆應手摧却。 道恭輒於壍內列 相持百餘日,前後斬獲不可勝計。 艨衝鬭艦 方欲攜之同逝, 以待之, 魏 可與棺柩相隨。」衆皆流涕。 使壯士刺魏 魏 三年,魏圍司州,時城中衆不滿 大造梯衝,攻圍日急,道恭 人不得進。 人登城者。 又潛作伏道以決壍 魏乃作大車載土, 能破 魏軍 基憚 於城 其年 滅寇

捷書 乃陷。 督、刺史、伯如故,幷尋購喪櫬,隨宜資給。」八年,魏許還道恭喪,其家以女樂易之,葬襄陽。 沒守存,窮 五月卒。 志 通烈。 先是,朝廷遣郢州 詔曰:「持節、都督司州諸軍 魏知道恭死,攻之轉急 而後屈。 不幸抱疾, 奄至殞 王業肇 構,致力陝西。 言念傷悼,特兼常懷,追榮加等,抑有 刺史曹景宗率衆赴援,景宗到鑿峴,頓兵不前。 喪,遺略所固, 事 受任邊垂,効彰所莅。 、平北將軍、司州刺史、漢壽縣開 得移氣 朔。 自非徇 恒 寇賊憑陵,竭誠守禦, 數。 國忘已, 可贈鎭 國伯 至八月, 西將軍 忠果並 道 恭 ,器幹 ,使持節、都 城內糧 奇謀 至,何能 間 詳 出, 身

軍劉 命還仲懷首。 **勔討琰,仲懷力戰,死於橫塘。** 楊公則字君翼,天水西縣人也。 公則殮畢,徒步負喪歸鄉里,由此著名。 公則隨父在軍,年未弱 父仲懷,宋泰始初為豫州刺史殷琰將。 歷官員外散騎侍郎。 冠,冒陣抱尸號哭,氣絕良久, 梁州刺史范栢 |琰叛, 輔國 將 勔

厚待焉,要與同事。 下詔襃美。 氏賊李烏奴作亂,攻白馬,公則固守經時,矢盡糧竭,陷于寇,抗聲罵賊。 除晉壽太守,在任淸潔自守。 公則偽許而 圖之,謀泄,單馬逃歸。 梁州刺史王玄邈以事 表聞,齊高帝 烏奴壯之,更

年板爲宋熙太守、領白馬戍主。

張寶 資無擔石,百姓便之。 領太守。 穎冑協同 積發兵自守,未知所附,公則軍及巴陵,仍回師南討。 永明中,爲鎭北長流參軍,遷扶風太守,母憂去官。 義舉,以公則爲輔國將軍、領 頃之,荆州刺史巴東王子響構亂,公則率師進討。 入爲前軍將軍。 西中郎諮議參軍,中兵如故,率衆東下。 南康王爲荆州,復爲西中郎中兵參軍。 雍州刺史陳顯達起爲寧朔將軍,復 軍次白沙, 事平,遷武寧太守。 寶積懼,釋甲以俟焉。 時湘 領軍 在郡 州行事 將 七年, 軍蕭

列傳

公則到,撫納之,湘境遂定。

蕭 祖 **須達宗室之貴亦隸焉。** (103郢州刺史張沖各據城未下,公則率湘府之衆會于夏口。 和帝卽位,授持節、都督湘州諸軍事、湘州刺史。 累進征虜將軍、左衞將軍,持節、刺史如故。 高祖勒衆軍次于沔口,魯山城主孫樂 時荆州諸軍受公則節度,雖

京邑。 公則 壘。 北樓,與南掖門相對,嘗登樓望戰。 送公卿士庶,故出 擊之,東昏軍乃退。 曰:「幾中吾脚。」談笑如初。 公則 郢 公則 城 獎厲軍士,剋獲 平,高祖命衆軍卽日俱下,公則受命先驅,徑掩柴桑。 號令嚴明,秋毫不犯,所在莫不賴焉。 者多由 公則所領多湘溪人,性怯懦,城內輕之,以爲易與,每出 更多。 公則營焉。 及平,城內出者或被剝奪,公則親率麾下, 東昏夜選勇士攻公則栅,軍中驚擾,公則堅臥 城中遙見麾蓋,縱神鋒弩射之,矢貫胡牀,左右皆失色。 進號左將軍,持節、刺 大軍至新林,公則自越城移屯領軍府壘 史如 故,還鎭 江州旣定,連旌東下,直造 南 蕃 列陣東掖門,衛盪 ,輒先犯公則 不起,徐命

充復 之,所辟引皆州郡著姓,高祖班下諸州以爲法。 南 將 初 軍 公則 封 爲 寧都 政雖無威嚴,然保 東下,湘 縣侯,邑一 部諸 千五. 郡多未賓從,及公則還州, 己廉 百戶。 涨慎,爲· 湘州 吏民所悅。 寇亂累年,民多流散,公則輕 然 湘俗單家以賂求州職, 後諸 屯聚並散。 刑 天監 薄斂,頃之,戶口 元 公則至,悉斷 年, 進號平

者數千戶。 朝 里乃反。 雖臨途疾苦,豈可僶俛辭事。 廉頗、馬援以年老見遺,猶自力請用。 廷 2始議: 四 疾卒于師,時年六十一。高祖深痛惜之,即日舉哀,贈車騎將軍,給鼓吹一部。 北伐,以公則威名素著,至京師,詔假節先屯洛口。 微徵 魏豫州刺史薜恭度遣長史石榮等前鋒接戰,卽斬石榮,逐北至壽春, 中護軍。自己代至,乘二舸便發,費送一無所取。 馬革還葬,此吾志也。」遂强起登舟。 今國家不以吾朽懦,任以前驅,方於古人,見知重 公則受命遘疾,謂親 仍遷衞尉卿,加散騎常侍。 至洛口,壽春士女歸降 去城數十 人曰:「昔

不輟卷,士大夫以此稱之。 公 則爲人敦厚慈愛,居家篤睦,視兄子過於其子,家財悉委焉。 性好學,雖居軍旅,手 日烈。

子膘嗣,有罪國除。 高祖以公則勳臣,特詔聽庶長子朓嗣。 朓固讓,歷年乃受。

起家州辟議曹從事史,轉奉朝請。 鄧元起字仲居,南郡當陽人也。 時西陽馬樂率衆緣江寇抄,商旅斷絕,刺史蕭遙欣使元起率衆討平之。遷武寧 少有膽幹,膂力過人。性任俠,好賑施,鄉里年少多附 雍州 刺史蕭緬板爲槐里令。 遷弘農太守、平西軍

列

傅

第

太守。

野州刺史張沖督河北軍事,元起累與沖書,求旋軍。 規襲夏口,元起率銳卒攻之,旬月之間,頻陷六城,斬獲萬計,餘黨悉皆散走。 勢,所謂金城湯池,一旦捨去,則荆棘生焉。」乃表元起爲平南中兵參軍事。 [當時,敢死之士樂爲用命者萬有餘人。 永元 末,魏軍逼義陽,元起自郡援焉。 蠻帥田孔明附于魏,自號郢州刺史,寇掠三關, 沖報書曰:「足下在彼,吾在此,表裏之 自是每戰必捷, 仍戍三關。

宗及元起等圍城,結壘九里,張沖屢戰,輒大敗,乃嬰城固守。 郢。 何 上 道。 患不 元起大言於衆曰:「朝廷暴虐,誅戮宰臣,羣小用命,衣冠道盡。 荆、雍二州同舉大事, 義 剋。 師 至江陵,爲西中郎中兵參軍,加冠軍將軍,率衆與高祖會于夏口。 起,蕭穎冑與書招之。 且我老母在西,豈容背本。 張沖待元起素厚,衆皆懼沖,及書至,元起部曲多勸其還 若事不成,政受戮昏朝,幸免不孝之罪。」卽日治嚴 高祖命王茂、曹景

監初,封當陽縣侯,邑一千二百戶。 元起築壘於 中興元 和 帝 卽 位,授假 建陽門, 年七月,郢城降,以本號爲益州刺史,仍爲 節 與王茂、曹景宗等合長圍, 冠軍將軍、平越中郎將、廣州刺史,遷給事黃門侍郎,移鎭南堂西 又進號左將軍,刺史如故,始述職焉。 身當鋒鏑。 前軍,先定尋陽。 建康 城平,進號征虜將軍。 及大軍進至京邑, 天

起至巴西, 初,義師之起,益州 巴西太守朱士略開門以待。 刺史劉季連持兩端,及聞元起將至,遂發兵拒守。 先時蜀人多逃亡,至是出投元起,皆稱起義應朝廷, 語在季連傳。 元

民始 郡籍注,三四因而罰 師人 .圖之,不患資糧不足也。」元起曰:「善,一以委卿。」膺退,率富民上軍資米,俄 新故三萬餘。 附,於我觀德,若糾以刻薄,民必不堪,衆 之,所獲必厚。」元起然之。治令李膺諫曰:「使君 元起在道久, 軍糧乏絕。 或說之曰:「蜀土政慢,民多詐疾,若檢巴西 心一離,雖悔無及,何必起疾可 前有嚴 敵,後無繼 以濟師 得三萬 膺請 Щ

出

盡沒。 進至蔣橋,去成都二十里,留輜重於郫。 嬰城自守。 元起出巡視圍栅,季連使精勇掩之,將至麾下,元起下輿持楯叱之,衆辟易不敢進。 元起先遣將

王元宗等,破季連將李奉伯於新巴,齊晚盛於

赤水,衆進屯 元起遺魯方達之衆救之,敗而反,遂不能剋。元起捨郫,逕圍州 晚盛又破元起將魯方達於斛石,士卒死者千餘人,師衆咸懼,元起乃自率 季連復遣奉伯、晚盛二千人,間道襲郫,陷之, 城, 西平。 栅其三面 季連始 軍備 兵稍 而 塹

使赦季連罪,許之降。 時益部兵亂日久,民廢耕農,內外苦饑,人多相食,道路斷絕,季連計窮。 高 祖 論平蜀勳,復元起號平西將軍,自己增封八百戶,幷前二千戶 季連即日開城納元起,元起送季連于京師。 城開,郫乃降。 會明年,高祖 斬奉伯

元起以鄉 人庾黔婁爲錄事參軍,又得荆州刺史蕭遙欣故客蔣光濟,並厚待之,任以州

性 輕脫,與黔婁志行不同,乃言於元起曰:「城中稱有三刺史,節下何以堪之。」元起由此疏 口不論財色。 黔婁甚淸潔,光濟多計謀,並勸爲善政。 性本能飲酒,至一斛不亂,及是絕之。 元起之剋季連也, 城內財寶無所私, 蜀土翕然稱之。 元起舅子梁矜孫 勤恤民

黔婁、光濟,而治迹稍損。

者。 追劾削爵土,詔減邑之半,乃更封松滋縣侯,邑千戶。 軍事,口心救漢中,比至,魏已攻陷兩晉壽。口則淵藻將至,元起頗營還裝,糧儲器械,略無遺 督之任,非我而誰?何事忽忽便救。」黔婁等苦諫之,皆不從。高祖亦假元起節,都督征討諸 濤,並遣告急,衆勸元起急救之。 元起曰:「朝廷萬里,軍不卒至,若寇賊侵淫,方須撲討,董 州 長史夏侯道遷以南鄭叛,引魏人,白馬戍主尹天寶馳使報蜀,魏將王景胤、孔陵寇東西晉 淵藻入城,甚怨望之,因表其逗留不憂軍事,收付州獄,於獄自縊,時年四十八。 在州二年,以母老乞歸供養,詔許焉,徵爲右衞將軍,以西昌侯蕭淵藻代之。 是時,梁

曰:「二十斛。」元起悉以施之。時人稱其有大度。 明。」因厚遺之。 師,華在 初,元起在 城 內, [荆州,刺史隨王板元起爲從事,別駕庾蓽堅執不可,元起恨之。 甚懼。 少時又嘗至其西沮田舍,有沙門造之乞,元起問田人曰:「有稻幾何。」對 及城平,元起先遣迎庫,語人曰:「庾別駕若爲亂兵所殺,我無以自 大軍旣 至京

家兒忽得富貴,詎可 之,遇蹇,喟然嘆曰:「吾豈鄧艾而及此乎。」後果如筮。 元起初爲益州,過江陵迎其母,母事道,方居館,不肯出。 久保,我寧死不能 與汝共入禍敗。」元起之至巴東,聞蜀亂,使蔣光濟筮 子鏗嗣。 元起拜請同行。 母曰:「貧賤

矣。詳之謹厚,楊、廢廉節,君子有取焉。 之所啓,人惎之謀?不然,何其響附之決也? 陳吏部尚書姚察曰: 永元之末,荆州方未有釁,蕭穎胄悉全楚之兵,首應義舉。 穎達叔姪慶流後嗣,夏侯、楊、鄧咸享隆名,盛 豈 天

校勘記

- [一] 起家冠軍 「起家冠軍」下疑有脫落,南史無此四字。
- 兄穎胄齊建武末行荆州事穎達亦爲西中郎外兵參軍俱在西府 各本脫「行荆州事類達」六字,

據南史補。

- **廬陵人脩景智潛引與南歸** 「脩」各本作「循」,據南齊書南史及通鑑改正。
- | |29 | 東昏遣安西太守劉希祖自南江入湖拒之 據南齊書蕭穎冑傳及通鑑齊和帝中興元年, 時東昏

列傳第四 校勘記

侯遣軍主劉希祖率三千人攻蕭穎孚,穎孚敗奔長沙,希祖攻拔安成,殺太守范僧簡, 安成 内史。 是「安西」乃「安成」之誤;而劉希祖時爲軍主,後乃爲安成內史,亦非太守。 東昏以希

Ħ 如其列狀 「如」各本譌「知」,據册府元龜五一九改。

祖

爲

· 公 山

譙郡

譙

人也

- しょし 並督光城弋陽汝陰三郡衆赴之「光城弋陽汝陰三郡」各本皆作「光成弋陽汝鄧五郡」。 按南齊

各本作「譙郡人也」,脱一「譙」字,據南史及册府元龜三四四、七五

一七補。

改正。

- 武帝紀及通鑑並作「左」。 授尚書左僕射 「左」各本作「右」,據南史改。 按"夏侯詳以繼沈約爲尚書左僕射而被徵,
- **八**九 七 父那宋益州刺史 「那」各本譌「郡」,據齊史改正。 蔡那見宋書宗越傳,爲益州刺史在泰豫
- (10) 魯山城主孫樂祖 「魯」各本譌「曾」,據本書武帝紀及册府元龜三七一改正。

元年。

- 戶口充復 爲「克」,通志正作「充」,今據改。 「充」各本作「克」。王懋竑讀書記疑:「克疑作充。」按「充」古書往往寫作「克」,因譌
- 四年徵中護軍 本書武帝紀,天監三年,以湘州刺史楊公則爲中護軍。 而代楊公則爲湘州刺

- 遷弘農太守平西軍事 「平西軍事」上疑脫「參」字。
- 若檢巴西一郡籍注 「郡」各本作「部」,據南史、册府元龜四二一改。
- 二吾 復元起號平西將軍 上文無授免元起平西將軍事,此處謂「復號平西將軍」,非前有脫文、卽此

處有譌誤。

- 高祖亦假元起節都督征討諸軍事 並作「諸軍將」,今改正。 「節」字,各本並脫,據册府元龜四四五補。 「諸軍事」各本
- 比至魏已攻陷兩晉壽 「比至」各本作「比是」,據南史及册府元龜四四五改。

梁書卷十一

列傳第五

張弘策 庾域 鄭紹叔 呂僧珍

江夏王行參軍 忍暫離,雖各有室,常同臥起,世比之姜肱兄弟。 弘策亦不食。 張弘策字眞簡,范陽方城人,文獻皇后之從父弟也。 母强為進粥,乃食母所餘。 遭母憂,三年不食鹽菜,幾至滅性。 起家齊邵陵王國常侍,遷奉朝請、西中郎 幼以孝聞。 母嘗有疾,五日不食, 兄弟友愛,不

有失地氣,浙東有急兵祥。 策由此特敬高祖。 緯象云何? 弘策與高祖年相輩,幼見親狎,恒隨高祖遊處。 國家 故當無恙。」高祖曰:「其可言乎。」弘策因曰:「請言其兆。」高祖曰:「漢北 建武末、弘策從高祖宿、酒酣、徙席星下、語及時事。 今冬初,魏必動,若動則亡漢北。 每入室,常覺有雲煙氣,體輒肅然,弘 帝今久疾,多異議,萬一伺釁, 弘策因問高 祖曰:

身親勞役,不憚辛苦。 喜,謂高祖曰:「夜中之言,獨當驗矣。」高祖笑曰:「且勿多言。」弘策從高祖西行,仍參帷幄, 效鄧晨乎。」是冬,魏軍寇新野,高祖將兵爲援,且受密旨,仍代曹虎爲雍州。 稽 「光武有云,『安知非僕』。」弘策起曰:「今夜之言,是天意也,請定君臣之分。」高祖曰:「舅欲 部 且 梁、楚、漢當有英雄興。」弘策曰:「英雄今何在。爲已富貴,爲在草茅。」高祖笑曰: 乘機 而 作,是亦無成,徒自驅除耳。 明年都邑有亂,死人過於亂麻,齊之歷數,自茲 弘策聞之心

亂,蒼生之命,會應有主。以郢州居中流之要,雍部有戎馬之饒,卿兄弟英武,當今無敵,虎 爲西中郎長史,行郢州事。高祖使弘策到郢,陳計於宣武王,語在高祖紀。 覩 據 「昔周室旣衰,諸侯力爭,齊桓蓋中人耳,遂能一匡九合,民到于今稱之。齊德告微,四海方 不世之功可建。 海 兩州,參分天下,糾合義兵,爲百姓請命,廢昏立明,易於反掌。 . 內方亂,有匡濟之心,密爲儲備,謀猷所及,惟弘策而已。 時長沙宣武王罷益州還,仍 五年秋,明帝崩,[1] 遺詔以高祖爲雍州刺史,乃表弘策爲錄事參軍,帶襄陽令。 無爲豎子所欺,取笑身後。雍州揣之已熟,願善圖之。」王頗不懌而無以 如此,則恒、文之業可成, 弘策因說王曰: 高祖

義 師將起,高祖夜召弘策、呂僧珍入宅定議,旦乃發兵,以弘策爲輔國將軍、軍主,領萬 拒

也。

|策 遷 高 衆 軍 欲 人 逆爲 庾 衞 祖 咸 頓 奮厲 域 後 尉 遣 軍 部 圖 夏口 弘 卿 域又同。 測, 策 軍事。 加 ·, 高 與呂 給 日,仍 皆 祖 事 在 僧 西臺建,爲步兵校尉,遷車騎諮議參軍。 以 中。 乃命衆 目中。 珍 破 爲宜 朱雀 先入清宮 天監初, 軍 乘勢長驅,直指京邑,以計語弘策,弘策 義 軍 即日 師 至新林,王茂、 高 ,封檢府 加散騎常侍,洮陽 上道,緣江 祖 入 頓石頭城,弘策 庫。 至建康,凡磯、浦 于時城內珍寶委積,弘策申 曹景宗等於大航方戰,高祖遺弘策持節勞勉, 縣侯, 屯門禁衞,引 邑二千二百戶 及郢城平,蕭穎達、楊公則諸 、村落,軍行宿 與高祖意合。 接 士類,多全免。 **、**(三) 勒部曲, 次、立頓處所,弘 弘策盡忠奉上, 叉訪 秋毫 寧遠 城平, 無 將皆 犯。 海將

散 之, 氏 騎常 凋 從 時 衰 觀 時 舅 年 侍 饗 東 衞 四 昏 前 十 嘗 車 尉, 餘 軍 屢 七。 騎 慮 黨 司 絕, 將 馬 發 初 高 軍 所忽, 呂僧 興 逢 祖 (感渭陽 赦 給鼓 深 珍直 令, 働情 殞 吹 身祇 多未 一殿內, 情寄 焉。 部。 自安, 豎。 斯 以宿 給 第 謚 在 其 數 衞 日 情 愍 兵 方賴. 晶 百人因運获炬束仗,得入南北掖作亂,燒神虎門、 理 拒 , 清貞, 衣 忠 破 之,盜 勳, 襲, 器 翼宣寡薄 識 錢十 分入衞 淹 濟, 萬, 尉 自 報 布 府 藩 効 百 弘策 升朝, 無徴 匹, 蠟 方教 契闊 永言增 百斤。 火,盜 夷 阻 潛後害 詔 可 加 贈 外

知

無

不

爲

交友

(故舊,

隨才薦拔,搢紳皆趨

焉

弘策 爲 人 寬 厚 通 一率,篤 舊故。 及居隆重,不 以貴勢自高。故人賓客, 禮接 如 布 衣時。祿

賜皆散之親友。 及其遇害,莫不痛惜焉。 子緬嗣,別有傳。

南鄭 廣退,以功拜羽林監,遷南中郎記室參軍。 ,州有空倉數十所,域封題指示將士云:「此中粟皆滿,足支二年,但努力堅守。」衆心以 庾域字司大,新野人。 長沙宣武王爲梁州,以爲錄事參軍,帶華陽太守。 時魏軍攻圍

議參軍。 城平,域及張弘策議與高祖意合,即命衆軍便下。 半,無有離心。 夏侯道遷舉州叛降魏,魏騎將襲巴西,域固守百餘日,城中糧盡,將士皆齕草食土,死者太 西臺,卽授高祖黃鉞。蕭穎冑旣都督中外諸軍事,論者謂高祖應致牋,域爭不聽,乃止。 口,自和帝遣御史中丞宗夬衡命勞軍。 永元末,高祖起兵,遣書招域。 天監初,封廣牧縣子,後軍司馬。出爲寧朔將軍、巴西梓潼二郡太守。 魏軍退,詔增封二百戶,進爵爲伯。六年,卒於郡。 西臺建,以爲寧朔將軍,領行選,從高祖東下。 域乃諷夬曰:「黄鉞未加,非所以總率侯伯。」夬反 每獻謀畫,多被納用。 霸府初開,以爲諮 梁州長史 師次楊 郢

刺 史蕭 紹 誕 叔 以弟 少孤貧。 年二十餘,爲安豐令,居縣有能名。 本州召補主簿, 難, 獨 馳 赴焉。 轉治中從事 誕 死 ,侍送喪柩, 史。

衆 咸 稱 之。 到京 師 ,司空徐孝嗣 見而 異之,曰:「祖逖之流也。」

在,義 囚之,救解得免。 叔 獨 固 高 無二心。」高 清 祖 願留。 臨 司州, 高祖謂曰:「卿才幸自有用,我今未能相益,宜更思 及高祖 祖固不許,於是乃還壽陽。 命爲中兵參軍,領長流,因是厚自結附。 爲 雍州 刺史,紹叔間道西歸,補寧蠻長史、扶風太守 刺史蕭遙昌苦引紹叔,終不受命。 高祖罷州還京師,謝遣賓客,紹 他塗。」紹叔 日:「委質有 遙昌怒,將

馬,莫不富實。 爲刺 圖,今日 取 客。 雍州,紹叔 東昏旣害朝宰,頗疑高 閑宴,是見取良會也。」賓主大笑。 紹叔 知之,密以白高祖。 植 請以此衆一戰。」送兄於南峴,相持慟哭 退謂 紹叔曰:「雍州實力,未易圖 祖。 紹叔兄植為 植旣至, 令植. 高祖 東昏直後,東昏遺至雍州,託以候紹叔, 登 於紹叔處置酒宴之, 也。」紹叔曰:「兄還, 具爲天子言之。兄 臨城隍,周觀府署,士卒、器械、舟艫、戰 而 别 戲植 曰:「朝廷遣卿 實潛使 見

事 無關乏。 則 義 日臣 師 起,爲冠軍 .愚不及,此皆聖主之策。」其不善,則曰「臣慮出淺短,以爲 天監初, 一將軍, 入爲 衞尉卿。 改驍騎將軍, 紹叔忠於事上,外所聞 侍從 東下江州 留紹叔 知, 纖毫 監州事、督江、湘二州糧運、 一無隱。 其事當如是, 殆以此 每爲高祖

列

之, 縣 誤 朝 起為 凋 廷, 弊,改封 冠 臣 軍 .之罪深矣。」高祖甚親信之。 將軍、右軍司馬,封營道縣侯,邑千戶。 東興縣侯、邑如 故。 初,紹叔 母憂去 少失父, 職。 紹叔 事母及祖母以孝聞,奉兄恭謹。 俄 復 有至性, |為衞尉卿,加冠 高祖常使人節其哭。 軍 一將軍 以營道 及居 頃

顯

一,祿賜

所

得

及

四方貢遺,悉歸

之兄室。

以 廣 司 州 此 田 歸 移鎭 積 三年 之。 穀 關 魏 招納 南。 軍 流民,百姓安之。 圍合肥,紹叔 四年, 以紹叔為 以本 使持節、征虜將軍 性頗矜躁,以權勢自居,然能傾 號督衆軍鎭東關, 一、司州 事平,復爲衞尉。 刺史。 紹叔 心接物,多所薦 創立城隍,繕修兵器, 旣而義陽爲魏所陷, 舉,士類亦

騎 優 及 叔 拜 與,隆 常 宅 授 義 巷 演興 六年, 始, 侍 狹陋,不容 茲 , 寔立 、右衞 載 寵 還府,中使醫藥, 徴爲 茂 將 命。 勳 軍 左將軍,圖 · \ 云 「輿駕,乃止。 ,作牧疆境,効 可 贈 散 東興 |騎常侍、護軍將軍,給鼓吹一 縣 加通 開 日 詔曰:「追往念功, 彰 數 或 直散騎常侍,領司 所莅。 侯 至。至 紹叔, 七年,卒於府舍,時 方申任寄, 立 身清 前王所篤 正, 豫二州大中正。 協贊 部,東園 奉 上忠恪, 心 气,在 膂 年 「秘器, 1;奄至 誠 四 契闊 惟 + 舊, 紹叔 殞 五. 朝服一具,衣一襲, 藩朝, 喪, 異代 至家疾篤, 高祖 傷痛 情績 同 將臨 于懷 規。 顯 其殯,紹 著。 通直 韶於宅 宜 |X 加 散 爱

事

所須,隨由資給。

諡 曰 忠。」

紹 叔 卒後,高祖嘗潸然謂朝臣曰:「鄭紹叔立志忠烈,善則稱君,過則歸己,當今殆無其

此 其見賞惜 如此。 子貞嗣

文皇爲門下書佐。 生, 指 呂僧珍字元瑜,東平范人也,世居廣陵。 僧珍 謂 博士日 身長七尺五寸,容貌甚偉。 :「此有奇聲,封侯相也。」年二十餘,依宋丹陽 起自寒賤。 在 同 類 中少所褻狎,曹輩皆敬之。 始童兒時,從師學,有相工 尹劉 秉, 秉誅後, 事 歷觀諸

軍曹虎,西爲典籤 史,齊武 陽門道, 陽,至太祖 曰:「卿有貴相 太祖 以僧珍 不過私 爲 豫州 率衆 ,後當不見減,努力爲之。」 爲子隆 室, 東討,使僧 刺 帶新城令。 史,以爲 太祖 防閣, 益 以 珍 典籤,帶蒙令,居官稱 從之鎭。 此 知行軍衆局 魏軍寇沔北, 知之。 永明 爲丹陽 事。 九年, 司空陳顯達出 尹、復 僧珍宅: 職。 雍州刺史王與反,四教造 命爲 太祖 在建陽門東, 那督 .討,一見異之,因屛人呼上座,謂 遷領 郵。 (軍,補) 齊隨 自受命當行, 主簿。 王 子隆 僧珍 妖賊 出 唐瑀 隸 毎 爲 革北 荆 日 宼 州 由

將

刺

建

爲 梁州 建武 刺 二年, 史, 魏圍守連月,間諜所在不通,義陽與雍州路斷。 魏大舉南侵,五道並進。 高祖 率師援義陽,僧 珍從在 高 祖 欲遣使至襄陽, 軍 中。 長沙宣 求梁州 武 王

列

傳

第

Ŧ.

呂

僧

珍

反,高祖

甚嘉之。

事寧,補羽林監。

問, 衆皆憚,莫敢行, 僧珍 固請充使, 即日單舸上道。 既至襄陽,督遣援軍,且獲宣武王書

茅,並立 義 舍,多伐材竹,[10]沈於檀溪,積茅蓋若山阜,皆不之用。 甚 僧 珍 兵起, 固 東 求 昏 高 高祖 祖 西 即位,司空徐孝嗣管朝政,欲與共事, 歸,得補邔 頗招武猛,士庶響從,會者萬餘 夜召僧珍及張 令。[五]旣至,高祖命爲中 弘策定議,明旦乃會衆發兵,悉取 人,因命按行城西空地,將起數千間屋, 僧珍揣不久安,竟弗往。 ·兵參軍,委以心膂。 僧珍獨悟 檀溪材竹, 其旨, 僧珍陰養死 裝 亦私 時高祖已臨雍州, 爲 艛艦, 具櫓數百 士,歸之者 葺 以爲止 之以

皆 來 軍 月 王 茂 壨 薄 越 於 塹拔 率 城 高 俄 居士應時奔散, 精 祖 板 辨。 叉 栅 僧 橋 兵 以 進據 珍謂將 僧珍 築 先登赤鼻邏。 僧珍為 衆軍 壘, 騎城。 分人 將發,諸將 壘立, 輔 士曰:「今力旣不敵 或 八上城, 獲其器甲不可勝計。 郢 [將軍 茂移頓 州平, 其日,東昏將李 、步兵校 果爭櫓,僧珍乃出先所具者,每船付二張,爭者乃息 矢石俱發, 越城 高 祖 進僧 ,僧珍猶守白板。 尉,出入臥內,宣通 不不 自 居士 可 珍 率馬步三百 為 `與戰;亦勿 僧珍又進據越城。 一與衆 加前鋒 來 大將軍。三三大軍 戦, 遙 李 人出其後,守隅者 意旨。 居 射 僧珍等要擊, 士密 須 東昏大將王珍國列車爲營, 至 師及 覘 塹裏,當並 知 郢 次江寧,高 衆 城,僧珍 少, 大破 復 踰 率銳 力破 之。 城 祖 率 卒萬 而 乃與茂 之。 所 令 下 領頓偃 僧 俄 人,直 珍 內 進 與 而

背潍而陣。 王茂等衆軍擊之,僧珍縱火車焚其營。 即日瓦解

宿衞。 僧珍率羽林勁勇出梁城。其年冬旋軍,以本官領太子中庶子。 守,遷給事黃門侍郎,領虎賁中郎將。 一千二百戶。尋遷給事中、右衞將軍。 建康城平,高祖命僧珍率所領先入清宮,與張弘策封檢府庫,卽日以本官帶南彭城太 天監四年冬,大舉北伐,自是軍機多事,僧珍畫直中書省,夜還秘書。五年夏,又命 高祖受禪,以爲冠軍將軍、前軍司馬,封平固縣侯,邑 頃之,轉左衞將軍,加散騎常侍,入直秘書省, 總知

地,豈可徙之益吾私宅」」姊適于氏,住在市西,小屋臨路,與列肆雜處,僧珍常導從鹵簿到 其宅,不以 在 |珍曰:「吾荷國重恩,無以報効,汝等自有常分,豈可妄求叨越,但當速反葱肆耳。」僧珍舊宅 市 珍在任,平心率下,不私親戚。從父兄子先以販葱爲業,僧珍旣至,乃棄業欲求州官。 北,前有督郵廨,鄉人咸勸徙廨以益其宅。僧珍怒曰:「督郵官廨也,置立以來,便在此 僧珍去家久,表求拜墓,高祖欲榮之,使爲本州,乃授使持節、平北將軍、南兗州刺史。 爲恥。 在州百日、徵爲領軍將軍、尋加散騎常侍、給鼓吹一部、直祕書省如

進。」祿俸之外,又月給錢十萬,其餘賜賚不絕於時。 侍 御座,屛氣鞠躬,果食未嘗舉箸。 僧珍有大勳,任總心膂,恩遇隆密,莫與爲比。 嘗因醉後,取一柑食之。 性甚恭慎,當直禁中,盛暑不敢解衣。 高祖笑謂曰:「便是大有所

年 ,疾病,車駕臨幸,中使醫藥,日有數四。 僧珍語親舊曰:「吾昔在蒙縣,熱病發黃,

發黃,所苦與昔正同,必不復起矣。」 竟如其言。 當時必謂不濟,主上見語,『卿有富貴相,必當不死,尋應自差』,俄而 卒于領軍府舍,時年五十八。 高祖卽日臨 果愈。 今已富貴而復

殯,詔曰:「思舊篤終,前王令典;追榮加等,列代通規。 散騎常侍、領軍將軍、平固縣開 國 侯

寵命。 舉。 僧珍,器思淹通,識宇詳濟,竭忠盡禮,知無不爲。 及居禁衞,朝夕盡誠。 可贈驃騎將軍、開府儀同三司,常侍、鼓吹、侯如故。 方參任台槐,式隆朝寄; 奄致喪逝, 傷慟于懷。 與股契闊,情兼屯泰。大業初構,茂勳克 給東園秘器,朝服一具,衣一 宜加優典,以隆

襲,喪事所須,隨由備辦。

諡曰忠敬侯。」高祖痛惜之,言爲流涕。

長子|峻早卒,|峻子|淡嗣。

三子皆有力焉。 |陳 吏部尚書姚察曰: 僧珍之肅恭禁省,紹叔之造膝詭辭,蓋識爲臣之節矣。 張弘策敦厚慎密,呂僧珍恪勤匪懈,鄭紹叔忠誠亮蓋,締構王業,

校勘記

五年秋明帝崩 齊明帝建武五年四月、改元永泰、明帝死在七月、「五年」當作「永泰元年」。

- 邑二千二百戶 梁制,郡王封邑例爲二千戶,張弘策僅一縣侯,何得食邑二千二百戶? 册府元
- **瓤三八〇作「一千二百戶」。**
- = 師次楊口 「楊」各本譌「陽」,據南史及通鑑齊和帝中興元年紀改。按本書宗夬傳亦作「楊口」。
- 79 徵 爲 左將軍 南史作「左衞將軍」。
- \sqcap 五. 右衞 中 ·使醫藥 將軍 日數至 上文云「徵爲左將軍」, 「使」字各本股,今據南史及册府元龜三八〇補 南史作「徵爲左衞將軍」,則此處之「右衞將軍」當作「左衞將
- 齊明 妖賊 帝永明三年、四年俱作「唐寓之」。 唐瑀寇東陽 「唐瑀」北監本作「唐寓之」, 其他各本俱作「唐瑀」。 南齊書武帝紀及通鑑

軍

ス 永明 九年雍州刺史王奐反 按南齊書王奐傳,與之反在永明十一年,此作「永明九年」,誤。

「邔」殿本作「卬」,百衲本、南監本、汲古閣本、金陵局本作「邛」。

張森楷梁書校勘

ナし

得補邔令

記:「卬、邛皆非縣名,不得有令。 據漢書地理志,南郡有邔縣,續漢志、晉志並屬荆州 }宋**、** }濟

齊志屬雍州,隋志無之,疑梁以後省。 時高祖爲雍州,僧珍從之,當補邔令。 卬、邛二字並非。」

按張說是,今據改。

多伐材竹 列 傳 第 五 「材」各本譌「林」,據南史及册府元龜三四四改。 校 勘 記 按:下文云「悉取檀溪材竹」, 亦

作「材」。

CIII 高祖進僧珍爲前鋒大將軍

張森楷梁書校勘記:「大將軍三字不當有,蓋涉下大軍而衍。」

二六

梁書卷十二

列傳第六

柳惔 弟忧 席闡文 章叡 族弟愛

柳惔字文通,河東解人也。父世隆,齊司空。

難作,惔以先歸得免。 巴東王子響友。子響爲荆州,惔隨之鎭。 |恢年十七,齊武帝爲中軍,命爲參軍,轉主簿。 歷中書侍郎,中護軍長史。 子響昵近小人,惔知將 出爲新安太守,居郡, 齊初, 入爲尚書三公郎, 爲禍, 以無政績,免歸。 累遷太子中舍 稱疾還京。 及

外之,爲右軍諮議參軍事。

中,領前軍將 江縣侯,邑千戶。 建武末,為西戎校尉、梁南秦二州刺史。及高祖起兵,惔舉漢中應義。和帝卽位,以爲侍 軍。 高祖 高 祖 因讌爲詩以貽惔曰:「爾寔冠羣后,惟余實念功。」又嘗侍座,高祖 踐作,徵爲護軍將軍,未拜,仍遷太子詹事, 加散騎常侍。 論功封

列

傳第

六

柳

惔

「徐元瑜達命嶺南,周書罪不相及,朕已宥其諸子,何如?」惔對曰:「罰不及嗣,賞延于世,今

復見之聖朝。」時以爲知言。尋遷尚書右僕射。

十月 紫光 天監 祿大夫, ,卒于州 四年,大舉北伐,臨川王宏都督衆軍,以惔爲副。 ,時年四十六。 加散騎常侍,給親信二十人。未拜,出爲使持節、安南將軍、湘州刺史。 高祖 爲素服舉哀。贈侍中、撫軍將軍,給鼓吹一部。謚曰穆。 軍還,復爲僕射。 以久疾,轉金

仁政傳及諸詩賦,粗有辭義。 |恢第四弟瞪,亦有美譽,歷侍中、鎭西長史。 子照嗣。 天監十二年,卒,贈寧遠將軍、豫州刺史。

忧字文若, 惔第五弟也。 年數歲,父世隆及母閻氏時寢疾,忧不解帶經年。及居喪,

以 、毀聞。 起家 爲司 徒行 参軍 ,累遷太子中舍人,西中郎主簿,功曹史。

得假 闡文等夜 竟 而 及? 爲 羣 H 齊 邪 自 東 且雍州士銳糧多,蕭使君雄姿冠世,必非山陽所能擬;若破山陽,荆州復受失律之 不看遣 安。 入議 所陷 一禍酷 雍州 之。 巴西太守 之事 忱日 相尋。 劉 且藉 朝廷狂悖 Щ 前事之不忘,後 陽 以 曲 相斃耳。 荆襲高祖,西中郎長史蕭穎冑計未有定,召忱及其所親席 ,爲惡日 獨 事之師也。 滋 不 見蕭令 頃聞京師長者,莫不重足累息,今幸在遠, 君乎? 若使彼凶心已逞, 豈知 以精兵數千,破崔氏十萬 使君 不係踵

進退無可,且深慮之。」闡文亦深勸同高祖。 穎胄乃誘斬山陽,以忧爲寧朔將軍

動 轉 民 吏 部 志。 和 尙 帝 書,不拜。 穎胄不從。 卽 位,爲尚 郢州平,穎胄議遷都夏口,忱復固諫,以爲巴峽未賓,不宜輕捨根本,搖 書吏部郎,進號輔國將軍、南平太守。 俄而 巴東兵至硤口,遷都之議乃息。 論者以爲見機。 葬遷侍中、冠軍將軍,太守 如故。

騎常: 持節 四十一。 出 侍, 督 高 爲安西長史、冠 祖 湘州 轉祠 追贈中書令、諡曰穆。 踐 阼, 諸 部尙書,未拜遇疾, 軍 以忱 ·事、輔 爲五兵尚書,領驍騎將軍。 軍將軍、南郡太守。 國 .將 軍、湘州 詔改 子範嗣。 刺史。 、授給事中、光祿大夫,疾篤不拜。 六年,徵爲員外散騎常侍、太子右衞率。 八年,坐輒放從軍丁免。 論建 定義功, 封州陵伯,邑七百戶。 俄入爲祕書監,遷散 十年,卒於家,時年 未發,遷 天監二

與 其子穎冑善。 席 闡文, 安定臨涇 復歷西 一人也。 一中郎 中 少孤貧,涉獵書史。 -兵參軍 ,領城局。 高組 齊初,為雍州刺史蕭赤斧中兵參軍,由是 之將起義 也,闡文深勸之,穎胄 同焉,

仍 遣 田 祖 恭 私報高祖,并獻銀裝刀,高祖報以金 如 意

和帝 稱 尊號,爲給 事黃門侍郎,尋遷衞尉卿。 穎冑暴卒, 州府騷擾, 闡文以和帝幼弱,

列

高

祖

受禪,

除都官尚書、輔國將軍。

封山陽伯,邑七百戶。出為東陽太守,

又改封湘

中 流任 重,時始興王儋留鎭雍部,乃與西朝羣臣迎王總州事,故賴以寧輯

西,戶邑如故。 視事二年,以清白著稱,卒於官。 韶賻錢三萬,布五十匹。 證曰威。

惲 二 叡 南山 職, 繼 也。」外兄杜幼文爲梁州 母 視 以孝聞。 。宋武帝 朱永光初,袁顗爲雍州刺 韋叡字懷文,京兆杜陵人也。 之 謙不敢對。 如 子。 入關,以太尉掾徵,不至。伯父祖征,宋末爲光祿勳。父祖歸,寧遠長 叡兄纂、闡,並早知名。 時叡內兄王燈、姨弟杜惲,並有鄉里盛名。 祖征 刺史,要叡俱行。 曰:「汝文章或小減, 自漢丞相賢以後,世爲三輔著姓。 纂、叡皆好學,闡有淸操。 梁土富饒,往者多以賄敗,叡時雖 學識當 過之,然而 祖征謂叡 幹國家,成功業, 祖征累爲郡守, 祖玄,避吏隱於長安 曰「汝自謂 幼,獨 皆莫汝逮 毎攜叡之 史。 用 何 出 廉 如燈、 叡 爲 聞 義 事

後爲晉平王左常侍,遷司 史,見而異之, 引爲主 空桂 陽王行參軍,隨齊 簿。) 顕 到 州 與鄧琬起兵, 司空柳世 隆 叡求 守 郢城,拒

荆州 長水校尉、右軍將軍。 刺史沈攸之。 攸之平,遷前 齊末多故,不欲遠鄉里,求爲上庸太守,加建威將軍。 軍 中兵 八參軍。 **外之,爲廣德令。** 累遷 齊興太守、本州別 俄而太尉陳顯

成郡

,故免顗之禍。

非命 達、護軍將軍崔慧景頻逼京師,民心遑駭,未有所定,西土人謀之於叡。 世 才,催 頗更事,懦而不武。 其取赤族也,宜哉。 天下眞人,殆興於吾州矣。」乃遣其二 叡曰:「陳雖舊將,

子,自結於高 祖

用。 死者十七八,皆積屍於牀下,而生者寢處其上,每屋輒盈滿。 死者得埋藏,生者反居業,百姓賴之。 日以爲冠軍將軍、江夏太守,行郢府事。 曰:「他日見君之面,今日見君之心,吾事就矣。」義師剋野、魯,平加湖,叡多建謀策,皆見納 大軍發郢,謀留守將,高祖難其人,久之,顧叡曰:「棄騏驥而不乘, 義兵檄至,叡率郡人伐竹爲筏,倍道來赴,有衆二千,馬二百匹。 初,郢城之拒守也,男女口垂十萬,閉壘經年,疾疫 叡料簡隱 卹, 高祖見叡甚悅,拊几 焉遑遑而 咸爲營理,於是 更索。」即

昌,戶邑如先。東宮建,遷太子右衞率,出爲輔國將軍、豫州刺史、領歷陽太守。 梁臺建,徵爲 大理。 高祖卽位,遷廷尉,封都梁子,□邑三百戶。 天監二年, 改封永 三年,魏遣

衆來寇,率州兵擊走之。

備,徐還授甲,乃可進耳。」叡曰:「不然。 拔。 叡巡行圍栅, 魏城中忽出數百人陳於門外, 叡欲擊之, 諸將皆曰: 「向本輕來, 四年,王師北伐,詔叡都督衆軍。 叡遣長史王超宗、梁郡太守馮道根攻魏 一艘城中二千餘人,閉門堅守,足以自保,無故出人 小峴城、未能 未有

列

叡 輿自 叡每晝接客旅,夜算軍書,三更起張燈達曙,撫循其衆,常如不及,故投募之士爭歸之。 魏 高 軍 守將 一死綏, 與 堤下 合 載 初 *,督厲 杜 肥 肥水堰 有前 其勢甚盛,軍監潘 城等, 元 倫 無却 衆 登城督戰, 四面 軍。 立,使軍主王懷靜築城於岸守之,魏攻陷懷靜城,千餘 。」因令取 臨之。 魏 兵來鑿堤,叡親 中弩死,城逐潰。 靈 魏 ·繖扇麾幢,樹之堤下,示無動 祐 人 勸叡退還巢湖,諸將 計窮,相與悲哭。 與爭之, 俘獲萬餘級,牛馬萬數,絹滿 魏 軍 叡 又請走保三叉。叡 少却, 攻具旣成, 志。 因築 叡素 壘 堰 羸 於堤以 水 又滿, 怒日:「寧有 人皆沒。 每戰未嘗 十間屋,悉充 自固 魏救 魏 騎 兵 叡 人乘勝 此邪 馬 無 起 軍 鬭 所 以板 Ī 用。 所 至 將

至頓舍脩立,館宇藩籬牆壁,皆應准繩。

近, 懼爲 合 肥 所躡, 既平 叡悉遣 ', 高 祖 詔衆軍進次 輜 重 居前,身乘小 東陵。 輿殿後,魏 東陵去魏甓城二十里, 人服叡威名,望之不敢逼,全軍而 將會戰, 有詔 班師。 還。 去賊 旣

避箭 是遷 謹。 焉。 値 步 執白角如意麾軍,一日數合,英甚憚 城,比曉而 征 曰:「鍾離 ′,跨淮通道。 北 淮水暴長,叡卽遣之,鬭艦競發,皆臨敵壘,以小船載草,灌之以膏,從而焚其橋。 也 叡 豫 將 高祖聞之,曰:「二將和,師必濟矣。」叡於景宗營前二十里, 五 叡不許。 自 年, 州 軍 自日日 合肥逕道由 曹景宗,都督衆軍二十萬以拒之。 今鑿穴而 於合肥。 營立。 魏 中 而 叡裝 Щ 軍 元英 至 中驚,叡於城 王元英寇北徐州,圍刺史昌義之於鍾離,衆號百萬,連城四十餘。 邵 處,負戶而 大艦, 陰陵 陽。 大驚, 大澤行, 使梁郡 初,高祖 以杖擊地 汲,車馳卒奔, 上厲聲呵之,乃定。 太守馮道根、廬江太守裴邃、秦郡 敕景宗曰:「韋叡, 值澗谷, - 其强 曰:「是何神 **(**公) 次邵 輒 猶恐. 魏軍 飛橋 陽 其 也」 又夜來攻城,飛矢雨集,叡子 以濟。 魏人先於邵 洲 後,而況緩 卿之鄉望, 明旦, 築 壘 師 相守, 人畏 英自率 夜掘 乎 陽 宜善敬之。」景宗 ! 魏軍盛,多勸叡緩行。 洲 高 兩岸 長塹, 魏 太守李文釗 衆 祖 人已墮吾腹 來 詔 爲 戰, 叡 樹 兩橋 率豫州 鹿 叡 黯請 見叡、禮 角, 等 樹 乘素木輿, 中 爲 截洲 栅 之衆 高祖 風怒火 下 卵 水 城 數 軍。 낈 叡 遺 甚

列

傅

第

六

韋

叡

叡積所獲於軍門,捨觀之,謂叡曰「君此獲復與熊耳山等。」以功增封七百戶,進爵爲侯,徵 報昌義之,義之且悲且喜,不暇答語,但叫曰「更生! 更生」高祖遣中書郎周捨勞於淮上, 通直散騎常侍、右衞將軍。 餘萬,斬首亦如之。 軍人奮勇,呼聲動天地,無不一當百,魏人大潰。 烟 塵晦 冥,敢死之士,拔栅斫橋,水又漂疾,倏忽之間,橋栅盡壞。而 其餘釋甲稽顙,乞爲囚奴,猶數十萬。 元英見橋絕,脫身遁去。 所獲軍實牛馬,不可 道根等皆身自搏戰, 魏 軍 勝 趨 水死者十 叡遣

樓,衆頗譏其示弱。叡曰:「不然;爲將當有怯時,不可專勇。」是時元英復追仙碑,將復邵陽 之恥,聞叡至,乃退,帝亦詔罷軍。 軍,爲魏人所躡,三關擾動,詔叡督衆軍援焉。叡至安陸,增築城二丈餘,更開大塹,起高 將軍、累遷左衞將軍、太子詹事,尋加通直散騎常侍。十三年,遷智武將軍、丹陽尹,以 七年,遷左衞將軍,俄爲安西長史、南郡太守,秩中二千石。 頃之,起爲中護軍。 明年,遷信武將軍、江州刺史。 會司州刺史馬仙碑北伐還 九年,徵員外散騎常侍、

遺惜,士大夫年七十以上,多與假板縣令,鄉里甚懷之。十五年,拜表致仕,優詔不許。 還 州,傷光 应 年,出爲 道 [侯叡,叡笑謂之曰:「若從公言,乞食於路矣。」餉耕牛十頭。 | 叡於故舊,無所 平北將軍、寧蠻校尉、雍州刺史。初,叡起兵鄉中,客陰儁光泣止叡,日初

軍, 甚 三子檢,尤明經史,世稱其洽聞,叡每坐稜使說書,其所發擿,稜猶 禮敬之。 年,徵散騎常侍、護軍 居家 無事,慕萬石、陸賈之爲人,因畫之於壁以自玩。 性慈愛,撫孤兄子過於己子,歷官所得祿賜, 將軍,四尋給鼓吹一部, 入直殿省。 皆散之親故, 時雖老,暇日猶課諸兒以 居朝廷, 弗之逮也。 恂恂未嘗忤視,高祖 家無餘財。 高祖 方銳 後 學。第 為護 意

以 時 於官,遣中書舍人監護。 服 普通元 高祖 (年夏,遷侍中、車騎將軍,以疾未拜。 即日臨哭甚慟。賜錢十萬,布二百匹,東園 贈侍中、車騎將軍、開府 八月,卒于家,時年七十九。 儀同三司。 一秘器,朝服一具,衣一襲,喪事 謚 日 嚴 遺 令薄葬, 斂 取

釋氏,天下咸從風而化;叡自以信受素薄,位居大臣,不欲與俗俯仰,所行略

如

他

尙 徐 勝 擲 多,率多 初 得 虚,遽 邵 如是,世尤以此賢之。 陽 之役,昌義之甚德叡,請曹景宗與叡會,因設錢二十萬官賭之,景宗擲 取一子反之,曰「異事」,遂作塞。 子放、正、稜、黯,放別 景宗時與 有傳。 〈羣帥 爭先啓捷,「弘」 叡獨居後,其不 得维,叡

復篤素 及 正 僧孺 字 分, 敬直,起家 有 爲 尙 踰 書 曩 日 吏 論 部郎,參掌 南康王行參軍,稍遷中 者 稱焉。 大選, 歷官 賓友故 至給 書侍郎,出爲襄陽 事 人莫不傾意 黄門侍 郞 正 太守。 獨 澹然。 初,正 及僧孺擯廢之後,正 與東海王 一僧孺友

稜字 威直 性 恬 素, 以書史爲業,博物强記,當世之士,咸就質疑。 起家安成王府行參

列

軍,稍遷治書侍御史,太子僕,光祿卿。著漢書續訓三卷。

卿。 軍,加持節。卒於城內,贈散騎常侍、左衞將軍。 作以應之,太宗親自負土,哀太子以下躬執畚鍤。 侯景濟江,黯屯六門,尋改爲都督城西面諸軍事。 醫字務直,性强正,少習經史,有文詞。 起家太子舍人,稍遷太僕卿,南豫州刺史,太府 叡族弟愛。 黯守西土山, 時景於城外起東西二土山,城內亦 晝夜苦戰, 以功授輕車將

初,南遷襄陽,爲本州別駕,散騎侍郎。祖公循,宋義陽太守。父義正,早卒。 愛字孝友, 沈靜有器局。 高祖父廣,晉後軍將軍、北平太守。 曾祖軌,以孝武太元之

讀書,手不釋卷,宗族見者,莫不異焉。及長,博學有文才,尤善周易及春秋左氏義。 埃塵滿席,寂若無人。年十二,嘗遊京師,值天子出遊南苑,邑里諠譁,老幼爭觀,愛獨端坐 愛少而偏孤,事母以孝聞。 。性清介,不妄交遊,而篤志好學,每虛室獨坐,遊心墳素,而

爲州里信伏,乃推心撫御,曉示逆順,兼率募鄕里,得千餘人,與僧都等戰於始平郡南,大破 時京邑未定,雍州空虛,魏興太守顏僧都等據郡反,州內驚擾,百姓攜貳。愛沉敏有謀,素 臨弔。服闋,引爲中兵參軍。義師之起也,以愛爲壯武將軍、冠軍南平王司馬,帶襄陽令。 袁顗爲雍州刺史,辟爲主簿。遭母憂,廬於墓側,負土起墳。高祖臨雍州,聞之,親往

之,百姓乃安。

蕭穎胄之死也,和帝徵兵襄陽,愛從始興王憺赴焉。 先是,巴東太守蕭璝、巴西太守魯

休烈舉兵來逼荆州,[10]及憺至,令愛書諭之,]實即日請降。

北長史,汝陰、鍾離二郡太守。 益州刺史鄧元起西上襲劉季連,行至公安,道病卒,贈衞尉卿。 中興二年,從和帝東下。 高祖受禪,進號輔國將軍,仍爲驍騎將軍,尋除寧蜀太守,與 子乾向, 官至驍騎將軍,征

功甚 哉 「盛,推而弗有,君子哉。 忧之謀畫,亦用有成,智矣。 陳吏部尚書姚察曰:昔竇融以河右歸漢,終爲盛族,柳惔舉南鄭響從,而家聲弗實, 章叡起上庸以附義,其地比惔則薄,及合肥、邵陽之役,其 時

校勘記

封都梁子 都梁」各本皆顚倒作「梁都」。 按:都梁爲湘州邵陵郡屬縣,見宋、齊書州郡志。

乙正。

列傳第六 校勘記

- 衆猶遲疑 各本作「衆皆猶遲疑」」「皆」字行。 今據南史及册府元龜三六三、四二八删。
- (三)右軍司馬胡畧等至合肥「胡畧等」,南史作「胡景畧」。
- 親自表率 「表率」各本作「夜率」,據册府元龜三五二改。
- 五 旣而魏援將楊靈胤帥軍五萬奄至 「楊」各本作「揚」,據南史及册府元龜四〇四改。
- <u>六</u> **六** し 英甚憚其强 「憚其」二字,各本皆脫,據南史及太平御覽三〇七補。
- 客陰儁光泣止叡 南史及册府元龜四一二、四五一「儁」作「雙」。
- 十五年拜表致仕優詔不許十七年徵散騎常侍護軍將軍 雍州 刺史韋叡爲護軍將軍。 是徵散騎常侍、護軍將軍卽在叡拜表致仕、優韶不許時。「十七 本書武帝紀,天監十五年十一 月,以

年」乃衍文,南史無此三字。

- 景宗時與羣帥爭先啓捷 「啓」下各本衍一「之」字,今删去。
- 巴東太守蕭璝巴西太守魯休烈舉兵來逼荆州 守蕭惠訓子璝」,此脫「惠訓子」三字。 本書蕭穎達傳及始興忠武王儋傳俱云「巴東太

梁書卷十三

列傳第七

范雲 沈約

|琰異之,要就席,||雲風麥應對,傍若無人。 | 琰令賦詩,操筆便就,坐者歎焉。 嘗就親人袁照 吳興沈約、新野庾杲之與抗同府,見而友之。 學,畫夜不怠。[1]照撫其背曰:「卿精神秀朗而勤於學,卿相才也。」少機警,有識具,[三]善 屬文,便尺牘,下筆輒成,未嘗定藁,時人每疑其宿構。父抗,爲郢府參軍,雲隨父在府,時 范雲字彥龍,南鄉舞陰人,晉平北將軍汪六世孫也。年八歲,遇宋豫州刺史殷琰於塗,

守,留家屬居外。 笑曰:「卿定可兒, 且出就舍。」明旦, 又召令送書入城。城內或欲誅之。 起家郢州西曹書佐,轉法曹行參軍。俄而沈攸之舉兵圍郢城,抗時爲府長流,入城固 雲為軍人所得,攸之召與語,聲色甚厲,雲容貌不變,徐自陳說。 雲曰:「老母弱弟, 攸之乃

列傳第七

范雲

懸 命沈氏,若違 「其命, (三) 禍必及親,今日就戮,甘心如薺。」長史柳世隆素與雲善,乃줲之。

俚, 爲 明。 郎。 正。 簿 時 齊高帝,値有獻白鳥者,帝問此爲何瑞?雲位卑,最後答曰:「臣聞王者敬宗廟,則白鳥至。」 文,時莫能識,雲獨誦之,王悅,自是寵冠府朝。 會赦免。 加出江 謁 如 尤多 復出 仍遷假節、建武將軍、平越中郎將、廣州刺史。初,雲與尚書僕射江祏善,而姨弟徐藝 故,遷尙書殿中郎。子良爲司徒,又補記室參軍事,尋授通直散騎侍郎、領本州大中 廟始畢。 出爲零陵內史,在任潔己,省煩苛,去游費,百姓安之。明帝召還都,及至,拜散騎侍 齊建元初,竟陵王子良爲會稽太守,雲始隨王,王未之知也。 令,深以託雲。 盗 永元二年,起爲國子博 爲始興內史。郡多豪猾大姓,二千石有不善者,謀共殺害,不則逐去之。 一賊,前內史皆以兵刃自衞。雲入境,撫以恩德,罷亭候,商賈露宿,郡中稱爲神 帝曰:「卿言是也。 感應之理,一至此乎」,轉補征北南郡王刑獄參軍事,領主 有譚儼者、縣之豪族、藝鞭之、儼以爲恥、詣京訴雲、雲坐徵還下獄、 士。 王爲丹陽尹,召爲主簿,深相親 會遊秦望,使 任。 人視 邊帶蠻 時進見 刻石

初 雲與高 祖遇 於 齊竟陵王子良邸,又嘗接里閈,高祖深器之。 及義兵至京邑,雲時在

城 司 內。 心翊贊。 東昏旣誅,侍 俄遷大司馬諮議參軍、領錄事。 中張稷使雲銜 命出城,高祖因留之,便參帷幄,仍拜黃門侍郎,與沈約 梁臺建,遷侍中。 時高祖納齊東昏余妃,頗妨

惜 及 政 風 事, 入 聲,奈何襲昏亂之蹤,以女德爲累。」王茂因起拜曰:「范雲言是,公必以天下爲念,無宜 高 關 雲嘗以爲言,未之納也。 定秦,財 祖 默然。 帛無所 雲便疏令以余氏齊茂,高祖賢其意而許之。 取,婦女無所幸,范增以爲其志大故也。 後與王茂同入臥內,雲又諫曰:「昔漢祖居山東,貪財好色; 明日,賜雲、茂錢各百萬 今明公始定天下,海 內想望 留留

頃之, 侍、 爲。 書 H 所 下省 吏部 申 高 坐違 四 謂懷乎若朽索之馭六馬。」雲對曰:「亦願陛下日愼 一, 時 監 祖 海 尚書,以佐命功封霄城縣侯,邑千戶。 亦推 元年,高祖受禪,柴燎於南郊,雲以侍 詔 之敬,今爲天下主,此禮 人榮之。 用 心任之,所奏多允。嘗侍讌,高祖謂臨 人,発吏部,猶爲 其年,東宮建,雲以本官領太子中庶子,尋遷尚書右僕射,猶 、僕射。 旣革,汝宜代我 **雲以舊恩見拔,超居佐命,盡誠翊亮,知無不** 中參乘。 呼范爲兄。」二王下席拜,與雲同 川王宏、鄱陽王恢曰「我與范尚 禮畢, 一日。」高祖善之。 高祖升輦,謂雲曰:「朕之今 是日,遷散騎常 領 車 書 吏部。 ·還尙 少親

每獻 當 史 Ŧ 宥之以遠。」子良 損 畡 雲 善 一性篤 益 ,未嘗 咳亡於官舍,貧無 睦 事 阿 意。 寡 日:「不然。 嫂 **湿盡禮**, 子良嘗啓齊武帝 居宅,雲乃 家 **雲動相規誨,** 事 必先 諮而後行。 論 迎 雲 喪還家 一為郡 諫書具存, 躬 好節尚奇,專趣人之急。 帝 營含殯。 ·曰:「庸· 請取以奏。」旣至,有百餘紙,辭皆 人,聞 事竟 其 陵 恒 王 相 子 賣弄,不 良 少時 恩禮 與領軍 甚 復 隆,雲 窮 法,

列

傳

第

七

范

銴

雲 發擿若神,時人咸服其明贍。 復聞讜言。」及居選官,任守隆重,書牘盈案,賓客滿門,雲應對如流,無所壅滯,官曹文墨, 知稼穡之艱難,無徇一朝之宴逸。」旣出,侍中蕭緬先不相識,因就車握雲手曰:「不圖今日 穫,顧謂衆賓曰:「刈此亦殊可觀。」衆皆唯唯。 切 直。 爲郡號稱廉潔,及居貴重,頗通饋餉,然家無蓄積,隨散之親友。 帝歎息,因謂子良曰:「不謂雲能爾。 性頗激厲,少威重,有所是非,形於造次,士或以此少之。 初, 方使弱汝,何宜出守。」齊文惠太子嘗出東田 雲獨曰:「夫三時之務,實爲長 勤。 伏 願殿下 觀

勤 初 況 可 追贈 非負勒,而 立志,素履有聞。脫巾來仕,淸績仍著。 問望斯在,事深朝寄者乎!故散騎常侍、尚書右僕射、霄城侯雲,器範貞正,思懷經遠,爰 子孝才嗣,官至太子中舍人。 二年,卒,時年五十三。 侍 中、衞將軍,僕射、侯如故。 舊 同論 講。 方騁遠塗,永毗庶政,奄致喪殞,傷悼於懷。 高祖爲之流涕,即日輿駕臨殯。詔曰:「追遠興悼,常情所篤, 並給鼓吹一部。」禮官請諡曰宣,勑賜諡文。 爕務登朝,具瞻惟允。 綢繆翊贊,義簡股心,雖 宜加命秩,式備徽典。

沈約字休文,吳興武康人也。 祖林子,宋征虜將軍。 父璞,淮南太守。 璞元嘉末被誅,

約幼潛 竄, 會赦免。 旣而流寓孤貧,篤志好學,晝夜不倦。 母恐其以勞生疾,常遣減油滅

火。而畫之所讀,夜輒誦之,遂博通羣籍,能屬文。

厥西令。[四] 興宗卒,始爲安西晉安王法曹參軍,轉外兵,並兼記室。 興宗嘗謂其諸子曰:「沈記室人倫師表,宜善事之。」及爲荆州,又爲征西記室參軍,帶 起家奉朝請。 濟陽蔡興宗聞其才而善之,興宗爲郢州刺史,引爲安西外兵參軍,兼記 。入爲尙書度支郞

帝崩,政歸 卿欲我夙興,可恒早入。」遷太子家令,後以本官兼著作郎,遷中書郎,本邑中正,司徒右長 管書記,直永壽省,校四部圖書。 年,以母老表求解職,改授冠軍將軍、司徒左長史,征虜將軍、南淸河太守。 等皆遊焉,當世號爲得人。俄兼尙書左丞,尋爲御史中丞,轉車騎長史。隆昌元年,除吏部 史,黃門侍郎。時竟陵王亦招士,約與蘭陵蕭琛、琅邪王融、陳郡謝朓、南鄕范雲、樂安任昉 侯到宮,或不得進,約每以爲言。太子曰:「吾生平嬾起,是卿所悉,得卿談論,然後忘寢。 郎,出爲寧朔將軍、東陽太守。 齊初爲征虜記室,帶襄陽令,所奉之王,齊文惠太子也。 冢宰,尚書令徐孝嗣使約撰定遺詔。 明帝卽位,進號輔國將軍,徵爲五兵尚書,遷國子祭酒。明 時東宮多士,約特被親遇,每直入見,影斜方出。 遷左衞將軍,尋加通直散騎常侍。 。太子入居東宮,爲步兵校尉, 當時王

在西邸,與約遊舊,建康城平,引爲驃騎司馬,將軍如故。 時高祖勳業旣就,天人

七

武王 日.丁. 閣外,但云「咄咄」。 天心 攀龍附鳳者,皆望有尺寸之功,以保其福祿。今童兒牧豎,悉知齊祚已終,莫不云明公其人 知 事。 同, 之子孫? 也。 召范雲謂 方更同 (約,不異)約今知公。」高祖曰:「我起兵於今三年矣, 天 卿明早將休文更來。」雲出語約,約日:「卿必待我。」雲許諾,而約先期入,高 約乃 人之望,脫有一人立異,便損威德。 ·公初杖兵樊、沔,此時應思,今王業已就,何所復思。 昔武王伐紂,始入,民便曰吾君, 不違民意,亦無所思。公自至京邑,已移氣序,比於周武,遲速不同。 不可違,人情不可失,苟是曆數所至,雖欲謙光,亦不可得已。」高祖曰:「吾方思之。」對 天 文 約嘗扣其端,高祖默而不應。 公作賊。」高祖然之。 出 若天子還都,公卿在位,則君臣 (人事,表革運之徵,永元以來,尤爲彰著。讖云『行中水,作天子』,此又歷然在記。 曰:「生平與沈休文羣居,不覺有異人處,今日才智縱橫, [懷中詔書並諸選置,高祖初無所改。 約出,問 約出,高祖召范雲告之,雲對略同約旨。 日 「何以見處了約舉手向 佗日又進曰:「今與古異、不可以淳風期萬物。 .分定,無復異心。 且人非金石,至 俄而 功臣諸將,實有其勞,然成帝業者,乃 **雲自外來,至殿門不得入,徘** 時事難保。 君明於上,臣忠於下,豈復有 可謂 高祖 豊可以 明 所望。」有頃,高 識。」雲日:「公今 日:「智者乃 若不早定大業, 建安之封,遺 祖 士大夫 命草 徊 壽 爾 光 其 暗 人

卿二人也。」

列傳第七 沈約

輿駕 史。 拜, 尙 戶, 書 事、中正 云 「令,領 服闋, 常 親 梁 朝 侍 臺建,爲散騎常侍、吏部尚書,兼右僕射。 出 . 臨弔,以約年衰,不宜 野以爲榮。 如 太子 遷侍中、右光祿大夫,領太子詹事,揚州大中正,關尙書八條事,遷尙書令,侍中、 如 故。 故。 少傅。 叉拜|約母|謝爲建昌國太夫人。 累表 俄遷尙書左僕射,常侍如故。 、陳讓,改授尙書左僕射、領中書令、前將軍,置佐史,侍中如故。 九年,轉左光祿大夫,侍中、少傅如故,給鼓吹一部 一致毁,遣中書舍人斷客節哭。 奉策之日 高 尋兼領軍 祖受禪,爲尙書僕射,封建昌縣侯,邑千 , 右僕射范雲等二十餘人咸來致 ·,加侍中。 起爲鎭軍將軍、丹陽尹,置佐 天監二年,遭母憂, 尋遷

勞役 身 行 能 道 嶇 之未 資 善, 弘 聿 薄 宣 過 宦 興 物 初 遂 差, 謬 易。 不 風 以 事 約 政, ·得不任 逢 總此 書 非 久 及昏猜之始 陳 光 嘉 爲 處端揆,有志台司,論者咸謂爲宜,而帝終不用,乃求外出,又不見許。 凋 闡 己, 情於勉曰:「吾弱年孤苦,傍無春屬,往者將墜於地,契闊 運,往志宿 竭,歸 人事。 朝 望得 猷, 尙 之暮年,牽策行止,努力祗事。 小祿,傍此 王政 永明 欲 心,復成 討 多門,因 末,出守東陽,意 尋 文簿,時 乖爽。 東歸。 此 ,謀退, 庶幾 今歲 議 歲逾十稔,方忝襄 同 在 異。 開元,禮 止 足,而 而 可 開 果, 外觀傍覽, 年 年 云至, 建武 託卿 以來 陽縣,公私 肇運,人 布懷 懸車 ,病增慮 尙似全 之請, 於徐令,想記 世 情計,非 切 屯邅,困於朝 人, 膠 當 事 加 而 由 由 恩 形 所了具,以 生 未忘。 奪,誠 去 骸 靈 與徐 力用, (夕) 崎 有 限, 示 勉

計月 乞歸老之秩。 煖 不 許,但加鼓吹而已。 相 則煩,加寒必利,後差不及前差,後劇 八小半分。 綜攝。 常須過自束持,方可僶俛。 若天假其年,還得平健,才力所堪,惟思是策。」勉爲言於高祖,請三司之儀, 以此推算,豈能支久?若此 必甚前 解衣一臥,支體不復相關。 不休,日復 劇。 百日數旬,革帶常應移孔,以手握 一日,將貽聖主不追之恨。 上熱下冷,月增日篤,取 冒欲 臂,率 表聞,

約 性 不飲酒,少嗜欲,雖時遇隆重,而居處儉素。 立宅東田,矚望郊阜。 嘗爲郊居賦,

其爾日

伊吾 欲 於 鳥先巢 康 人 惟 之編 莊。 至 人之非己, 而後翔。 志, 披 東郊之寥廓,入蓬藋之荒茫。 無經世之大方。 固物我而兼忘。 |陳 巷窮而 業泰,嬰居湫 思依 林 自中智以下洎,〔t〕咸得性以爲場。 而 羽 旣從豎而 戢,願託 而德昌。 水而 横構 僑 棲仁於 鱗藏。 亦 風除 東里, 固 而 無情於輪 雨 鳳 攘。 晦跡 獸因窟 奐, 於 西堂 而 獲

誰 踰 爭 訴。 班 而 生 波 昔 西漢 之十紀。 流,民失 伊皇祖之弱辰, 之標季, 時 或辭祿 而 狼 余播遷之云始。 顧。 逢時艱之孔棘。 而 反耕,或彈 延亂麻 於井 冠 違利 邑, 而 違危邦而窘驚, 來仕。 建於 曝如 海昏, 逮有晉之隆安, 莽於衢路。 創惟 訪安土而移即。 桑於江汜。 大地 集艱虞於天步。 曠 而 靡容, 同河 肇胥字於朱 濟之重 是天 世交 遠而 世,

忽其窊隆。 遷華 掩閑 屝 mi 庭而晏息。 來啓,張高衡而徙植。 縣四代於茲日,盈百祀於微躬。 值龍顏之鬱起, 乃憑風而 傍逸陌之脩平, 嗟弊廬之難保,若實籜之從風。 矯翼。 面淮流之清直。 指皇邑而南轅, 芳塵浸而悠遠,世道 駕脩衢以騁力。 或誅茅而

翦

棘,或旣西而

復東。乍容身於白社,亦寄孥於伯通。

殫而 徒羈 紲 彌 迹 於 一平生之耿介, 實有心於獨往。 峭,情薄暮而踰廣。 八天壤。 應屢歎於牽絲,陸興言於世網。 抱寸心其如蘭,何斯願之浩蕩。 思幽 「人而軫念,望東臯而長想。 事滔滔而未合,志悁悁而無爽。 詠歸歟而躑跼,眷巖阿而 本忘情於徇物, 路將

抵掌

| 娲、夏, 俗。 之云 貽 將 愛 垂 稔。 闢 熠 乎上天,固非民 逢 叉驅 終 時 而 爲餌。 古 君之喪德,何凶昏之孔熾。 寧方割於下墊, 馳 而 乎軒 遐 念,信王猷 瞻穹昊而 項。 其莫甚。 德無遠 廓 無歸,雖非 其 重氛於上墋。 如 授冥符於井翼, 玉。 而不 车 乃戰||牧所未陳,實升||阿所 而 明無微 被載。 躬靡暇於朝食, 實靈命之所禀。 而 始歎 不 燭。 級絲而 鼓玄澤於大荒,播 未 常求衣於夜枕。 親,終逌組 當降監之初辰,值積 不記。 彼黎元之喋喋, 而 後値。「公尋 仁風 旣 车 於遐 籠 惡 於

列 傳 値 第 銜 [圖 七 之盛 沈 世, 約 遇興聖之嘉期。 謝中涓於初日,叨光佐於此 時。 三三七 闕投石之猛志,

何安身於窮地。〔亡〕味先哲而爲言,固余心之所嗜。不慕權於城市,豈邀名於屠肆。

詠希微以考室,幸風霜之可庇。

却老 蘋萍 藥於靑跗。 李衡 南 籬於芳杜。 遷甕牖 刊 吐 緑 池 樹,由妨基而翦巢。 ,振羽 、芡芰,菁藻蒹菰,石衣海髮,黄荇綠蒲。 之陽,爛漫北樓之後。 攢 則 爾 (朱;羅窗映戶,接霤承隅。 橘 於蘭室。同肩牆於華堵。 乃傍窮野,抵荒郊;編霜葵,葺寒茅。 林千樹,石崇則雜果萬 服於清都。 其林鳥則翻泊頡頏,遺音下上;楚雀多名,流嚶雜響。 開閣室以遠臨,闢高軒而旁覩。 決渟洿之汀濙,塞井甃之淪坳。 其陸卉則紫鼈綠葹, 或幕 株。 渚 織宿楚以成門,籍外扉而爲戶。 開 而 丹房以四照,舒翠葉而 並豪情之所侈, **芘地,或縈窗而** 構棲噪之所集,築町**疃之**所交。 天蓍山韭;[10]雁齒麋舌,牛脣彘首。 動紅 漸沼沚於霤垂,周塍 荷於輕浪,覆碧葉於澄湖。 窺牖。 非儉志之所 藝芳枳於 九衢。 若乃園宅 陌於堂下。 北渠,樹脩楊於南浦 娛。 旣取陰於庭樾,又因 或班尾而綺翼,或綠 抽 紅 殊製,田 英於紫帶 欲令紛 其水 **飡嘉** 因犯檐而 披 圃 ",銜素 **蓊鬱**, 異區 草則 布濩 渡而

秋蜩 脩鷁 江 余之所避也。 每誅空而索有,皆指難以爲易。 鯉 海, 青魴,纖儵鉅鱯。 短鳬。 絳顙。 、吟葉,寒雀噪枝。 聊相忘於余宅。 曳參差之弱藻,戲瀺潛之 好葉隱 而 碧鱗朱尾,脩顱偃頟。 枝藏,乍間 來風南軒之下,負雪北堂之垂。 其竹則東南獨秀,九府擅奇。 關 不自已而求足,並尤物以興累。 而 來往。 輕 軀; 小則戲渚 翅抨流 其水禽則大鴻小雁,天狗澤虞,秋隱寒鶒, 而 成文, 起沫, 訪往塗之軫跡,觀先識之情僞。 不遷植於淇水 大則 翼鼓 八噴流 浪 亦昔士之所迷,而今 而 揚白。 成 ,豈分根於 珠。 其魚則 不興羨於 樂池 赤

朝蔬。 衷而 考阡陌於前書。 跼念,幸取給於庭廬。 原農皇之攸始,討厥播之云初。 排外物以齊遣,獨爲累之在余。安事千斯之積,不羨汝陽之墟。 顏簞食而樂在,鄭高廩而空虛。 緯東菑之故耜,浸北畝之新渠。 肇變腥以粒食, 乃人命之所儲。 頃四百而不足,畝五十而有餘。 無褰爨於曉蓐,不抱惄於 尋井田之往記, 撫幽

響繁笳之淸囀。羅方員而綺錯,窮海陸而兼薦。奚一權之足偉,委千金其如線。 歸 臆 而 爲言,豈斯風之可扇。 臨 誤維 帶脩 而騁目,卽堆冢而流眄。 汀於桂渚, 肇舉鍤於强秦。 將通人之遠旨,非庸情之所見。聊遷情而徙睇,識方阜於 雖茲山之培塿,乃文靖之所宴。 路縈吳而款越,塗被海而 通閩。 驅四牡之低昂, 懷 三鳥以長 試撫

列

傅

潤。 堅枕臥,詭狀殊形。 終陵 言以 其爲狀 虚 自姱,冀神方之可請。 回余眸於艮域, 倒影。 也,則巍峨崇崒,喬枝拂日,嶢嶷岧葶,墜石 駕雌蜺之連卷,泛天江之悠永。 孤嶝横插,洞穴斜經,千丈萬仞,三襲九成。 覿高館於茲嶺。 惟鍾巖之隱鬱,表皇都而 雖混 成以無跡, 指咸池 作峻,蓋 寔遺訓之可秉。 堆 而一息,望瑤臺而 星。 望秩之所宗,含風雲而 岑崟峍屼,或坳或平;盤 亘繞州邑,款跨郊坰, 始飡霞 高 騁,匪爽 而 吐霧, 吐

往,忽二紀以歷茲。

咸夷漫以蕩滌,非古今之異時。

素 烟晚帶,白霧晨縈。 近循則一巖異色,遠望則百嶺俱青。

珪 騷 或 淵 獲 獨 騂駒 之纘 天 生 玉 遊 假 訓 遠 存 異 根根 猶 屑 依 之令望。 情 林 墀 余 「聚沫。 於 猶 ,堂流 於玄肆 ,或開櫺於木末。 ,握椒糈。 武,殆隆平之可 觀 或陵雲高 而 而 遠 以大德,荷茲賜之無疆。 二代之瑩兆,覩摧殘之餘燧。 奉 分 樹 莫駭,魚牣 職於 桂醑。 丹 邀昔恩於舊主,重匪 ,烈窮飲以致災,安忘懷而受祟。 歸妙軫於 月籠 青 、春坊。 怳臨風以浩唱,折瓊茅而延佇。 ; 作因 蹈。 連於 降紫皇於天闕,延二妃於湘渚。 沼 至。 一乘,啓玄扉於三達。欲息心以遣累,必違人而 時言 風 而 室闇蘿蔦,檐梢松栝。 、池竹。 余世德之所君,仰遺封而 不綱。 而 雜 歸於 紅 蔓長柯於簷桂, 紫。 旋迷 陋 服於今皇。 受老夫之嘉稱, 班燕 宇 ,聊暇 紫蓮夜發,紅荷曉舒。 塗於去轍,篤後 成顚沛於虐豎,康斂衿於虛器,穆恭已於巖廊 日以 仰休老之盛則 以表號。 何宗祖之奇傑,威橫天而 發黃華於庭菊。 旣得理於兼謝,固忘懷於飢渴。 敬惟空路邈遠,神蹤遐闊。 劉翔。 浮蘭煙於桂棟,召巫陽於南楚。 掩淚。神寢匪 念於徂 、禮於 得忘己於茲日, 棲余 ",請微 上庠。 光。 志於 輕 風 冰懸埳 晚樹開 軀 爭國,歸余 微 一,靈館相距。 無希驥之秀質,乏如 於 動, 後豁。 夕陽。 而帶坻,雪縈松 花, 陵 其芳襲余。 地。 念甚驚飇, 初 宁 勞蒙 或結僚於 於 英落蘂。 於來報 惟 或攀枝 、道場。 聖 司 席 加 文 風 揚 布

列

傳

第

七

沈

約

四二

而 被野。 鴨 心屯飛而不散,雁高翔而欲下。 並時物之可懷,雖外來而非假。 寔情性之所

留滯,亦志之而不能捨也。

官靡述;徒重於高門之地,不載於良史之筆。長太息其何言,羌愧心之非一。 歸閑蓬蓽。 傷余情之頹暮,罹憂患其相溢。 旁闕吳娃,前無趙瑟。以斯終老,於焉消日。惟以天地之恩不報, 悲異軫而同歸, 歡殊方而並失。 時復託情魚鳥,

尋 加特進,光祿、侍中、少傅如故。十二年,卒官,時年七十三。詔贈本官,賻錢五萬,布百

匹,諡曰隱。

進 酒。 而 師是齊文惠宮人。帝問識座中客不?曰:「惟識沈家令。」約伏座流涕, 于宗黨,得米數百斛,爲宗人所侮,覆米而去。及貴,不以爲憾,用爲郡部傳。 有之, 一官,輒 約 約左目重瞳子,腰有紫志,聰明過人。好墳籍,聚書至二萬卷,京師莫比。 歷仕三代,該悉舊章,博物洽聞,當世取則。 然不能過也。 殷勤請退,而終不能去,論者方之山濤。 自負高才,昧於榮利,乘時藉勢,頗累淸談。 用事十餘年,未嘗有所薦達,政之得失, 謝玄暉善爲詩,任彦昇工於文章,約兼 及居端揆,稍 帝亦悲焉, 嘗侍讌,有妓 少時孤貧,丐 弘 止 爲之罷 足,每

初 ,高祖有憾於張稷,及稷卒,因與約言之。 約曰:「尙書左僕射出作邊州刺史,已往之 唯

唯

而

已。

乃止。 還具以狀聞。 捨 而 諡例十卷,宋文章志三十卷,文集一百卷:皆行於世。 隱。」故改爲隱云。 所憶,少帝三事。 之,巫言如 高 不 祖 ',何足復論。」帝以爲婚家相爲,大怒曰:「卿言如此,是忠臣邪!」乃輦歸內殿。 |約懼,不覺 曰:「天子聖哲」是也,然帝竟不遵用。 ·寤,而 起,猶 及聞赤章事,大怒,中使譴責者數焉,約懼遂卒。 夢。 .獨得胸衿,窮其妙旨,自謂入神之作,高祖雅不好焉。 坐如初。 先此,約嘗侍讌,值豫州獻栗,徑寸半,帝奇之,問曰:「栗事多少。」與約各疏 乃呼道士奏赤章於天,稱禪代之事,不由己出。 出謂人曰:「此公護前,不讓卽羞死。」帝以其言不遜,欲抵其罪,徐勉固 所著晉書百一十卷, 宋書百卷, 齊紀二十卷, 高祖紀十四卷, 邇言十卷, 及還、未至牀、而憑空頓於戶下,因病,夢齊和帝以劍斷其舌。 又撰四聲譜, 有司諡曰文,帝曰:「懷情不盡 高祖遣上省醫徐奘視約疾, 帝問周捨曰:「何謂 以爲在昔詞人,累千載 四聲? 召巫視 諫 日

遠將軍、南康內史,在部以淸治稱。 僕,復以母 子旋,及約時已歷中書侍郎,永嘉太守,司徒從事中郎,司徒右長史。 憂去官 ,而蔬食辟穀。 服除,猶絕粳粱。 卒官,諡曰恭侯。 爲 子寔嗣 給 事黃門侍郎、中撫軍長史。 **免約喪,爲太子** 出爲招

寧區夏,謀謨帷幄,寔寄良、平。 一時,約高才博洽,名亞遷、董,俱屬興運,蓋一代之英偉焉 陳 吏部尚書姚察曰:昔木德將謝,昏嗣流虐,慄慄點黎,命懸晷漏。 至於范雲、沈約,參預締構,贊成帝業;加雲以機警明贍,濟 高祖義拯横潰,志

校勘記

務益

- 嘗就親人袁照學晝夜不怠 各本作「嘗就親人袁照學書,一夜不怠」,將「晝」字誤分爲「書一」
- 今據册府元龜七八九、八四三改正。 按: 南史云「就其姑夫袁叔明讀毛詩,日誦 九紙」。
- 袁叔 明 卽袁照。 是范雲向袁照非學書法。
- 源, 少機警 有識具 識 具優敏」,見南史陸瓊傳。 「具」各本作「且」,連下「善屬文」爲句,今從百衲本。 「且」與「具」形近而 訛 按:「識具親通」,見孔休
- ≡ 若違其 命 · 南史及册府元龜七五三、八七一、九四○作「若其違命」。
- 29 帶 按 宋、齊 厥 西 令 有闕西縣 「厥西」北監本、 屬司 州 隨郡, 殿本作「關西」, 又有厥西縣, 百衲本、南監本、汲古閣本、 屬荆 州南義陽 郡。 時 蔡興宗爲荆州, 金陵局本作「闕西」。 沈約 爲荆
- 州掾屬 不 應帶 司州縣令。 「闕」當 爲「厥」之譌,更由「闕」譌「關」。 今改正。
- Ħ. 且. 人非金石 「金石」各本作「金玉」。 據南史及册府元龜三四四改。

- ベン 右僕射范雲等二十餘人咸來致拜 「右」各本譌「左」,今改正。 按本書武帝紀及范雲傳, 雲於
- 天監 元年四月遷右僕射,二年五月卒官,故追贈詔稱「故散騎常侍、尚書右僕射、霄城侯雲」。
- 「キン 自中 智以下洎 藝文類聚六四「洎」作「愚」,疑作「愚」是。
- ハベン 終追 組 而 後値 「逌」百衲本作「道」,南監本、北監本、汲古閣本、殿本作「逌」。 百衲本卷末有

會鞏校語云:「『道組』,疑。」

へたし 敖傳嗣 於墝壤 何安身於窮地 「敖」各本作「教」。 按:敖謂孫叔敖, 臨終, 戒其子必無受封善

楚莊王卒如其言而封之。「教」字譌,今改。

天蓍山 韭 「蓍」各本作「著」。 按:嚴可均全梁文二五校云「著當作著」,今據改。

地,以寢丘

地惡,受之可長有。

- [二]實褰期於晚歲非失步於方春「褰期」疑當作「騫期」。
- 貴 則 丙 魏 蕭 曹 丙」各本作「景」。 錢大昕廿二史考異: 景魏謂丙吉魏相 也。 思廉避唐諱

改。」今改回

梁書卷十四

列傳第八

江淹 任昉

宋建平王景素好士,淹隨景素在南兗州。 江淹字文通,濟陽考城人也。 少孤貧好學,沉靖少交遊。 廣陵令郭彥文得罪,辭連淹,繫州獄。 起家南徐州從事,轉奉朝請。 淹獄

中上書曰:

義士伏死而不顧者此也。下官聞仁不可恃,善不可依,始謂徒語,乃今知之。 不廢卷流涕。何者。士有一定之論,女有不易之行。信而見疑,貞而爲戮,是以壯夫 昔者,賤臣叩心,飛霜擊於燕地;庶女告天,振風襲於齊臺。 下官每讀其書,未嘗 伏願大

王暫停左右,少加憐鑒。

列 傳

第 八

江

下官本蓬戶桑樞之民,布衣韋帶之士,退不飾詩書以驚愚,進不買名聲於天下。 淹 二四七

罪得其實,亦當鉗口吞舌,伏匕首以殞身,何以見齊魯奇節之人,燕趙悲歌之士乎。 行歌而忘歸。子陵閉關於東越,仲蔚杜門於西秦,亦良可知也。若使下官事非其虚, 幽 近則伯魚被名於不義。彼之二才,猶或如此,況在下官,焉能自免。昔上將之恥,絳侯 爭分寸之末, 競刀錐之利哉!然下官聞積毁銷金, 積讒糜骨。 古則直生取疑於盜金, 雖乏鄉曲之譽,然嘗聞君子之行矣。其上則隱於簾肆之間,臥於巖石之下,次則結綬 虧名爲辱,虧形次之,是以每一念來,忽若有遺。 所天。不圖小人固陋,坐貽謗缺,迹墜昭憲,身限幽圄。履影弔心,酸鼻痛骨。 金馬之庭,高議雲臺之上;次則虜南越之君,係單于之頸:俱啓丹册,並圖青史。寧當 右無色。 實佩荆卿黃金之賜,竊感豫讓國士之分矣。 王之義,爲門下之賓,備鳴盜淺術之餘,豫三五賤伎之末。 日者,謬得升降承明之闕,出入金華之殿,何嘗不局影凝嚴,側身扃禁者乎? 一獄,名臣之羞,史遷下室,如下官尚何言哉。夫魯連之智,辭祿而不反,接輿之賢, 。身非木石,與獄吏爲伍。此少卿所以仰天搥心,泣盡而繼之以血者也。下官 常欲結纓伏劍,少謝萬一,剖心摩踵,以報 加以涉旬月,迫季秋,天光沉陰,左 大王惠以恩光,眄 以顏色。 下官聞 竊慕大

原,莫不浸仁沐義,照景飲醴。而下官抱痛圜門,含憤獄戶,一物之微,有足悲者。

方今聖曆欽明,天下樂業,青雲浮耀,榮光塞河。西洎臨洮、狄道,北距飛狐、陽

惟 大王 少垂明白,則梧丘之魂,不愧於沉首,鵠亭之鬼,無恨於灰骨。 不任肝膽之切,

敬因執事以聞。此心旣照,死且不朽。

景素 覽 書, 即日出之。 尋舉南徐州秀才,對策上第,轉巴陵王國左常侍

南 右 容 東海 諫 之計,則復 景 曰:「流言納禍,二叔所以同亡,抵局銜怨,七國 郡丞。 素 為荆州 見麋鹿霜露棲於姑蘇之臺矣。」景素 景素 淹從之鎮。 與腹 心日夜謀議,淹知禍 少帝卽位,多失德。 :機將發,乃贈詩十五首以諷焉。 不納。 於馬 景素 俱斃。 及鎭京口 專據上流,咸勸因此舉事 殿下不求宗廟之安,而信 淹 又為鎭軍參軍事 淹每從 領 左

逆,五 奇略, 之虜。 敗 淹 部 也 鄓 對 日 勝 言於選部 懸 驃騎參軍 南 此 也 勝 兵 昔項 東海 謂『在德 也; 數 彼 千 强 太守陸澄 寬容而 、黜爲 志 里 事。 而 銳 不 劉 而 在鼎』。公何疑哉 而 俄而 弱 建安吳興令。 仁恕,二勝 無 器 丁艱,淹自謂 不,一 袁 同 荆 衆 惡相濟, 州 而 敗 刺 曹寡、羽 也; 史沈攸之作亂, 也 _; 有 淹 []五敗也。 、」帝 賢 郡 在 能 威 丞應行郡事,景素用司馬柳 號 縣 日二 畢力,三 而 三年。 令諸侯, 無恩,二敗 聞此言者多矣,試 高帝謂 故雖豺狼十萬, 昇明 勝 卒受 也; 初, 也; 一劍之辱, 淹 民望 齊帝 士卒 日:「天下紛紛若是,君謂 所 解體 輔政,聞其才, 歸, 為 而終爲我獲焉 慮之。」淹 紹 四 世隆。 跨躡 .膀 敗也 也; 四 淹固 日、公 奉 州 搢 召爲 ·天 。」帝笑曰: 求之,景素 紳 子 終 不 尚 而 雄 爲 何 懷,四 '書駕 伐 武 奔 如 叛 北 有

列

傳

第

八

江

淹

五〇

博 史。 王記 君 土 談 出爲 室,三 過矣。」是時軍 少帝 建 帶 武 初 將 東 以本 軍 武 令, 廬 官 書表記,皆使淹具草。 參掌 陵 兼 內 御 史中 史。 ·韶册, 視 丞 並 事 三年 典 國 ·, 還 史。 相 爲驍騎將軍,兼 國建,補 尋遷中書侍 記室參軍 郎。 尚 永 事。 書左丞,尋復 明 初 建元初, 遷) 驍騎 叉 以本官領 爲 將 驃騎 重 國 掌 豫 或 章

庾曇隆、 嚴 州 足以震 於是彈 明 刺 中 史 時 ·丞,君· 一及諸 劉俊、梁州 明帝 中 肅 書令謝朏 百 僚 作 郡二千 今日 。」淹答曰:「今日之事, 相 ,因謂 可 刺 司 史陰 謂 右 徒左長史王績、護軍 淹 近 幷 大縣官 智伯,並 世 曰:「君昔在 獨 步 長, ြဲ 一贓貨 多被劾治,內外 尚書中, 可謂當官而 巨萬,輒 長史庾 非公事 收付 行, 弘 肅 延 遠, 不妄行,在官寬猛 更恐才劣志薄, 然。 尉 治 並 明帝 罪。 以 久 謂淹 臨海 疾不 日一 預 太守 不足以 Щ 能折衷;今爲南司, 宋世 沈 陵 昭 公 仰 以 略 事 稱 來,不 文; 永嘉 明旨 奏前 復有 太守 耳

慧景 爲 宣 舉 城 明 帝 兵 太 圍 守,將軍 卽 「京城、 位, 爲 衣冠 如 車 騎 故。 悉投 臨 在 海 名刺 郡 王 長 四 流 年, 史。 稱 還為黃門侍. 俄除廷 疾 不 往。 尉 卿, 及 郎、 事 加給 領 平,世 步 事 兵校 中,遷冠 服 其 尉, 先 尋 軍 見 爲 長 秘 史, 書監。 加 輔 或 永元 將 軍。 中 出

取 吾空名耳。 東 昏 末,淹 且天時人事,尋當飜覆。 以 秘書監 兼 衞 尉 固 辭 不 孔子曰:『有文事者必有武備 獲 趸, 逐親 職。 謂 人 日 此 非 吾 臨事圖 任, 路 之, 人 所 何 知, 憂 之 正

有。」頃之,又副領軍王瑩。及義師至新林,淹微服來奔,高祖板爲冠軍將軍,祕書監如故, 故。

尋兼司徒左長史。中興元年,遷吏部尚書。二年,轉相國右長史,冠軍將軍 如

貴何時。 本素宦,不求富貴,今之忝竊,遂至於此。平生言止足之事,亦以備矣。人生行樂耳,須富 天監元年,爲散騎常侍、左衞將軍,封臨沮縣開國伯,食邑四百戶。 吾功名旣立,正欲歸身草萊耳。」其年,以疾遷金紫光祿大夫,改封醴陵侯。〔三〕四 淹乃謂子弟曰:「吾

年,卒,時年六十二。高祖爲素服舉哀。賻錢三萬,布五十匹。諡曰憲伯。

淹 少以文章顯,晚節才思微退,時人皆謂之才盡。凡所著述百餘篇,自撰爲前後集,幷

齊史十志,並行於世

子薦襲封嗣,自丹陽尹丞爲長城令,有罪削爵。 普通四年,高祖追念淹功,復封薦吳昌

伯、邑如先。

尺五寸。 寢,夢有彩旗蓋四角懸鈴,自天而墜,其一鈴落入裴懷中,心悸動,旣而有娠,生昉。身長七 任昉字彥昇,樂安博昌人,漢御史大夫敖之後也。父遙,齊中散大夫。 幼而 好學,早知名。 宋丹陽尹劉秉辟爲主簿。 時助年十六,以氣忤康子。 久之, 遙妻裴氏,嘗書

列

傳 第

八

任 眆

爲奉朝請,舉兗州秀才,拜太常博士,遷征北行參軍。

闋,續遭母憂,常廬于墓側,哭泣之地,草爲不生。 獄 參軍事,入爲尚書殿中郎,轉司 永 明 初,衞將軍王儉領丹陽 尹, 、徒竟陵王記室參軍,以父憂去 復引 爲主 簿。 服除,拜太子步兵校尉、管東宮書記 儉 雅欽重昉,以爲當時 職。 性 至孝,居喪盡 無輩。 遷司徒刑

實管王言。 寧容復徼榮於家恥,宴安於國危。驃騎上將之元勳,神州儀刑之列岳,尚書是稱司會,中書 之事,一至於斯,非臣之尤,誰任其咎!將何以肅拜高寢,虔奉武園?悼心失圖,泣血待旦。 徒懷子孟社稷之對,何救昌邑爭臣之譏。四海之議,於何逃責。陵土未乾,訓誓在耳,家國 託,導揚末命。 之明,庸近所蔽,愚夫一至,偶識量已,實不忍自固於綴衣之辰,拒違於玉几之側,遂荷顧 **篤猶子之愛,降家人之慈,世祖武皇帝情等布衣,寄深同氣。 武皇大漸,實奉詔言。** 尙 匡,賞同千室,光宅近甸,奄有全邦,殞越爲期,不敢聞命,亦願曲留降鑒,卽垂聽許。 書事,封宣 初,齊明帝旣廢鬱林王,始爲侍中、中書監、驃騎大將軍、開府儀同三司、揚州刺史、錄 貫。辭一官不減身累,增一職已黷朝經。便當 且虛飾寵章,委成禦侮,臣知不愜,物誰謂宜。 |城郡公,加兵五千,使昉具表草。 雖嗣君棄常,獲罪宣德,王室不造,職臣之由。何者。親則東牟,任惟博陸, 其辭曰:「臣本庸才,智力淺短。 自同體國,不爲飾讓。 但命輕鴻毛,責重山岳,存沒同 太祖高皇帝 至於 雖自見 公功均 鉅

平之怨誠必固,永昌之丹慊獲申,乃知君臣之道,綽有餘裕,苟曰易昭,敢守難奪。」「图一帝惡

其辭斥,甚慍,防由是終建武中,位不過列校。

竄。 沈約一代詞宗,深所推挹。 助雅善屬文,尤長載筆,才思無窮,當世王公表奏, [E] 莫不請焉。 明帝崩,遷中書侍郎。 永元 末,爲司徒右長 防起草即 史。 成,不加點

騎也。 扶轂 迹淪 副四海,含生之倫,庇身有地;況防受教君子,將二十年,咳唾爲恩,眄睞成飾,小 防 忝,千載一逢,再造難答。 雖則殞越,且知非報。」 知死所。 曰:「我登三府,當以卿爲記室。」昉亦戲高祖曰:「我若登三事,當以卿 ,神功無紀,化物何稱。 、驕餌,湯沐具而非弔,大厦構而相驩。 高祖克京邑,霸府初開,以防爲驃騎記室參軍。 至是,故引助符昔言焉。 昔承淸宴,屬有緒言,提挈之旨,形乎善謔,豈謂多幸,斯言不渝。 府朝初建,俊賢驟首,惟此魚目,唐突璵璠。 。昉奉牋曰:「伏承以今月令辰,〔4〕肅膺典策,德顯功高, 明公道冠二儀,勳超邃古,將使伊周奉轡,桓 始高祖 與防遇竟陵王西邸,公 為騎 顧己循涯,寔知塵 雖情謬先覺,而 兵。」謂 人懷 高祖 從容謂 惠,顧 文 光

梁臺建,禪讓文誥,多防所具。 高祖踐阼,拜黃門侍郎,遷吏部郎中,尋以本官掌著作。

Щ 「澤游。 天監 二年,出爲義興太守。 及被代登舟,止有米五斛。 在任淸潔,兒妾食麥而已。 既至無衣,鎮軍將軍沈約遣裙衫迎之。 友人彭城到溉,溉弟洽,從防共 重除吏部郎

列

傳

中,參掌大選,居職不稱。 尋轉御史中丞,祕書監,領前軍將軍。 自齊永元以來、祕閣四部、

篇卷紛雜,助手自讎校,由是篇目定焉。

祠堂於城南。 就路決焉。 六年春,出爲寧朔將軍、新安太守。 爲政淸省,吏民便之。 高祖聞問,卽日舉哀,哭之甚慟。追贈太常卿,諡曰敬子。 視事朞歲,卒於官舍,時年四十九。闔境痛惜,百姓共立 在郡不事邊幅,率然曳杖,徒行邑郭,民通辭訟者,

宅。世或譏其多乞貸,亦隨復散之親故。 目,官所無者,就防家取之。助所著文章數十萬言,盛行於世。 墳籍無所不見,家雖貧,聚書至萬餘卷,率多異本。防卒後,高祖使學士賀縱共沈約勘其書 恒 云亡,儀表長謝。元龜何寄?指南誰託?」其爲士友所推如此。 防不治生產,至乃 居無室 有數十。時人慕之、號曰任君、言如漢之三君也。陳郡殷芸與建安太守到漑書曰:「哲人 防好交結,獎進士友,得其延譽者,率多升擢,故衣冠貴遊,莫不爭與交好,坐上賓客, 防常歎曰:「知我亦以叔則,不知我亦以叔則。」防

初,防立於士大夫間,多所汲引,有善己者則厚其聲名。及卒,諸子皆幼,人罕贍卹之。

平原劉孝標爲著論曰:

「夫草蟲鳴則阜螽躍,雕虎嘯而淸風起。 客問主人曰:「朱公叔絕交論,爲是乎? 爲非乎?」主人曰:「客奚此之問?」客曰: 故絪縕相感,霧涌雲蒸,嚶鳴相召,星流電激。

列傳第八 任昉

開

域

所不 息流 變於垻篪。 是以王陽登則貢公喜,罕生逝而國子悲。 知,心計莫能測。 波之雅引。 **聖賢以此鏤金版而鐫盤盂** 范、張款款於下泉,尹、班陶陶於永夕。 而朱益州汨彝敍,越謨訓,捶直切,絕交遊,視黔首以鷹鸇,媲人 一,書玉牒 且心同琴瑟,言鬱郁於蘭茝,道叶膠 而刻鍾鼎。 駱驛縱橫,煙霏 若匠人輟成風之妙巧,伯 雨散,皆巧曆 漆,志婉 牙

倫

於豺虎。

蒙有猜焉,請辨其惑。」

起, 之微旨。 興,天下蚩蚩,鳥驚雷駭。 不 組 人 輟 握 織仁義,琢磨道德,驩其愉樂,恤其陵夷。 谿谷不 .其音,霜雪零而不渝其色,斯賢達之素交,歷萬古而一遇。 一金鏡,闡風烈,龍驤蠖屈,從道汙隆。 主人听然曰:「客所謂撫絃徽音,未達燥濕變響;張羅沮澤,不覩鵠雁高飛。 若五音之變化,濟九成之妙曲。 能踰其險, 鬼神無以究其變,競毛羽之輕,趨錐 然利 一交同源,派流則異,較言其略,有五 此朱生得玄珠於赤水,謨神睿而爲言。 日月聯璧,歎亹亹之弘致,雲飛電薄,顯 寄通 靈臺之下,遺迹江湖之上,風 刀之末。 逮叔世民訛, 術 於是素交盡,利交 焉 狙 雨 急 至夫 禄華 蓋聖 詐 颰 而

流 聳 其風 若 水 接 其 塵,四 軫。 寵 鈞董、石,權壓梁、竇。 皆願 海 疊其 摩 、燻灼。 頂至踵,隳膽抽腸,約同要離焚妻子,誓徇荆卿湛 靡不 望影星奔,藉響川鶩,鷄 雕 刻百工,鑪 錘萬物,吐 人始唱, 漱 興雲雨,呼 鶴蓋 七族。 成 吸下霜露,九 陰, 高 是日 門 勢 且

交,其流一也。

稻粱,沾玉斝之餘瀝。銜恩遇,進款誠,援青松以示心,指白水而旌信。 有窮巷之賓,繩樞之士,冀宵燭之末光,邀潤屋之微澤,魚貫鳬踊,颯沓鱗萃,分雁鶩之 「富埓陶、白,貲旦程、羅,山擅銅陵,家藏金穴,出平原而聯騎,居里閈而 是日賄交,其 鳴鐘。 則

流二也。

閣,攀其鱗翼,丐其餘論,附騏驥之髦端,軼歸鴻於碣石。是曰談交,其流三也。 飛沉 頻,涕唾流沫,騁黃馬之劇談,縱碧鷄之雄辯,敍溫燠則寒谷成暄,論嚴枯則春叢零葉, ,出其顧指,榮辱定其一言。 於是弱冠王孫,綺紈公子,道不絓於通人,聲未遒於雲 「陸大夫燕喜西都,郭有道人倫東國,公卿貴其籍甚,搢紳羨其登仙。 加以顏頤蹙

於苫蓋。是以伍員濯漑於宰嚭,張王撫翼於陳相。是曰窮交,其流四也。 「陽舒陰慘,生民大情,憂合讙離,品物恒性。故魚以泉涸而呴沫,鳥因將死而悲 同病相憐,綴河上之悲曲;恐懼置懷,昭谷風之盛典。 斯則斷金由於湫隘,刎頸起

若衡 **黻河漢,**[<] 視若遊塵,遇同土梗,莫肯費其半菽,罕有落其一毛。 不能舉,纊不能飛,雖顏、冉龍翰鳳鶵,曾、史蘭熏雪白,舒、向金玉淵海,卿、雲黼 馳騖之俗,澆薄之倫,無不操權衡,秉纖纊。 衡所以揣其輕重,纊所以屬其鼻息。 若衡重錙銖,纊微影

列傳第八 任昉

撇 金膏翠羽將其意,脂韋便辟導其誠。 ,雖共工之蒐慝,灌兜之掩義,南荆之跋扈,東陵之巨猾,皆爲匍匐委蛇,折枝舐痔, 故輪蓋所遊,必非夷、惠之室,苞苴所入,實行脹、

波瀾。[10]此則徇利之情未嘗異,變化之道不得一。 由是觀之,脹、陳所以凶終,肅、 |朱 衰 霍之家。 所以隙末,斷焉可知矣。 相 ·襲,或前榮而後瘁,或始富而終貧,或初存而末亡,或古約而今泰,循環翻覆,迅若 凡 斯五交,義同賈鬻,故桓譚譬之於闤闠,印林回喻之於甘醴。夫寒暑遞進,盛 謀而 後動,芒毫寡忒。 而翟公方規規然勒門以箴客,何所見之晚乎? 是日量交,其流五 也。

以檟楚,朱穆昌言而示絕,有旨哉 釁 也;名陷 然因 整餮,貞介所羞,三釁也。 此五交,是生三釁: 敗德殄義, 古人知三釁之爲梗,懼五交之速尤。 禽獸相若,一釁也;難固易攜,讎訟所聚,二 故王丹威子

其長 滿。 眉 儁 抵掌。 邁 鳴,影組雲臺者摩肩,趨走丹墀者疊迹。 聯 蹈 近 其 世 衡許、郭。<a>只到田文之愛客,同鄭莊之好賢。 雌黃 閫 有樂安任昉,海內髦傑, .'閾,若升闕里之堂;入其奧隅,謂登龍門之坂。 、出其脣吻,朱紫由其月旦。 早縮銀黃,夙招民譽。 於是冠蓋輻湊,衣裳雲合,輜輧 莫不締恩狎,結綢繆,想惠、莊之淸塵,庶 見一 至於 善則盱衡 適文麗藻,方駕曹、王,英特 顧盼 增其倍價,翦拂 扼腕,遇 擊轉,坐客 二才 則揚 使 恒

同羣,皦皦然絕其雰濁,誠恥之也,誠畏之也。」 寧云嶄絕。是以耿介之士,疾其若斯,裂裳裹足,棄之長騖。獨立高山之頂,驩與麋鹿 友,會無羊舌下泣之仁,寧慕郈成分宅之德。嗚呼!世路險巇,一至於此!太行孟門, 之賓。藐爾諸孤,朝不謀夕,流離大海之南,寄命瘴癘之地。自昔把臂之英,金蘭之

防撰雜傳二百四十七卷,地記二百五十二卷,文章三十三卷。 |防第四子東里,頗有父風,官至尙書外兵郎。

壯麗,允值其時。 淹能沉靜,助持內行,並以名位終始,宜哉。 江非先覺,任無舊恩,則上秩 顯贈,亦末由也已。 陳吏部尚書姚察曰:觀夫二漢求賢,率先經術,近世取人,多由文史。二子之作,辭藻

校勘記

而無同惡相濟 「無」各本皆脫,據南史、文選及册府元龜七一七補。

建元初又爲驃騎豫章王記室 「豫章王」各本作「建安王」, 據南史改。 按建安王子貞以建元四

年 ·封,亦 無建元初爲驃騎 事。 豫章王嶷於建元初爲驃騎大將軍。 作「豫章王」是。

改封醴 陵侯 張 森楷梁書校勘記:「上云封臨沮縣伯, 此云爲侯,當是進封, 而云 改封,非也。」

按 侯」疑當作「伯」。 江淹死後,謚曰憲伯,其子薦襲封,後復封薦吳昌伯, 邑如先。 凡此皆可

證 非 改封 醴陵侯, 乃改封醴陵伯。

24 苟曰易昭敢守難奪 「易昭」百衲本、汲古閣本作「易照」、北監本、金陵局本作「易昭」。 張元濟

易與,見史記『韓信之爲人易

與耳』,對下『難

奪』言。」

五 梁書校: 當 世王 公表奏 「王公」二字各本譌倒,據南史及册府元龜 八三九乙正。

昭,疑當作與。

7 オ 始 高 祖 與 昉 遇 竟 陵王西邸 「遇」各本作「過」,據南史 改。

 \sqcap 4 伏承以 今月令辰 各本脱「月」字,據文選及册府元龜 補。

卿雲 黼 黻 河 漢 河 漢」百衲本、南 監 本、 汲古閣 本、 金陵局本作 「江漢」,今從北 監 本、 殿本及

論衡案書篇 ::「漢作書者多, 司 馬子長、 揚子雲, 河漢 也 ; 其 餘涇 渭 也。」此 句蓋: 取

其 義

禁中,

уь Ц 故 桓 譚 譬之於闓 関 「桓譚」疑「譚 拾」之譌。 文選李善注: 桓 一譚集 及新論 並 無 以市 誤爲『桓』, 喻交之文。

列 墠 國 傅 (策 第 八 譚 拾子謂 校 勘 孟 記 嘗君 日 :『富貴者則就之, 貧賤者則去之, 請以市 喻 二五九 。』疑『拾』

迅若波瀾 「若」各本作「彼」,據南史改。

聯衡許郭

通用横。

「衡」各本作「橫」,據南史改。 按:衡橫本通,然縱橫之橫可通用衡,車衡之衡不可

二六〇

梁書卷十五

列傳第九

謝朏弟子覽

邪王景文謂莊曰:「賢子足稱神童,復爲後來特達。」莊笑,因撫朏背曰:「眞吾家千金。」孝武 幼聰慧,莊器之,常置左右。 謝朏字敬沖,陳郡陽夏人也。 年十歲,能屬文。 祖弘微,宋太常卿,父莊,右光祿大夫, 莊遊土山賦詩,使朏命篇,朏攬筆便就。 並有名前代。 琅 朏

帝遊姑孰,勑莊攜朏從駕,詔使爲洞井贊,於坐奏之。 帝曰:「雖小,奇童也。」

袁粲長史。 起家 撫軍法曹行參軍,遷太子舍人,以父憂去職。 **燦性簡峻,罕通賓客,時人方之李膺。** 朏謁旣退、桑曰:「謝令不死。」尋遷給事 服闋,復爲舍人,歷中書郎,衞將軍

齊高帝為驃騎將軍輔政, 選朏爲長史,勑與河南褚炫、濟陽江斅、彭城劉俁俱入侍宋

列傳第九 謝朏

黄門侍郎。

出爲

臨川

內史,以賄見劾,案經袁粲,粲寢之。

齊受禪,朏當日在直,百僚陪位,侍中當解璽,朏佯不知,曰:「有何公事。」傳詔云:「解璽授 使魏早依唐虞故事,亦當三讓彌高。」帝不悅。更引王儉爲左長史,以朏侍中,領祕書監。及 帶南東海太守。 帝 於高帝、請誅朏。 齊王。」朏曰:「齊自應有侍中。」乃引枕臥。傳詔懼,乃使稱疾,欲取兼人。朏曰:「我無疾, 勸魏武卽帝位者,魏武曰:『如有用我,其爲周文王乎!』晉文世事魏氏,將必身終北面,假 何所道。」遂朝服,步出東掖門,乃得車,仍還宅。 ·晉革命時事久兆,石苞不早勸晉文,死方慟哭,方之馮異,非知機也。」朏答曰:「昔魏臣有 ,時號爲天子 ,四友。 高帝方圖禪代,思佐命之臣,以朏有重名,深所欽屬。 帝曰:「殺之則遂成其名,正應容之度外耳。」遂廢于家。 續拜侍中, 並掌中書、散騎二省詔册。 是日遂以王儉爲侍中解璽。 高帝進太尉,又以朏爲長史, 論魏、晉故事 旣而武帝言 因 日:

實避事 太守,加秩中二千石。在郡不省雜事,悉付綱紀,曰:「吾不能作主者吏,但能作太守耳。」視 郡每不治,而常務聚斂,衆頗譏之,亦不屑也。 **廣將軍、吳興太守,受召便述職。 時明帝謀入嗣位,朝之舊臣皆引參謀策。 朏內圖止足,且** 事三年,徵都官尚書、中書令。 隆昌元年,復爲侍中,領新安王師,未拜,固求外出。 仍爲征 永明元年,起家拜通直散騎常侍,累遷侍中,領國子博士。五年,出爲冠軍將軍、義興 弟滿,時爲吏部尚書。 朏至郡,致瀟敷斛酒,遺書曰:「可力飲此,勿豫人事。」朏居

列 傳 第 九 湖 朏

逐斂 西郭 不 侍中、太子 二年,日 旌 國,高謝漢臣,取貴良史。新除侍中、中書令朏,早藉羽儀,夙標清尚,登朝樹績,出守馳聲。 素 概。 |跡康衢,拂衣林沚,抱箕潁之餘芳,甘顦顇而無悶。 建 武 明帝 詔徵朏爲散騎常侍、中書監,胤爲散騎常侍、太常卿,並不屈。 四年,詔徵爲侍中、中書令,遂抗表不應召。 可賜牀帳褥席,俸以卿祿,常出在所。」時國子祭酒廬江何胤亦抗表還會稽。 少傅,胤散騎常侍、太子詹事。 下詔曰:「夫超然榮觀,風流自遠,蹈彼幽人,英華罕值。 時東昏皆下在所,使迫遣之,值義師已近,故並得 遣諸 撫事懷人,載留欽想。宜加優 子還京師, 故長揖楚相 獨與母留,築室郡之 三年,又詔徵朏 見稱南 』禮,用 永元 爲

鼎 誰 亂 簪 胤 不 萌,見 紱 同 其激貪 食, 羽 ' ', 用 未 及高 儀 而 褫 捨惟 庸 廿茲橡 世 祖平京邑,進位相國,表請朏、胤曰:「夫窮則獨善,達以兼濟。 . 胄 功歸 質 而 之如 時,賢哲是蹈。 ,徽猷冠冕,道 風 艾,世 塵 有 握落。 初,知 :道,康俗振民,朝野一致。 襲青紫,而 貽厥之無寄。 且文宗儒肆,互居其長,清規雅裁,兼擅其美。 業德聲,康 前新除侍中、太子少傅朏,前新除散騎常侍、太子詹事、都亭侯 安此 懸 拂衣 濟雅俗。 鶉。 東山 自澆 雖在江 昔居朝列,素無宦情,賓客簡通,公卿罕預, 眇絕 風 肇易, 「海,而勳同魏闕。 塵軌。 用 南 雖 成 解 俗,淳流 組 昌運,實避 今泰運甫開 並 雖出處之道,其揆 素軌, 達照)香時。 深識, 餘 烈頗存 賤貧爲 預覩 家膺

才,共成棟幹。 恥 ;況乎久蘊 瑚璉,暫厭承明,而可得求志海隅,永追松子。 思挹淸源,取鏡止水。愚欲屈居僚首,朝夕諮諏,庶足以翼宣寡薄,式是王 臣負荷殊重,參贊萬機,寔賴羣

請並補臣府軍諮祭酒,朏加後將軍。」並不至。

軒,遣謁者於府拜授,詔停諸公事及朔望朝謁。 臨 小車就席。 爲侍中、司徒、尚書令。 夫,又並不屈。仍遣領軍司馬王果宣旨敦譬。明年六月,朏輕舟出,詣闕自陳。 **三發,輿駕復臨幸,賦詩餞別。王人送迎,相望於道。** 高祖踐阼,徵朏爲侍中、左光祿大夫、〔三]開府儀同三司,胤散騎常侍、特進、右光祿大 明旦,輿駕出幸朏宅,醼語盡歡。 **朏辭脚疾不堪拜謁,乃角巾肩輿,詣雲龍門謝。詔見於華林園,乘** 朏固陳本志,不許,因請自還東迎母,乃許之。 到京師,勑材官起府於舊宅,高祖臨 旣至,詔以

出 . 臨哭,詔給東園秘器,朝服一具,衣一襲,錢十萬,布百匹,蠟百斤。 贈侍中、司徒。 、司徒、衞將軍,並固讓不受。 遣謁者敦授, 乃拜受焉。是冬薨於府, 時年六十六。 三年元會,詔朏乘小輿升殿。 其年,遭母憂,〔三〕尋有詔攝職如故。 後五年,改授中書 朏所著書及文章,並行於世 輿駕

子諼,官至司徒右長史,坐殺牛免官,卒於家。次子篡,頗有文才,仕至晉安太守,卒官。

覽字景滌,朏弟瀟之子也。選尙齊錢唐公主,拜駙馬都尉、秘書郎、太子舍人。高祖爲

大司馬,召補東閤祭酒,遷相國戶曹。天監元年,爲中書侍郎,掌吏部事,頃之卽眞。

俱國華。」以母憂去職。服闋,除中庶子, 又掌吏部郎事,尋除吏部郎, 遷侍中。 **覽**頗樂酒, 之,敕掌東宮管記,遷明威將軍、新安太守。 因醼席與散騎常侍蕭琛辭相詆毀,爲有司所奏。高祖以覽年少不直,出爲中權長史。頃 高祖善之,仍使重作,復合旨。乃賜詩云:「雙文旣後進,二少實名家,豈伊止棟隆,回」信乃 覽爲人美風神,善辭令,高祖深器之。 嘗侍座,受敕與侍中王陳爲詩答贈,其文甚工。

選部,當世以爲榮。 遷司徒諮議參軍、仁威長史、行南徐州事,五兵尚書。尋遷吏部尚書。覽自祖至孫,三世居 九年夏,山賊吳承伯破宣城郡,餘黨散入新安,叛吏鮑敍等與合,攻沒黟、歙諸縣,進兵 覽遣郡丞周興嗣於錦沙立塢拒戰,不敵,遂棄郡奔會稽。臺軍平山寇,覽復還郡,左

覽 爲吳興,號稱名守,覽皆欲過之! 通。四郡境多劫,爲東道患,覽下車肅然,一境淸謐。 未到郡,陸之子弟來迎,覽逐去其船,杖吏爲通者。 十二年春,出爲吳興太守。中書舍人黃睦之家居烏程,子弟專橫,前太守皆折節事之。 一昔覽在新安頗聚斂,至是遂稱廉潔,時人方之王懷祖。 自是睦之家杜門不出,不敢與公私關 初,齊明帝及覽父瀟、東海徐孝嗣,並

列傳第九

謝朏

校勘記

於官、時年三十七。韶贈中書令。子罕、早卒。

難,確然獨善,其疏、蔣之流乎。 覽終能善政,君子韙之。 陳吏部尚書姚察曰:謝朏之於宋代,蓋忠義者歟?當齊建武之世,拂衣止足, 泪高祖龍興,旁求物色,角巾來仕,首陟台司,極出處之致 永元多

校勘記

- 永元二年 「永元」各本作「永明」。按上文已有永明五年、隆昌元年、建武四年,則此不應作永
- 明二年。,南史作「永元」,是,今據改。
- 徵朏爲侍中左光祿大夫 「左」字各本脫,據本書武帝紀及南史補。
- 其年遭母憂 「其年」應承上文指天監三年, 然據本書武帝紀,謝朏以母死去職,在天監四年,
- **豈伊止棟隆** 「止」各本同,惟北監本及南史作「爾」。 張森楷梁書校勘記:「南史止作爾,

作

爾德。」

「其」當是「四」之譌。

八 五 U 不敢與公私關通 「關通」各本譌「門通」,據册府元龜六九六改。

梁書卷十六

列傳第十

王亮 張稷 王瑩

王亮字奉叔, 琅邪臨沂人, 晉丞相導之六世孫也。 祖偃,宋右光祿大夫、開府儀同三

司。父攸,給事黃門侍郞。

丞。 在職淸公有美政。 司馬從事中郎,出爲衡陽太守。 齊竟陵王子良開西邸,延才俊以爲士林館,使工圖 亮以名家子,宋末選尙公主,拜駙馬都尉、 時齊明帝作相,聞 以南土卑濕,辭不之官,遷給事黃門侍郎。 而嘉之,引爲領軍長史,甚見賞納。 秘書郎, 畫其像,亮亦預 累遷桂陽王文學,南郡王友,秘書 焉。 及卽位,累遷太子 遷中 尋拜晉陵 ·書侍郎、大 太守,

建武末,為吏部尚書。 是時尚書右僕射江祏管朝政,多所進拔,爲士子所歸。 亮自以

列

中庶子,尚書吏部郎,詮序著稱,遷侍

中。

常侍、太子右衞率,爲尚書右僕射、中護軍。 更弗 所器 身居 選部 能 重;至是與祏情好攜薄,祏昵之如初。[1] 止 每持異 外若詳審, 議。 始亮未爲吏部郎時,以而帝之內弟,故深友而, 內無明鑒, 其所選用, 及祏遇誅,羣 旣而東昏肆虐,淫刑已逞,亮傾側取容,竟以 拘資次而已, 小放命,凡所除拜,悉由 當世不謂爲能。 而爲之延譽, 頻加通直 內寵 益爲帝 日散騎 亮亮

発戮.

戶。 獨 中 司 而 語 書 推亮爲首。亮出見高祖,高祖曰:「顚而不扶,安用彼相。」而弗之罪也。 監,無尙書令。 長史、撫軍將軍、琅邪淸河二郡太守。 笑自若。 天監二年,轉左光祿大夫,侍中、中軍如故。 義 師至新林,內外百僚皆道迎,其未能拔者,亦間路送誠款,亮獨不造。 數日、詔公卿問訊、亮無疾色、御史中丞樂藹奏大不敬、論棄市刑。 高祖受禪,遷侍中、尚書令、中軍將軍,引參佐命,封豫寧縣公,邑二千 梁臺建,授侍中、尚書令,固讓 元日朝會萬國,亮辭疾不登殿,設饌別省, 。霸府開,以爲大 不拜, 乃爲侍中、 及城内旣定, 詔削爵廢

陛 獻 替 棄之如彼,是愚臣所不知。」高祖變色曰:「卿可更餘言。」縝固執不已,高祖不悅。 。」尚書左丞范縝起曰:「司徒謝朏本有虚名,陛下擢之如此,前尚書令王亮頗有治實, 匹 年夏,高祖讌於華光殿,謂羣臣曰:「朕日昃聽政,思聞得失。卿等可謂多士,宜各盡 御史

中丞任昉因奏曰:

非風 在前 亮 席之望。 議 國 風 聞 沸騰,遂貶裁司徒臣朏,聚舉庶人王亮。 。」輒收縝白從 宴私旣洽,羣臣並已謁退,時詔留侍中臣昂等十人,訪以政道。 聞 尙 ,記言在後,軫早朝之念,深求瘼之情,而[編言不遜,妄陳襃貶,傷濟濟之風,缺側 臣 書 聞 息夫 左丞 不有嚴裁,憲准將頹,縝卽主。 竊尋王有遊豫,親御軒陛,義深推轂,情均湛露。 |臣|范縝,自晉安還,語人云:「我不詣餘人,惟詣|王亮;不餉餘人,惟餉|王 歷詆,漢有正刑,白襃一奏,晉以明罰。 左右萬休到臺辨問,與風聞符同。又今月十日, 臣于時預奉恩留,肩隨並立,耳目所接,差 況乎附下訕上, 毀譽自口者哉。 酒闌宴罷,當扆正立,記事 御餞梁州刺史臣 **縝不答所問,而** 横 珍

之談。 與 勳, 頗 未知去代,弄 疵 同先覺,實 功微 廢,廷辱民宗。 臣 蓮 宜置 .賞厚,出守名邦,入司管轄, 苞箧 案:尚書左丞臣范縝,衣冠緒餘,言行舛駮,誇諧里落,喧詬周行。 之徽纆, 奉 口 一龍顏。 鳴舌,祇足飾非。 自居樞憲, 肅正國典。 而今黨協釁餘,飜爲矛楯, 糾奏寂寞。 臣等參議,請以見事免縝所居官,輒勒外收付廷尉法 乃者,義師近次,縝丁罹艱 問遺, 顧望縱容, 而假稱折轅,衣裙所弊, 人而 無恒, 無至公之議,惡直 林, 成茲姦詖。 曾不呼 門, 一醜正, 讒激 日 者, 墨縗景附, 曲學諛聞, 失所,許 飮 有私託 至策

傳

獄治罪 應諸連逮,委之獄官,以法制從事。凝位應黃紙,臣輒奉白

事逼, 忠,姦賄彰暴,有何可論,妄相談述?具以狀對。」所詰十條,縝答支離而已。原因屏居閉 韶聞 掃,不通賓客。遭母憂,居喪盡禮。 此誰之咎!食亂君之祿,不死於治世。亮協固凶黨,作威作福,靡衣玉食,女樂盈房,勢危 而,爲吏部,末協附梅蟲兒、茹法珍,遂執昏政。 可。 自相吞噬。 璽書詰緘曰(三):「亮少乏才能,無聞時輩,昔經冒入羣英,相與豈薄, 建石首題,「三」啓靡請罪。 股錄其白旗之來, 比屋罹禍,盡家塗炭,四海沸騰,天下橫潰, 晚節諂事江

侍。 其年卒。 八年,詔起爲祕書監,俄加通直散騎常侍,數日遷太常卿。 韶賻錢三萬,布五十匹。四 諡曰煬子。 九年,轉中書監,加散騎常

等具 解 衣 知 而 **張稷字公喬,吳郡人也。 父永,宋右光祿大夫。** 名, 養,永異之。 時稱之曰「「充融卷稷,是爲四張。」起家著作佐郎,不拜。 及母亡,毁瘠過人,杖而 後起。 性疏 稷所生母遘疾歷時,稷始年十一,夜不 率,朗悟有才略,與族兄克、融、倦 頻居父母憂,六載廬

于墓側。

服除,爲驃騎法曹行參軍,遷外兵參軍。

列 傳 第 + 張 稷

度樊城 護軍 號鎭 郡 西 全縣境。 輔 書 犯私 司 國 僕 齊永 俄 馬 將 歷 司 進督 陽 軍 諱, 岸 射 馬,尋爲本州治中。 、寧朔 入爲 沈文季鎮豫州。 明中,爲剡縣令,略不視事,多爲山水遊。 、都督北徐 改永 南譙二郡太守,遷鎭 以 北徐、徐、兗、 將軍 稷 太子洗馬,大司 寧爲 知 州事。 、南平內史。 州諸 長 寧。 魏師 青、冀五 軍事、北徐州刺史。 魏衆 明帝領牧,仍爲別 尋 遷司 馬東曹掾, 退,稷還荆州 魏 稱 南長史、尋陽 一州諸軍 又寇雍州、詔以本號都督荆、雍諸 百萬,圍城累日,時經略 徒司 馬, 建安王友,大司 事, ,就拜黃門侍 加輔 太守、輔國將軍、行江州 將軍 駕。 出次白下,仍遷都督南兗州諸軍 國將 並 時魏寇壽春,以稷爲寧朔 會賊唐萬之作亂,至 如 軍。 故。 馬從事 郎,復爲司馬、新興 處分,文季悉委 及江州 永元末, 中郎。 刺史陳 軍事。 事。 徵爲侍中,宿 武陵王 顯達舉兵反,以本 **及稷焉。** 尋徵還, 爲持節 時雍州刺史曹虎 稷率厲縣人,保 永寧二郡太守。 將 一曅爲 軍、軍主,副 事、南兗州刺 軍退,遷 **護軍,轉** 衛宮城 平

尙

史。 師 至 一,兼 衞尉江 淹 出奔,稷兼衞 尉 ,副王瑩都督城 內諸軍 事。

項伯 德,鼎 遷于 歸漢之日 時 東昏 張齊害東昏于含德殿。 脫,商紂暴虐,鼎遷于周。 淫虐,義師圍城已久,城內思亡而 ,可不勉哉。」乃遣國子博士范雲、舍人裴長穆等使石頭城詣 稷召尚書右僕射王亮等列 今獨 、夫自絕于天,四海已歸聖主,斯 莫有先發。 《坐殿前 北徐 州刺 西鍾 史王 F 珍國就稷謀之, 實微子 謂日 高祖 「昔桀有昏 去殷之時, 高祖以稷 功

侍、都官尚書、揚州大中正,以本職知領軍事。 正,以事免。 禪,以功封江安縣侯,邑一千戶。又爲侍中、國子祭酒,領驍騎將軍,遷護軍將軍、揚州大中 爲侍中、左衞 將軍。 尋爲度支尚書、前將軍、太子右衞率,又以公事免。 俄爲祠部尚書, 高祖總百揆,遷大司馬左司馬。 葬遷領軍將軍,中正、侯如故。 梁臺建,爲散騎常侍、中書令。 轉散騎常 高祖受

將欲 權 爲 石。 頓六里,都督衆軍。 (使持節、散騎常侍、都督青冀二州諸軍事、安北將軍、青冀二州刺史) 如稷宅,以盛暑,留幸僕射省,舊臨幸供具皆酬太官饌直,帝以稷凊貧,手詔不受。 下車存問遺老,引其子孫,置之右職,政稱寬恕。 時魏寇青州,詔假節、行州事。 還,進號鎭北將軍。 會魏軍退,仍出爲散騎常侍、將軍、吳興太守,秩中二千 進號雲麾將軍,徵尚書左僕射。 會魏寇朐山,詔稷 輿駕 出

防, 僚吏頗侵漁之。 初 鬱洲接邊陲,民俗多與魏 州人徐道角等夜襲州城,公害稷,時年六十三。有司 人交市。及朐山叛,或與魏通,既不自安矣,且稷寬弛無 泛奏削 爵土。

徵 道由吳,鄉人候稷者滿水陸。[刊]稷單裝徑還京師,人莫之識,其率素如此。 稷 性 烈亮,善與人交。 歷官無蓄聚,俸祿皆頒之親故,家無餘財。 初 去吳興郡,以僕射

稷 長女楚瑗,適會稽孔氏,無子歸宗。 至稷見害, 女以身蔽刃,先父卒。 稷子嵊,別有

王瑩字奉光,琅邪臨沂人也。父懋,光祿大夫、南鄉僖侯。

瑩選尚宋臨淮公主,拜駙馬都尉,除著作佐郎,累遷太子舍人,撫軍功曹,散騎侍郎,司

徒左西屬。

軍,中書侍郎,大司馬從事中郎,未拜,丁母憂。服闋,爲給事黃門郎,出爲宣城太守,遷爲 領射聲校尉,又爲冠軍將軍、東陽太守。 居郡有惠政,遷吳興太守。 驃騎長史。 **交惡,旣還,問瑩於懋。** 一郡,皆有能名,甚見襃美。還爲太子詹事、中領軍。 齊高帝爲驃騎將軍,引爲從事中郎。 復爲黃門侍郎、司馬、太子中庶子,云仍遷侍中,父憂去職。 懋言之於朝廷,以瑩供養不足,坐失郡廢棄。 頃之,出爲義興太守,代謝超宗。 明帝勤憂庶政,瑩頻處 久之,爲前軍諮議參 服闋,復爲侍中, 超宗去郡,與瑩

湖頭。 與同 永元初,政由羣小,瑩守職而不能有所是非。 夜爲慧景所襲,衆散,瑩赴水,乘榜入樂遊,因得還臺城。 遷尙書左僕射,未拜,會護軍崔慧景自京口奉江夏王入伐,瑩假節,率衆拒慧景於 **瑩從弟亮旣當朝,於瑩素雖不善,時欲引** 慧景敗,還居領軍府。 義

列

傳

第十

戶。 尹。 師至,復假節,都督宮城諸軍事。 號 迎 和帝于江陵。 左中權將軍,給鼓吹一部。 視事三年,遷侍中、光祿大夫,領左衞將軍。 尋遷尙書左僕射,侍中、撫軍如故。 帝至南州,遜位于別宮。 **瑩性淸愼,居官恭恪,高祖** 建康平,高祖爲相國,引瑩爲左長史,加冠軍將軍,奉法駕 頃之,爲護軍將軍,復遷散騎常侍、中軍將軍、丹陽 高祖踐阼,遷侍中、撫軍將軍,封建城縣公, 俄遷尙書令、雲麾將軍,侍中如故。 深重之。 邑千 累進

六鑄而龜六毀,旣成,頸空不實,補而用之。 儀同三司。 天監十五年,遷左光祿大夫、開府儀同三司,丹陽 居職六日,暴疾卒。 尹、侍中如故。 贈侍中、左光祿大夫、開府 **營將拜,印工鑄其印,**

稷因機制變,亦其時也。 其自取廢敗,非不幸也。 居亂世,勢位見矣。其於取捨,何與三仁之異歟。及奉興王,蒙寬政,爲佐 陳吏部尚書姚察曰:孔子稱「殷有三仁,微子去之,箕子爲之奴,比干諫而死。」王亮之 王瑩印章六毀,豈神之害盈乎。 命,固將愧於心。 惜哉!張

- [一] 至是與祏情好攜薄祏昵之如初 各本脫「祏情好攜薄」五字,據南史及册府元龜九四五補。
- **墾書詰槇日** 「詰」各本譌「語」,今改正。 按:下云「所詰十條」,明「語」字是「詰」字之譌。
- 建石首題 建, 建業。石,石頭。南史王亮傳:「乃遣國子博士范雲齎東昏首送石頭,推亮爲

首。」推亮爲首、謂推王亮首先署名於向梁武輸誠之文書上也。 卽此「首題」意。

- 布五十匹 各本作「布五千匹」。據册府元龜三一八、四六一改。
- 五三二 會賊唐萬之作亂 各本原作「唐瑤」、本書呂僧珍傳作「唐瑀」、南史作「唐寓之」、今據南史改。

錢大昕廿二史考異:「梁書作唐瑤,誤。梁宗室傳作唐瑀之,『瑀』誤爲『瑤』也。」按:南齊書武帝

永明四年紀、通鑑武帝永明三年、四年紀俱作「唐寓之」,蕭崇之事附見梁書蕭景傳, 云「永明

中,錢唐唐寓之別衆攻東陽,崇之遇害」。

- てよし **八 公 い** 鄉人候稷者滿水陸 州人徐道角等夜襲州城 各本脫「人」字,據南史及太平御覽六九一補。 「徐道角」,南史同。 魏書世宗紀、游肇傳並作「徐玄明」。
- 復爲黃門侍郎司馬太子中庶子 錢大昕廿二史考異:「司馬者, 驃騎府之司馬也。 蓋蒙上驃騎

長史之文。」

列

